

11926.

Lat. lett.

89


JOHN CARTER BROWN
LIBRARY

Elizabeth Goodale Kenyon
& Robert W. Kenyon


BOOK FUND







CASPARIS BARLÆI
EPISTOLARVM
LIBER.
PARS ALTERA.



AMSTELODAMI
Apud JOANNEM BLAEV.
M. DC. LXVII.

CASTALIS BALLEI
EPISTOLARVM
LIBER
PARS ALTERA.



RPJCB

AMSTELÆDAMI
JOANNEM BLAEU
MDCCLXII

CASPARIS BARLÆI
EPISTOLÆ.

248.

IOANNI OXENSTERN, *Legato.*

PErgo, illustrissime Oxensterni, inter publicas curas nugamenta mea tibi obtrudere, & Poëtam agere. Vbi argumentum grandius nactus fuero, componam vultum & calamum ad gravitatem. Dum alii ad te de Regum Principumque Europæ bellis perscribunt, quis Germaniæ status, quid Gallus, quid Britannus, quid Hispanus moliantur, ego epigrammata tibi mea impartior. Si Neptunus essem, mitterem tridentem, si Pallas hastam, si Mars gladium, si Iupiter fulmen. Iam pauperculus Poëta, mitto pauperculos, rancidos, & macilentos versiculos. Volo te ridere, & si fortè non omnia ex animi voto erunt, cantu meo te recreare absens. Refert Homerus, Achillem ex acie reducem citharam & fides curis suis interposuisse, & animum ægrum sollicitudine aut offensa recreasse. Idem facito. Hæc ut ludicra accipe, sed ab animo profecta in cultum tui prorsus devoto. Nascuntur hæc sub manu, citius fortè, quam scribuntur. Fructus præcoces sunt, ideoque fugaces, quales tamen & magnatum mensæ non fastidiunt. Princeps noster militibus suis veter-

num excutit. Et jam hybernis evocat ignavam Martis sobolem. Vbi belli signum dederit, redibit in præcordia prisca virtus, & Nassovius, uti spes est, aliquid tanta dabit indole dignum. Vale Vir summe, & me ama. 1 Iul. 1634.

249.

ARNOLDO BUCHELIO.

Nondum memoriam mei, & rerum mearum curam deposuisti, humanissime Bucheli. Inter senectutis incommoda, inter studiorum labores, de meis commodis cogitas, & ea, quæ in spe habeo, pergis votis tuis officiisque urgere. Non dubito, quin fatalem casum fortissimi Regis Gustavi mecum doleas. Fortitudini, vigilantia, & rei militaris peritia addiderat summi Numinis reverentiam, quæ hodie in Principum aulis inter postremas virtutes non uno loco habetur. Iam, ut opinor ego, animo præconceperat adire Italiam, & Gothica signa inferre Tiberi. Verum non fuit hoc in fatis. Regum timendorum in proprios greges, Reges in ipsos imperium est Iovis. Germania secum luctari pergit, nec jam vasto corpori facile quies erit. Distractis hic illic exercitibus, dividuntur miseris populis calamitates & mala. Hæret Suecus in Imperii Romani visceribus, nec, uti se res dant, cogitat de abitione. Atque ista quidem bella nostrorum bellorum refrigeria sunt & sufflamen. Mitius nobiscum agitur occupatis alibi Austriacis. Speraveram nobis hac æstate
otia,

otia, sed videmur pertrahi in bellum. Non tamen magnos fore motus arbitror. Hispani tragici sunt actores, amant pulsare orchestram, ut terreant spectatores. Quam malè sibi consulerunt Brabantini Proceres. Serò discunt, nimium deliberando amitti Sagunthum. In Frisia tumultuatur plebes ob exactiones novas. Mirum est iis, quibus bella placent, displicere ad bellum requisita. Hæc vulgi indoles, Reip. salutem verbis amant asserere, non loculis. Nasutiores dicunt, exactionum satis esse, sed malè rem administrari. Etiam hodie dari Verres, qui everrant provincias. Ego querulas istas voces non magni facio, & sto à partibus magnatum, quibus populi commissi & tanta negotia curæ. Desidero te videre, amicissime Bucheli. utinam impetrare à te liceat, uti me invisas. Videbis urbem immensis spaciis diffusam, quæ nondum est εν ἀκμῇ. [*in vigore.*] Si non veneris propediem ad me, veniam ad te. Iam enim in procinctu est ut cum Sole oriatur canicula. Vale Vir prudentissime & dilectissime. Vxorem meis verbis saluta & amicos. Amstel.
3 Iul. 1634.

250.

HENNINGIO ARNISÆO.

FAcit, amplissime Arnisæe, fiducia amicitiae, quam cum amplissimis viris D. Overbeekio & Vicofortio antehac coluisti, uti audeam ad te transmittere hunc chartarum fasciculum.

A 3

culum.

culum. Videbar enim mihi per illorum latus tibi quoque jungi debere, quos ego amicissimos mihi indies experior. Cum nuperrime hic esset magnificus vir Fr. Guntherus Regi vestro à secretis, & sermo incidisset de nuptiis Principis Daniæ, subiit animum epithalamio prosequendi augustos thalamos. Nec sine exemplo hoc feci Claudiani, Ausonii, Statii, qui magnorum Principum nuptiis fausta cecinere. In Romanorum triumphis non tam grata erant Imperatori gratulantium Quiritium voces, quam exterorum populorum applausus. Fortè, dum Dania omnis gaudio dissolvitur, non ingratum fuerit audiri illic Federati hominis & Batavi gratulationem. Si minus digna Regum majestate locutus sum, conatus tamen fui assurgere, & ea in medium proferre, quæ à loco, tempore, familiisque augustissimis non omnino credentur esse aliena. Scis fictiones Poëtarum proprias esse, & per fabulosa eos Deorum & Dearum commentare. Ita profunt. ita delectant. Veterum hæc Philosophia est, & quod non ignoras, primos Sapientiæ natales Poëtis debemus. Vale Vir maxime, & me, quem communia Philosophiæ & Medicinæ studia tibi junxisse debebant, iis accense, quos amas. Præstantissimum D. Guntherum, regni vestri decus & ornamentum, si illic est, meis verbis reverentur saluta. Amstel. 8 Jul. 1634.

251.

CORNELIO VANDER MYLE.

Nobilissime Myli,
 Remitto Pſyllanthropomachiam doctif-
 simi Bonifacii, in qua pugna cum pulice com-
 missus est bellicosissimi Antenor's nepos. Certè
 minus mihi gloriosum videtur, Venetum cum
 pulice pugnare, nisi forte grande sit facinus, cum
 exercitu pulicum conſligere. Herculi negotium
 fuit cum hydris, tauris, leonibus. Perſeus ad-
 verſus maris immanem belluam depugnavit.
 Theſeus adverſus Minotaurum. Sed quis heros
 cum pulice velit congregari. At ſcio hic non ad
 corporis robur, ſed ingenii attendendum eſſe.
 nec videndum, quid pulex poſſit, ſed quid ſcri-
 ptor ingenioſiſſimus. Eleganter pugnam hanc
 exaggerat Poëta, & facete diſertus eſt. Placet
 amoris & pulicis comparatio, aliaque plurima.
 Verum hic illic autor ad quarundam ſyllabarum
 quantitatem non advertit. Notavi ego in mar-
 gine hoc ſigno x. producuntur brevia, vel ab-
 breviantur longa. Tranſivit hac Illuſt. Oxen-
 ſternius die Dominica proximè elapſa Hambur-
 gum petiit, ob viarum incommoda. Nihil à
 Britannis impetrare potuit. Pacis ſe ſtudioſos
 eſſe profitentur, non bellorum. D. Grotius Fran-
 cofurti eſt, & uti videtur, illic ſedem figet. Lau-
 do Cancellarii inſtitutum, quod tanti viri ratio-
 nem habeat. quem jam pridem, magnis rebus
 virtus eruditioque deſtinavere. Vale præſtan-
 tiſſime

tissime vir, & me ama. Vxorem, filium filiasque
saluta. Raptim, 28 Jul. 1634.

252.

E I D E M.

Nobilissime Myli,

Accepi tuo dono Postulatum Osnabur-
gensẽ, sive potius nummum Postulati, quem
tamen non postulaveram. Neque propterea te-
cum super Postulato statui expostulari, ne vi-
dear postulatum & desideratum adeo generi
humano aurum sprevisse. Nec puto aliam ob
causam Postulatos hæc nomina amare, nisi ut
liberalius aurum possideant. Illud tamen asse-
vero, nunquam ex Infantis mei collo suspensum
iri hunc Postulatum. Metuo enim, ne parvulus,
in quem aliquid originalis superbiæ transfudit
Adamus, conspectu tantæ dignitatis nominum,
Postulatus quoque esse cupiat, qui irrita hacte-
nus Vicariatus spe contentus fuit. Mallem ego
vicarii cujusdam effigiem æneam collo circum-
dare, ut discat ab incunabulis mediocri forte
esse contentus. Fuit hic Illustrissimus Dominus
de Beaussi, Regis Galliarum Legatus, quo cum
loquutus fui, quo cum ambulavi, nesciens me
tanti herois latus claudere. Mox apud D. Vi-
cofortium tantorum Deorum epulis accubui.
Veneror in isto viro gravitatem temperatam le-
ni comitate, iudicium acerrimum, utriusque
linguæ Latinæ & Gallicæ facundiam, rerumque
veterum & recentiorum, exterarum & dome-
stica-

sticarum scientiam. Non desinam benè sperare de rerum nostrarum statu, quoad videbo talium virorum consiliis fulciri Federatorum Rempubli- cam. Vbi occasio feret, me meaque officia illi trade, imò totum me mancipi. Scripsi Venerem Cimbricam, sive Epithalamium in Nuptias Principis Daniæ. Mittam propediem. Vale Vir nobilissime, cui pro Postulato non postulato gratias agit uxor, & uxoris maritus. Dominum vander Myle, Filium respondendi reum, filiasque meis verbis saluta. Amstelod. 13 August. 1634.

253.

CONSTANTINO HUGENIO.

Nobilissime Hugeni,
Quæris tuâ epistolâ, quid rerum agam? respondeo, quod amico suo idem quærenti respondit Flaccus: suaviter, ut nunc est inquam, & cupio omnia quæ vis. Ago *ὑπερσύν π, αἰσθη- κέν π*, [*vegetativum aliquid, sensitivum aliquid,*] & *λογικόν π*. [*rationale aliquid.*] ut credas eundem esse operationum & actionum mearum ordinem, qui fuit olim generationis. Arist. lib. 1 de generat. animalium, ait hominem primò vivere vitam plantæ, inde animalis, inde hominis. Ego ne à principiis meis dissideam eodem ordine operor, quo mea me gravida gestavit mater in alvo. *ὑπερσύν π* [*vegetativas*] actiones quoad necesse est sollicite curo, ut sine quibus nec sentire licet, nec ratiocinari. Hinc ad sensus mo-
tusque

tusque operationes accingor. ut visum recreem,
 amo legere in Virgilio inſectivam Didonis in
 Æneam, in Ovidio orationes adverſarias Ajacis
 & Ulyſſis, in Claudiano initium poëmatis in
 Ruſſinum, in Catullo nuptias Pelei & Thetidis,
 in Horatio libellum de arte Poëtica. Auditum
 minus grata jam pridem percepi, nempe Ratisbo-
 nam ceſſiſſe Cæſari, famere exercitum Sueco-
 rum, Saxonem retro pedem movere, Improviſum
 aſpris veluti qui ſentibus anguem Calcat: Ho-
 ſtem Trajecto ad Moſam obſidione minari, ſed
 differre, donec exercitum junxerit Cardinalis
 Infans: nos ſpem in Gallo & copiis Haſſicis po-
 nere: domum Auſtriacam de vindicanda ſua
 incolumitate jam ſeriò cogitare. Illud olſeci,
 pejus his per ætatem menſibus olere aquas Am-
 ſtelodamenſium, quam Neomagenſium, melius
 aulam quam forum piſcarium. Non ita pridem
 ad nuptias vocatus, guſtavi *paſtum ficis jecur an-
 ſeris albi*. Et *leporum avulſos lumbos*, &c. Verum
 cum apponerentur poſt ſecundas menſas Pluto-
 nis iſta ambroſia, quam Caviariam vocant, & fe-
 rentes muria encraſicholi, tetigi ſingula dente
 ſuperbo, hoc eſt ſaſtidienti ſimilis. Quoties affe-
 ctibus obſequor, amo tria in terris, uxorem, li-
 beros, amicos, duo odi maximè, Hiſpanum &
 paupertatem. tunc lætor valde, cum literas tuas
 & elegantiffimos characteres adſpecto. Et ne
 me ζώφυτον [*ſpongiam*] putes, ambulo indies
 gnaviter, ne longiore ſitum putreſcam. Vbi ve-
 rò hominis partibus deſungi libet, hoc ſeriarum
 tem-

tempore non vacat Philosophari, aut in cathedra disquirere,

*Quæ mare compefcant causæ, quid temperet annum,
Stellæ sponte sua, jussæne vagentur & errent,
Empedocles, an Stertini deliret acumen.*

Verum solutus curis istis tria jam ago : garrio
in officinis & urbanus sum : equito cum Satra-
pis Muydensibus & magnificus sum : Empiri-
cum refuto & dogmaticus sum. Scis jam opinor
quid agam, secundum omnes animæ partes &
δωαίρεις. [facultates.] Te duo velim porro age-
re, amare me & scribere sæpius. 24 Aug. 1634.

254.

In liberatum obsidione Trajectum ad
Mosam, per tentatam Bredæ
obsidionem

E P I G R A M M A,
ad quod Epistolæ tres sequentes spectant.

Quod genus hoc belli est? quænam nova nomina
Mavors

Parturit, & titulo deteriore favet?

Cinxerat attonito bellacia moenia Tungro

Cantaber, & portas, effere Mosæ, tuas.

Sederat ad claræ Fredericus moenia Bredæ,

Et patrias armis dux repetebat opes.

Ne male pugnet Iber, Tungros obsessaque linquens

Moenia, vult Bredæ consuluisse suæ.

Ne Batavus male pugnet, amat secedere Bredâ;

Et satis hoc, Mosæ consuluisse, putat.

Hic

Hic speciem fugientis habet, magis ille timentis.

Hic votis abiens excidit, ille tenet.

Exercet Bellona Duces. fugit, horret uterque.

Ille urbi, castris Dux timet ille suis.

Ergo abeunt ambo. Tu dic, Victoria, cujus

Sit, tanto rerum turbine, causa prior?

AVRIACI, respondet. Iber, quam deserit, urbem

Non habet, Auriacus, quam sibi servat, habet.

C. B.

CORNELIO VANDER MYLE.

Nobilissime Myli,

Mitto Tibi accusationem N. Constantini Hugonii super Epigrammate meo, quod nuper scripsi in liberatum obsidione Trajectum. Offendit illum, & Te, ut scribit, quod dicam, *Fugit, horret uterque.* quasi hæc ignominiosa essent Principi. Sed cur non attendit ad alia; quod dicam, non fugisse, sed speciem habuisse fugientis, quod voti sui factus sit compos, quod Bredam concesserit, ut Trajectum obsidione levaret, quod consilio discesserit, & secesserit, postquam Mosæ consulisset, quod urbem isto stratagemate servaverit. Hæc non videtur observasse. Solum invehitur in illud *fugit horret*, quæ dicta sunt ex populi perverso iudicio, & de fuga, quoad speciem, & de fuga utili & salutari. Totum carmen directum est in honorem Principis, adversus malevolorum iudicia. Apologiam meam lege, quam D. Hugenio misi. Æquum enim

enim est ut apud eundem me defendam, apud quem immeritò accusatus sum. Amstel. 1634.

In Barlæi lapsum de fuga Imperatorum utriusque exercitus ad Mylium.

Vnde meus, Myli, malè dormitavit Homerus?
 Vnde, quod hic gestum non fuit, ille refert?
 Trajecti, Bredæ, quod Iber, quod victor Iberi
 Fecerunt, fuga sit? non fuit umbra fugæ.
 Fato, consiliis lentè concessit uterque.
 Mentior. hunc vatem fugit uterque Ducum.

CONSTANTER.

255.

CONSTANTINO HUGENIO.

Non est necesse, ut me pluribus & anxie defendam, nobilissime, dilectissimeque Hugeni. Non conquiram ambages aut Sophismata, quibus me expediam. Pro me loquatur Epigramma meum, & res plana erit. Persto in sententia. Pilatus sum. quod scripsi, scripsi. Non sum lapsus, non cespitavi, sed recto stant carmina talo. Multo minus dormitavi, cum ista scriberem, licet humanum hoc, nec à me alienum esse putem. Scripsi summo manè, post longam dormitionem, quo tempore nihil minus, quam dormire solent homines. Nullam hic agnosco licentiam aut audaciam Poëticam. Nihil (da veniam si mihi Suffenus videar) scripsi consultius deliberatiusque. Volui ego hoc Epigrammate Principem Auriacum tueri adversus non
 solum

solum vulgi & malefanæ plebeculæ, sed & cordatiorum quorundam ignominiosas voces, qui Principis à Breda discessum præcipitem & inconsultam fugam interpretabantur. Fuit hæc vox publica, tum illorum qui patriæ malè volunt, tum illorum ex parte, qui illi benè volunt. Audivimus non semel indignabundi, contradiximus, & pro honore Principis (licet hic defensoribus istis non egeat) stetimus. Fuit insuper animus hoc ipsum Epigrammate testandi, in quo ad hoc unum alludo : Principem Aurium dum malè & falsis nominibus *fugisse*, & *horruisse* dicitur, voti sui compotem factum; Breda decessisse, postquam Mosæ consulisset. Ideoque fugam ita falso dictam, salutarem fuisse & utilissimam, utpote servata jam aut liberata ex parte Trajecto ad Mosam. Quorsum enim illa admirantis verba? *Quod genus hoc belli est?* in quo nempe vulgus Principem fugisse clamat, cum profuerit & vicerit. Quorsum illa? *Quænam nova nomina Mavors Parturit?* nempe, ut fugisse dicatur victor, malè rem gessisse, urbis alibi vel in totum vel ex parte liberator. Hæc enim profectò nova nomina sunt. Quorsum & illud : *Et titulo deteriore favet?* Titulus iste deterior est, quod optimus prudentissimusque Princeps fuga dicatur sibi consuluisse, sub quo tamen titulo deteriore, utpotè falso, nobis favit Mars, liberata nempe urbe ad Mosam obsessâ. In hoc vertitur Epigrammatis cardo, quod Princeps malè audiat, re benè & ex voto gestâ. Non
sunt

sint Vatis verba ex sua sententia loquentis, *Fu-*
git, horret uterque, sed vatis insurgentis in istas
 alumniantium voces, qui fugisse exercitum no-
 rum criminabantur. Vates illum titulum vocat
 eteriorem, miratur Martem talibus appella-
 tionibus occasionem dare. Vbi ex sua sententia
 loquitur, dicit: Auriacum habere *speciem fu-*
gentis: hostem *speciem magis timentis*, At species
 ei opponitur ipsi rei, species fugæ, fugæ. Nec
 efficiendum, discessum abutumque utriusque
 exercitus & hostilis & nostri speciem habuisse
 fugientis & timentis, apud illos, qui hic & alibi
 longius à castris ignari consiliorum Principis
 vivunt, & priusquam de liberatione Trajecti
 quicquam percrebuisse. Rursum, ubi ex sen-
 tentia loquor, dico: Principem *vota sua tenere,*
hostem excidisse, Principem urbem Bredanâ disces-
 sisse, postquam *Mosæ consulisset*; eam deseruisse,
 sed habere aliam, *quam sibi servavit*. Quomodo
 hæc dici à me, ex mea sententia possunt, & simul
 Principem fugisse & horruisse? ἀόυστα [*quæ*
simul consistere non possunt] hæc sunt. Dicis Principes
 utrosque concilio concessisse. Dixi & ego apertissi-
 mè: *Ne malè pugnet Iber, obsessa mœnia linquit, ut*
Bredæ consulat. Ne malè Batavus pugnet, Breda disce-
dit, postquam Mosæ consuluit. Interim hæc subitæ, li-
 cet deliberatæ, abitiones non sine turbine ali-
 quo & motu acciderunt. Dura, inquis, sunt ista
 verba, *fugit horret uterque*. Esto, sint durissima.
 Populi sunt voces, aut fuerunt potius; malevo-
 rum sunt verba, & etiam, qui ignari erant re-
 rum,

rum, quæ istuc apud Bredam, & alibi apud Mo-
sam agebantur. Planum est id quod dico, ex
primo Epigrammatis disticho, cujus mentem
ut suspicor, minus adsecuti estis. Fingite etiam
amici, me dixisse, Principem fugisse, sed fuga
salutari, utili, non fuerit hoc ignominiosum
Principi. Licet vatibus, in Epigrammatibus
potissimum, oppositum ponere in appposito: li-
cet illis dicere, mortem alicujus esse salutarem
lucem obscuram, decus esse dedecus. Qui hæc
non ferunt, totum Martialem expungant necesse
est. Habent Græci & Rhetores schema, quod
ὀξύμωρον vocant, hoc est, acutifatum, quo idem
de seipso negatur, aut prædicatum subjecto re-
pugnat. Hoc prima fronte fatuè dictum puta-
tur, & propius attendenti acutè dictum cogno-
scitur. Hujus generis sunt: avarus non habet
quod habet, nullum in limine limen erat; elo-
quentia obmutuit, deceptaque non capiat, ut
est apud Lucretiam, & apud Plautum, innume-
ri numeri, apud Scaligerum docta ignorantia,
apud Ovidium, & ne sit scelerata facit scelus.
Terentii est, cum ratione insanire, Ejusdem, id
aliquid nihil est, coactus tua voluntate es. Ca-
tullum audi, Non est Dea nescia nostri, Quæ
dulcem curis miscet amaritiem. Hæc si illis li-
cent, cur mihi non liceat in eodem Epigramma-
te scribere, Principem non fugisse, sed voti sui
compotem factum, & tamen fugisse? non fugis-
se, quia abiit postquam servasset, fugisse populi
judicio, aut ad speciem. Cur non liceat dicere,
fugisse,

fugisse, sed ita ut fugiendo profuerit? deseruisse urbem, sed ita ut adhuc habeat, quam servavit: hostem vero nondum habere urbem, quam deseruit. Habent istiusmodi antitheta & ὀξύμωρα [acutifata] emphasin suam & elegantiam, ut si dicam Parthum fugiendo vincere & fugare; Fabium cunctando restituisse rem. *Non fugit me uterque Ducum*, nam jam ante ex litteris tuis ad affinem tuum amplissimum D. de Willem datis intellexeram, Principem eo consilio Bredam concessisse, ut hostem Trajecto avocaret. Quibus lectis fiduciam sumsi scribendi Epigrammatis. Concludo itaque me non esse lapsum, non dormitasse, & Epigramma illud esse meum, cum istis, *Fugit horret uterque*, non præter ista. quod oportuit demonstrasse, ὅπερ ἔδοι δειξαι, inquit Aristoteles.

Vale nobilissime ac candidissime Hugeni, ac sæpius istiusmodi mihi criminationes intende. Scripsisti ista non serio, sed ad vexandum dogmaticum Philosophum, more Scepticorum. Quod si non satisfecero, si perges scribere,

Hunc vatem fugit uterque Ducum,
regeram ego,

Barlæi mentem nescit uterque Ducum.

Adeò me offendisti, ut nova tibi mittam Epigrammata, quæ heri lusi. Amstelod. prid. Cal. Sept. 1634.

Ad Categoriā nobilissimi clarissimi-
que viri, CONSTANTINI HU-
GENII, super ficto lapsu Casparis
Barlæi Responsio.

Humanum est labi, fateor. dum scribimus, eheu,
Sæpè solacismum barbarā Musa facit.

Cespitat omnis homo, mi Constantine. quid? ipsi
Dormitant vatum, nomina magna, Dii.

Non tamen hæc fractis nutant Epigrammat a lumbis,
Non Bavius spreta fallitur arte tuus.

Si fugit Auriacus, postquam servaverat urbem,
Hæc fuga nulla fuga est. cum ratione fugit.

Dicite vos fugisse, mali. non fugit. abiit.

Hæc solum speciem res fugientis habet.

Sic fugere, est vicisse. fugam ne credite cives,

Quæ fuit accepti nuntia certa boni.

Sapienter hoc titulo fugiat, modo sublevet urbes,

Et patriam, populo falsa loquente, juvet.

At vox dura, Fugit. sit vox durissima, voci

Dummodo præduræ sit comes ipsa salus.

Sic fugiens Romana fugat trux agmina Parthus,

Sic Fabius duro nomine victor abit.

Dum populo Romæque suæ Cunctator habetur,

Hos, titulo quamvis deteriore, juvat.

Sic vixisse mori est; sic ægrotasse, salubre

Dicitur, & Veneris dulcis amarities.

Si damnant mea verba Duces, si damnat Iberus,

Auriacus nescit schemata, nescit Iber.

Sed dum Bredâ alius, Mosâ movet alter abitque,

Bellorum melius perdidicere Tropos. C. B.

256. COR-

256.

CORNELIO VANDER MYLE.

Nobilissime Myli,
 Post missam Apologiam meam ad Cen-
 suram Domini de Zulechem, scripsi paucis in
 hæc ferè verba: Cum sciam aulicorum aures
 tenellas esse facileque offendi, & sententiam
 perdere malim, quam amicos, dele illud, *Fu-
 git, horret uterque*, & substitue *discedit uterque*.
 Hoccine est culpam & lapsum fateri? Minimè
 quin potius ista correctione aulicorum infirmi-
 tati, & nimis anxie sollicitudini volui succurrere.
 Ea enim sum morum facilitate, ut versus meos
 depravare malim, quàm iis displicere, quibus
 me plurimum debere fateor. Scio, quo sensu, &
 qua occasione scripserim illud *fugit horret uter-
 que*. Cum enim hic clamitarent benevoli juxta
 ac malevoli nostros fugisse, ego ita fugisse dixi,
 ut servaverint Trajectum, hostem verò fugis-
 se, ut Trajecto potitus non fuerit. Ad Apo-
 logiam meam hæc respondit nobilissimus Hu-
 genius:

C. B. C. H. fugam gratulor.

In populum conjecta fuga est. ignosco poëtæ

Censor, habet speciem, nec fugientis habet.

Aufugit, & credi, fugit, aufugisse. quid ad me?

Dummodo confessi sit fuga facta fugæ.

Quem per istum confesum designet, nescio,
 an se, an me. Quod de vicariatu mones, non

aufim facere ; ne videar summo viro nimis esse familiaris, aut ipsius curæ diffidere. Elogia ista clarissimi Pighetti, acuta sunt & plena genii. Vale Vir præstantissime, & uxorem liberosque à me saluta, & censores rigidissimos D. Hugenum. Amstel. 1634.

257.

NICOLAUS BAUGY.

Illustrissime Domine,

IMemor istius humanitatis, qua me nuper cum hic esses, amplexus es, facile à me impetravi, ut in Gallias abeunti valedicerem. Illud doleo, tum demum me in amicitiam tuam receptum, cum dirimenda illa potius videtur, ob discessum tuum, quam colenda diu. Permitte quæso, ut quò corpore non possum, literis meis versiculisque transvolem. Non alias alas Dii Poëtis concessere. His freti Regum, Principum, Legatorum aulas adimus, frequentamus, licet longe ab iis positi. Nullus me timidius aulas adit, & coram affatur positos in luce viros. Rursus nullus me audacius eosdem alloquitur vel carmine vel epistola. Non erubescunt literæ, nec respondendum ex tempore iis, qui & plus Poëtis sapiunt & regaliter respondent. In talem amicum incidisti, illustrissime Vir, si modo inter sorte dispares amicitiae locus esse possit. Expungam potius amicitiae nomen, & obsequio majore me tibi devinctum dicam, ex quo ad colloquium tuum sermonemque humanissimum

num me admisisti. Faxit Deus, ut sospes incolumisque in Galliis appellas, Regisque Christianissimi commodis, gloriæ tuæ, & amicis diu super sis. Vale Vir summe, & licet non nisi magna pro animi tui magnitudine amare possis & soleas, me tamen inter eos habe, quibus imperare quidvis possis & velis. 6 Sept. 1634.

258.

CONSTANTINO HUGENIO.

ITane vacat, clarissime Hugeni, in castris & Virginum meminisse & Antiquitatum? simul & in juvenulæ puellæ laudes & decrepitæ Romæ obsoleta sacra diffundere spaciosissimum ingenium? modò præstantissimam Virginem Annam Mariam à Schuermans in lucem vocas. Modò detrita & semesa Latii monumenta. Cum de his loqueris, videris mihi cum Evandri matre Carmenta loqui. Cum illam laudas, res tibi est cum virgine divâ. Quæ, quia nil nisi divinum sapit & excellens, hominibus nubere non vult, & Deos amafios expectat. Debebat aut nulli illa, aut docto nubere, ut mixtis magnæ indolis ingeniique principiis, Apollines nobis aut Pallas gignat. Elogia illa, qua supellectilem antiquariam doctissimi Smithii descripsisti, ejus generis est, ut notam *Optimæ* mereatur. Miratus sum, & mirati sunt una mecum, quos ad hæc sacra admisi, te in castris, ubi nulli stant ordine vates,

Nec domino monstrat pergula certa librum,

B 3

Illa

Illa scripsisse, quæ antiquorum nobis ritus ceremoniasque propriis verbis nominibusque exhibent. Opinor te recentem ab eruditis Smithii discursibus venisse, cum illam scriberes. Majestati Romanæ aptissima verba conquisivisti. Et visus mihi fui inter veteres Quirites stare, cum legerem phaleras, phialas, uncias, periammata, cymbala, lapides, genios, annulos, stylos, calices, capedunculos &c. Romana vocabula. Verum cum mentionem facis, *ignis æterni lampadibus contenti*, libet quærere causam æterni ignis. An putas Dæmonum studio & cura conservatam flammulam, & ideo sepulchris inscriptum, *Dis manibus!* an putas flammulam hæsisse in filis incombustibilibus, qualia dicunt fingi ex ligno ἀσβέστω, [*inextinguibili*,] aut lino Carbasio, cujus meminit Paulanias? An probabilius putas, oleum in flammam, flammam in fumum, fumum iterum in olei ejusdem naturam transiisse, & ita veluti per circulum duravisse & flammulam & alimentum? An credis fuga & metu vacui non extinctum ignem! eo quippe extincto necesse fuisset aërem vicinum refrigerari, refrigeratum condensari, condensatum abire in minorem locum. Obstructo autem sepulchro, cum non potuerit subire novus, vacui metus incubuisset naturæ. An putas flammulam illam non semper arsisse, sed aperto sepulchro & subeunte aurula, materiam concepisse flammam, utpote oleosam & aptam accendi? An mecum verisimilius arbitraris, flammam duravisse in lon-

longum tempus, imò in secula aliquot, ob olei viscositatem, lentorem & resistendi vim maximam, non tamen durasse in perpetuum, sed aliquando extinctam fuisse? Fortè hujus rei causam nobis aperiet Smithius, harum rerum scrutator sedulus. Gratulor ego rei antiquariæ, quod te cultorem sui nacta fuerit. Ego in isto sapientiæ genere aliquando insanivi. Habeo nummos aliquot melioris notæ, probos plerosque, quos tibi dono mitto, ut pergas plures petere. Vbi Othonem æneum repereris, crede, te reperisse rem preciosissimam, & maximi valoris. Auro rediment hic aliqui, si probum nactus fueris. Vale. Amstelod. 16 Sept. 1634.

259.

IOHANNI BEVEROVICIO.

Nondum videris termini tui terminum acquisivisse, doctissime Beverovici. Adeò secundum est liti ingenium, ut resecto uno capite, repullulent alia. Plurium de vitæ termino sententias conquiris, nec difficulter invenies, cum & contradicere ament mortales, & suam quisque Helenam Gygi ostentare non erubescat. Rogas, an priori meæ epistolæ quicquam velim addere. Nihil prorsus. Quin potius vellem quædam expungi, ea nempe, quæ morosiores quosdam offenderunt. Non scripsi illam, ut quenquam offenderem. Nec unquam putavi fore, ut essent qui ferre non possent festivum dictum. Scripsi potius, ut recrearem illos, qui-

bus salubre est ridere. Sunt in eruditorum quoque gente πικρόχολοι [*amarâ bile perciti*] & ἀνώχολοι [*redundantes bile*], sunt & atrabilarii, prioribus peiores, quibus joci, risusque aliaque animi corporisque oblectamenta pro remediis præscribi solent. Nonne malum Saulo Regi spiritum discussit cithara? nonne Heraclito supervixit Democritus? ut jam inter modos & media prorogandæ vita non postremum habeam, *Bene agere & letari*. Vti temperamentis differimus homines, ita & studiis & scribendi genere. Placent ejusdem cibi condimenta varia. Alii sedulcare amant, alii aceto & pipere perfundere, ut stupido palato sapiat mordax edulium. Prout arteria aspera, vocis instrumentum, magis minusque talis est, vocem edimus magis minusve raucam, aut canoram. Insipidi sunt, quibus præter fabam, lentem, betam nihil sapit. Nolui in ista epistola in arcana Theologorum inquirere. Sed quia medicus medicò scribebam, hoc volui ostendere, nihil medicorum commodis decedere, sive quis terminum vitæ mobilem, sive immobilem statuat, cum utriusque sententiæ assertores pari studio medicina utantur, tanquam benè diutiusque vivendi medio & conditione. Non rident in re seria, qui verum dicunt sine supercilio. Non vacat semper eructare voces ad fastidium graves. Qui amaris, qui acidis, qui stipticis velci amant, prandeant soli, sibi que servant severas dapes. Conviva illorum esse nolo, nec volo ut sint mei. Sic sine lite epulabi-

abimur, & ego & illi, & discedemus saturi
 absque ullius injuria. Non fuit, nec est mihi
 animus cum quoquam contendere. Offensam
 amicorum deprecari malo, quam exasperare.
 Hostem quisquis me suum putat, fallitur. Mihi
 si quis sit, nolo ut amplius sit, nisi irasci velit
 non irato. Præstat ἀδελφίζειν, [*fraterne agere,*]
 quàm ἰαμβίζειν. [*invektivis uti.*] Hæc scribo pro-
 pterea, quia scio me ob Epistolam illam vapula-
 re apud eos, qui Urbanitatem operibus carnis
 annumerant. Qualis est Ultrajectinus Theolo-
 gus, quem missum facio, quia nolo cum pedi-
 bus certare, ut qui longius absunt à rectæ ratio-
 nis sede. Vale Vir clarissime. 1 Octob. 1634.

260.

NICOLAO CROMHOUT.

M *Agnifce vir,*
 Cogor apud te in gratiam alterius de-
 pudere. quamobrem non ægrè feres, si literis
 meis te interpellem, quas sola mihi extorsit pie-
 tas. Curiam vestram veneror & suspicio, nec
 minus illum, qui illi præsidet. Religio mihi fo-
 ret A. T. affari, nisi ut affarer suaderet religio.
 Si pro vidua me loqui dixerò, veniam debes in-
 tercessori, & dictum satis. Pendet illi lis in foro
 vestro, resque eò, ut ait, perducta est, ut con-
 troversiarum sacculus à, responsionibus, repli-
 cationibus, duplicationibus (quæ voces, ne-
 dum res, supra sapientiam nostram sunt) instru-
 ctus sit. In judicium genibus jam posita causa
 B 5 est,

est, & litis expectatur decisio. Vnum petit. ne longior mora in damno sit. Mavult festinum partum, quam lentum. Ignosce. femina est. mater est. Nescio ego, quid petere debeam. Senatorum prudentissima consilia præcipitari, non est meum urgere. Et tamen illa vellet illos festinare & sententiam dicere. Tu vir maxime, tantum dona favori, quantum dari patitur lex in codice, tantum dona viduæ, & meo erga te amoris, quantum scies ab optimis Curiæ moribus & consuetudine vestra non esse alienum. rogatus rogo. Optaret vidua, se, quam fieri potest citissimè, hac lite expediri, quæ jam in triennium excurrit. Qui humanitatis benevolentiaque officiis tot tibi obstrinxisti Batavos, etiam poëtam rogantem noli adspernari, quem amasti olim, & amas etiam nunc. Vale vir magnifice, & hanc ex humanitatis tuæ fiducia conceptam libertatem, pietatis in viduam & desertam Creüsam titulo excusa. Amstel. 13 Nov. 1634.

261.

CONSTANTINO HUGENIO.

C Ur me iterum, amplissime Hugeni, revocas ad sterile illud & exangue nihil? differis de eo multa *σχεπλικῶς* [*scepticè*] & *σκωπλικῶς*. [*scopticè, id est mordaci stylo*] *σχεπλικῶς*, [*scepticè,*] ubi acutus esse vis, & gratiarum actiones aulicas verè dicis esse nihil. *σκωπλικῶς*, [*mordaci stylo,*] cum rectius facturos putas vi-

ros

s magnos, si se ad aliquid potius applicent, nam ad nihil. Verum impossibile est viros magnos, quos tu Nihilistas vocas, de aliquo philosophari, nisi primum norint, quid sit nihil, cum hoc prius fuerit aliquo, nempe non munus mundo, non princeps principe, non philosophus philosopho, non vicarius vicario. deoque Horatius volens definire virtutem, per negationem eam definit; cum inquit, virtus est vitium fugere. Quasi dicat virtus non est vitium. Qui libellos supplices offerunt Ordini, prius in margine legunt invisum nihil, nec nisi post læsam & victam patientiam nanciscuntur aliquid. Mercatores novi naufragium passi mercaturam à nihilo auspicantur. Advocati reus Curiaë initiati; quoties causa cadunt, itidem à nihilo statum iudiciale ordiuntur. Dido, cum in Æneam invehitur, nonne à nihilo incipit?

Non tibi Diva parens generis, non Dardanus autor.

Quod si hos omnes non puduit à nihilo auspicari suas res, cur ægre fers philosophos nihilistas de nihilo prius differere, dummodo postea ad aliquid se applicent. Est & aliud quod in literis tuis ferre non possum. Illud nempe, quod scribas te me aestimare, ut nihil magis. O nominem nihilo minorem. Nihil magis amatur ab Hugenio, quam Barlæus. Sed quomodo nihil amas, quod amari nequit, cum bonum non sit, quia nihil in se rei habet. Et quomodo nihil magis amas, quam me? ergo flocci me & naviculi non facis, minus sum, quam titivillitium, quam

quam umbra, quam gry, hæc enim aliquid sunt. Itane nihil magis amas me? & tamen literas mihi scribis, versus mittis, amicos concilias? mihi inquam, rei infra nihilum abjectæ, & minus quam nihil amabili? si dicas me in verbis tuis Sophistam agere, regeram ego, hoc esse proprium nihilistarum. Nec mirare me de nihilo sæpius scribere. Quia nihili sum possessor. Nihil aula dat, nihil recipit. Excusas silentium tuum & rariores literas. At ut videas quam sim erga te indulgens, per me licet totum trimestre fileas, dummodo tum scribas mihi obtigisse ab aulæ Principe illud speratum aliquid, quod nosti. Vale. 1. Dec. 1634.

262.

R O C H O H O N E R D O.

Amplissime vir,
Petisti per amplissimum virum D. Petitiū, intimā mihi amicitia à multis retro annis junctum, ut aliquid ad te darem litterarum. Sed quid vis me scribere? de Nihilo? At illud argumentum vexandi me & nigro carbone notandi, elegit sibi nobilissimus Hugenius, cui jam insigni elogio Nihilista vocor. Quam injuriam ægerrimè ferrem, nisi idem epitheton meruisset Marchio d'Aytona, coeptā obsidione frustratus. Et forte etiam nos (non audeo clarius loqui quod sentio) in Galliā propemodum dicemur Nihilistæ. Et si contingat, quod Deus avertat, Suecos remigrare in Gothiam suam,
solatio

ratio erit cum tantis heroibus ignominioso
 nihiliistarum vocabulo vapulare. Vis scribam
 gradibus comparationis? At inglorium est,
 terarum studiosos per eandem lineam con-
 tentionis ferram reciprocare. Vis scribam de
 us Patriæ nostræ & momentis pacis vel
 illi? at illa non magis capio quam sus poë-
 ta. Præsertim hoc tempore, quo Legati eunt
 redeunt, ignaris (ita garrit querulum in su-
 periores vulgus) Dominis. Dicam aliquid de
 Cardinali Infante. Ajunt eum mirâ gravitate &
 percilio partes suas tueri, hoc est, Guberna-
 ris Belgii. Non aperit caput quoties in pu-
 blicum prodit, ac si è Persiâ aut Oriente adven-
 ret. Pauca loquitur, & suaviter, Menelai
 templo, de quo Homerus, *παῦρα μὲν, ἀλλὰ
 ἀλλὰ λιγέως*. [*pauca quidem, sed admodum ar-
 guè.*] Accepi, cum puer essem, à parente
 meo, Carolum V Imperatorum cum Antver-
 piam intraret, perhumaniter salutasse S. P. Q.
 Antverpiensem. Philippum verò Secundum fi-
 lium, nondum tunc ex ephebis egressum, oper-
 o capite adspectasse, hinc Patris, illinc Senatus
 officiosam humanitatem: Atque hoc facto ita
 excanduisse Carolum, ut adspectante Senatu
 & populo alapam impeerit filio, additis his:
Hocce te docuit Vives? Fuerat enim hic, uti
 cis, Philippo morum studiorumque rector. Si
 vera sunt, quæ de Cardinali Infante narrantur,
 videtur *Φιλιππίζειν*. [*Philippizare.*] Sed quid
 enses, vir prudentissime, venisse eum, ut pacem
 adferat,

adferat, an bellum? Ego de pace vel induciis despero. Bellum metuo ut afferat. Est enim purpuratus. Rubet purpura & ad sanguinem proximè accedit. Verum istiusmodi enthymemata vocant Logici εἰρήματα, [*probabilia*,] non τεκμήρια. [*certa indicia*.] Quamobrem vestra iudicia audire malim, qui novistis, quid Rex reginæ in aurem dixerit. Sed qui pessimus est Aulicorum mos, tacent ac silent omnes, tanquam jurati amanuenses, nec quicquam earum rerum quæ publicè geruntur, & ad nos quoque pertinent, impertiunt umbraticis Doctoribus. scribunt multa & acutè de nihilo, de gradibus Comparationis. Sed an res Patriæ surgant cadantve sibi sciunt. Sum in eadem vobiscum navi, viri gravissimi & amicissimi. Si pereundum est, eadem fortè, qua vos evadam tabula, aut mergar vobiscum: si in portu navigamus, solvam vobiscum vota Iovi liberatori. Videte, quam seria jam scribam. Et facio hoc serio, ne putetis nihil mihi esse curæ, præterquam putidum istud & rancidum nihil. Addam aliquid, quod ad Petitionem meam spectat, valde exercet Curia vestra hominis optimi patientiam. Invitus discit virtutem illam ex vobis, quam tantopere laudant tristes Stoici. Vbi litis suæ videbit finem, jubebit, ni fallor, Haggam μέγα κλάειν. [*multum plorare*.] Vale, Vir præstantissime, & doctissime. Nummorum tuorum historia an in spongiam incubuit? Raptim. 12 Decemb. 1634. Amstelod.

263.

GULIELMO STAACKMANS.

Immeritò de cymbula, tempestate, & comitibus sordidis quereris, mi Staackmanne. Cymbula fuit, quæ Cæsarem vexit, cum Dyrachium peteret. Cymbula fuit quæ Athanadium vexit, cum Arianorum fugeret furorem. Perinde est, qua cymbula vehatur sapientis anima, quæ fragiliore vehi non potest, quam qua vehitur semper. Si corpus erigere non potuisti ob depressos cymbulæ foros, erexisti alius mentis vim, qua in istis angustiis exarasti livinissimos versus. Cur quoque iniquam voces tempestatem nescio, quæ cum cymbula sublimius sustulit vatem, & inter turbidos fluctus fivit scribere deductum carmen. Quod si in procelloso mari non defuit Hippocrene, quanta à te expectabimus, ubi ad Castalium fontem, & Aganippen domi confidebis tranquillior. Fecit tempestas, ut collectus in se animus sibi vacaret, quem aëris serenitas & maris malacia foras evocare solent. Fecit illa, ut Alcyonia impetraveris à Musis. Non scripsit elegantiores elegos Ovidius quam inter decumanos fluctus. Testes sunt, *Di maris & cœli, &c.* Et quæ illa tempestas? quæ facetissimis te commentis meditabundum detinuit? & inter pericula passa fuit cogitare de aliorum amplexibus. Si comites habuisti sordidos, Stoicismum cogita. In pediculosa sodalitate illustrior fuit
Virtus

Virtus tua, & patientia repperit, quos ferret, magnanimitas quos non contemneret, comitas cum quibus rideret; eruditio, quos superaret. Quid tu iudices equidem nescio. Ego cymba vehi malim, quam equo. Neque enim illic opus freno, quo compescam recalcitrantem caballum, nec calcaribus, quibus incitem tardigradum. Non illic cervix est, quam frices; non ungula, quam ferro armes; non dorsum, quod ephippio insternas, non venter fœni & avenæ indigus. Sedes inter socios. Loquentes audis homines, semihomines, rudes, sagaces. Sapientiam mixtam dementia. Audis ridicula sæpe. Ventos nullos percipis extra spirantes. Vides comptos, laceros, vigiles. Hic stertentem aliquem, hic dormitantem, hic oscitantem. Breviter humanæ vitæ fabulam & scenam. At hyeme navigasti? quid tum? iussit Patria, cuius commodis invigilasti. Omne tempus opportunum, quod Reipub. impenditur. Pro te inquit apud Claudianum Stilico,

Solstitio Merœn, brumâ calcavimus Istrum.

Hac via ad nominis immortalitatem grassaris, quam homines appetimus avidissimè. Epithalamium quo calamitates amoribus, hosque illis erudite permisceas tradidi novis nuptis. riserunt magis & minus doluerunt. Aulam Principis ex parte conflagrasse jam intellexeram. Benè habet, quod pepercerit flamma iis, è quorum salute salus publica dependet. Ruinosi palatii jactura reparabilis est, at non Principis in Bata-

vorum

orum gloriam & tutelam nati. Vale Vir amplissime. 24 Dec. 1634.

264.

CONSTANTINO HUGENIO.

Nobilissime Hugeni,

Audio ædificare te, hoc est, metuere, ne scrinia tua & loculos aranæ intexant. Si unquam, jam Philosophia tibi opus, non speculativa solum, sed & practica. De speculativa nihil scribam, nam audio te Vitruvium legere, ex quo disces, ubi & quomodo ædificandum, qua partium symmetria & ordine. Ad practicam te attendere nunc cupiam, & virtutes hasce, magnificentiam, mansuetudinem, temperantiam, magnanimitatem, justitiam, constantiam, urbanitatem, prudentiam. Magnificencia opus, ut opus sumptibus, sumptus operi respondeant. Mansuetudine, ne facile irascaris architectis lentis & mendacibus. Temperantia, ne nimis ædifices delicatè. Magnanimitate, ne nimis ambitiosè; justitia, ne umbra proximum aut stillicidiis lædas. Adhæc prudentia, ne ita ædifices, ut junctam viæ domum mordax populus sibilet. Constantia, ne inchoatam domum, molestiarum tœdio, derelinquas, ne verum sit de ea dicere: *pendent opera interrupta, minæque murorum ingentes*, &c. Monitum hoc Hesiodi est in libello, Περί τὸν ἔργων ἢ ἡμερῶν.

[De operibus & diebus.]

Μηδὲ δόμον πτωχῶν ἀνετίξῃς καὶ ἀλείπειν.

Pars II.

C

Neque

[*Neque domum exstruens imperfectam relinquo.*]

Tandem urbanitatis meminisse te velim, cellulamque exstruere, in qua mecum & cum Vander Burchio & Brosterhusio rideas, absque offensa conjugis, & vagientis infantiae. Occurrunt plura. Hoc cavendum ædificantibus, ne domum nimis ament, more illorum, qui domo egrediuntur nunquam vel ingrediuntur, nisi cum attenta frontispicii admiratione, ad quod subsistere solent meditabundi, quasi à lapidibus veniam intrandi impetraturi. Etiam ubi domum propriam inhabitabis, noli semper desiderare domi, ne οἶκος ἐλαῶν [*domus custodiam, id est vitam otiosam*] tibi exprobet Plutarchus. Verum minus ab hoc incommodo tibi metuo, quandiu Principi jus erit te evocandi. Sed cur ædificas, mi Hugeni? an ut habites? non defuit Diogeni, ubi habitaret, nec ædificavit unquam. An ut commodè habites? etiam in conductâ commodè habitabis. An, ne pecuniæ fitu marceant? at accidet idem lapidibus & trabibus. An, ne in jus vocari possis, juxta illud Caji Pandect. lib. 4. tit. de in jus vocando. Plerique putaverunt nullum de domo sua in jus vocari licere. Quibus gemina habet Paulus lib. 1. tit. de regulis juris. Sed illud jus jam exolevit. Et qualem quæso quantamque domum ædificabis? Si magnam, bene mereri voles de gliris & muribus. Si parvam, diceris nimis arcte habitare, & minus esse magnificus: vis ædificare

care firmam & perennem, quæ seculum ferat, eris ludibrio Chinenſibus, qui domos ædificant, quæ ad vitam domino ſufficiunt, de nepotibus ſecuri. Si invalidam, metuo, ne ſumma fiant ima, & tuo damno probes, gravia cadere deorſum. Et ut pergam te exercere, dico impoſſibilem eſſe quam ordiris *οικοδομὴν*. [*ædificationem.*] Aut enim ædificas, quod ædificatum eſt, aut quod non eſt ædificatum. Si prius, actum agis. Si poſterius, ædificas non ens. Nam tale eſt id, quod non eſt ædificatum. Inſuper aut ædificas domum, in loco, in quo eſt, aut in quo non eſt. Si in loco, in quo eſt, cur ædificas? Si in quo non eſt, ædificas domum quæ nullibi eſt. Vnum addam contra Vitruvium: monet ille, parietes debere eſſe perpendiculares, & parallelos. At nego dari poſſe in rerum natura duos parietes perpendiculares & parallelos. Ratio eſt, quia gravia omnia feruntur ad centrum, & in hoc coincidunt. Quamobrem neceſſe eſt partes parietum inferiores ſibi eſſe vicinioreſ, quam ſuperioreſ: alias numquam poſſent in centro concurrere. Vale mi Hugeni, nec poſthac Nihiliftis objice ſuum nihil, ſum enim philoſophatus de domo.
25 Dec. 1634.

265.

HERMANNO CONRINGIO.

Clariffime doctiffimeque vir,
Traditæ mihi ſunt Orationes tuæ, quarum

rum priorem Principis tui Cancellario , posteriore mihi inscribis. Non videmur benè compositi eodem libello , Professor cum Cancellario , doctor umbraticus cum viro illustri & in luce posito. Sed facilè à me facti veniam impetrabis , qui tuo hoc omne in me affectui imputo. Aliàs non soleo tantis viris comes ire à latere. Nec meæ fortis est jungi iis , qui propius terrarum Deos tangunt. Gratias tibi porrò ago & debeo maximas , quod nomen meum Germanis vestris ignotum novo paxillo suspenderis. De rebus Germaniæ quæ scribis, tristissima profectò sunt. Licet illa gravius accendant coram spectantibus, quàm è longinquo audientibus. Vides belli aleam modo huic , modo illi ex voto cadere : aut providentiam potius divinam summa imis mutare. Illud doleo te aliosque pacis studiis devotas animas , inter bellorum illic strepitus & tumultus vivere , & eo loco de Natura verba facere , ubi in segetes & culta novalia , hoc est, naturam ipsum grassatur barbarus miles. Optarem tibi hîc otia. Sed scis apud partium studiosos rigidius expendi fidei , quam scientiæ eruditionisque momenta. Moderationum uti minor numerus , ita auctoritas vix ulla. Nimis candidè & dextrè philosopharis , quàm ut possis hic Lutheranis tuis placere. Non credis , corpus dari sine termino : non credis proprietates separari posse & transfundi : non credis idem corpus posse esse in pluribus locis : non credis penetrationem corporum

porum esse possibilem, aliaque. Hæc bonæ mentis axiomata excutienda tibi forent, si te probare voles Augustanis nostratibus. Nimis te dicerent Aristotelicum, & rationibus è naturæ lumine petitis inhærere. Tecum tamen sentio, & laudibus, quas in Aristotelem copiose & luculenter congefisti, subscribo non invitus. Ita est. Nemo veterum huic par, siue rerum copiam, siue scribendi perspicuitatem & nitorem, siue disputandi vim methodumque spectes. Sceptici nihil dicunt. Academici probabilibus insistant. Platonici magis mira quam vera dicunt. Pythagorici in numeris nugantur. Epicuræi sensum pluri, quam rationem faciunt. Stoici in definiendo nimis sunt audaces, nimis etiam in vita civili graves. Noster Philosophus probabilibus necessaria, feriis jucunda, vera mirabilibus miscet. Rationem adhæc sensui & hunc rationi sociat. Denique dum alii theoretica solum sectantur, aut practica solum, ille θεωρητικός est & ὄντων, & πρακτικός & δεόντων. [*speculator eorum quæ sunt, peractor eorum quæ decent.*] Quæ in Regem Sueciæ scripsisti, hic imprimi posse despero. Superstite Rege & res feliciter gerente, grata erant famelicis Typographis, quotquot in eum scribebantur Encomia. Iam erepto terris invictissimo Heroë, minor est virtutum ejus fama, minor præconum gratia. Vale Vir clarissime & doctissime. Raptim Amstel. 26 Decemb. 1634.

JOACHIMO VICOFORTIO.

FActum consulto, amplissime Vicoforti, quod dies aliquot sine meo alloquio transire passus fuerim. Dum enim iuxta optimo parenti solvis, dum exequias celebras, mortuum effers, dum recens dolor stupet, & solamina vix admittit, distuli ea styli officio designare, quæ in animum tuum simul ac meum (unus namque is ambobus est) effundere decreveram. Amisisti Parentem in terris, quem beatior aliquando salutabis inter superos. Deseruit ille mundum hunc ante te, quem intraverat ante te. ut jam nec de morte, nec de ordine conqueri possis. Satur hujus scenæ ad ea loca ivit, ubi eadem semper erit nec mutabilis cœlestis scenæ facies. ubi opes caducas & fluxas æternitate, vitam fragilem immortalitate, famam denique civis boni divinis honoribus commutavit. Decessit hinc vitæ tuæ olim dux, morum magister, & pietatis inter suos domesticus doctor. ideoque levior tibi debet esse ejus mors, ex cujus vita fructus percepisti uberrimos. Feliciter excessit, te superstite, & fratribus sororibusque tibi junctissimis, in quibus renascitur indies, & eas vidit gliscere virtutes, quibus vivus maxime excelluit. Non jam ægritudo tua franget ægrum, non affliget tua calamitas imbecillem, non dolebit ob dolores tuos, nec mors tua funerabit senem tui amantissimum. Bene secum actum putavit, quod liberos

ros genuerit sibi, Christo, Virtuti. sibi in auxilium & oblectamentum, Christo in peculium, Virtuti in exemplum. Vixit, quantum per humanam imbecillitatem licuit, pie, caste, sobrie. Nec obiit alius, quam vixerat. Quæ monita pater quondam dederat filiis, ea moriens avus dedit nepotibus. usque adeo, ut cum loquentem destitueret fracta naturæ vis, voces tamen extuderit integra, religio. quæ tunc in sene & pro sene verba fecit, nec de rebus terrenis loqui passa fuit cœlo Deoque proximior. quam hæc fuit suavis, quam pretiosa apud Deum, quam plena solatii mors, in qua moriens cum Creatore sermones habuit, & de Redemptore suo loqui maluit, quam de mundi hujus, quæ plurimos occupare solent, quisquiliis. Salutari catastrophe absolvit vitæ hujus Actus. Laudabili Epilogo desinit esse facundus; & postquam de salutis suæ momentis perorasset, desinit in pium *Dixi*. Vix spatii quicquam intercessit inter loquentem & morientem. quia enim ad Deum suum & patrem ibat, cogitationibus se divinis implevit. Ita mori, mi Vicoforti, est in Domino mori. ita mori, est novam ac meliorem vitam ordiri. Sic discedendo accessit ad eum, cujus sanguine est redemptus, spiritu sanctificatus, verbo regeneritus. Non illum avaritia, non ambitio, non sæculi præsentis fastus aut sordida voluptas transvorsum rapuit, licet ad has mundi phaleras generis humani cœca cupiditas obstupescat. Simplicitate, candore, religionis sincero

studio, occupationibusque honestis se totum involvit. Reliqua mortalis ævi studia, impedimenta esse credidit mentis in cœlos profecturæ, & remoras in pietate proficientium. Gratulare potius sic mortuo, ac beatitudinem è longinquo illi apprecare, cujus præludia etiam hîc in ærumnarum valle positus in se sensit. Sunt ea, tranquillitas gaudiumque animi, pax cum Deo, gustus desideriumque futurorum bonorum. Vidimus aliquando sedentem, scribentem, vidimus ambulantiem. Sed dubium, an vivum an mortuum: an hominem, an umbram hominis. Adeo jam tum cum vita & morte pepigisse videbatur, ut in uno corpore, eoque exsucco pene & exanguis, simul habitaret aliquid utriusque. Nunc mortalitate omni exutus, totus vivit ea parte, qua sapuit, qua credidit, qua honestissime vixit. Cur tot laboribus defuncto inideas quietem? cur post emensos humanarum calamitatum fluctus ægre feras in portu cum navigare? & post confectam hominis Christiani militiam rude donari ac bravium reportare? Cur mercari amplius volet, cui lucrum est Christus. Quid mercari pretiosius, quid dignius possit, cui merces est Deus. Cur se bysso amplius & serico implicet, quem jam *bysso* (ut est in Apocalypsi) *investivit Agnus albo* & *mundo*. Cur ulli mercator debere cupiat, cui majus debitum remissum in cœlis. Cur esse creditor, qui nulla bona ultra in spe habet. Nec opus illi adire vendentium & eumentium frequentatam toties Panegyrim, qui
jam

am in beatarum animarum cœtum receptus est, ubi nec venditur, nec emitur, nec debetur, sed ex gratia habetur, quicquid habetur. Ea quoque ætate ereptus est tibi, qua vita nostra morbus esse incipit. Eo senectutis gradu, infra quem plurimi deficimus. Eo morbi genere, qui placidissimus est & doloris expers. Græci *μᾶλ' ἡγνόν* vocant. Latini marcorem. Eo mortis genere, ut nec acerbam illam nec crudam dixeris. Ea denique animi alacritate, qua migrare hinc solent viri, Christiani, ac cives boni. Nec decepit Te natura, nam septuagenarium vidisti. Et si diutius vivere concessisset, miseriarum illa ac malorum potius fuisset prorogatio, quam bonorum. Ille, quia futura fidei oculis prospexit, & æterna animo complexus fuit, vim abstulerat præsentibus malis. Hoc cogitandum, quamdiu habueris, non quamdiu habere potueris. In præteritum tempus potius animum mitte, quam in futurum, & ejus te recollectione recrea, cujus ususfructus tibi fuit charissimus. Ingrati est, beneficii à Deo accepti finem, injuriam interpretari. Habuisse parentes bonos in bonis maximis est. At carere iis nunquam velle, inhumanum est. Non dat illos Deus ad satietatem. dat ad usus & officia necessaria, quibus cum defuncti fuerint, suo illos jure repetit. Nec volo, te non sentire dolorem præsentis funeris; sed non volo, te non ferre. Optimo pietatis & rationis temperamento dolere parentis obitum potes, & eundem dolorem vincere.

cere. Ut vincas, non ad sacra solum, sed & liberalia studia & sapientum præcepta te confer, quibus animum imbuisi jam inde à teneris, quæque ad usum jam referre prudens didicisti. Illa quoties fati necessitatem, morientium exempla, mortalis ævi ærumnas, futuri felicitatem, vitæque bene actæ conscientiam ob oculos ponent, supervacuum pectori tuo vexationem eximent. nec poterunt in tam denso rationum examine obloqui multum degeneres querimonias. Hæc cum perpendes, Vir prudentissime, acquiesces non invitus summi Numinis decreto, quo voluit te lugere patrem, ne ille lugeret Te. Quod superest, dilectissimi patris memoriam venerare, famamque inculpatam in pretio habe. Ita qui vivus liberorum suorum commodis studuit, mortuus adhuc prodesse poterit. Vale integerrime, & pias amici tui voces pro solatii parte habe. reliqua à pietate, eruditione & prudentia tua facile impetrabis. E Museo nostro, Amstelodami, 27 Decembr. 1634.

267.

P E T R O C U N Æ O.

PAulo ante, quam literæ tuæ mihi traderentur, perlatum ad nos fuit tristissimum nuncium de inopinato obitu filioli tui Nicolai. Scripserat ea de re ad filiam vidua D. Arminii. adeò me perculit iste familiæ tuæ casus, ut nihil possit magis. Vxor filiæque in lachrymas profusæ suum ergo vos affectum testatæ fuerunt.

Ego

o sensi mihi mota τὰς πλάχνας ἐλέσς, [*viscera*
sericordiae,] & longè steti citra Stoicismum.
 cinam vel consilio, vel opere possem afflicto
 oi succurrere. Hoc agendum tibi, ut pectus
 unias contemptu humanarum calamitatum.
 linus nocent prævisæ. Et profecto minus di-
 num est viro bono, nimis metuere mortem,
 uos singulos ocyus, segnius manet. Scio faci-
 esse sanis, consilium dare ægrotantibus. Et
 men dandum. Erigit vox amici, & levat ali-
 ua obsessum ægitudine animum. Non con-
 uiram operosè solatia, quibus domi abundas.
 uerulo tuo bene est. Decessit peccandi igna-
 is: & vitæ hujus ærumnis subductus doloris
 bi materiam non præbebit. Satiùs est, ut illum
 ageas tu, quam te ille. Puerperæ ratio haben-
 a, ne se debilem adhuc, & minus integram ni-
 aio dolore affligat. Si è lectulo emerisset, sua-
 lerem, uti secederes Warmondam vel Wasse-
 rariam. Vale, & me porro de familiæ tuæ statu
 tertio fac. Si quod à me præstari tibi voles
 officium, impera. Non deero tibi, cujus pro-
 pensissimum erga me affectum non levibus do-
 cumentis comperi. 29 Dec. 1634.

268.

WINANDO SCHUYLIO.

L Iberasti fidem promissi tui, amplissime
 Schuyli, quanquam nullo meo merito pro-
 vocatus, ad promissa descenderis. Subride-
 bam, cum adspicerem quadratum tuum munus,

ex

ex quo colligebam te memorem esse compotorem. Nec tamen hoc nomine te odi, licet celebri proverbio exosi soleant esse *μνήμores συμποῖται*. [*compotores memores.*] Gratulatus aliquando fui patriæ nostræ ob victam Limburgum. Iam privato nomine mihi gratulor illam provinciam nobis cecidisse, quæ caseos præbet palato meo gratissimos. Sed cupio ex te scire, cur Limburgenses rustici caseos suos quadrata forma induant, nostrates rotunda? Fortè norunt Limburgenses agricolæ rusticum quadratum dici, ob formam proximè ad quadratam accedente, cum aulici, nobiles, & albæ gallinæ filii soleant esse graciles, corpore tereti, minusque saginato. Et ut aliam dem causam, forte legerunt Limburgenses agricolæ apud Aristotelem, viros sapientes & scientiæ cubo subnixos, necnon etiam bonos quadratos, *τετραγώνους*, vocari. Sapientes quidem ob demonstrationis certitudinem. Nam uti rotunda facile moventur loco, ita quadrata mole sua stant. Quam ob causam cubicam figuram scientiæ symbolum esse voluerunt veteres, prout hæc ab opinione & levi credulitate discernitur. Bonos etiam, quia hi tenaces propositi, nec adversis nec secundis, à virtutis studio dimoveri possunt. Nostrates Batavi in rotundam formam cogunt caseos, quia metuunt, ne si quadratos faciant lædantur & impingant anguli. Deinde rotunditas signum est simplicitatis, innocentiae, sinceritatis, quæ virtutes in Hollandis & Zelandis admo-

modum sunt conspicuæ. Quod si Geometria nosset, adderent tertiam causam, nempe hanc, quod figura circularis, ob simplicitatem, capacitatem, sit perfectissima. Si alias causas invenire potes, volupe erit eas intelligere, cum nos erimus. Vide, mi Schuyli, quantus sim artifex, qui pro caseo delicatiore, verba tibi reddo et voces. Isto mercandi genere non facies rem. Sed quid hoc rei est, quod cum mittas unum, non mittas secundum? Vis periculum facere modestiæ meæ? an liberalitatis esse apud me Professor? Si dicam caseum tuum placuisse, videbor expetere secundum. Si negem placuisse, videbor contemnere utrumque. Quare fileo, & tibi ultroneo datori gratias ago maximas, pro caseolo quadrato, de cuius forma tunc ulterius philosophabimur, cum Limburgenses te beatibunt pluribus. Vale. 29 Dec. 1634.

269.

IOANNI NEOPORTIO.

Amplissime vir,
 Gratulor felicibus Scholæ vestræ auspiciis, quæ tanto sunt auspiciatiora, quanto plures orchestra vestra habet actores, & tu illis præfatus es disertius. Accedit, quod urbem vestram tradendis capeffendisque disciplinis natura destinasse videatur, in qua cœli solique clementia leniri possunt studiosorum ingenia & Canonicorum ordines otio abundant. ut nihil dicam de iis, quibus graviora studia diffundi possunt;

possunt, ambulacris, quæ & intra & extra urbem
 habetis amoenissima. Miratus non semel fui hæc
 consilia non citius animis vestris insedissee. Illud in
 oratione asseveras, jam olim hac de re cogitasse
 Adrianum VI Pontificem, qui cum multa alia
 quoque in votis habuerit, nihil eorum præstitit,
 quæ maxime expetiisse visus fuit. Quod de Bi-
 bulo consule, C. Cæsaris collega olim dictum,
 etiam de Adriano verè dixeris, *Illo Pontifice nihil
 gestum esse*. Erat quippe ad omnem ferè rem
 timidior, & popularis auræ captator summus.
 Orationes Professorum vestrorum inaugurales
 tuo dono accepi & legi. Pignus mittis non pri-
 vatæ solum, sed & publicæ, quam inter Scholas
 urbesque socias vigere oportet, amicitia. Eo-
 dem collimamus, ut Reip. Ecclesiæque suppe-
 tant præsidia, quibus illa insistant. quare æquum
 erit animis jungi Professores, quos studiorum
 similitudo cognatioque junxit. De oratione tua
 vix audeo apud te eloqui, quid sentiam. Eam
 laudem meretur, quam merentur optimæ, quæ-
 que Arpinatis ore loquuntur. Professorum ve-
 strorum quisque professioni suæ appositè dixit.
 Ipsorum laboribus benedicat omnis boni largi-
 tor Deus, urbisque vestræ institutum laudabile
 in ejusdem bonum & nominis sui gloriam ver-
 tat. Vale Vir amplissime & doctissime. 30 De-
 cemb. 1634.

270.

P E T R O C U N Æ O.

✓ Ratissimæ mihi fuerunt literæ tuæ priores,
✓ quibus scribis tibi totique familiæ tuæ be-
adhuc esse, nec minus gratæ fuerunt poste-
ores, ejusdem argumenti. Ea est summi numi-
s clementia, ut paterne castiget, & suum in
os rigorem temperet lenitate. Novum annum
tecum ingressus es, illum tibi tuisque felicem
comprecor. Ut autem felix sit, ibo per singulos
mensēs, & quid agendum tibi, quid cavendum
exponam distinctius. Mense Ianuario togam
compone, foco te admove, & victu utere cali-
iore. In Febuario, cum ciconiæ adventant,
corpus leniore pharmaco move. & quia frigi-
ior hic est mensis, perge Vestam habere in pre-
dio. Mense Martio noli quicquam movere, sed
ibo utere puriore & minus excrementitio. Est
nimis mensis verè Martius, & valetudinis ar-
diter maximus. Verum, Candidus auratis aperit
cum cornibus annum Taurus, ab evacuationi-
bus noli abhorrere. tunc enim constricti per
brumam humores calore blando resolvi inci-
piunt, ut utile tunc sit, naturam sequi, quo ver-
git. Percam & rhombum pisces ama. Majo
mense passerem piscem cum acetosa tibi com-
mendo. Adhæc ambulationes & exercitia me-
dica. Neque enim temere huic mensi præesse
dicuntur Gemini, Castor & Pollux, ille equis,
hic lucta nobilis. Exercitiis annumerem etiam
illam

illam ἀσκησιν, [*exercitationem*,] qua Maja genuit Mercurium. Cum Sol Cancrum subit, nec nimis studiis animum, nec corpus forti diæta aut medicina afflige. Est enim tunc debilior natus calor, quam ut magnis laboribus sufficiat. Porcellos marinos & cyprinos latos per hoc tempus noli fastidire. Ad Leonem cum Sole progressus cave à purgationibus & venæ sectionibus. Θωρηξίς, hoc est generosi vini potio salubrior haustu frigida. Si mitylis delectaris, jam iis fruire. Per Augustum, cum Pallas diverticula amat, ad me deflecte. Non leve valetudini momentum adferunt facetiores amici. Et nihil sedentariam vitam amplexis consultius, quam alibi respirare. Ab aromatibus licet abhorreas, noli abhorrere Autumnii frigore primo. quo tempore crudi fructus & putredini obnoxii calefacientibus digeruntur. Vbi octavus imber ingruet, fuge vina seculenta & mustea. His enim de causis fit, ut Autumnus febres & testamenta resignet. November longiusculam amat dormitionem, & cutem adstrictam. December lactucas, portulacam, & frigida quæcumque esse non vult. potius calidis vescitur, rapa cineribus cocta, vel pyris igne tostis. Si vegetus es & athletica valetudine, non dissuadeam dentes subinde exerceri in asello majore. His præceptis si addideris bonæ mentis officia, animum æquum & hilarem, næ felicissimus tibi ibit & desinet hic annus. Quod si festiviora hæc esse putas, quam ut te & me deceant, scito, me inter
Medi-

Medicorum esse filios, qui ita loqui amant. Hujus facultatis non possum prorsus oblivisci, ut quæ mihi apud licitatores Gallos stetit XL coronatis. Vale amicorum integerrime. nec his, quas præscripsi legibus, ita inhære, ut nefas putes ab iis deflectere. Non in oratoria solum, sed & diætetica, laudis est subinde dissimulare artem. 1 Ian. 1635.

271.

CORNELIO VANDER MYLE.

CHartas Venetorum, nobilissime Myli, evolvi. Pyctomachia dictio sic satis mascula est, quamvis argumentum tractet ludicrum & puerile. De reliquis versibus dicam cum Martiali,

Sunt bona, sunt quædam mediocria, &c.

Terruit nos fama secundi incendii, quo chartas omnes, & rationum publicarum libros conflagrasse ferebatur. Verum gratum fuit ex literis tuis intelligere, non esse tam immane damnum, quam ad nos detulit rumor. Non potui non, ut tibi obsequerem, etiam ad secundum incendium alludere. tanta incendii istius fuit vis, ut vates longe positos accenderit, & incalescere alibi fecerit Hippocrenen, frigoribus penè congelatum. In casum ridiculum Principis junioris hoc Epigramma lusi:

Parvule cur diris Princeps erepte favillis

In gelidas prono laberis ore nives?

Cur, quem flamma nequit, lædunt contraria flammis

Frigora, & alterna sors mala sorte premit.

Pars II.

D

Optima

*Optima vaticinor. flammis duratus & undis,
Spartani nobis militis instar eris.*

Filio tuo Adriano Mylio Præfecturam oppidi Guilielmopolis obtigisse gratulor. His honoribus illum jam olim destinavi, ob modestiam & prudentiam. Sollicitudine opus majore quo majus momentum est oneris, quod suscepit. In limitaneis munimentis salus patriæ potissimum vertitur. & stat jam per ipsum ut nos securius dormiamus. Molesta satis, & minus tranquilla est gubernantium fors, & plurimarum tum militum, tum civium quærimoniis & litibus exposita. quæ mala facile affabilitate, æquitate, morumque lenitate superabit. Istud Senecæ cogitabit:

Præstat timeri Cæsarem, at plus diligere.

Fortior custodia est ab amore civium, quam ab armis & metu. Quæ non scribo, ut viro prudentissimo præscribam, sed ut scias, quibus illum virtutibus ornatum esse nos credamus. Vale Vir summe, cum uxore & liberis. 4 Ian. 1635.

272.

P E T R O C. H O O F T.

SVperiore anno mihi leporem, jam perdices mittis, magnifice Hoofdi, ut duplici me tibi munere devincias, uno cælesti, altero terrestri. Verum, qua es prudentia, nec timerè tunc leporem, nec sine ratione nunc perdices mittis. Vis exprimere ingenium meum, quod & lepori multa habet similia, nec minus perdicibus. Non solet lepus annumerari animalibus efferis, & in pugnam

pugnam natis. nec ego me inter Atridas, aut Pelidas, aut Lapithas censerī patiar. Mite mihi ingenium dedit natura; & quod non cum leporibus solum, sed & cum magno Achille habeo commune, sum valde *πόδας ὠκὺς*, [*pedibus celer,*] præsertim cum res in cuspide ferri est posita. Mira est lepori velocitas, ut vel intactæ segetis per summa volare possit culmina, ita præceps nimis mens, ire nequit modesto gradu, sed velut ebria ruit, præsertim cum pangendum est carmen. Ideo informes edo fetus, quia lambere non vacat. Referunt historiæ naturalis scriptores lepores clausis palpebris vigilare. Idem factito ego, cui familiare est, noctu clausis palpebris meditari versus, quos sub stragulis, ne elabantur, annotare soleo in pugillaribus. En leporinum Barlæum. Dicam aliquid de perdicibus. Scribit Plinius tantam in illis esse concipiendi facilitatem, ut vento à maribus delato, quin voce & superno volatu, absque contactu, concipiant. Non minore facilitate concipit Poëta, qui dum cœlum adspicit, & aërem captat meditabundus, divinis furoribus impletur. Ajunt perdicem amare sociam, & raro solam volare. Etiam Poëtæ sodalitates amant. Laudatur docilitas perdicum, nec minus vatum, quibus ingenium est flexile ad omne argumentum. Odoricus de Foro Iulii inquit: In regionibus circa Trapezuntē, quæ Pontus olim dicebantur, vidi hominem ducentem supra 4000 millia perdicum. Is iter faciebat per terram, perdicēs per aërem volabant,

quas ducebat ad quoddam castrum, nomine Tanega, quod à Trapezunte distat trium dierum itinere. Hæ perdices, cum duci ipsarum homini quiescere aut dormire libebat, omnes quiescebant circa eum, tanquam pulli gallinarum. Cum vero sic quiescebat, capiebat de illis, quantum volebat numerum, reliquas ad locum, in quo prius erant, reducebat. Hæc ille. Sed opinor hunc scriptorem cum Ænea per eburneam portam egressum,

Qua falsa ad coelum mittunt insomnia Manes.

Tibi amplissime Hoofdi, duplici nomine gratias debeo, tum quod rarioribus me ferculis recreaveris, tum quod minimè morosam scribendi materiam mihi subministraveris. Vale. 20 Ianuar.

1635.

273.

A D R I A N O P L O O S.

Nobilissime præstantissimeque Ploosi,

Non dubito, quin de incendio Hagienfi primo & secundo certior factus sis. Celebriores quippe solent esse calamitates, quæ celebrioribus accidunt. Et uti in oculos magis incurrunt templa & aulæ Principum, ita quæ secunda vel adversa illis accidunt, clamare solet fama potius, quam narrare. Gaudeo nihil incommodi passos utriusque sexus Principes, & quod charitis publicis accidit damnum non carere solatio. Pervasit ad nos incendii flamma, meque languidum & repentem Poëtam eminus accendit. Et

licet

licet pertinacissimo hoc frigore penè obriguerim, sensi facibus Aulicis me incaluisse, & rediisse ad ingenium. Lusi quædam Epigrammata, flammularum instar nata, quæ Hagam ad amicos misi. Supererat, ne memoriam mei apud te sinerem obliterari. Quæ ut perpetua sit, impertior subinde N. T. otia mea. Etenim, ex quo me favore tuo & benevolentia complecti es dignatus, magnum fuit amicitiaæ tuæ apud me precium. Vbi foco adsidebis, & fessum patriæ curis animum reficere voles, ista lege. Nec ingratum mihi fuerit, si amplissimo viro D. van Hilten blandè aurem vellicaveris, uti memor esse velit litterarum illustrissimi Principis. Non est plenæ felicitatis sperare bona, sed possidere & frui. Vale Vir maxime, & Dominam de Thienhoven, liberosque saluta. 10 Feb. 1635.

274.

P E T R O C U N Æ O.

DOlemus iterum & condolemus durissimæ vestræ sorti, cognatorum charissime, eoque magis, quo tolerabilior fuit mors filioli, quam hæc vagientis infantuli. Vtique iniquius mortales ferimus, quæ hominum culpa obveniunt mala, quam divina voluntate. Pluribus nocuit ista nutricum somnolentia. Ut beatas prædicem matres, quibus proprios lactare infantes concessit benignior natura. Vxorem meam adeò commovit hoc vestrum infortunium, ut totam noctem insomnem traduxerit. Interea, dum Li-

bitina crebrior funestam tibi reddit domum, sapientum præceptis animum roboram, quæ scis. Senecam copiosissimè impartiri Helviæ matri & Polybio. Nascimur, mi cognate, inter mortes & funera. Inter eadem educamur & vivimus. Nec dissimilis est prologo suo vitæ humanæ catastrophe. *Cum judicamur*, inquit gravissimus Apostolus, *à Domino judicamur, ne cum mundo pereamus. Patientiam Iobi*, inquit alter, *audivisti, & finem vidisti.* Illum tibi familiæque tuæ salutarem largiatur clementissimus Deus, vitæ, mortis, rerumque omnium nostrarum sapientissimus arbiter. Totus eram in commendando Ryckwardo, cum commodum supervenerunt literæ tuæ, quæ maximum pondus commendationi nostræ attulerunt. Cogor abrumperé epistolam, cum præ manibus habeam Oratiunculam de Animæ humanæ admirandis. Inter illa admiranda est Animæ immortalitas, à qua solatia maxima petuntur adversus mortem, etiam illorum, quos — *limine primo*

Abstulit atra dies & funere mersit acerbo.

Vale Vir clarissime & amicissime, & uxorem liberosque saluta. 15 Feb. 1635.

275.

CONSTANTINO HUGENIO.

A Liquandiu scripsimus sine epistolis, & obtrusimus alii aliis versus sine præfatione. Nec enim opus erat glossemate super mœcho priore, & posteriore, cui allegoriæ tu primus occa-

occasionem dedisti. Lætor me ex ista arena, subductum, & novis uncis pertractum in flammâs Aulicas. Vbi cum flamma latius grassari potest Poëtarum licentia. Fingunt Poëtæ Vulcanum, (quod nomen clarissimus meus collega arbitratur profectum à Tubalcain, fabro ferrario, cujus mentio fit Genes. 5.) claudicantem, ob hoc, quod inæquales sint ignium flammulæ. An ob hoc elegeris claudicantes jambos, ubi de Vulcano loquendum fuit, nescio. Fabulantur iidem Poëtæ Vulcanum aliquando ambiisse nuptias Minervæ, sed repulsam passum, ob morositatem Iovis. Nunc voti sui compos factus est. Postquam tu Minerva esse voluisti, quæ sapientiæ suæ poëticæ vim illi desponsavit. Sed quam initurus sis gratiam apud Venerem zelotypam tute videris. Scazontes, tum quos mihi, tum quos aulicæ calamitati inscripsisti, exactissimi sunt & graves. Cum illos scriberes calamum, non in Mosam aut Rhenum, sed Aganippen tinxisti. Ego qui te præeuntem sequi soleo, à te, ut vides, claudicare didici; reddo pro scazonte scazontem, licet disparis à tuo genii. Pro libellis Puteanicis gratias tibi ago maximas. Expungam propediem debitum novo nec inamœno discursu de Animæ admirandis. Vale & summos viros D. Mylium, Ploosium, Catsum, Honerdum, Reygersbergium saluta. 20 Feb. 1635.

CORNELIO VANDER MYLE.

Nisi odiosum esset nobilissime Myli, doctos inter se comparare; dicerem Aloysium inter Poëtas Italos excellere, solo Pontifice Urbano excepto. cujus in Lyrico carmine laus maxima est. In Heroïco carmine Claudianum hîc illic imitatur Aloysius, sed non ubique, quod si sæpius hoc faceret, major esset Poëmatum ejus majestas dignitasque. In Epigrammate non est infelix. Maximè placent ea, quæ in Imperatorum vitas scripsit. Ea, quæ in laudem B. Mariæ Virginis lusit, acumine non carent. Sed valde dubito, an sit ex honore venerandæ Virginis, eam non solum cum profanis Reginis comparare, verum etiam cum talibus, quæ metreticulæ fuerunt: qualis fuit Cleopatra, Leda, aut violatæ pudicitia Dido. Die lunæ proximè elapso Orationem habui de Animæ humanæ Admirandis. Mittam, ubi excusa fuerit. Domino Hugenio misi Scazontes in doctissimos ipsius Scazontes, quibus me provocavit. Nescio, an videris. Digni sunt, qui doctorum omnium manibus terantur. Singulas ædium partes suis nominibus indiget, ac si totum Vitruvium imbibisset. Carmen est grave, numerosum, plenum acuminum. Libellum Aloysii ab ipso repete. Misi illi una cum meis literis & versibus. Hic mercatorum animos non leviter erexit victa Pariba cum arcibus. Totam penè Brasiliam tenent nostri.

nostri. An Hispanus dormit, stertit, stupet? Nobis videtur minari proxima æstate. Cardinalis fortè aliquid dabit indole sua & purpura dignum. Interea Scipiones nostri in Brasilia campis spatiantur apertis; & belli hic nostri amaritudinem faccari dulcedine leniunt & edulcant. Vale præstantissime Myli, & uxorem liberosque saluta. 21 Febr. 1635.

277.

IOACHIMO VICOFORTIO.

Capita epistolæ tuæ sunt ostrea, neptes Richelii, mensæ Gallicæ, Dux Aurelianensis & Oxensternius, res diversissimæ, quarum aliæ edunt, aliæ eduntur, aliæ nubunt, aliæ nuptias rescindunt, aliæ Martem iniquam, aliæ Venerem propitiam experiuntur. Eduntur ostrea. Edunt Galli. Nubunt dictæ neptes, nuptam repudiat Aurelianensis, Regis frater; iniquo Marte pugnat Oxensternius, Germanique. Quæ de ostreis scribis, probo. Licet non sim ex eorum numero, qui

— *Circæis nata forent, an,*

Lucrinum ad saxum, Rumpinove edita fundo

Ostrea, callebant primo deprendere morsu.

Alii cruda amant, alii elixa. Ego præfero illa, quæ ad exemplum martyrii Laurentiani, flammis sunt ustulata, & cydoniorum succo adpersa. Mensæ Gallicæ opiparæ fuerunt. Sed nihil ad luxum Tiberii, qui in mensa apposuit tres mullos emptos tribus millibus nummum. Dicere solebat Caligula, aut frugi hominem nasci oportere,

D 5

tere,

tere, aut Cæsarem. Aurelianensis veniam facti sui mereri posset, si qua facilitate causas repudii invenire posset, sponsæ ablata virginitas restitui posset. Oxensternius adversim fortunam lupere animi magnitudine didicit, non elatior esse secundis, nec dejectior adversis. Cedendum subinde bellorum tempestati, donec adspiret Favonius, qui è Gallia flare incipit. De Richelii neptibus nihil dicam, nisi hoc unum, operæ precium fuisse illas elocari, ob dotem. Poterit hanc amare impensius, quæ Pulaurentium amat minus. Leida redii, ivi rediique iratis dīs hominibusque; in itione infesta fuere grando, venti, nives, pluviae. In reditione, incidi in aurigam lentum, morosum, duræ cervicis, penè dixerim non uno dignum suspendio. Post meridiem te invisam, & itineris mei labores enarrabo propius. 1 Mart. 1635.

278.

CONSTANTINO HUGENIO.

Cum Scazontes tuos, in fine polysyllabos, legerem, correptus fui catalepsi sive caticho. Is morbus est, quo æger detentus repentè in eodem permanet habitu, sive stans, sive sedens, sive clausis, sive adaperitis oculis. Non aliter in carmen illud præstantissimum intentus obrigui, ut vix aliò flexerim oculum. Iam verò ab isto me morbo liberaisti acriore literarum tuarum sale. quo negligentiam meam, quam ego morbum interpretor, perfricas. Redii ad me,

me, & discussio rigore crepo perlustrare Epigramma de causis incendii. Allusio ad causas & καὶ σιν [*incendium*] lepida magis est, quàm gravis. Eam alia paranomasia Belgica prosecutus est Mostartius noster. Videbis ex scheda inserta, quanta ingenia in occulto lateant. At nullius epigrammatis argumentum convenientius, quàm illius, quod sic clauditur, *Credita cum nudo Marte cubare Venus*. Illud tuum est. Incidit mihi simile quid. Sed non ausus fui tractare argumentum ob amphiboliam. Suspiciosa valde est aula, & lædi facilis. Quia verò Philosophum laceffis, inveniam nullo labore nodum in scirpo. Dicis Principem non fuisse lapsum in terram, sed terram centri virtute traxisse Principem. Quasi gravia extrinseca moverentur virtute. Natura, inquit Stagirita, est causa & principium motus & quietis, *eius in quo inest*. Si terra traheret, facilior esset tractio corporis minus ponderosi, cum hoc resistere magis valeat, quàm magis ponderosi. At parum moror hanc controversiam; sive enim terra trahat lapidem deorsum, sive gravitas intrinseca trumat, sive aër à tergo trumat, possum ferre dissentientem. Tibi & clarissimo Honerdo si quando obdormiscere vacabit in Parnasso, sumite me socium. Vobis concedam in fastigio altum stertere, contentus recubare in vallibus. Amplissimo Honerdo aliquid reposui, ut provocem egregium Poëtam. Quæ scripsit in incendiarios deos, ipsam Heben, non decrepitam senectam sapiunt. Adeo

ner-

nervosa sunt omnia & succi plena. Non est exhaustus ille senex, sed plenus genii, & vigoris. Eum meis verbis saluta reverenter. 3 Mart. 1635.

279.

E I D E M.

Nobilissime Hugeni,
Dum tu ad leges Salicas regem salire scribis ingeniosissimè, ego pergo ad leges metricas & epicas salire. Tamque inverecunda est mea saltatio, ut insiliam in te, qui prior insiliisti in me. Quam cuperem ad hoc nostrum tripudium pertrahi senem Honerdum. Etenim, ut habet proverbium, salva res est, cum saltat senex. Mitto Orationis meæ exemplar. Titulus speciosus est & grande aliquid promittere videtur. Crede hoc ab arte esse, ut pelliciamus emptorem & lectorem. Tu phaleras istas non curas. Nec scripsi tibi hæc, iisque, qui Epidauriis serpentibus acutius vident: Satis fuerit, tetrica Aristotelis dogmata amœniore phrasi expolivisse. Vale. 4 Mart. 1635.

280.

ARNOLDO BUCHELIO.

Reverende, doctissimeque vir,
Antè dies non ita multos Orationem habui de Animæ humanæ Admirandis. Cum enim mihi explicandi essent libri Aristotelis de Anima, visum fuit auditores præfatiuncula quadam excitare, rei que ipsis commendare dignitatem.
Tu

Tu verò cum inter illos sis, quos ob elegantiora studia amavi & colui jamdudum, benigne excipe hominis tibi addictissimi conatus, & illi perge lingua animoque favere. Illud credas velim, me non solum Orationem tibi mittere de anima, sed una animum meum, tui observantissimum. Sed quantis, mi Bucheli, bellis implicabimur? quantas minas spirat iste Infans Hispanus. Cuperent Batavi esse infantem opere ubi est nōmine. A Gallo nihil est, quod sperem. Moras nectit & tergiversatur. Expectavimus aureos montes. Iam, ut audio, vix sebaceam candelam mittet. Nempe bello Germanico impeditus, non habet quod donet Federatis. Nobis nostro succo vivendum & belligerandum erit. Imò Gallorum tum veteres tum recentes copię nostris stipendiis militabunt. Quare in Achivos denuò cudetur faba. Ego acquiesco & ferre porrò patienter discam, quicquid corrigere est nefas. Vale Vir clarissime. 10 Mart. 1635.

281.

CORNELIO VANDER MYLE.

Nobilissime Myli,

Quem coram vides, Ioachimus Vico-
fortius est, vir eleganter doctus, & humanitatis
omnis ipsissima Idea. Ejus in me officia tot tan-
taque sunt, ut per illum hīc suavissima mihi sit
vita. Tradet tibi Orationis meę aliquot exem-
plaria, quę quibus debeantur ex inscriptione
cognosces. Famuli tui operam imploro, qui eas
de-

deferat. Quod filioli mei obitum doleas, humanum est, quod solatia addas, Christianum. Amicorum est, mutuis & gaudiis & doloribus affici. Quid in ipsius obitum scripserim, legisti. Quæ ad meos versus reposuit Zulechemi Dominus, hæc sunt :

In tumulum filioli C. Barlæi.

D *Isce quid hic jaceat, quanti spes quanta parentis,
Quanti quam felix cura magisterii.*

*Quo præeunte puer, nondum puer, incipit infans,
Infans exanimis verba diserta loqui.*

Meum epitaphium, quo ad Iacobi nomen alludo, tale erat :

Hic situs est fratris non supplantator Iacob.

Planta cui nullam languida pressit humum.

Quod puer hand potuit, jam vult me dicere ; tactum

Hoc etiam superis succubuisse latus.

Detulit ad nos rumor, N. Tuam & D. Catzium Curatores Academiæ Lugduno-Batavæ constitutos. Si verum est, habebunt quod sibi gratulentur Professores. Nominis enim tui, & singularis erga Professores humanitatis fama Academiam istam adeò implevit ; ut Tibi ista dignitas perpetua videri possit. Velim scire quid hujus rei sit. Legatus Suecorum Iohannes Skyte hic est, Gustavi Regis disciplinæ olim præfectus fuit, his officiis emerfit, uti Adrianus Pontifex Caroli V, & olim Aufonius Gratiani Imperatoris gratitudine. Vale Vir maxime, & uxorem Dominam vander Myle, liberosque saluta. Filia,
Domi-

Domina de Loofe , an denuò prolem expectat ?
 Nolo iterum vates esse, ne me fallat mea vaticinatio. Raptim Amstelod. 11 Mart. 1635.

282.

IOACHIMO VICOFORTIO.

Cum manus tuæ lineamenta ex literarum inscriptione agnovissem, dixi mecum: Hic vir hic est. Ita adsolent miseri amantes se imagine absētis amatiæ oblectare , & captare umbras , cum res nequeant. Sed quid audio? vir doctissimus D. Demorius id sibi negotii dari patietur, ut Orationem meam de Animæ admirandis reddat Gallicè? Ergo cognoscent propediem mecum Galli, quanta infideat animæ suæ ignorantia. quæ si in Batavo crassior est, in Germano inflatior, in Hispano sævior, in illis tota flamma est. Cognoscent & hoc: quid Galliam toties colliserit, quid sceptris insidietur, domi, foris. quid illud sit, quod in ipsis loquitur disertissime, pugnet calidissime, salutet officiosissime. Nam & hæc ab anima sunt. Verum , hoc velim in versione observare virum prudentissimum , ne se verbis meis adstringat , sed paraphrasten agat , ubi necesse erit. Nec enim lepores Romanos de verbo ad verbum expressisse conveniet. hoc agendum, ut pro Latinis flosculis reponantur Gallici. E. g. eleganter à Martiali dictum in hominem delicatum :

Aprum amat & mullos & sumen & ostrea.

quod quin propria phrasi & proverbio exprimere queant Galli, non est dubium. Rerum novarum

varum quod scribam non habeo. Solco enim ex tuo fonte bibere, & tuis uberibus lactari. Nunc quia alibi moraris, silent meæ cannæ, uti immotis follibus templorum organa. Vale, & Zulechemi Domino, Braserto, ac Demorio me totum trade. 18 Mart. 1635.

283.

NICOLAUS BAUGY.

DVm Gallorum & Federatorum Legati ultro citroque commeant nobilissime vir, facile literis meis impetrabo saluum conductum. Nec tamen bellorum tibi consilia aperiam, aut Martis, sed studiorum & pacatissimi Apollinis. Ex quo enim cœpisti meas esse aliquid putare nugas, permisi, ut per amplissimos viros D. Brasertum & Vicofortium subinde ad te transvolarent schediasmata mea, aut potius ociosæ mentis modo seriæ, modo ludicræ commentationes. Est hæc humanæ dementiæ non levissima species, ut quæ scripsimus nobis, aliorum quoque juris esse velimus: non satis est ea autoribus probari, aliorum insuper applausus emendicamus miseri. Inflat gallinas hordeum, cicadas ros, chamœleontem aura. literarum studiosis pro hordeo & rore est gloriolæ studium. Hæc aura sublevantur altius, & hoc pabulo pinguescere sibi videntur. In plures hæc scribo, nec excipio meipsum. Nuper de Animæ humanæ admirandis peroravi, non ut tantæ mihi rei scientiam arrogarem, sed ut publicè ignorantiam profiterer meam. Celebris est

est Sorbonensium fama. Verum aut ego vehementer fallor, aut puto totam Sorbonam eadem illa ignorare, circa Animam, ad quæ stupui hætenus. mitto N. T. exemplar, cui comes it cultor virtutum tuarum animus. Defixisti in me nuperis sermonibus humanitatis tuæ memorem aculeum. & ad huc incalesco à benevolentiae radiis, quibus me abiturus fovisti, & irradiasti coram. Gratulor N. T. novæ dignitatis titulos, quos in te contulit Galliarum Majestas. Illam tibi felicem & diuturnam esse velit divina clementia. Hætenus similis fuisti Hamaxobiis, quique in plaustris vagi habitant. Hi sedes mutant pro aëris clementia vel inclementia. Tu Regia voluntate è Gallia Viennam, hinc Bruxellas, hinc Hagam translatus denuo Galliam tenes. Ita movemur omnes & jactamur variè, donec aut hic in terris quies brevior, aut in coelis perpetua concedatur. Tranquillius jam vivis, & domi, & inter tuos & coram Rege, in urbe maxima, ad Sequanæ ripam, quæ omnia & singula felicitatem tuam commendant. Accedat his amicorum peregre habitantium in te propensissimus favor, inter hos novissimus Barlæus, qui tanto te colit impensius, quanto in amicitiam tuam receptus fuit serius. Vale. 24 Mart. 1635.

284.

I A C O B O C A T S I O.

Amplissime Catsi,
 Effluxit hyems, quam mihi terminum
 Pars II. E susce-

suscepti operis præfixisti. Quare memor officii, mitto Hymnum Salomonis epico carmine à me redditum. Maluisssem ipse finxisse novum Poëma, quam sacrum istud reddere. Nec enim aut latius vagari ad singula ausus fui, nec rigidius intra verborum cancellos stare. Si fecissem illud, derogassem non parum majestati sensus allegorici, & recessissem longius à phrasibus sacri textus. Si hoc, minus fuisset grata carminis lectio. Quare moderationem aliquam adhibui. Hoc conatus fui, ut singulorum penè versuum sensum mysticum una indicarem, quò pari passu iret litera & spiritus, allegorica & spiritualis significatio, typus & res typo signata. Mysticum sensum interdum paucis, interdum pluribus verbis expressi, prout se res dabant, quod facile erit observare minus oscitanti lectori. Totus Hymnus plus quam ænigma est, cum ne ipse quidem literalis sensus proprius ubique esse possit. Quas dedi explicationes conjecturæ sunt piæ & probabiles. Nec enim in hymni hujus interpretatione omnes eadem dicunt Theologi. Felicior interpretes est, quisquis ingeniosius conjicit. Tu vir summe mecum judica, tunc Poëtas minus Poëtas esse, cum à diis & deabus & profanorum vatum elegantis abstinere coguntur, aut ea exprimere, quæ religionis Christianæ propria sunt. Aliter Eginardus loquitur: aliter Salomon. aliter Emma, aliter Ecclesia. Vbi sacrorum mystas decet vestitus gravis, absque redimiculis, ita sacra ipsa decet oratio simplex, non

non compta & calamistris ornata. Non eget fuco divina veritas, nec cincinnis voces sacrosanctæ. Si quid mutari velis, asterisco nota, non semel petii operum omnium ἀνάγνωσιν. [*lectionem.*] Vale Vir summe. Prid. Cal. April. 1635.

285.

GODEFRIDO DE HAESTRECHT.

NE me putes vetus Latium odisse, revertar ad Latinum sermonem. quo, ni fallor, me loquentem audire mavis, quam si Belgicissimos tibi meos obtrudam. Fui per dies aliquot Trajecti ad Rhenum, ubi cum te non reperirem, poenituit suscepti itineris. Occurrit mihi Domini de Renesse filius, qui se jam tertia prole gloriabatur patrem. Gratulatus illi fui jus trium liberorum. Si inter Romanos vixisset, patuisset illi locus in theatro. Scribis triumphatum fuisse Antverpiæ super adventu Cardinalis Infantis. non invideo. Sed metuo, ne iste triumphus caro aliquando, stet Antverpianis. Amant Principes mulgere urbes opulentiores, & tensa nummis ubera. Annon satius fuisset dissimulare magnificentiam, ut cum de pecuniarum exactionibus instituuntur querelæ, fidem illæ mereantur majorem. Est iste Antverpianorum mos. Irritant Principum suorum cupiditatem, & postea negant petentibus, aut inviti dant. apud nos omnia ad bellum spectant: magno apparatu futuris castris providetur. In Gallo (loquor humanitus) omne præsidium. Is bello Hispanum peti-

turus dicitur. Sed multis nostratium minus verisimile videtur. Nos promissis erigimur & spe fumus magni. Legati nostri in Poloniam abeunt, ut inducias Suecum inter & Polonum trahant, & in annos plures continuent. De successu nihil ausim temerè statuere. quæ sub deliberationem cadunt, ardua sunt. Polonus Prussiâ volet discedere Suecos. Sed hi illecti portoriis luculentis, difficulter avelli poterunt ab opimo cadavere. Dum litigant Principes, ego, mi Hæstrehti, sum securus. nec enim aut regnis aliorum inhio, nec ut mihi eripiantur, metuo. Philosophiæ studium felicitatis nostræ pars est, opes veritas; honor, honorum contemptus; voluptas, voluptatum usus modicus & honestus: amici præsentès, libelli: absentes Tu cum paucis aliis. Hæc dum mihi supersunt & integra sunt; Persarum vigeo rege beatior. Vbi exercitus suos eduxerint Principes, scribendum erit sæpius, nec deerit argumentum. 9 April. 1635.

286.

CONSTANTINO HUGENIO.

Æ Gerrimè, cum hic esses, à te discessi. Sed evocatus per literas amicorum Ultraje-ctum ob causam matrimonialem, non ausus fui amantibus hoc officium negare. Non patitur amor moram. nisi ratione regatur, furit. Si retardes, instat acrius, donec fruatur. Istic cum essem, incidi fortè in bibliothecam hospitis mei, ibidemque repperi prosodiam hanc, quam nuper

per à me poscebas. Non vidi accuratiorem & pleniorẽ. Autoris nomen est Pantaleo, sed non is, qui cum fratre Leone Sophismatis à compositione & divisione exemplum fuit. Vtuntur illo sæpe dialectici. Quæ de lumine & coloribus scripsit Anonymus iste, placent valde, neque ubique dissentio. Probat aquam esse causam nigredinis, à qua opinione dissentio, licet probabiliter ea de re disputet, cur enim, si aqua est causa nigredinis, umbræ & umbrosa omnia nigricant? nec enim umbræ madent. Lucretii verba sunt,

Nigras discutit umbras.

Cur in cœlo, propè Polum Antarcticum, apparent nubeculæ nigræ? cum tamen humoris omnis expers sit cœlum. Cur Æthiopum vultus magis nigrescunt? cum exsiccentur magis, idque circa extimam cutim, in quam calor agens indefinenter humidum absorbit. Cur, quæ maxime humida sunt, ut lac, vinum, minus nigra sunt; quam illa, quæ minus humida sunt, magisque nigra, ut carbo, pannus, terra? Cur corporum pariter siccorum, & pariter humidorum, sensu indice, alia nigricant, alia albicant, ut creta, & stannum rude. Cur charta candida existens in cineres conversa nigricat, cum exusta minus sit humida ob adulationem? accidit idem linteis exustis. Cur albicant vultus Septentrionalium, nigricant Meridionalium? cum illi humidiorẽ, hi sicciore vivant climate! Cur uvæ intensiore calore nigrescunt, cum calor exsiccet? Hos scrupulos qui exemerit mihi, facile in opposi-

tam me sententiam pertrahet. Aristotelis sententia est, nigredinem esse à dominio terræ & ab opacitate. reliquorum colorum causam esse elementorum pellucetium victoriam. Verum de his coram. Vale. 10 April. 1635.

287.

IOACHIMO VICOFORTIO.

Heri cum Legatis Illustrissimorum Ordinum in Poloniam abituris pransus fui. Quid animi mihi putas esse, qui dignus jam habeor tantorum epulis accumbere Divûm. Fuit mihi de poësi & ἀποσείας [alternis] versibus multus cum clarissimo Honerdo sermo. Nihil minus est, quam morose doctus, aut intempestivè severus. Petiit, ut Epigrammate prosequerer Legatos. Feci hodie summo mane. mittam proxima hebdomade. Iam non est ocium. Exercitus noster ex hybernis undique excitur. Arnheimi prima statio est. at Princeps ex podagricis doloribus decumbit. Cuperet lectica vehi in castra, sed non patitur morbus. Hic ubi desævierit, nulla erit in duce mora. Urget quippe militem præsentia Turni. De Gallorum suppetiis quid dicam. pergo ἐπέχειν. [judicium suspendere.] Spectant undique veluti è specula Principes, quid dignum tanto apparatu simus daturi nos, quid Gallus, quid Infans. Intereà dum nihil agunt illi, sed moliuntur & suo quoque more comuntur,

Amemus, Ioachime, nos, amemus,

Rumo-

*Rumoresque minasque Martiales**Omnes unius æstimemus assis.*

Vale cum uxore & fratribus. 20 April. 1635.

288.

ROCHO HONERDO, *Legato.***I** *Llustrissime Honerde,*

Vides etiam nunc, quanta sit Musarum fiducia. Prosequor vos Epigrammate, quos operosiore Poëmata debuisssem. Nec fortè displicebit consilium. non amas longos λόγος, [*sermones*,] præsertim Poëtarum, quorum voces propupediis esse debent & bellariis. qualia parci-
tas commendat & paucitas. Alloquutus sum vos universim & viritim. Ita ferebat genius, quem ducem sequimur. Vbi in navi composueris res, & jacebis mollius, ista lege. & si vacabit, acutiore stylo confige semianimes foetus, quos heri non parturii, sed fudi potius inter amicorum interpellationes, & domesticos strepitus. Vale Vir summe & me ama,

*Sic te Diva potens Cypri,**Sic fratres Helenæ lucida sidera**Ventorumque regat pater. Nosti cetera.*

25 April. 1635.

289.

I A C O B O C A T S I O.

Nondum gratulatus A. T. fui Curatoris dignitatem. Facio id jam nunc, magisque gratulor Academiæ & studiosæ juventuti, cui

E 4

Ephorus

Ephorus moderatorque datus, non amore solum studiorum, sed & doctrinæ facundiæque laude clarus. Iam eris Professoribus Leydensibus, quod Paulinus fuit Aufonio, Mecœnas & Pollio Virgilio. Pallas femina est, innupta est, ideoque tutore eget. Nec reperiatur aptiorem, quam Catsum, Apollinem suum. Cogitatis jam de vocando Professore Philosophiæ, qui Burgersdicio succedat. Scio plures nobilissimis Curatoribus commendari, nec ullius laudibus virtutibusque derogo. Est inter illos Franciscus Duban Gallus, cujus rationem haberi, meo quidem indicio, ex re fuerit Academiæ. Ea est ætate, qua se à contemptu vindicare potest. Ea morum modestia & facilitate, ut collegam ὁμιλητικὸν [*affabilem*] habituri sint Professores reliqui. Ea verò eruditione, ut cum Philosophia eloquentiæ & humaniorum artium studia junxerit. Philosophiæ partes varias variis in Galliæ locis professus fuit. Et potuisset istuc emergere, viamque sibi ad meliorem fortunam sternere, nisi displicuisset & ordo, quem elegerat, & quæ olim erranti placuit, religio. De fide & vitæ ratione propius judicent Theologi Leydenfes, inter quos vivit. Omnino arbitror illum Academiæ vestræ honori & decori fore. Quare, si quod est erectæ eruditionis apud vos precium, est autem maximum, audito hunc loquentem publicè, & qua valeat dicendo & docendo gratia experiamini. Eligi in Professore non cupit, priusquam se vobis, Professoribus, & studiosis probaverit.

baverit. Vale Vir amplissime, & in Patriæ ac
Academiæ decus commodumque diu vive.
2 Maji, 1635.

290.

IOACHIMO VICOFORTIO.

I Am scire desidero, amicissime virorum, num
incolumis in Stormariam appuleris, una cum
Creusa, affine tuo & cognata Marietta. Singu-
lis pene diebus Solem respexi & Æolum. Illum
non semel increpui, quod te iter faciente caput
nubibus aliquoties, abdiderit, neque lumen suum
cum virtutum tuarum lumine confuderit. Nec
minus succensui Æolo, quod spiraret acrius, &
uxoris tuæ flammeolum discusserit importu-
nius. Etiam illud me male habuit, quod infe-
stam subinde senseris pluviam. Sed ista pluvia
bene cedat Iunoni tuæ, quæ ni fallor, te pluvium
Iovem magis amat, quam pluviam? Sed cave
hæc illi interpreteris. Eleusinia sacra sunt, quæ
revelare nefas. Sæpe me optavi vobis itineris
socium, non ut magis esses severus, sed ne ri-
deres parcius. Vbi intellexero vos sospites Ham-
burgum venisse, Taurum Neptuno, Æolo asel-
los marinos mactabimus. Quod de tauro dico,
voto & destinatione me facturum promitto,
non re. Preciosa nimis forent taurorum sacri-
ficia. Princeps noster à podagra penè convaluit.
quod ad me perscripsit nobilissimus Mylius,
indignatur ægros sibi esse pedes, cui bellaturunt
manus. Heri Haga discessere stabularii omnes &
E 5 equi.

equi. *Bella ô, bella, horrida bella,*

Et multo video, spumantes sanguine campos.

nisi tanta incepta remoretur aliquis casusve Deusve. Fert rumor Gallorum copias in agro Leodiensi stare. Non credunt βαρυκέφαλοι. [*quibus grave caput est.*] Nec tamen arbitror frustra fore Regum Principumque super communi bello deliberationes. Affinis tuus Wesenbecius, ante pauculos dies, fratres tuos & me convivio excepit. Miror, si dextra tibi non tinnit auris. adeo crebra tui hic facta mentio. Non dubito, quin & nostri memores sitis vos. Si istis officiis saginari possent gallinæ meæ, quas alit hortulus meus, levarer hordei impensis. Vide de quam magnis rebus tecum loquar, postquam à serio argumento destituor. Vale candidissime & tuos saluta. 6 Maji, 1635.

291.

CORNELIO VANDER MYLE.

TRansmisit ad me, nobilissime Myli, Dominus Zulechemi Diploma illustrissimi Principis, quo ducentorum florenorum annuorum mihi gratiam facit. Meum erit captare occasiones, quibus affectum vicissim meum erga illustrissimum Auriacum, & domum Nassovicam tester. Aristoteles noster in Ethicis docet, inter inæquales, puta Principem & privatum amicitiam coli posse, si Princeps se privato probet beneficentia; privatus Principi reverentia, obsequio, cultu, fide. Sic ad æqualitatem revocari mu-

mutua disparium officia. Tibi gratias egi & ago etiamnum, quod toties mei apud Principem dignatus fueris meminisse. Quem doleo jam cum podagricis doloribus luctari. Debebant sani incolumesque esse pedes, cui bellaturiunt manus. Sed mala ista licet molestissima sint ægris, præsagium habent longioris vitæ. Nec enim humor in corpore peccans, in partes magis ignobiles trudi potest, quam in pedes, feriantibus interim & immunibus à malo partibus principibus, cerebro, corde, hepate. Remitto chartas Venetorum. Poëmata Gaddii erecta sunt, & minus vulgaria. Sed magis placebant Epigrammata nuper missa. Sylvas Gaddii magni facio, sive Carmina ista Pindarico more scripta, mixtis carminum generibus. Pighetti de Cardinali Richelio Elogium non est magni laboris. Amant Heroës & viri magni operosius laudari. Vxor mea ex acerrimo gravissimoque morbo jam per octiduum decubuit, non sine vitæ periculo. Quater illi secta vena, clysteres injecti quinque, præter purgationes supernas. Suffocationes uterinæ in causâ sunt, aliaque mala. Dolores capitis summi nullis medicamentis cedunt. Iubent tamen Medici me bono animo esse. Deus Opt. Max. illam sibi mihiq; restituat. Debilis est admodum, fractis partim vi morbi, partim crebriore medicina viribus. Vale nobilissime Myli, & me amare perge. Dominam vander Myle, uxorem Tibi dilectissimam, filiam generumque saluta. Raptim. 13 Maji, 1635.

THEODORO SCHREVELIO.

Vix animus mihi est scribendi, dilectissime Schreveli, cum illum totum penè expectoraverit conceptus ex gravissimo uxoris meæ morbo dolor. Dubia adhuc est valetudine, spemque simul meam & metum exercet morbi pertinacia, quæ modo remissionis aliquid ægræ concedere videtur: modo vires capit & illam simul ac me dejicit. Heri mutationem insignem observavimus, licet non optimam. Qui enim humor capiti hætenus incubuit, gravissimorumque dolorum causa fuit, dextrum nunc crus occupavit, quod immobile jacet & stupet. Constat adhuc mens & ratio. Ad rogata respondet appositè, sed non loquitur, nisi rogata. Ego dum domesticam scenam intueor, deploro sortem feminini sexus, cui tot calamitatum causa conjugium est. Scilicet hoc precio uxores sunt & matres, ut spectaculum se præbeant non unius miseriæ. Nec tamen incuso providentiam divinam, in cujus abdita dum se recipit animus, cessat queri, & cœlestis sapientiæ consiliis tacitus acquiescit. Literas tuas solatii & Christianæ commiserationis plenas accepi, & ad animum revocavi. Iam philosophia opus, non theoretica illa, sed practica, quæ adversus domestica nos mala, morbos, dolores, mortem roboraret firmerque. Erigo me quâ possum argumentis à fatalis horæ necessitate, divinæ voluntatis

tatis sanctitate, & melioris vitæ forte, quam speramus Christiani, depromptis. Cum ægram aspicio, dejicior non parum: cum circumstantes liberos, erigo me, & patientiam mihi impetro ac fortitudinem. Tu summe Deus propitius sis ægræ, sive eam superesse diutius velis, sive meliori in sede locare. Vale amicissime & integerrime, & dolenti condole. Vxorem liberosque aliosque amicos saluta. Raptim. 23 Maji, 1635.

293.

CORNELIO VANDER MYLE.

LEgi cum voluptate dissertatiunculam eruditam & amœnam Gabrielis Naudæi, de Medicorum mendaciis officiosis. Omnino sum in illa sententia, licita esse, non minus quam licitum fuit obstetricibus Ægyptiis simili mendacio fallere Pharaonem, Exod. 1. Disputant amen super ea re Theologi & Philosophi. Illorum non pauci omne mendacium damnant, & mortale esse volunt, juxta illud, *Lingua quæ mentitur, occidit animam*. Horum nonnulli urgent, voces institutas esse ad significandas suas res, nentientes vocibus ad alienam significationem abuti. Sed & hi & illi superstitiose rigidi sunt, cum actionum secundæ Tabulæ regula sit Charitas proximi, cujus in istiusmodi officiosis mendaciis salus commodumque quæritur. Iocosa & perniciofa meritò damnantur. Ad illud, quod leges pag. 9. non potui non subridere. Citat versiculum hunc:

— Quod

— *Quod Medicorum est,*

Promittunt Medici, tractant fabrilia fabri,
quem Divi Hieronymi esse ait in Epistolis,
cum sit Horatii Flacci Epist. lib. 2. Epistola 1.
qui certè Poëta nihil minus fuit, quam Divus &
Hieronymus, quod mecum credis. Exemplaria
duo Orationis meæ de Animæ Humanæ admi-
randis mitto, ut ad illustrissimum Molinum trans-
mittas. Gallorum primis successibus gratulor.
Multum est in limine belli rem benè gerere, uti
pessimum in limine impingere, quod nuper
Cardinali Infanti accidit, frustra tentato muni-
mento Philippino. Vxoris meæ morbus magno
meo, & liberorum dolore, nihilo adhuc est mi-
tior. Quin potius, nisi Deus avertat, magna ma-
la afflictissimæ matri minatur. Ex summis ca-
pitis doloribus qui miseram excruciarunt, &
subsecuto abortu, nata est mentis & rationis
quædam diminutio. Nec enim loquitur, nisi
rogata. Rogata non respondet, nisi Verbulo.
Adhæc brachium & crus dextrum stupent, &
sine motu jacent. Nec tamen paralytis est, cum
partes doleant. Deus Opt. Max. matronam
optimam, & œconomam sagacissimam pristinæ
incolumitati, meo familiæque meæ commodo
restituatur. Vale Vir nobilissime, & uxorem libe-
rosque à me saluta. Amstelod. 26 Maji, 1635.

294.

DOMINICO DE FEENSTRA.

NEc de morbo, nec de morte parentis tui quicquam inaudiveram. Primus tu rem tristem nuncias, quæ licet te matremque propius tangat, me tamen non leviter affecit, qui amico privatus jacturam feci ingentis boni. Amicitiam mecum coluit candidè & prudenter, ut non necesse sit te de literis, scriptisque ad me missis sollicitum esse. Solatia si à me petis, cogita ea lege omnes nos nasci, ut moriamur. Et bene cum illis actum esse, qui vixerunt bene. Talium mors instar victimæ est gratæ in naribus Domini. Ivit ad ea loca, ad quæ viam monstravit auditoribus suis & sibi. Ivit fide in Christum, ivit pietate & sinceræ religionis studiis. Repetiit servum suum Dominus, quem vineæ præfecerat; & repetiit eo tempore, quo invenit operantem & docentem. Tuum erit forti & Christiano animo hanc domesticam calamitatem ferre, quæ per vices omnium est. Si vestigiis optimi doctissimique parentis institeris, si eundem bonæ conscientiae callem presseris, eris matri solatio & subsidio. Et videbitur in te renatus pater, qui divino consilio denatus est. Quod doctoratus in jure gradum expetis, rem facis tua indole dignam, animoque ad majora contendenti. Illum tibi tuisque salutarem esse velit summus artium ingeniiue largitor. Carmen quod petis, mittam tempestivè. Vale juvenis

venis doctissime, & si me amas, Deum, pietatem, doctrinam ama. 2 Jun. 1635.

295.

CORNELIO VANDER MYLE.

Maximus justissimusque dolor habet familiam meam, me ac liberos. caret illa rectrice sua, ego charissima conjuge, liberi propensissima matre. Iam convalescebat, per ædes bacillo innixa ambulabat, ut de morbo triumphatum videretur. Cum ecce elapso proximè die Martis, qui hujus mensis fuit 19, novo paroxysmo circa meridiem corripì cœpit. Medicorum alii apoplexiam validam esse judicabant, quibus ego assentior: alii catarrhum suffocantem illapsum in pulmones & cor. Videbamus ægram, sensu, motu, rationis adhæc usu privatam, aderat stertor anxietasque pectoris summa, quæ omnia intra horas duas, frustra adhibitis clysteribus & cucurbitulis, illam exstinxerunt, sine ullo doloris, qui appareret, sensu. Steterunt mecum attoniti Medici, nec causam tam subitæ & funestæ mutationis conjicere potuerunt. Non conquerar impatientius. Quia à Domino factum est istud, qui vitæ in nos mortisque habet arbitrium. Iam philosophia è schola & pulpitis in domos transferenda. Iam quæ aliis suggesti solatia, mihi quoad possum ingero. Verum cum nihil humani à me alienum putem, per intervalla afficior valde, ut de me quoque verum sit dicere, *Sic factur lachrymans*. Erigo me liberorum causa, quorum

rum interest, me non dejici animo. Heri qui 22 fuit Junii eam extuli. Nolui hæc N. T. ignorare, quam non minus rebus meis adversis, quam secundis affici scio. Inter hos dolores hæc pau- cula semianimi exciderunt:

Scribere chara tuos cupiebam Barbara manes,

Cum mediis cœpi versibus ipse mori.

Ne pergam, clamat soboles. superesse parentem

Sit satius, quam te, me moriente, cani.

Vale Vir summe, & Dominam vander Myle li- berosque saluta. 23 Jun. 1635.

296.

EDUARDO HERBERTS.

*I*lluſtriffime Domine,

Tradidit mihi librum tuum de Veritate do- ctiffimus Doreſlaus. Exoſculatus ſum munus iſtud literarium non uno nomine. Precium illi conciliat autor, titulus, & ille, per quem volui- ſti ad me deferri opus graviffimum, exactiſſi- mumque. Gaudeo in Britannia Philoſophari Barones, & ad ſtudia noſtra ſe demittere gran- des illuſtresque animas. Gaudeo philoſophiam non illis ſolum cordi eſſe, qui longa ſtola ambu- lant, hoc eſt, umbraticis doctoribus, ſed & vi- ris in lucem poſitis, quosque dignior fortuna ſecrevit populo. Nec minus recreor auguſto Veritatis vocabulo, ad quam aſſurgat ipſe è cu- ruli ſella Cato. Demerſam illam in profundo puteo dicebat Plato: inveniri non poſſe Pyr- rho, probabilem ſolum eſſe Academicus: inve-

Pars II.

F

niri

niri posse, certamque esse & immobilem Dogmaticus. Tu, vir summe, dogmaticorum sententiæ affinis, non inveniri solum eam posse doces, sed & oculis lectorum nudam objicis. Legi pleraque. nec aliena te dicere & sentire ab Aristotele & Peripateticis statuo, licet alia forma orationis, & mutatis vocabulis, quorum maiestate & elegantia gratior es lectori, & admirabilis magis. Vbi dissentis, facile te dissentientem fero, cum & hoc inter Veritates communes sit, non idem omnes sentire. Philosopharis liberè, nec in aliorum verba juras, ut non solum in territorio tuo, sed & Philosophorum regno Baronatum exerceas. Qui uti libertatis civilis est studiosissimus, ita pari libertate de vero iudicat, nulli vel beneficio vel metu obnoxius. Quibus stipendiaria est veritas, anxie loquuntur; & licet sentiant secus, linguam calamumque falso mancipant. Ideò utilia sibi loqui malunt, quam vera. Tu in libertatis regno natus ea scribis, quæ nec fœdam servitutem, nec licentiam effrenem sapiunt. Simul & candide philosopharis & prudenter: acutè & religiose: doctè & piè. Pro libro animum hunc doctrinæ tuæ admiratorem devoveo. Tu Dorellaum, quem ob eruditionem, facundiam, probitates & candorem dilexi semper, amare perge. Ita me, ita illum, virtutesque quas recensui, tibi devincies. Vale Baro illustrissime, & nobilitatis splendorem sapientiae radiis porrò illustra. Amstelod. 24 Jun. 1635.

A D R I A N O P L O O S.

Literæ tuæ afflicto familiæ meæ statu, & gemitus mihi expressere, & solatia attulere maxima. Nec enim his locus, nisi cum dolemus. tunc autem dolemus, quoties sublatis ex oculis boni memoriam refricat officiosa amicorum pietas. Amisi conjugem & matrem familias laudatissimam, tot liberorum parentem, quos dum adspecto, conjugii suavissimos fructus & matris in singulis imaginem contemplor. Non incuso Deum, quia suo jure suum repetiit. Non naturam, quia mortalem eam genuit. Accidit mihi, quod quibusvis accidere potest. Si divina oracula consulam, cingor nube rationum, quibus animum ad patientiam componam. Si humana, sufficit vel unus Seneca moderando dolori. Si ad Poëtas deflectam, est apud Statium Poëma in obitum Priscillæ, quod fractum mœrore pectus validissimè mihi munit. Illud disco, non magni esse laboris de mortis contemptu, & patientia philosophari, at illam sibi imperare, maximi. Aliud est Stoicismum acutè dictis interpolare, aliud vita exemploque profiteri. Quàm cordate ubique de rerum adversarum tolerantia disserit Cicero. at quam impatienter fert suorum obitum. Quanquam me philosophum voces, possum tamèn, quæ mea est imbecillitas, valde affici. Quanquam Theologum, sentio nihilominus Theologiæ responsare conjugalem flammulam,

lam. quanquam Poëtam, agnosco lubens, jam cum vena languere pristinam animi vim. Difer-tus satis sum in leniendis amicorum malis, at in meis penè obmutesco. Illud tamen à Theolo-giæ studio impetravi, ne voluntati divinæ velim obluçtari: à Philosophia, ne mihi immodicum dolorem exprobraret ratio: à Poësi, ut malo-rum sensum jucundissimis studiis pergam lenire. Accedunt his monita tua & amicorum, quibus tanquam fulcris erigor, ne collabascam. Tibi, vir summe, gratias ago maximas, quod subdu-ctum te publicis curis mihi solando impenderis. Expertus disco me à te amari seriò, qui in utra-que fortuna vel gratularis læto, vel condoles af-flicto. Vale. Iplis Cal. Iul. 1635.

298.

P E T R O C U N Æ O.

C Vm hinc discederes, cognatorum charissi-me, à mortualibus uxoris meæ p. m. pe-tebam, uti liberos tuos ad nos mitteres, non so-lum ut amicitia inter nos dudum cultæ hæredes sint ex te & me nati, verum etiam, ut recentem adhuc tristitiam tum meam tum liberorum, præ-sentia sua, alloquiisque discutiant. Erit illis hîc benè. At, quod maximè velim, ipse cum uxore veni, cum voles, & apud me, quandiu voles, morare. Feriæ instant, ut totus tibi tuisque va-care possim. Audio vires apud vos indies ca-pere luem epidemicam, ut omnino consultum sit, te aliò transferri, & aëre frui salubriore.

Vrbs

Vrbs hæc nostra, licet populofissima, ab isto malo immunis etiamnum esse creditur. Excipiam te sobrie & frugaliter. Si voles, ex præscripto tuo edes & bibes. Nec deerunt amici, quibus tempus fallamus. Ego hac urbis vestræ facie cavebo diligenter, ne vos invisam. Magis jam de valetudine mea sollicitus sum, quàm ante, idque liberorum causa, quorum solatium omne in uno me repositum videtur. De rebus publicis nihil scribam. Lentius procedunt res nostræ in Brabantia, nec promovemus multum. Votis juvamus conatus Principis, quando aliter non possumus. Vale. 7 Quintil. 1635.

299.

THEODORO SCHREVELIO.

Q Væ mihi sufficis solatia, Schreveli doctissime, istiusmodi sunt, ut levando quidem dolori faciant, at non penitus tollendo. Altius namque animo hæret pristini amoris, & conjugalis flammulæ memoria, quàm ut eam exuere possim, etiamsi velim maximè. Amisi thori fociam, prosperæ & adversæ fortunæ consortem, quæ difficillimis temporibus nequaquam animo dejecta, me familiamque virtutibus, supra sexum suum erectis, suffulciit. Non ignarus es harum rerum. prudentiam ejus domesticam, liberorum curam, in me affectum perspexisti. Doluisti non semel nobiscum. Rursum gratulatus es non semel meliori fortunæ redditos. Et quod amicorum est, credidisti tibi benè esse,

cum esset nobis, nec non malis nostris, tanquam communibus, ingemuisti. Sentio, sentio quam longe absim à Stoa, quam non sim ἀνείδηντος.

[*sensus expers.*] Quocunque oculos verto,

Ante oculos morientis imago est,

Et mecum totos ambulat illa dies.

Hæc humana sunt, & fragilitatis nostræ certissima documenta. Nec minus sapientiæ præceptis castigo querulum amorem, & illud cogito; Deposuit nos Dei esse; peculium suum repetere Creatorem, cum libet; mortis necessitatem vitæ nostræ condicionem esse & terminum: illam tot mundi hujus malis calamitatibusque subductam, Deo & Christo Salvatore propius frui: aliter necti copulam conjugalem, aliter solvi. Illud duorum esse, hoc singulorum. Et quæ alia vel sanctior scripturarum doctrina, vel naturali lumine subnixa ratio suggerit. Ab omnibus illud non ægrè impetro, ut flaccescentem subinde animum erigam, dolorem flagellem, ac divinæ providentiæ fatoque acquiescam. Vale Vir clarissime & amicissime, & amare perge amicum veterem, & sine fuce tui studiosissimum. Vxorem liberosque omnes saluta. 15 Jul. 1635.

300.

CONSTANTINO HUGENIO
de conjugis obitu.

EX quo in Eburones, Tungros, Grudios movit illustrissime Princeps, me domestica calamitas exercuit, præstantissime Hugeni. Iam victo-

victoriarum spe erigebam, jam argumenta Panegyricæ laudationis animo præconcupiebam, cum Deo Opt. Max. visum fuit, charissimi me pignoris acerbissima jactura mactare: Turtur sum sine compare, sine vite ulmus, sine socia ambulator. Cum Auroram adspecto, doleo miser Tithonus non exurgere Thaumantiam meam. Cum diem oculis usurpo, queror cum Apolline Leucothoen meam, terris cheu defossam, non ultra vivere. Cum advesperascit, frustra quæro Venerem meam Adonis. At cum nox mundo incubat, Morpheus sum, & veteris maritæ vanis amplexibus hæreo. Ita omne mihi tempus per mœstas cogitationes, suspiria, & querelas abit. Testes sunt querimoniarum libri, lachrymarum prandia & cœnæ, singultuum cubile. Excussus à manu calamus, quo Principem, quo te virtutesque tuas cecini, aret plane nec sepiam imbibit:

Iam querimur crassus calamo quod pendeat humor,

Nigra quod infusa languescat sepiæ lymphæ.

Chartæ, ut lineas Poëticas fugiant, in rugas se & plicas contrahunt. Languet ingenii vigor, & velut amissa Polla olim Lucanus, caret incentrice sua tuus vates. Ruunt sine lege numeri ob ereptam Terpsichorem. Periit accentuum discrimen, quia omnes mecum βαρύτονοι [gravitoni] sunt. Nullus sibi pes constat, quia vacillat meus. Horrent syllabæ, quia omnes luctus nostri consciæ stupent & mutæ sunt. In Heroico carmine destituor ab amœniore dactylorum saltu.

In jambis plus quam postremâ syllabâ claudico. In elegia hac ipsa sum flebilior. In lyricis nimis sum remissus. In dithyrambicis non uno loco sto, nec epanodon, aut stropham, vel antistropham scio. Quis Apollo veteres dabit in carmine vires? Quæ Pallas dicet extinctam Pallada? quæ Thalia sufficiet dicendis ejus laudibus, quæ pia fuit sine fuko, casta præter seculi morem, modesta sine affectatione, facunda sine garritate, faceta cum oportuit, prudens ad invidiam sui sexus, rei familiaris administra in exemplum, mariti amans sine petulantia, liberorum citra indulgentiam. Si Orpheus essem, revocarem hanc Eurydicen; si Admetus essem, facerem ego, quod fecit Alcestitis,

Spectares subeuntem fata maritæ Barlaam.

Si Antoninus essem, non minus Barbaræ meæ, quam ille Faustinae, divinos honores decernerem. Nuper à gravioribus studiis animum remissurus, deflectebam in amœniores Pegasidum recessus, modo in Anacreonticos lusus, modo in Veneres Catullianas, Tibulli vel Propertii delicias; aut quoties placerent recentiora, in Secundi Hagienſis basia, aut Otiorum tuorum libros. Iam postquam læta omnia displicere cœperunt, malo hæerere in Tristibus Nasonis, Statii epicediis, vel lachrymis I. Scaligeri. Quin adeò delector fatali apparatu, & flebili scena, ut cupe-
rem mecum flere amicos omnes, & ad animum revocare, quæ me solum tangunt. Cuperem videre Belgas atratos omnes, squallidos, luctu &
mœrore

in ære fractos , ut rerum undique miserandarum adspectu fruere liberalius. Cuperem perpetua nocte tegi Solem, nec illum diem unquam candidum mortalibus oriri, quo mea lux, mea vita, mea voluptas occidit. Cuperem illam horam præfidi cœlo, & fastis æternum expungi, quæ postrema fuit dilectæ meæ, & suprema meis gaudiis. Vtinam memorem mihi vitæ antea actæ mentem extingueret Lethe aliqua, ne meminisse queam, ô mea Barbara, tot blandiloquiorum, soliloquiorum, solationum, quibus erexisti fatifcentem non semel maritum. Tu à studiis fesso imperasti remissionem. Tu toties scribentem in lectulo tulisti patienter, & thalami officia donasti Apollini. Tu meditabundo optimarum sæpè cogitationum argumenta suppeditasti. Tu à Scholarum spinosis quæstionibus morosiorum recreasti serenioris vultu. Et inter hæc ibas inter liberos mater sedula, quæ ad animi & corporis cultum faciebant, curabas gnaviter, ne domui suus nitor, proli sua elegantia, mensæ frugales epulæ deessent. Fuerint grandes Corneliæ, Sempronæ, Porciæ, Clæliæ, Liviæ. Etiam hic Dî Deæque habitant. Mihi non minor illis heroinis fuit mea Barbara. Mihi inquam, nec enim matres Gracchorum magni facio, aut eas, quæ cursum torquent enthymina, aut historias sciunt omnes. Illa Porcia mihi est, quæ maritum audit. illa Cornelia, quæ soboli vacat. illa Sempronia, quæ tenui deducit stamina fuso. illa Clælia, quæ carceribus fidei conjugalis constringi amat. Illa

Livia, quæ sine dolo & fraude blanditur. illa Faustina, quæ rem familiarem auget, nec sordida est. Talem dederunt fata, talem abstulere. At quot virtutes ejus cogito, tot damnis, tot doloribus premor, quos si confundere velim, prope est, ut ab omnibus obruar: si distinguere, pluribus modis miser sum. Quot excelebas honestæ matronæ muniis, tot mereris vatum encomia, quæ solverem ipse grandi Poëmate, nisi hinc maritalis modestia obstreperet, hinc silentium imperaret crudus recensque dolor. Nec desunt tamen, mi Hugeni, solatia. quibus levem hæc mortalitatis dispendia. Adsumt ad manum Epictetus, Seneca, Tullius, adsumt Boëtius, Petrarcha, è quibus disco: nihil immortale ex mortalibus nasci; crudelitatem fati, si ita Christianos loqui sit fas, æqualem esse omnibus: stolidum esse, nil profuturo gemitu pectus deducere: accusari posse fata, non flecti, non mutari: non debere Philosophum, qui consolator est aliorum, mœrori indulgere: sapientis esse, iis carere posse, quæ amavit maximè: contumacissimum etiam luctum tempore atteri. & quæ sunt alia, quibus ægræ mentes ad sanitatem revocantur. Adest ad manum Codex sacer, qui, præter illas Ethnicorum graves sententias, providentiæ divinæ motus occultos edisserit explicatius: fidei vitæque honestioris præmia promittit morientibus, & resurrectionis spem indubium facit piè defunctis. Docet ille Dei, Angelorum, & tot sanctissimarum animarum conspectu

spectu frui mortuam : non illic mortalitati, non egestati, non querelis, non lachrymis locum fore. Fulgere pios ut sidera ; lætari sine intermissione , opulentos esse sine desiderio , honoratos sine ambitione , voluptatibus sempiternis frui sine fastidio. His curis , his me meditationibus immergo indies. His munimentis circumeo animum , ne qui invenit introitum dolor, figat domicilium. Quæ dum hic aguntur, tu in hostico stas , & Fortunæ militaris, æstus suos Euripi instar reciprocantis, spectator es. Vides non esse verum, quod minus providè dixit Silius :

— *fati modum in sceptris esse.*

Efficacior humanis consiliis est divina voluntas. Et tamen indignor Remi turbæ, quæ Principum virtutes ex sola æstimat felicitate. Bellorum eventus non aliter , quam Mathematicorum conclusiones putat ἐξ ἐνάγκης συμβαίνειν. [*ex necessitate evenire.*] Ego gaudeo illustrissimum Principem incolumem ad suos rediisse , quo sospite vel recuperabimus, quod omissum est, vel feremus æquius. Vale præstantissime Hugeni , & ex hac epistola duo collige : Primò me inter suspiria domestica & privatos gemitus tui non dememinisse. Deinde me Poëtam esse posse sine numeris & metro. Amstel. 4 August. 1635.

301.

CORNELIO VANDER MYLE.

NOn ita pridem meorum te malorum participem feci nobilissime Myli , & condoluisti

luisti. Nunc, quæ humanarum sunt calamitatum vices, me de tuis certiolem facis; ut æquum quoque sit, me tibi condolere. Non coacervabo solatiorum acervos adversus vitæ hujus aspera, cum è gravioribus malis emerferis, generosa animi constantia, & recti conscientia. Contrahitur, fateor, in arctum nepotum tuorum spes. Sed illud cogita, superesse adhuc utriusque sexus vegetum germen, & hinc filium cum Raaphorstia, inde filiam cum Loosio, de posteritate ferriò cogitare. Me quod attinet, minus semper ob filiarum obitum dolui, quam filiorum. Credo enim spe miseriarum vivere muliebre sexum, quem conjugis incommoda, partus, lactationes, aliaque mala indefinenter exercent. Vxoris è curru lapsus meritò te terruit, aliorum miserandis exemplis. Facile enim ista rerum perturbatione, cum currus habenas non audit, matronarum vestes fluidæ curruum transtris inhærent, non sine discrimine. Scimus quid Hippolyto acciderit olim, & aliquot retrò annis filiæ Consulis Delphensis vander Wel, quæ simili casu tragice periit. Sed gaudeo uxorem convaluisse per Dei gratiam. Interea his tuis meisque privatis malis supervenere publica. Quæ tanto sunt graviora, quanto ad plures pertinent. Non debebant istiusmodi Arces, è quibus patriæ salus pendet, tam negligenter curari. Securitati præsto est exitium. Doleo optimi Principis institutum quorundam socordia eludi. Vacillat Ducis fama aliorum culpa, & dum malè res gerunt

runt custodes suppedanei, malè audit summus. Illustrissimo Molino pro misso exemplari gratias age. Non fuit ingratum videre, aliquod esse nostri precium apud Transalpinos. D. Vossio collegæ meo tradidi schedulam istam. Respondet, exemplaria Saxonis Grammatici difficulter haberi posse. Vale. 14 Augusti, 1635.

302.

V O P I S C O P L E M P I O.

QVo tempore vos belli rabies exercuit, doctissime Plempi, me domesticus dolor habuit, ob obitum dilectissimæ conjugis, quæ levi apoplexiâ correptâ, mox superveniente forti, fatis cessit. Hoc casu attonitus à me impetrare non potui, ut, quæ debebam amicis, styli officia solverem singulis. quamobrem ignosce tardius respondentî. Senti in me verum esse, parvas curas loqui, ingentes stupere. Quæ de Lovaniensium scribis fortitudine, equidem invideo, & miror magis. Armis ducum vestrorum bellicæque laudi nihil derogo. Sed, mea sententia, fame nostrorum vos evasisse potius, quam vestra virtute arbitror. Quicquid sit, evasistis hac æstate. de futura spondere non aulam vobis majorem securitatem. Nec tamen credas velim me bellaturire. Non sum pullus Martius, utpote in umbra & scholis educatus. Cuperem, ego Martem in Thraciam suam relegatum, aut alligatum Caucaaso. Collidimur Belgæ & mutuis odiis atterimur. Principum causa, agitur, sed damno Achi-

Achivorum. Aleam Martis vide. terruimus modo vos. jam intercepta arce Schenkiana, terribiles estis nobis. Dirimit exercitus noster Vahalis, quos modo dirimebat Dilia vester & Dimeria. Sed vatem audi. quæ res nostros Brabantiam relinquere coëgit, propediem vos Clivia abiget. *Odit cupidus jejunia venter.* Thienensem lanienam tantum abest ut probem, ut ingemiscam ad ejus memoriam. quod in illustrissimum Principem causam derives, vereor ne à partium sit studio. Quibus belli res propius perspectæ sunt, Præfecto urbis Thienensis miseræ urbis fatum imputant, ut qui præter belli morem, oppidum vel adversus primam incursionem impotens, dedere post tot sollicitationes noluerit. nec potuit jam hærente in portis & muris milite, sistere furorem suorum Princeps; tam ab omni crudelitate alienus, quam illi affinis olim fuit Tagi dominus. Clarissimi Fromondi Vestam legi, & quanquam in illius sententiam magis inclinem, videor tamen mihi observasse rationes nonnullas, quæ verborum magis apparatu venustæ sunt, quam robustæ. Nimiis animis pro ista causa certant hinc Fromondus, inde Lansbergius. Posset terra moveri non mota Philosophantium bile. posset cœlum quiescere commissis placide dissentientium calamis. Me quod attinet, sive hanc sive illam opinionem amplectar, cicum non interdum. Et nisi autoritas Ecclesiæ vestræ obstaret, idem sentiretis cum Galilæo. Pro Vesta nihil habeo, quod
re-

reponam vobis dignum. Quæ tamen nuper super Animæ natura differui mitto. aliter videbis Philosophum loqui, aliter, qui declamat. Inscripti exemplar unum tibi, alterum Puteano, tertium Fromondo. Vale. 2 Sept. 1635.

303.

HENNINGIO ARNISÆO.

Postquam amicitiae mihi dexteram porrexisti clarissime Arnisæe, non dimittam te, sed te-nebo arctius. Facit candor tuus ut te amem, doctrina ut venerer, & ὁ υἱέας [*sanitatis*] studium, ut te colam suspiciamque. Non est verum de nobis illud Hesiodi, ἢ κέεργμεῦς κέεργμεῖ &c. [*Figulus figulo &c.*] Maria, terræ, montes, syl-væ dirimunt nos, ne alius in aliorum commoda involemus. quamobrem minus metuendum, ne livor Medicorum ἰδίου πᾶθος [*peculiaris passio*] amicitiae nostræ obstrepet. Dabit illi perpetui-tatem virtus tua, & diffusa late eruditio, & per-specta maximo regi fides, cujus dum pro salute vigilas, publicum in uno asseris. Sunt, qui feli-citatem Daniæ æstimant ex securitate, quia ma-ri cingitur. Sunt qui ob Freri celebris oportu-nitatem eam laudant: alii bellicosæ gentis for-titudinem, & priscam & recentem exaggerant. At, me judice, Dania felix audit Gunthero & Arnisæo. quorum ille regni curam, hic regnan-tis habet; ille legationes obit fideliter, hic cura-ones; ille Mercurio tutus, qui Deorum jussa per auras fert, hic Apolline Medicorum deo.

uterque

uterque verò literarum ac eruditionis laude Cimbrorum imperio decus firmitatemque addunt. Facitis ambo, ne barbaries posthac exprobreetur genti vestræ, quam melle Attico & Latiis leporibus edulcatis, ut mitescat prorsus, & coeli solique asperitatem exuat: lenior est Septentrio per vos, & culturam indies admittit. ut jam quoque Orpheos canere, & Amphionas urbes condere verum sit. Animos vobis addit regius favor & fulgor, quos in nobis dejiciunt mercantium strepitus & degeneres curæ. Nec minus inter has ipsas libet interdum de rebus magnis gravibusque in Schola nostra loqui, & philosophantium studia Musæo lepore perfundere. Nuper de Anima dixi, cujus vim indolemque tam me ignorare fateor, quam se scire venditat Peripatus. non dixi ea morositate, qua in scholis Aristotelem interpretamur, sed admiscui dulcia, ut auditorum animos aliquo verborum lenocinio captos, pertraherem in rei gravissimæ attentam considerationem. Mitto A. T. exemplar, alterum magnifico D. Gunthero tradi cupiam. tertium illustrissime Cancellario. fortè non molestum fuerit viro summo, ab occupationibus publicis legere, quid sit, cujus beneficio Rex imperat feliciter, vos consulitis fideliter. Vale. 23 Sept. 1635.

304.

CORNELIO VANDER MYLE.

Illustrissimi Molini periodos *παρρησιας* [*affectuosas*] quabus ob uxoris obitum mihi condoleret, ex literis tuis excerpti, & selegi mihi. Inter suspiria quotidiana volupe est videre, tanto viro me meaque esse cordi, & purpuratos solatia transmittere homini atrato jam & squallido. Vbi rescribes, istud pietatis officium, à viro maximo profectum, tua facundia exaggera & prædica. Dignas gratias referre non possum, quas tamen facile N. T. exequitur linguæ Toscanæ elegantiss, & phrasibus, quas ignoravi hætenus. Ad clarissimi Bonifacii versus allusi. Dicit se cœlibem ignorare, quid sit amor. Nolo contradicere. Debent ex officio & ordinis regula hoc ignorare Canonici, saltem non scire practicè. Præfert Bonifacius amorem sacrum conubiali, ego amo utrumque. Nihil vetat, cum Deo consecraveris animam, legitimæ conjugii devovere animæ capsulam. Ita sentimus nos, salvo interim Transalpinorum iudicio. Vale.
30 Sept. 1635.

305.

P E T R O C U N Æ O.

C*Ognatorum charissime,*
Post tuum in Zelandium abitum, nihil de reditu tuo intellexi. ut nesciverim hætenus, ubi locorum vivas. Iam ante biduum ab
Pars II. G amico

amico accepi, te cum familia omnia in prædium cognati tui Sixti secessisse. quare officii mei esse putavi, ut per literas de tua tuorumque percunctarer valetudine. Expectavimus ut liberorum aliquos ad nos mitteres, aut venires ipse, sed excidimus hac spe. Nunc non minus suspecta tibi erit urbs nostra, quam tua Leida. Per mediam urbem sparsa est lues, & sine discrimine pauperum divitumque domos pulsat. Pauciores adhuc afflavit familias, sed quas afflat, delet penitus. At quam me miseret vestræ urbis, in quam grassatur inclementius, ut civibus *πανολεθρίαν* [*internecionem*] minari videatur. prudenter facis, quod affecto te aëri subducas, licet audiam Theologos aliosque paucos Spartam suam tueri. Rogandus Deus ut talem velit terris avertere pestem. quæ non vitæ solum sed & morientium bonis gravis est. respiciet ille aliquando pro sua clementia urbem afflictissimam, & flagellum iræ suæ cum misericordiæ sceptro commutabit. Studioforum vestrorum magna pars Ultrajectum abiit, alii Groningam, alii Franequeram, aliqui huc concessere. Sed hi aliò jam abitum parant, postquam & nos tangere cœpit iste dolor. mortalitatis & fragilitatis nostræ scenam inter hæc mortualia videmus. elata hic sunt superiore hebdomade cadavera 205; sed quid hoc ad numerum vestrum, qui jam 1400 excessit. Ego, ut tibi tuisque bene sit, ex animo opto & voveo. Non debebat isto tibi cine privari Schola

Lug-

Lugdunensis, nec ista face Themis Batava.
præstat abire te ad tempus, unde redire pos-
sis, quàm unde negant redire quenquam : προ-
φυλακτικὰ [*præservantia*] probe nosti. nec opus
est, ut te horter ut ab aëre vespertino, stomacho
jejuno, cibisque putredini obnoxiiis abstineas.
Nos cum familia omni recte adhuc per Dei
gratiam valemus. nec minus valet collega meus
cum suis. 30 Sept. 1635.

306.

P E T R O C. H O O F T.

QUas superiore anno misisti perdices,
Hoofdi clarissime, æquissimis animis ac-
cepi, nec invitis dentibus intrivi. erat enim
munus illud tuum tempestivum valde & oportu-
num. At mihi viduo jam perdices mitti, alie-
num est ab omni ratione. Salacissimam mihi
mittis avem, Veneris symbolum, & hierogly-
phicon, cujus adspectu memoriam mihi refri-
cas earum voluptatum, quibus ἀγαμέ [cælebs]
careo. quod quid aliud est, quam salivam mo-
vere homini famelico, qui quod edat, non ha-
bet. Potius misisses tristem & feralem bubo-
nem, homini tristi & afflicto : avem noctiva-
gam & solitariam homini solitario & sibi vi-
venti. misisses potius philomelam, aut pro-
gnen, aves querulas, viro querulo & misero.
misisses infaustam strygem, infausto mihi. Cy-
gni, columbæ, perdices, passeress, tuæ aves sunt,
utpote conjugibus dicatæ, quorum oscula,
G 2 mur-

murmura, amplexus, gaudia ad istarum avium exemplum componi solent. Ululæ contra, vespertilioes, noctuæ, meæ aves sunt, utpote ululatibus, stridoribus, gemitibus assuetæ. quod ut credas verum esse, mitto exemplar epistolæ, quam ad Zulechemi Dominum dedi, quæ luculenta est testis fortis meæ, & vitæ perdicum similiumque deliciarum non indigæ. Atque hinc causam collige, cur à meridie domo abesse soleam, ubi supellex quondam uxoris voluptas, ubi viduus thorax, ubi proles orba matre mœroris materiam indies subministrant. Cum se Sol medio axe subduxit, & ad occasum vergit, occupant me viri amicissimi Vicofortius & Schuylius, qui, ne doleam minus, lepores mihi apponunt, carnem succi melancholici, cum sciant me talem esse, & similibus gaudere naturam. si vel hoc die me invisas, non ero domi. Nam apud Vicofortium sum, virum à virtute ad omnem honestatem, à Pallade ad elegantiores doctrinam, à comitate ad jocos falesque innoxios factum. Hic jam convivamur, sed sine te, non leporum, sed leporum patre. Si perdix es, frui nostris gaudiis eminus, ac sine contactu. Hoc enim modo volunt perdicæ concipere. Sed quid de gaudiis loquor, qui tristitia omnia & cogito interdum, & somnio noctu. Erit forte dies, mi Hoofdi, cum nubilum mentis meæ discutiet lætior Iuno.

Tunc tua Barlææ festiva fronte Camæna

Fata canent, fatis prosperiora meis.

Tunc

Tunc tibi perdices & fercula lauta reponam ;

Et tanti præsens hospitis hospes ero ;

Accipe promissi, versus quos mittimus, arrham ,

Hoc precio nobis tot redimentur aves.

Vale. 20 Oct. 1635.

307.

E I D E M.

M *Agnifce Hoofdi ,*
Oratores aliud nacti argumentum , alia
recitatione detinent populum. Comicus , pro
fabulæ ratione actus suos format & scenas. Sa-
trapæ , prout peccavit reus, magis minusve ter-
ribilia loquuntur. Ego , quamvis nec Orator
sim, nec comicus, nec Satrapa, tamen hos ipsos
imitabor , & nactus leporem post aves , non de
avibus , sed lepore loquar. Non citabo Gel-
liam Martialis , quæ ex leporum esu vultus for-
mosiores reddi dicebat. Non reponam Teren-
tii jocum , *Tute lepus es & pulpamentum quæ-
ris ?* verum hoc nomine gloriari , illud mihi mis-
sum animal , cui Cleopatram Ægyptiorum re-
ginam comparat Horatius , illa oda , quam in
Actiacam victoriam scripsit. Dicit Imperatorem
pressisse fugientem Reginam ,

Accipiter velut molles columbos, aut leporem citus

Venator in campis nivalis Hæmoniae.

Nec illud parum ad muneris tui commendatio-
nem facit , quod ejus capturam in felicitatis
rusticæ partem ponat idem Poëta ,

Pavidumque leporem & advenam laqueo grucm ,

G 3

Iu-

Iucunda captat præmia.

Quid, quod grande mihi sapientiæ argum-
tum objicias, cum didicerim, non in scholis,
sed divitum mensis, optimos esse armos lepo-
rinos, juxta eundem Flaccum,

Fœcundi leporis sapiens sectabitur armos.

Quod si cum lepore misisses galeam, ego ga-
leatum leporem misissem illis maris ducibus,
qui fœdo nuper exemplo fugientibus magis,
quam persequentibus fuerunt similes. Attamen
gaudeo me non esse Hebræum, cui leporem
edere nefas, licet enim ruminet, ungulam ta-
men bifidam non habet. Quod si viveret He-
liogabalus, pilos leporis tui, uti & plumas per-
dicum illi pro dono mitterem, solitus quippe
erat & hos & illos habere in deliciis, & sub
alis gestare. Sed libet causas scrutari, cur lepo-
rem miseris. an quia ut illi auditus est sagacissi-
mus, vis Philosophos attentius audire sapien-
tum voces? an quia ut ille insomnes ducit no-
ctes, putas me quoque lucubratores. An, quia
ut effeminatissimus est lepus, credis me lepus-
culo tuo molliorem? An, quia ut ille solitudine
gaudet, mihi quoque solitariam vitam sine
compare exprobras. Quin & illud scire cu-
piam, cujus mihi generis leporem miseris. Var-
ro tria numerat, unum Italicum, primis pedi-
bus humilem, posterioribus altum, superiore
parte pullum, ventre albo, cruribus longis: se-
cundum Gallicum, idque plurimum candidum,
quales in Noricis sunt Alpibus: tertium Hi-
spani-

spanicum, simile cuniculis. Dum de his deliberas, exercebo dentes in lepore tuo, cujuscunque tandem generis sit. magnam sane rem misisti, quæ ventri materiam alimenti, mihi Philosophandi, amicis ridendi præbuit. Nec tamen iis annumerari volo, de quibus Horatius in Satyris scribit:

*Sunt quorum ingenium novatantum crustula
promit.*

Vale. 7 Nov. 1635.

308.

P E T R O C U N Æ O.

Scriberem sæpius, cognatorum charissime, si tam essem meus, quam fui tunc, cum essem ex parte alterius. puta conjugis. quoties amœnioribus studiis me applico, aut scribendis literis, intercurfant cogitationes pristinae sodalitatis, quam conjugium appellant. Faciunt illæ, ut dum nimis memor sum vitæ præteritæ, minus memor sim amicorum. Quamobrem veniam mihi dabis, si tardius literis tuis respondeam. Quam sæpe te longius abesse à Libitinæ domo, ubi Charontis cymbulam usque adeò implent Leydenses mei, ut sub pondere illa gemat, & multam accipiat rimosa paludem. At volupe est audire, remisisse se nonnihil mali vim, & placatius esse Numen, peccatis nostris offensum. Illic, ubi es, aëre frueris salubriore. quare noli festinare & intempestivius repetere fatalem locum, ubi de feretris & sepulchris li-

tem movent superstites. Perlatum ad nos, vos literis Curatorum excitos ad professionem. at non debebant tam rigidi esse exactores publicorum officiorum, viri sapientissimi, in tanta doctorum penuria, quorum sane carior est annonæ, quam fullonum & vespillonum. Præstat, meo iudicio, Palladis sacra differri ad tempus, quam certissimo discrimini objici ejus mystas. Consultius est militem in bello subinde fugere, quam stationem mordicus tueri & perire. quæ es prudentia discernes facile Senatusconsulta ab occultis naturæ vocibus, quæ amorem nostri suadent. Et quis locus Doctoribus, remotis auditoribus? nisi voces esse velint clamantes in deserto. De pace aut induciis deliberant partium delegati. Vidi literas, quibus scribitur Graphiarium Ordinum Generalium ultro citroque commeare, & propediem expectari aliam publici status faciem. Faxit Deus, ut bellorum fatias aliquando capiat Magnates. Et capiet, cum incerta bellorum, cum calamitates publicæ, cum ambitionis vana spes, cum vicinorum afflictæ res, cum pacis commoda animis subibunt imperantium. Scribo hoc, non ut consulam sapientioribus, sed ut scias, me non esse Achillem aut Diomedem. Potius cum Penelope dixerim: *Non Priamus tanti totaque Troja fuit.* Dixissem fere me Palamedem esse, sed nolo esse, ne simili fato peream. tibi hæc scribo, qui mecum togam præfers armis, & laureæ linguam, qua vales ad invidiam. 15 Nov. 1635.

309.

THEODORO SCHREVELIO.

Salva res est, mi Schreveli, vivis & vales. Nec Senim mortui aut Dominum laudant, aut versus scribunt. Tu utrumque facis. Si, ut Maro ait, carmina vel cœlo possunt deducere Lunam, te teste, carmina vel terris possunt avertere pestem. Placuit mihi poëma tuum, sed displicuit ferele argumentum. ingemui non semel ad charissima amicorum nomina. Nomina inquam, quia hæc sola supersunt. In quoscunque incidi Leideneses, quæsi vi diligenter de te familiæque tuæ statu. Hactenus vobis pepercisse procul jaculantem Apollinem intellexi. Et si quis amici tui precibus locus, parceret porro. Nescio, quo in urbem vestram affectu ferar, cujus ego malis non minus, quam propriis condoleo. Quare & gaudere me scias, cum desævire luis vim scribis. Desævit & hic per Dei gratiam, licet mortuorum numerus vestro longe fuerit minor. Filia Doctoris Tollii, quæ cum matre & vitrico huc concesserat, simili fato periit. Eadem dies & sanam vidit & mortuam. Vigilandum est & orandum singulis, cum horam nesciamus, qua venturus est Dominus. Optaveram te Autumnalibus feriis videre. Sed detinuit te, uti opinor, communis mali metus, & familiæ cura. Versus tuos pios, graves, nec invita Minerva scriptos distribui amicis. Omnes tibi gratias agunt, & annos optant Euboi-

G 5

cos.

cos. Vale cum conjuge & liberis. 24 Novemb.
1635.

310.

CORNELIO VANDER MYLE.

HAbes quæ petiisti exemplaria Orationis de Oculo, præstantissime Myli, nec inamœna illa est, nec inerudita. Oculis opus est, ut intelligatur oculus; cum sæpe in hoc argumento cæcutiant etiam oculatissimi. Inter omnes sensus nullus æque admirabilis ac visus, sive oculi fabricam, sive species visibiles, sive videnti modum, vel per receptionem vel per emissionem radiorum spectes. Sed de his ipsum auctorem differentem audi. Nondum gratias N.T. egi, pro missis clarissimi Bonifacii versiculis. Id nunc facio. Nihil habeo quod rependam, præter hos Hendecasyllabos, de Perdicibus, quos ad Satrapam Muydensem nudiustertius misi. Velim scire, an Zulechemi Dominus Hagæ sit, an in Batonis, ut vocant, insula, ubi Schenckii moles patriæ molesta est. Addo exemplar Tragœdiæ Grotianæ, quam Belgicè reddidit I. Vondelius. Die Iovis proximo ex orchestra ab actoribus recitabitur. Oblitus pene eram quærere, ubi vivat Dominus de Thienhoven. Vale Vir maxime, & Barlæum tui tuorumque observantissimum si non in amicorum primis, saltem in postremis habe. Raptim Amstel. 24 Nov. 1635.

311. ADRIA-

311.

ADRIANO VANDER MYLE.

[X] literis parentis tui intellexi, nobilissime
 Myli, uxorem tuam Agatham filiam tibi
 peperisse. Quamobrè non potui non hunc ti-
 bi conjugii fructum gratulari. Fortè feliciorem
 crederes, si filium peperisset. At ego rationi-
 bus pluribus evincam, filiam filio, feminas ma-
 joribus digniores esse. Est philosophorum, non
 vera solum & probabilia, sed & paradoxa tueri.
 tria sunt bonorum genera, honestum, utile,
 cundum. Singulis præstat mulier. Honestior
 est, quia minus temeraria quam vir, magis tem-
 perans, quam vir, minus prodiga, quam vir;
 magis mansueta, modesta, minus ferox quam
 vir. Patientiam desideras? nulla major, quam
 minarum, quæ concipiendæ, gerendæ, parien-
 dæ, educandæ proles molestias naturæ lege fer-
 re coguntur. Nec minor in iis humilitas, ut
 quæ viro obsequentes sunt, & ad eorum nutum
 non invitæ se componunt. Non obliviscar de
 religione dicere. Hic laudem viris præripit
 muliebris ardor & zelus. Tempia vide, plus
 hic togarum, quam palliorum, plus vittarum,
 quam bræcarum, plus peplorum, quam pileo-
 rum. Qui primi sacrum Tumulum adiere? vi-
 re an feminæ? Mariæ erant, Magdalenæ
 præstant, *tardius Andrææ, tardi venere Simones.*
 qui vagantes Apostolos hospitio excepere?
 Lydia fuit, Timothei mater fuit. Vbi viros sa-
 lutat

lutat Paulus , etiam meminit Tryphinæ , Triphosæ , Olympiæ , Persidis , Iuliæ , feminarum virginumque. Si objicias, Apostolos viris scripsisse , dicam ego , Ioannem Apostolum secundam Epistolam inscripsisse Electæ dominæ. Si regeras , Deum sub typo Iacobi & Esau arduas res adumbrasse , respondebo etiam Saran & Agaram typos fuisse cœlestium rerum. Vnde non videam , quo merito plus sibi honestatis vendicare debeat vir , quam femina. Quod si de utilitate controversiam moveas , inutilis res visa est Creatori vir absque conjuge. Sine illa vita virorum, vita est exulum & erronum. Sine muliere languent , jacent , gemunt , suspirant. Sine muliere laceris incedunt caligis , lutosi calceis, vestibus immundis. Sine muliere friget culina , friget lectus, imperant ancillæ, male custoditur domus. Mulierem si tollas , desinit vir esse caput, esse maritus, esse pater. Non habet quod osculetur, quod amplexetur, cui arrideat, cui se totum credat , sanus , æger , interdium, noctu , rebus secundis vel adversis. Sine muliere nec Respublica, nec Ecclesia, nec exercitus, nec popina, nec textrina, omnibus numeris perfectæ sunt. Nullibi non necessaria est muliercularum officiosa sedulitas. Denique si de delectabili bono loquendum sit , multis parasangis viro vincunt feminæ. Nos morosi sumus , illæ comæ : nos superciliosi, illæ gratiosæ ; nisi forte officii sui oblitus maritus , justam offensæ causam præbuerit. Tota vita, expertus loquor, sine muliere

uliere tristis est, infestiva, invenusta, molesta,
 eviter, dolor & mors. His adde hæc solatia,
 non perituram tibi in bello filiam, non in mari,
 non in Arabum sylvis desertisque, quò viros
 oppellit avaritia, vel ambitio, vel temeritas.
 non litigabit in foro, more causidicorum;
 non è suggestu despumabit in superiores, more
 quorundam Theologorum: non multas illustres
 vias ad Orcum mittet, more Medicorum.
 non erit Hippolytus, non Bellerophon, non
 Priamus, non Priamus. Felicem te prædico, cui
 iam indulsit Lucina. Faxit Deus, ut cum ad-
 venerit, Saram referat modestia, Annam pre-
 m indefesso studio, Esteram amore populi &
 patrium, Lydiam comitate & facilitate erga Dei
 æcones, matrem formosam, castam, mode-
 ram, pari forma, castitate, modestia. Tu, mi
 Myli, judica, quantum mihi debeat sexus mu-
 bris, cujus patrocinium tantis animis suscepi-
 bi filium tibi peperit uxor, agam virorum
 usam. Philosophus omnis ambidexter est,
 toties vel vexare adversarium, vel amicum
 excercere vult. Vale & conjugem matremque
 saluta. 4 Dec. 1635.

312.

JORNELIO VANDER MYLE.

Obilissime Myli,

Jam ante octiduum, non de morte, sed
 morbo illustrissimi Molini inaudiveram, ex li-
 ris Venetia ad mercatorem D. Suers datis.

Quibus

Quibus fidem fecere tuæ, tristissimi nuncii testes. Amisit in illo viro Respublica Veneta tibicinem, quo nitebatur; oculum, quo sibi utilia prospiciebat: cor, cuius se fidei committebat: decus lucemque, qua domi forisque fulgebat. Nec minus Respublica literaria, Patavina præsertim, in eodem viro Mecœnatem amisit, quo gaudebat; Apollinem, cuius se horatu monitisque erigebat: Palladem, cuius se ægide tuebatur; purpuram, qua splendebat; curatorem, à quo fovebatur tenerius. Expecto, ut in lacrymas se solvant Venetorum eruditæ mentes, Patavini, Tarvisini, aliique, quibus vivus præfuit & profuit. Æquum est præcedere Italos, & Heroi domestico parentare. Fortè illorum lachrymis victus potero inter postremos plorare. Mitto amœnioris argumenti epistolam ad filium, jam patrem. Istis lusibus & reficio me, nec illi ero gravis. Vale Vir maxime, & qualis Venetis fuit Molinus, perge talis esse Batavis. 16 Decemb. 1635.

313.

CONSTANTINO HUGENIO.

Qui has tibi literas offert, nobilissime Hugeni, vis scire ecquis sit? nondum dicam. Vbi natus? ubi morimur omnes. A quibus educatus? ab Apolline, Musis, & Gratiis. Quo lude? veritatis, comitatis, elegantiae. In quo gymnasio? bonæ mentis. Quo sæculo? quo orbi imperat ignorantia, ambitio, avaritia. Quæ æra?

æra? anno à Moriæ natalibus inobservabili. Vbi habitet? ubi non Nitzliputzli Mexicanorum deus, sed nummus pro idolo est. Ad quod flumen? in quo delicatuli excrementa sua comedunt in anguillis. Ad quod insigne? Aratri, sed cui nullus infudat taurus. Vis & scire, quid agat? favet bonis. Quid non agat? nulli maledicit. Quid sit? legatus meus à latere. Quid non sit? pater. Quid amet? virtutem. Quid non amet? aulam. Quid calleat? sorte sua esse contentus. Quid nesciat? fallere. Quid optet? pluribus prodesse. Quid metuat? amicorum offensam. Quando doleat? cum gaudent improbi. Quando gaudeat? cum non dolent probi. Quot calleat linguas? unam, simplicitatis & candoris. Quas oderit? adulatoriam & sugillatoriam. Quæ illi deliciæ? Romanorum & Græcorum. Quid novissimè in illis amet? antiquissima. Qualis sit in foro? minus credulus. In templo? cum ratione. In conviviiis? officiosissimus. In aula? metuens futuri. In cubili? nescio. Vis & scire, quam mercaturam exerceat? lucrandi bonos. Quid numeret? virtutes tuas. Quid ponderet? beneficium acceptum. Quo se pede metiatur? suo. Quo sit vultu? ingenuo. Quo supercilio? nullo. Quibus oculis? probis. Quo pectore? aperto. Quali incessu? modesto. Quo habitu & vestitu? quo ocreati Achivi incedebant. Vis jam scire, quis sit? dicam. Vicofortius est, tui mei que studiosissimus & amantissimus. Vale & nos ama. 25
Dec. 1635. 314. IO-

IOHANNI BOR.

D*Octissime & amicissime vir,*

De morte parentis tui jam ante inaudiveram, uti solent amicorum comoda & incommoda ad amicos nullo negotio dimanare. Condolerem tibi magis, nisi scirem gratias te debere Deo, quod non nisi senem & grandævum patrem amiseris. Mihi ante depositam prætextam ereptus parens uterque, tibi jam secundum conjugii & plus quam viro. Ut, si loquendum humanitus, melius tecum, quam mecum egisse fata videantur. Miratus sæpe in parente tuo fui integram vegetamque rationem, ac bonæ mentis robur, & languente corpore erectum spiritum. Amavi in illo candorem, humanitatem, & quo in patriæ incolumitatem ferebatur, affectum. Familiare illi erat in prandio & cœna preces Reipub. nostræ necessitatibus accommodare, & universali precationis sacræ formulæ inferere τὰ ἑκαστα. [*à singula.*] Libens illa audiui coram non semel, fateorque me non pauca pietatis officia ab ipso didicisse. Iam Deo & Christo propius fruitur, quem coluit, in quem credidit. Mortuus est in Domino, qui vixit in Domino. Curas nostras & Principum motus ex alto despicit, securus unicè, quid nos mortales terreat. Hoc agamus ambo, mi Borri, ut ab optimo & venerando sene exempla capiamus vitæ honestioris sanctiorisque. Sic enim & vivus & mortuus prode-

E P I S T O L Æ. 641

proderit. Tu imprimis animam genitoris tui, quæ jam in benedictione est, pia recordatione venerare, & quo subsequendum erit, mihi tibi-que vota præmitte. Vale, & uxorem officiose saluta. Liberis meo nomine osculum commoda.
14 Ianuar. 1636.

315.

P E T R O C U N Æ O.

Perscripsit ad me vidua D. Arminii de obitu filioli tui Iacobi, pueruli elegantis & festivi. Memini, quàm esset *χρῶ ποιοῦς*, [*visum excitare promptus*,] quoties quæstiunculas moveret, non sine genio, etiam de rebus sublimibus, & puerilem captum excedentibus. Mallem mihi gratulandi vobis causas offerri, quam condolendi. Licet non desint causæ, ob quas familiæ tuæ gratuler. Quam fatali hac anni tempestate à luis contagio incolumen servavit divinus favor. Non leve adversus humana mala solatium est, malorum communitas. Nisi omnium esset mors, juvenum pariter & senum, meritò naturæ controversiam moverent morituri. Nescio qua aura afflet Zelandia peregrè advenientes. Etiam me aliquando, cum in istas partes habitatum concessissem, febris corripuit & exercuit per semestre, postquam exsuccum me, exanguemque bene confecisset. Non accumulabo rationes, quibus dolorem tuum leniam, cum ea omnia non promptu habeas, quæ consolando homini facere possunt. Capis patientia tua robur à ca-

Pars II.

H

lami-

lamitatum domesticarum consuetudine. Nec potest mortis esse contemptor, nisi qui suorum mortem ferre didicit. Hæc privata sunt. Reip. nostræ fortunam optarem tutiorem esse. Quamquam enim in Germania leviculis præliis victores Sueci animosiores sint, nihil hæc ad rei summam. Instant nobis Cæsareanæ copiæ, & in confinibus undique hærent. Nisi arcem Schenkianam primo Vere aëris aliqua præcox clementia reddat, metuo Trajecto ad Mosam, urbibusque magno ære victis. Dicitur hostis à pecuniis esse instructissimus, ut jam nobis terrore sit, qui proxima æstate Brabantiam magno terrore concussimus. Belli nostri apparatus ad defensionem componi videntur. De induciarum successu despero. Non placent Iovi. Et lactat nos vana spe Hispanus, eaque postulare dicitur, quæ sine publica infamia concedi nequeunt. Nec desinit turbare pacis consilia Gallus, cui opus est occupatis vicinis, ut Lotharingiam teneat. Anglus de Palatinatu recuperando consilia init, sed per Legatos, hoc est, inermes. Vale cum uxore & liberis. 16 Ianuar. 1636.

316.

GODEFRIDO DE HAESTRECHT.

FECIT domesticus dolor, nobilissime Haestrecht, quod tibi longo tempore non scripserim. Illius cum te participem esse vellem, tu Hagæ Advocatorum limina pulsabas, & offas ob-
jiciebas

jiciebas procuratoribus Lentulis, ut loqui vel-
 lent & scribere. Quæsi te apud Dominam de
 Poelgeest, solusque mœrens & querulus sum-
 mo mane Alphenò Coudenkerkam ivi, redii-
 que circa meridiem ad D. Overbeequium. Ut
 verum dicam, male precabar Curia, ut quæ di-
 vortium inter nos fecerat. Malè precabar liti-
 bus, quæ amicitia nostræ pene lethale frigus
 induxerant; malè precabar Grobbendonckio,
 qui te clientem fecerat, & ex homine libero
 aulæ mancipium. Ita mihi periit æstas, Hae-
 strechti, sine conjuge, sine te, sine solatio. In-
 terea cæsus est in Eburonibus Sabaudus, discer-
 pta miserè Thiena, vastata Brabantia, nostri
 rediere sine gloria, intercepta arx Schenckiana,
 & versæ rerum vices. Nihil alienum à belli &
 fortunæ militaris indole evenit. Meretrix illa
 est, & pantomima, & prorsus comica, vultu,
 pede, nutu tota versatilis & inconstans. De in-
 duciis despero. Obstant Brasilia, Gallus, ho-
 stium fiducia, Cæsaris felicitas, aliaque, licet
 Saxonis res in angusto sint. Bello nec servabi-
 mur nos, nec hostis. Arx Schenkiana securita-
 tem nostram flagellat, non tamen penitus tollit.
 Cardinalis Infans feliciter satis auspicatur im-
 perii habenas. Fuiſti Bruzellis & apud amplif-
 ſimum D. Deckerum frontem explicuiſti. Scri-
 bis illum mirificè meis versibus delectari: mi-
 nor etiam illic viris magnis placere Batavorum
 neptias. Si φιλοησίας [benevolentia] pocula in
 sanitatem Barlæi tui bibiſti, non invideo tibi
 H 2 istud

istud gaudium. Ego vicissim hic, ne me putes ab omni humanitate exaruisse, ad tuum nomen hausi spumantem pateram. Rogas ubi? apud Vicosortium meum, quem si propius nosset, unum hunc omnibus tuis Canonicis, & regularibus & irregularibus præferres. Vbi Ultrajectum reversus fueris, me invise, & viduitati meæ condole. Ni feceris mittam tibi divortii libellum. Multa habeo, quæ in sinum tuum effundam. Sunt quæ risu tecum excipere volo, sunt quæ lachrymis prosequar. Iam exacti sunt anni aliquot, ex quo non vidi te. Quæ hæc in amore remissio est? quis torpor? Vale heros cordatissime, & amicorum frigidissime. Amstel. 28 Ian. 1636.

317.

P E T R O C U N Æ O.

*C*ognatorum charissime,

Noli conqueri, quod scribam rarius. Vis me, scribere, ut scribam? non audeo non seria tibi scribere, qui ubique serius es, & rerum æstimator gravissimus. Chartas rerum inopes scio te averfari. Si momenta Reipub., hostium molimina, legatorum arma nossem certius, scriberem crebrò. Iam cum & benè valeamus nos, Dei beneficio, nec sinistri quicquam de familiæ tuæ statu resciscam, gratulor tacitus & tibi & mihi, & silentio tanta gaudia involvo. D. Vortio fasces Academici benè feliciterque cedant. Non debebat illic lascivire juvenus, recenti adhuc

adhuc tantæ cladis memoria. Nuper orationem habui de Cœli admirandis, Physicam auspicatorum. Excitandi interdum sunt animi studiosorum, & minus moroso sermone ad Philosophiam pelliciendi. Vidi librum de Mari clauso, magno molimine & apparatu à Seldeno scriptum. Sed non difficile erit tibi, cui has partes demandatas ajunt, clausum Mare aperire, utpote & historiæ veteris, ac juris divini pariter humanique peritissimo. Dignum est te argumentum, quo demereberis Batavos omnes, & quotquot fortunam libero Mari experiri amant. Vale cognatorum charissime, & tuos saluta.
3 Feb. 1636.

318.

ARNOLDO BUCHELIO.

*A*mplissime vir,
Ignosce, quod præter morem meum dudum fuerim silentiarius. Fecit privatus familiæ meæ luctus, ut mihi & amicis defuerim. Nunquam me invisit amicissimus Petitius, quin de te & valetudine tua inquiram sollicitè. Ex quo enim tibi innotescere cœpi, eo me sensi in te affectu ferri, quo filii solent in parentes. Admiscuit eruditioni tuæ benignus Deus morum suavitatem, quam ista ætate in plerisque desideramus. His pellicior & pertrahor usque in amorem tui, & reverentiam sedatæ ac minimè morosæ senectutis. Diu est, quod de climacterico anno mihi scripsisti. Illi jam accessisse arbitror

tror octavum novenarium. Interea studes , & minimè ociosus es , & immerentem me omni officiorum genere prosequeris. Experior , mi Bucheli , verum esse in te , studia senectutem alere , & vitæ fatiscentis tædia discuti optimarum rerum lectione. Mihi , quamvis tetrico philosophorum ludo includar , subinde libet in amceniores literarum hortos deflectere , & leporis aliquid aspergere gravitati Aristotelicæ , ut sapiant auditoribus , quæ docemus. Habui nuper Orationem de Cœli admirandis , cum Physicam essem prælecturus. In ea , dum res philosophicas tracto , hoc conor agere , ut Philosophi voces phrasèsque dissimilem. Si legere vacabit , invenies plurima , quæ in summi numinis te admirationem rapiant , præterquam , quod & piè & non sine parænesi claudam. Vivimus in ea urbe , in qua virtutem post nummos plurimi sectantur. Itaque vapulare interdum necesse est , ambitionem , avaritiam , intemperantiam , luxum , vitia magnis civitatibus familiaria. Cognato tuo D. Vorstio fasces Academici obtigerunt. Gratulor illi honorem hunc , qui virtutibus ipsius debetur , quamvis ob studiorum inordinatos motus non careat suo opere iste honos. Vale , & conjugem meis verbis saluta. Amstel. 12 Feb. 1636.

319.

JOACHIMO VICOFORTIO.

*A*mplissime Vicoforti,

Dum tu aulæ vacas, ego illam fastidiose disco spernere. Splendorem istum non fero, noctuis similis, quæ tenebras amant & latibula. Quam suave est vel Hugenio missitare versiculos, vel tibi, vel matronis supra sexum eruditis. Hac condicione non permutem Divitias operosiores. Est domi meæ D. Overbeequius, cui dum domum meam aperio, aperio litibus, in quas adversariorum improbitate pertrahitur. Parum abest, quin fiam causidicus, aut forensis rabula, adeò auribus meis obstrepunt crediti & debiti vocabula, ut videar δικαιολόγος, [*juris defensor*,] & mercurialium controversiarum arbiter. Advocati non semel mihi, & meritò, exprobrant rerum istarum imperitiam, quoties obloqui audeo, & interpellare exercitata litibus ora. Fero patienter verbera hæc, & Asini Apulejani exemplo excipio tergore graves ictus. Recitent illi leges Codicis & edicta Imperatorum. Mihi non obtusum adeò est pectus, quin videam æqui & iniqui discrimen. Miseret me illorum, de quorum bonis disceptant isti Rhetores. Non eguit ipsorum opera Diogenes, cui de pera & dolio nemo, quo sciam, litem movit. Nec audies unquam Barlæum ire in partes, aut litigare pro rostris. Placet illud Bilbilici: *Lis nunquam*. Nobilissimo Hugenio

trade hos versus ingeniosissimæ Tesselæ. Non
carent genio, nisi me aut affectus aut cœca ad-
miratio inumbrant. Addidi epigramma meum.
quia ut proverbium habet,

Mulier pudica non it sola.

Vale & citò redi. Ita placabis Dominam, mihi
placebis. Amstel. 16 Mart. 1636.

320.

CONSTANTINO HUGENIO.

Quantos tu, mi Hugeni, fluctus in simpulo
excitas, quanta fulmina è pelvi das. Quia E-
pigramma molliusculum effudi in laudatissimam
Tesselam, quia ad Belgicos ejus rhytmos ver-
ba reposui minus severa, credor tibi amare.
Non sum lapis aut stipes, cum illi assideo. Nec
quoque sum naphta, qui sine propiore contactu
concupiam flammam. Refruxi, amicissime, ca-
pit cum ætate & annis incrementa prudentia.
Ipse Horatius, Naso, Catullus amatores stre-
nui, tandem necesse habuerunt canere,

Nunc arma, suspensumque bello,

Barbiton hic paries habebit.

Illa, ut scis,

Vatis amatoris Tessela scripta manu,

magna gravitate præsentem vitæ statum tue-
tur, & pro eo verba facit. Ego ne videar
modestam simulationem observasse, laudo insti-
tutum, sed constantiam me ut plurimum in
istiusmodi votis desiderare affirmavi, cum fe-
mina nec Capitoli saxum sit, nec Mathemati-
corum

corum cubus, nec ex Parcarum aut Fatorum ordine, quæ immobilia habentur. Sunt plurima, quæ in ista matrona veneror & suspicio. Est aliquid, quod displicet, cuius nota est †. *Quod si non animo fixum* &c. *Huic uni forsitan* &c. Deterrent me à secundis nuptiis acerrimæ Hieronymi invektivæ, præter novercalia odia. Et videntur gentiles illas permisisse magis, quam probasse. Sæpe indignor genti nostræ, quod illud à se impetrare nequeat continentiae robur, quod sibi imperant, quotquot monasticam vitam amplectuntur. An aliud ipsis putas esse jecur, quam nobis? an precum assiduitate putas contundi carnis petulantiam? an vigiliis & jejuniis exarescunt? an fascino utuntur & medicatis herbis? quicquid sit, vivunt patres illi tranquillius, nec necesse habent suas epistolas inferere Heroidum epistolis. Quæ in Pontificis manum deletoriam scripsisti, acutissima sunt. Præripuisti mihi aculeos, ut vix audeam aliquid reponere. Quæris quid sentiam de Sebastiano Bassone, Aristoteles mastige, vox est præterea nihil. Aristotelem non intelligit, cui oppedit verius, quam contradicit. Legi ante annos xii, & habeo autorem in Bibliotheca mea. Gloriolam quærit ex adversarii celebritate. Si viveret Aristoteles, Hippocrati curandum in Coan insulam mitteret. Petis, ut omissis controversiis theses ipsius *ελεγχτικὰς* [adversarias] excerpam. At nullas habet, mi Hugeni, & quas habet, aut falsum dicunt, aut non

contradicunt Peripato. Ex Andabatarum est gente, qui adversarium sibi fingunt, & velati cœcis ictibus feriunt. Ajax est lorarius, qui dum in fues sævit, putat se Achivos cædere. Cum multa in illo scriptore leges, ignorabis multa, & post fastidiosam lectionem, discedes è convivio non satur, sed famelicus, aut potius *ἀνορεξίᾳ*. [*sine appetitu.*] Vale. 25 Mart. 1636.

321.

J A C O B O P E T I T I O.

A Cademiæ vestræ natalibus non interfui, Petiti amplissime. Non defuere susceptores natæ Palladi, aut testes tantæ rei. Potui abesse à strepitu, & fremitu tumultuantis plebeculæ, quæ Oratores vestros nec intellexit, nec ut intelligerent alii permisit. Tintinnabulis illa & campanarum sonitu magis detinetur, quam declamationibus. Pridie diei, qui solennis fuit Athenæo vestro venit huc D. Cunæus, cognatus meus, potuissem alias ad vestra spectacula pertrahi. Desideraverant multi videre Processum Musarum, Apollinis, Facultatum, qualis exhibitus fuit olim Lugduni in Batavis, quo tempore hujus Academiæ investitura celebraretur. Nimis fuistis graves & expertes ceremoniarum & phalerarum, quibus Remi turba gaudet. Non est aliena à Sapientiæ studiis omnis dementia. Non temere veteres Minervæ ululam consecravere. Ego ordinum vestrorum præclaro instituto gratulor. Benè se habent Respu-

Respublicæ, quas literarum & humaniorum artium cura tangit. Non aliis æquè præfidiis illæ insistant, quam illis ipsis literis & artibus. Saluti namque civium Theologia consulit, valetudini Medicina, bonis oribusque Iurisprudentia. Etiam majus erit doctorum precium, ubi pluribus opus. Cuperem scire, an pellexeris ad te clarissimum Sylvium. Etiam, an istic sit Hæstrechtius noster. Heri me ad solemne prandium pertraxit mercatorum flos delibatus, & fori nostri decora, Vicofortius, Bartelottus, Schuylius, Calandrinus aliique, quibus cum convivari & joculari malo, quam mercari: Cras nobis redeundum ad lectiones. Quare caperanda frons est, & ad gravitatem componendus calamus, vultus, & oratio, nec nugandum ultra. Tu vale, & cum pulchra fecerit te prole parentem conjux tua, fac sciam, quò me teste, illa Christianismo initietur. Vale amicissime. 29 Mart. 1636.

322.

JOHANNI BEVEROVICIO.

DAvus sum, mi Beverovici, non Oedipus. Ex periphrasi tamen, qua hominem illum non indisertum describis, hariolor illum apud aulicos loqui. Quia nomini parcis, parcam & ego. Sacer est, hunc tu Romane caveto. Fertur Galliarum rex Henricus IV dixisse, male se sex Bullonios hostes, quam unum Monachum. Veneror istius ordinis homines, partim quia

quia ejus olim pars fui : partim quia nocere possunt , illo telo , quo se ulciscuntur feminæ , hoc est , lingua. Nolim tamen paucorum vitia toti ordini imputari. Erasmus noster non semel ait, se malos monachos taxare, non monachos , malos Episcopos, non Episcopos. Si uno Scripturæ loco, ut Theologus iste pro concione dixit, decidi potest controversia illa, multiplicasti entia sine necessitate. Nec tu solum, sed quotquot operosius illud argumentum tractarunt , horas perdiderunt optimas. Sed fruatur ille suo textu. Soli loquuntur , qui ex sacro umbone loquuntur. Remoto hoste facile est triumphum canere. Crescunt tuæ disputationes de vitæ Terminis novis doctorum judiciis. Lis fecunda fui , quæ definit , incipit. Vidi etiam ἀπόδειξις [demonstrationem] meam, magno labore refutasse Pedanium. non indignor. patienter fero modeste contradicentem. Nihil reponam, nec enim vacat certare cum pedibus , ut qui longius absunt à rectæ rationis sede. Aries est cornupeta. in quosvis incurSAT, obvios, non obvios. Mitto Orationem meam de Cœlo , quo dignus es ob probitatem , eruditionem, & singularem humanitatem. Nec tamen volo te virtutibus mereri augustum illud domicilium. Nolo impingere in sanas Theologorum theses. Sed cum dignum te cœlo pronuncio , gratiæ te hoc & indulgentiæ divinæ debere agnosco. Tu me ama, & si meam de cœlo sententiam expendere vacabit , ignosce ignorantiae Professori. Vbi una erimus apud
Supe-

Superos, propius edocebimur, num terra rote-
tur, an æther. Si nomini meo bibistis, bibimus
& hic tuo. D. Colvius se salutis tuæ stitit va-
dem, & pro te respondit non invitus. Vbi ad
vos redierit, libera virum optimum gravi hoc
vadimonio. Amplissimum virum D. Sebastia-
num Franconem aliosque meis verbis saluta.
26 April. 1636.

323.

GULIELMO STAACKMANS.

*A*mplissime vir,
Gratissimæ mihi fuerunt literæ tuæ, qui-
bus & patriæ te libertatis, & mei juxta studio-
sum profiteris. Indignaris, maria claudi, sive
jugulum occludi lucripetis Batavis. Si neces-
saria ad vitæ præsentis usum cuivis populo suffe-
cisset benefica natura, possent Principes sui ju-
ris facere, quæ accolunt æquora. Iam, cum alii
aliorum egeamus ope, nec omnis ferat omnia
tellus, vim inferri puto humano generi ab iis,
qui obicem commerciis ponere allaborant. Tu
Seldeni grande opus paucis versibus refutas.
Sufficit. nec enim consultum arbitror, tantam
rem scholarum doctoribus aut causidicis com-
mitti. Si ullibi, hic jus in armis est, aut saltem
armis defendi expedit. Ne si disceptari ad fo-
rensiū controversiarum morem causam illam
patiamur, causa cadat vel hic vel ille. Epigram-
ma tuum argutum est & masculum. Si in navi,
prope sentinam positus, talia scribis, quid ex-
pectabi-

pectabimus à te , ubi inter bene olentes aulicos ambulabis. Exigis à me Epigramma. Mitto duplex : licet periculosum putem scribere ea, quæ Regibus ac Principibus displicent. Non debebam ego Regem Britanniae offendere , qui me Torquatum fecit. Sed qua est ille prudentia & animi magnanimitate, non metuit sibi à poëtico strepitu. Malunt reges sibi obloqui corvos poëtas & poëtrias picas , quam Veliferas arces & castra natantia ponto. Pertrahe , si potes , in hanc scenam Zulechemi Dominum, & amplissimum Honerdum. Ego petitioni tuæ nolui non obsequi. Sed cave, Tamesin conscendant, quæ scripsi. Vale. 27 April. 1636.

324.

P E T R O C. H O O F T.

PEtis versiculos, qui nuper inter pocula mihi exciderunt. Eos habe. licet gravitatem tuam minus deceat , legere ridicula , quæque in Vela-bro minus teruncio emas. Amicitiae tamen nostræ me hæc debere puto , ne quicquam tibi denegem eorum , quæ tu æstimare videris. Multis tibi nominibus obæratum sum. Alloquio tuo & mensa non semel dignatus es. Amicis ad hæc tuis , viris amplissimis humanissimisque Schuylio & Bartelotto me annexuisti , cum Italis ac Sabaudis commisisti , & honoris tui radiis adeò me illustrasti, ut jam alicujus pretii esse videar & inter reliquos , velut umbras , micare. Crede, ambitiosum me facis. Inter Crassos ac
Lucullos

Lucullos jam ambulo, pari penè gradu & animo. Si opum mihi minus est, plus in est ejus virtutis, qua illas, præ bona mente, vilipendere possum. Hoc debemus literis. Si oculis non profunt, cupiditatem flagellant & castigant, ut minus petamus, quia paucis ad vitam nos egere scimus. Sed nimis apud te graviter videbor philosophari, & intempestivè commovisse Stoam. Abrumpam sermonem, si te cum uxore liberisque plurimum salvere jussero. Cum uxorem nomino, sæpe felicitatem tuam tacitus mecum rumino; cui post primas nuptias obtigit matrona, nec in amoribus difficilis, nec moribus morosa, affabilis, sine supercilio, sine fastu, tui amantissima, amicorum tuorum studiosissima, breviter, Brabantinæ indolis. Tu quod facis, illam æstimare & amare perge. Ac quoties illi pro more tuo ingeminabis oscula, cogita, omnibus te illa & singulis virtutibus imprimere. Vale vir præstantissime, & luxurianti calamo da veniam, sum enim contrà quam velim, ἀγᾶρ. [cælebs.] 6 Non. Maji, 1636.

325.

P E T R O C U N Æ O.

C*Ognatorum charissime,*

Invaluit hic contagio, quæ vobis superiore anno fuit luctuosissima. Eodem vivimus climate, eodem fruimur aëre. non alia hic nobis coeli tempestas, quam vobis. Et tamen viget hic & serpit

pit lues ista, quæ apud vos desæviit prorsus & languet. Vnde colligo, evidentem & manifestam morbi istius causam ab humana mente difficulter deprehendi posse. Nec adeò hic sævit, ut terribilis sit iis, qui didicerunt moriendum sibi aliquando esse serius, ocysus. Urbem inhabitamus amplam, quæ laxis & ædium & morientium spaciis distinguitur. Nondum numerum Libitina excessit quadringentorum. Arcem Schenkianam partibus nostris denuo accessisse mecum gaudes. Eo es animo, qui publicæ securitati unicè favet. Victa est tempestive, priusquam exercitum ex hybernis excire potuit hostis. Nunc de pace cogitant Urbanus Pontifex, Galliarum & Hispaniarum Reges, & Cæsar. Exhaustis ærariis mitiora consilia suggerit communis indigentia. Aliud hæc, aliud suadet regnorum sitis. Mitto epigramma, quod in recuperatam arcem scripsi. Difficile mihi est abstinere à versiculis, quoties argumentum mihi lætius objicit fortuna. Addidi unum & alterum in librum Seldeni. Sed non est, quod ab hoc armorum genere sibi metuant Britanni. Versiculis uti nec clauditur mare, ita nec recluditur. Expectavi, ut liberos tuos mitteres hac æris tempestate. non debes nimis esse meticulosus. Vidisti illa, quæ in Academiam Trajectinam scripsit ingeniosissima Anna Schuurmans. rogatu amicorum laudavi encomiasten. Ea tibi impertior, licet magis ames legere Democritos, Zenonas, inexplicitosque Platonas. Vale. 25 Maji, 1636.

THEODORO SCHREVELIO.

Nuptiis filii tui gratulor, amicorum dignissime. Sponsam commendat modestia, forma, patris humanitas dignitasque. Sponsum doctrina, candor, morum suavitas & patris doctissimi celebritas. Optimis auspiciis junguntur, quos virtutum similitudo jungit. Nec dubito, quin hæc amantum copula cessura sit tibi familiæque tuæ in solatium & decus. Vtrique meis verbis benè precare. Et Sponso dic, ut caveat sibi à præterito *amavi*; & Sponsæ, ut discat, *amo*, *amas*. Reliqua tempora & personas non curant conjuges. Invitas me ad nuptiale festum, cui interesse ob veterem amicitiam cuperem, nisi dissuaderent plurima: locorum distantia, lectionum officia, quæ hic religiosius observamus: necnon memoria charissimæ conjugis, quæ voluptates meas, si quæ intercurfant, indies objurgat. Nec ignoro, amicorum & tibi & amplissimo Consuli abunde esse, quibus sacra ista peragatis. Finge me (nam Poëta es) convivis tuis assidere, ego fingam idem, & tacitus fruar ista imaginatione, fruar sermonibus, deliciis, cupediis longo ordine accumbentium. Si viduæ aderunt, quarum apud vos est copia, tu selige unam, quam judicabis mihi maximè convenire. Et si audes (quid non audebis pater nuptiarum & mensæ induperator?) nomine absentis Barlæi illi propina. Admirabiles sunt in

Pars II. I amore

amore casus, & occasionibus ridiculis non raro videas confici res serias & magnas. Scribo festiva, quia de nuptiis loquimur, à quibus abesse debet ambitiose tristis oratio. Addidi disticha aliquot in nuptias, ut officium tuum aliquo grati animi officio rependam. Vale charissime, & uxorem liberosque salvere jube. Septemvratuſ meus novis sponſis ἐπευφημεί. [*omnia fausta precatur.*] Amstel. 28 Maji, 1636.

327.

WINANDO SCHUYLIO.

A *Mplissime Schuyli,*
Mitto tibi versiculos inter pocula primum natos, postea renatos domi. Lepidi sunt, quia à me scripti, ad te & de fratre tuo. Ego tristis Deus non sum, & qui putant me leguminibus solum pasci, aut cibis melancholici succi, vehementer errant. Tu leporum pater es (cave ne in accentu pecces) & propius ad Democriti indolem accedis, quam Heracliti. Frater tuus nova & lepidissima conjuge beatus, non esse mavult, quam non ridere. præsertim cum procaci oculo Claram suam adspicit. Nam, nisi à pristinis moribus degeneravit, ipse Jupiter ejus adspectu trifidum fulmen è manu deponat, & ad omnem se componat festivitatem & suavitatem. Quare non decuit me, apud lepidos convivas, & recentes sponſos triste carmen eructare. Loquor de basiſolis, quorum uti nondum apud me exolevit memoria, ita acer-

E P I S T O L Æ. 659

acerbissima est recordatio. Miserum est fuisse felicem. tibi ac fratri messis in herba est. Fortè & me aliquando respiciet lætior Iuno. quod an optare debeam, nescio. Hoc scio, me posse, quod ut velim dissuadet paterna cura, amorque prolis plurimæ. Fratri epigramma trade, in tesseram initæ amicitiae, cuius tibi & laudem & gratiam debeo. Vale. Amstel. 7 Iun. 1636.

328.

R O C H O H O N E R D O.

Non est mei moris, amplissime Honerde, fatigare aures Senatorum importunis flagitationibus. Curiam vestram veneror, sed gratulor mihi, nihil in ista arena negotii esse homini, literis quam litibus addictiori. Verum quod petam, peto in amici gratiam. Is Joachimus Vicofortius est, vir singulari mihi amicitia junctus, ob eruditionem, humanitatem, & virtutes, quas Aristoteles *ὁμιλητικὰς* [civiles] vocat. Est illi lis coram Curiâ vestrâ, non suo, sed Ducis Wirtenbergici nomine. quæ jam per annos aliquot è vestris pependit suffragiis. Rogat, ut illâ expediri possit, & ut eo favore rem ipsam prosequaris, quem ad illam conferri causæ bonitas & Iudicium incorrupta probitas permittent. Ego illius petitioni jungo meam, ut duplici officio & ipsum & me, virtutum tuarum cultorem æternum & *ἀκίβδηλον* [sincerum] devincias. Sentiat amicus meus, aliquid apud te posse vocem ejus, quem amas unicè. Silent jam

Musæ meæ silente classico. nec silent proflus,
nam & Epigrammate nuper recuperatam ar-
cem Schenckianam profecutus sum, & librum
Seldeni duplici ultus sum Epigrammate. Vale.
13 Iun. 1636.

P E T R O C. H O O F T.

NOn jam de perdicibus aut leporibus ver-
ba faciam, magnifice Hoofdi. uti in bru-
males mensas fercula ista servari solent, ita æsti-
varum meditationum minus idoneum videntur
argumentum. Omnino tempestivum est, de
Passerculo loqui. Avis illa verna est, quæ sub
æstatis initium parit. quo tempore, dum for-
mosissimus est annus, expeditissimum est vati-
bus ingenium. Non terræ solum, almæ om-
nium nostrum matri, sinum recludit calor, sed &
mentibus non omnino malis, quibus præter
veternum & vacunam nihil æquè invisum. Tu
prævivisti, & quia domi habes filiam magistram
passeris, & passerem discipulum filiæ, eleganti-
arum tuarum pyxidem reclusisti, accuratis versi-
bus. Ea dixisti & scripsisti de passere, ut parum
absit, quin simili condicione velim esse passer.
Non morerer, sic tibi dictus. Iam quia passer non
sum, sed potius graculus inter vos, strepo &
tumultus edo incompósitos. Quod si me pipi-
re putas, ero te iudice passer: si stridere, noctua;
si fritinnire, cicada. Quidvis esse malo, quam
silere, ubi carminis materia objicitur. Caballis,

ne per campos alienos grassentur aut septa transiliant, appendi solent è pedibus ligna. Tauris ferocientibus obligatur os. falconibus oculos capsulæ regunt, ne intempestivè avolent. Mihi scripturienti capistrum injice, quale voles. Feram patienter. Sed, si vel linguam refeces, uti Philomelæ fecit Tereus; si manum amputes, quod Deiphobo fecere Græci, inveniam viam, qua me liberem à versibus. Non scriberem hæc, nisi & te huic morbo affinem putarem. Condolet claudus claudus, cæcus cæco. An insanus insano condoleat, dubito. quod si insania est, scribere versus, amabilis insania est. Filiam tuam velim places, ne indignetur me passeris virtutibus dignissimum ejus nomen sociasse. aliter fieri non potuit. Quis clavam Herculis laudabit sine Hercule? tridentem sine Neptuno? pectinem Veneris sine Venere? Tu lege, & filiæ aperi sensus, quos expediet illam intelligere. Amstelod. 24 Jun. 1636.

330.

A D R I A N O P L O S I O.

QUæ per humanissimum virum Matthæum Heuft curari jusseras nobilissime Ploosi, curata sunt probè. In cellam meam penuariam descendit grande vas vini Parisiensis, sive Francici, tua liberalitate & jussu. Solent istud vinum bibere, quibus lautior est fortuna & lautius palatum. Domi meæ minus preciose bibitur, licet apud opulentiores mercantes inter-

dum hoc potu excipiar. Nunc videor mihi ejusdem esse sortis cum Lucullis, & Pomponiis nostris. Qui me inviserunt amici, mirantur istiusmodi apud me latices fluere. Et sunt inter illos non pauci, qui me taciti prodigilitatis incusant. Ego, qui ab omni dissimulatione sum alienus, Deorum hæc dona esse assevero, & nominatim tua. partim ut illis probem frugalitatem meam, à qua istiusmodi calices frustra expectaverint, partim, ut credant me à te unicè diligi. Quoscunque mihi iste liquor amicos conciliabit, tibi debebo. Quoscunque scribam hoc tempore versiculos, eorum autorem puta non Apollinem & Musas, sed rubellum hunc Bacchum. Si deteriores erunt prioribus, cogita me nimium bibisse; si meliores, cogita me ad leges bibisse. Non poterunt non esse mediocres, cum isto humore irrigatur vena. Si aquæ essem potor, dilutus esset carminis genius. Nunc cum bibam cum Principibus, & non è vulgo hominibus, assurgam altius. Multa Diræum levat aura cygnum, canit de Pindaro Horatius. De me dixerit aliquis: Multa Barlæum levat aura Ploosi, & favor nullo ipsius merito provocatus. Sum tuus & fui antehac non uno beneficio & officio. Gratias agerem, si par essem facundia. Ea cum desit, perpetua animi recordatione supplebo partes gratitudinis. Impera mihi, quæ à me præstari posse putas. Si impar sum beneficiis, non sinam me vinci tui amore, reverentia & obsequio. Sed
quid

quid hoc rei est ? vix beneficum te mihi & munificum præstitisti , cum ecce superveniant ab uxore missi Limburgenses duo , voti mei in mensis summa & deliciae ; adeò isto casei genere delector. Non potest non mihi benè esse , postquam non in perniciem , sed salutem meam conspirant Jupiter & Juno Thienhovientis. ille vini dator , hæc caseorum. Ne bibere volenti desit irritamentum , uxor caseos mittit. Ne de caseo edere volenti desit , quod eundem digerat , tu vina mittis. Uterque habete & possidete me , qui meus esse desii , postquam vobis obnoxius vester esse cœpi. Vale vir nobilissime & conjugem plurima imparti salute. 28 Jun. 1636.

331.

R O C H O H O N E R D O.

M *Agnisice Honerde ,*
 Verissimè ais , sex menses nobis periisse , ex quo illustri legatione defunctus domum reversus es. Non ignoras , cujus illa olim fuerit vox : Amici diem perdidimus. Quare & illud mihi tempus periisse arbitror , quo nec incolumem te videre licuit , nec coram tibi loqui , aut permutare versiculos. Abeuntem epigrammate uno aut altero prosecutus fui. Et statueram in medios Sarmatas mittere litteras & carmina. Verum quæ inopina mihi meisque supervenit charissimæ conjugis mors , animum mihi expectoravit , ut mei & amicorum oblitus per menses plures confederim in vestibulo Orci , ubi lu-

Etus & *ultrices posuere cubilia diræ*. His nebulis aliquà discussis, redeo sensim ad me, medelam adferentibus amicis, tempore, studiis. Legi cum voluptate Epigramma, quod mihi inscripisti & arci Schenckianæ. Nihil ab ingenio tuo detrivere truces Gothi, aut *junctus Sarmata velox Pannonio*. Antiquum obtines, acumine, inventione, numeris, & dictione optima. Quod judicium nolo putes profectum à censore, sed ab amico. Reposui paucula. Nec enim jam mihi vacat prolixo esse. Scribo, ut rideas cum Zulechemi Domino. Ambo credite, nec omnino hæc à me serio dici, nec omnino joculariter. Dido sum, aut potius Æneas, qui animum *nunc huc celerem, nunc dividit illuc, In partesque rapit varias* &c. Misi Hugenio jambos in passerem Bartelotæ, hos lege, & iis lectis dic: me nondum didicisse juveniliter loqui. Vale Vir præstantissime & celeberrime, & cum Constantino me constanter amare pergite. 26 Jun. 1636.

332.

CORNELIO VAN VEEN.

O *Rnatissime & amicissime vir,*
Depudit pro me cognatus tuus H. Stoc-
kius, & qua valet facundia, impetravit à te flo-
res, qui me ingenti tibi debito obligant. Est
hæc ultimi hujus sæculi non ultima forte insa-
nia, æstimare res exigui momenti, & sine qui-
bus vita hæc nostra nihilo se haberet pejus. Ego
eidem

eidem insaniam affinis esse cœpi, ut duplici jam furore agi videor, Musarum & florum. Sed hic Mularum furor inveteratus est. Florum amor nuper me invasit. Quem tua liberalitas mirum in modum accendit. Et ne putes me gregariis solummodo Tulpis delectari, habeo Helvetios, Coronas, Perlas, Goliathos, Cornherios, & Ioannem Gerardi. Hi inter flores meos sunt antesignani, & supra alios precio nominibusque excellent. Bulbos tuos terræ mandabo, ubi erit oportunum. Illis mitem hyemem opto & ver idoneum. Tibi jam gratias ago implicitè. Vbi bulbos explicuerit novus annus, & fœtum propius nosse dabitur, agam gratias oratione magis explicita. Effigiem parentis tui, viri optimi & gravissimi exolculatus fui. Vbi æri incisa fuerit Apolonia soror, non fraudabo eam debitis laudibus. Novi vivam ab ingenio, castitate, & morum suavitate, etiam ab artibus, quas plurimas calluit. Potuit illa, cum viveret, trigam facere, cum Anna Schuurmans & placidissima Tessela, nisi quod prior illa, rarissimo exemplo, Latini Græcique sermonis peritiam reliquis virtutibus junxerit. A me si quid proficisci posse putas te tuisque dignum, pete cum imperio. Hoc Epigramma in sororem si non placeat, dabo aliud:

Sculpīs Apollineam frater germane sororem.

Et tamen hic nullam sculpīs Apoloniam.

Sculpe oculos, exsculpe manus, exsculpe capillos,

Hoc, quod dextra nequit sculpere, Apolonia est.

Vale amicissime, & matrem, fratres, sororesque
meis verbis saluta. 6 Iul. 1636.

333.

P E T R O C. H O O F T.

OB passeruli fugam, tantum tibi condo-
leo, Hoofdi præstantissime, quantum tu
doles. Plorent & singultiant virgunculæ, qui-
bus copiosius est humidum, & minus firma ra-
tio. Nos ficcioris temperamenti jacturam illam
sine lachrymis & gemitu feremus. Maluit pas-
serculus libero aëre frui, quam dominæ suæ esse
illustre mancipium. Adeo eorum omnium, quæ
juris naturæ sunt, etiam animalibus à ratione de-
stitutis amor insedit. Est inter illa libertas,
quam specioso carceri, & aulæis tuis ferculis-
que prætulit generosa avicula. Et forte, secun-
dum Pythagoricam philosophiam, transmigra-
vit in passerulum hominis benè nati anima,
quam puduit sartoriam addiscere. Verum, quid
artifici isti fiet inter indoctos passerulos? an
artes, quas didicit, dediscet desuetudine? an
alios eandem artem docebit? prius arbitror.
Gaudet interim passerculus, quod evaserit. Quæ
de Deorum convivio in memoriam revocas, re-
vocabo ad animum. Rarus admodum est tot
Doctorum in eodem convivio concursus. Wit-
tios, Hugenos, Hoofdios, Vossios, Realios,
Moririos accumbentes vidimus. Videbar mihi
spectare mensam, qualis fuit, cum Lælii, Sci-
piones, Catones, Fannii, Scevolæ pranderent
unà.

unà. Sed hæc carmine exaggerari poterunt, à quo non est aliena hyperbole. Proxima hebdomade à lectionibus feriabimur. Quis enim lustrante canicula loqui cupiat? Tunc, si quod in caballos imperium habebit Bartelottus tuus, finam me Muydam vehi, ut videam Satraparum dignissimum, matronarum humanissimam, virginum modestissimam. Vale Vir maxime, & salvere omnes jube, quarum aut maritus es aut pater. 13 Jul. 1636.

334.

CORNELIO VANDER MYLE.

Nobilissime Myli,
 Habes justissimas causas succensendi, quod aliquot retrò mensibus nihil ad te dederim literarum. Mortuo Molino erepta est utrique nostrum occasio permutandi literas. Solebat enim heros iste Venetorum suorum literarias merces liberalius exteris impartiri, & judicia aliorum cognoscere. Extincto hoc lumine minus lucemus omnes, quos favore ille suo irradiabat. Nihil tamen de meo erga te amore tuosque decessisse puta. Quem venerandi nominis tui recordatione fuscito foveoque indies. Nullum à me alienum magis est vitium quam ingratitude. Hæret infixæ pectori humanitatis tuæ memoria, quam non solum explicuisti erga me cum Academiam Leydensẽ curares, sed & tunc, cum publicus favor à me vultum immeritò avertisset. Quo tempore filios tuos
 insti-

institutioni meæ & curæ commifisti, ut ostenderes non sperni à te, spretam malis innocentiam. Literas accepi Vienna, quibus petitur, uti Laudatione aliqua velim prosequi Coronationem Ferdinandi Tertii Imperatoris. Ego, si sapiam, abstinebo ab illa laudatione religiosissimè. Quanquam enim ea possem scribere, quæ ad laudes Imperatoris faciant, nec Reip. nostræ adversentur, tamen, prout sunt nostratum ingenia, judicarent me beneficio obstrictum Austriacis. Scimus Cæsarem non quidem aperto Marte nos petere, sed per latus Hispani nobis gravem esse. Laudavi etiam non ita pridem Gustavum Sueciæ Regem, ejusque adversus Cæsarem bella probavi. Iam ut laudem Ferdinandum Tertium ob gesta adversus Suecos feliciter bella, à prudentia mea impetrare non possum. Non sum ambidexter, sed ab omni adulatione alienissimus. Cuperem obsequi petitioni illustrissimi Legati, sed hoc cavendum, ne dum foris benè, domi malè audiam. Fortè nimis sum meticulosus. Sed & illud certum, illam Cæsaris laudationem à me profectam calumniæ suspicionibusque oportunam fore. Velim tamen audire ex te, quid consulas. Magis consiliis tuis, quam meis geram. Licet non dubitem, quin idem sis suasurus, quod jam apud animum decrevi meum. Vale Vir nobilissime, & Dominam vander Myle, liberosque saluta. Desidero scire, ut valeat filius, cui populi commissi & tanta negotia curæ. Ad literas meas nondum rescripsit; sive
quod

quod occupatior sit, sive quod fastidiat præceptorem umbraticum. Prius statuere malo, ne peccem in amicitiam, quam hæctenus mecum candide & sincerè coluit. Amstelod. 17 Iul. 1636.

335.

CONSTANTINO HUGENIO.

ACquiesco, doctissime Hugeni, & tibi quinto congressu succubuisse, gloriosum arbitror. Solent pueruli nostrates, vecordes vocare boves, qui ad primum ictum concidunt. Me non primo, sed quinto ictu stravisti, & bove fecisti mutiorem. O salutare aquas, quæ genium summi ingeniorum in me concitavistis, sine amicitiae naufragio. O salutarem metum, qui audacem me fecit, ut responsarem viro inexhaustæ eruditionis, & solidissimorum acuminum. Crescit tibi scribendo carminis vis, & magis acuitur. Mihi eadem torpet & hebet. Abrumpendus ergo coeptæ contentionis funiculus, nec ferra ultrò trahenda per illam lineam. Si tecum non conscendi turbidum & procellosum Yam, conscendi Aganippen. Si horrui Flevum, non horrui Castalios lacus. Si ignominiosum putas, aquas metuere, est metus ille morbi species, cujus meminit Naso:

— *Tollere nodosam, &c.*

Nec formidatis auxiliatur aquis.

Noluit Pythagoras aquis se credere, ne anima, quam ille igneam putabat, aquis extinguere-
tur.

tur. Et cujus quæso est illa exclamatio ?

O terque quaterque beatos, Quæis ante, &c.

Ejus est, quem toties à fortitudine laudat Maro.

Cujus illud, — *Dî maris & cæli, &c.*

Nalonis est. Ut jam me & philosophorum, & Ducum, & vatum exemplo tuear. Quare non detrecto vocari *amans strenuus*, modo me non absorbeat mare Thracium : non renuo vocari per ironiam *prudens philosophus*, modo credas, me malle terra iter facere, quam mari, ubi à morte digitis secernimus quatuor aut septem. Sim tibi *fortè vir*, modo me credat talem esse futura conjux. Hac scaphula vehi malim, quam ista Argo, quæ à *sublimi cubiculo* nomen habet. Illa vectores plures respuit, nec admittit præter unum. Hæc cujusvis sectæ homines admittit, Cynicos, Satyricos, Dentatos, qui mihi *ὁδὸφοβίαν* [*aquæ formidinem*] meam tam falsè, tam doctè, tam copiosè exprobraverunt. Ut cœpi dicere, acquiesco, & quæ vetus Scholarum formula est, accipio responsionem. Prætorix tuæ navi demittit vela meus lembulus. Amatori maximo proletarius pater, viro fortissimo & masculorum genitori, sequioris sexus pater. Vale præstantissime, disertissime & amicissime vatum, & me doctissimis tuis jocis exerce, cum finent, aula, castra, Princeps. Amstelod. 2 Aug. 1636.

336.

P E T R O C. H O O F T.

M *Agnisice Hoofdi,*

Vide quantas tempestates excitaverit nupera illa convivii tui, aut potius convivarum tempestas, quæ sub mensæ tuæ, & solis occasum accidit. Quam miserè vapulo ob aquarum formidinem. Non contentus fuit Hugenius, me uno Epigrammate perstrinxisse; verum carmina carminibus superingerit, ictibus ictus, respondi, non ut volui, sed ut valui. Ita loquor, ut scias, me non omnem paranomasiâ damnare. Nisi jam bellis Belgicis totus implicaris, nisi te Principum casus, imperiorum vices, populi furores, castra classicaque totum habent, lege bella nostra & iras innoxias. Paucis epigrammatibus constat lis. Non fuit inutile, me tunc timuisse. Elicuit iste metus, aliquid non indignum tuis auribus, quæ quanquam Batavæ sint, nihil minus sunt quam Batavæ. Hugeni Epigrammata innuo, quæ te volo bis legere ob reconditos sensus. Deorum proprium est nubibus involvi. Ego conspici amo, cum homo sim, & in dictione *σαφηνείαν* [*perspicuitatem*] unice selector. Pinguntur nudæ Veneres, Gratia, Cupidinesque. Illas in te veneror. Qui, nescio, quo, me fascino dementasti. Et scio tamen. Cornu es Amalthæum, in quo hæc reposuit benignior Deus, doctrinam, prudentiam, comitatem, urbanitatem, recti honestique amorem. Si Charis

ris essem, ruerem in amplexus tuos: si Pallas, discerem à te magis sapere: si Rhadamanthus, corrigerem rigorem tua moderatione & lenitate. Si amator, peterem à te exemplum probandi me conjugi. Et tamen posterius hoc novi satis probè. Et nos aliquod nomenque decusque gessimus. Legi modo epistolam tuam facetissimam de scaris & rhombis, quos Arctois intonatos fluctibus tibi misit humanissimus Schuylius. Fecit ille, ut ad me quoque pervenerit pisciculorum fasciculus. Prunis tuis minatus fueram fatalem diem. Sed licet ipsis hac æstate salvise per me. Post dies non multos Leydam abeo veteres visurus amicos. Inde in prædium D. Overbeequii me conferam, ut fruor solus tristissima viduitatis meæ meditatione. Postea cum Sapientiæ studiis redibo in gratiam. Tu interim vale, & me gratissimo vadimonio tibi obstrictum puta, sine regula excussionis & divisionis. Amstelod. 5 August. 1636.

337.

E I D E M.

Magnifice Vir,

Ex agro Leydenſi domum reverſus, coepi cogitare de promiſſo meo, quo me abiturus hinc tibi obſtrinxeram. Petieras tibi mitti apographa Epigrammatum, quæ Hugenius & ego luſimus ἀποεικάζον [*alternatim*] ſuper aquarum formidine, quæ illum minus, me ſociosque meos magis habuit. Mihi cum relligio ſit, quicquam

quam tibi negare eorum , quæ salva sceptri majestate (ut reges loqui amant) conferri in alium possunt, curavi illa à filio meo describi. Verum prudentiæ tuæ fuerit statuere , an consultum sit illud Epigramma in qua laudatissimam Tesse- lam pro pila habet Hugenus , in Brabantiam mitti. Ego eadem misi ad nobilissimum My- lium, sed absque isto. Non leviter me perculit allatum de adversa uxoris tuæ valetudine nun- cium. Quæsi vi seriò & sæpe ex amicis , quo loco illa esset. Tandem intellexi cum gaudio morbum periculi esse expertem. Debebat opti- ma matrona, humanitatis omnis ἰδιον [genuinum] exemplar, amicis esse immortalis, & tibi potissi- mum Hoofdi ,

Conjugio tantæ Veneris dignate superbo.

Castigat voluptates nostras Deus non una cala- mitate , & ægrotare nos vult , ut mori semper doceret. Hic inter funera quotidiana nobis vi- vitur , & singulis accidere indies posse credi- mus , quod cuiquam. Hæc tela illa sunt procul jaculantis Apollinis , cujus iram lib. 1. Iliad. describit Homerus. Ille felix quem incautum non præveniet mors. Ego, si tuam tuorumque valetudinem votis , precibus , animo omni ju- vero, fecero hominis Christiani, & amici, & stu- diorum eorundem socii officium. Vale Vir maxi- me cum Creusa tua & Ascanio & Lavinia. Am- stelod. 6 Sept. 1636.

CORNELIO VANDER MYLE.

Nobilissime Myli,
 Mitto N. T. chartas argumenti amœ-
 nioris & minus amœni. Amœniora sunt epi-
 grammata, quæ Zulechemi Dominus & ego
 lusimus super aquarum formidine. Exceperat
 convivio magnificus Hoofdus Zulechemi Do-
 minum, Vossium, Barlæum, Vicofortium,
 Schuylium, Baeckium, nec non matronas duas
 Zulechemi Dominam, & Vicofortiam. Circa
 vesperam, cum discedendum esset, oborta tem-
 pestate, timuerunt navem conscendere Vossius,
 Barlæus, Vicofortius. reliqui audaciores navi
 ventisque se credidere. Hinc nata hæc Epigram-
 matum tempestas, quibus Barlæum postridie
 coepit impetere Hugenus, & se tueri Barlæus.
 Lege, at ubi legeris, velim ad me redeant. At
 minus amœni sunt libelli, quos mitto. Cum an-
 te dies aliquot Leidæ essem, tradidit mihi
 magnificus Rector D. Vorstius libellum Ano-
 nymi scriptoris, Daventria missum ad D. Hein-
 sium. quo Epigramma quoddam meum, ante
 sesquiannum scriptum in librum Manassis, de
 Creatione, quæsitis & perversis detorsio-
 nibus malignè interpretatur. Dicit isto Epi-
 grammate contineri varia, quæ Ecclesiæ per-
 niciosa, religioni Christianæ probrosa, & in
 Deum ac Dominum nostrum Iesum Christum
 impia sunt. Socinianismum adhæc auctori Epi-
 gram-

grammatis impingit &c. Suspiciantur Leiden-
 ses autorem esse Vedelium, Theologiæ apud Da-
 ventrienses Professore. Daventriæ excusus est
 libellus, apud hæredes S S. V V. Sebastiani
 Warmboutii. Daventria missa sunt exemplaria
 ad D. Heinsium, Ultrajectum & alio. Ego, qui
 me ex arena Theologorum subduxi, non fuiſſem
 de responsione sollicitus, nisi ob atrocitatem
 criminis respondendum fuisset. Facile enim ista
 Socinianismi calumnia fidem invenit apud su-
 spiciosos. Mitto & auctoris libellum & respon-
 sum. Honoris mei & innocentiae velim haberi
 rationem, cum res exiget. Censor pessima fide,
 voculam è carmine sustulit, & suam substituit,
maneamus pro vivamus. Sensus affingit versi-
 bus meis, de quibus ne per somnium quidem
 cogitavi. Dixit mihi Magnificus rector Aca-
 demiae Leydensis, consilia agitari, uti libellus iste
 Censoris Ordinibus Hollandiae exhibeatur, ut
 appareat Barkeum & Remonstrantes esse Soci-
 nianos. Si contingat hoc fieri, velim responsum
 hoc juxta exhiberi. Non sum Socinianus, nec
 fui unquam. Imo hostis sum illorum dogmatum
 acerrimus. Carmen addidi in fine in Lucifugam
 istum, quod si videbitur acrius esse, cogitet quæ-
 so lector atrocissimum esse crimen, quod mihi
 impingitur. Quid Croesi filio vocem extorſit?
 Vatum genus irritabile est. facit subinde indi-
 gnatio versum. Exemplar velim mitti D. à
 Thienhoven, si istic est, D Catſio Hollandiae
 Advocato, Honerdo, & Schotto, aliisque. Vale

Vir nobilissime cum uxore & liberis. Cuperem N. Tuam propius ex D. Heinsio quærere, quis ipsi exemplaria miserit. Procul dubio novit autorem. Amstelod. 7 Sept. 1636.

339.

IOHANNI HELMONDO.

D *Ossissime Helmonde,*

Putabam te adhuc in agro Leydenſi morari. Sed heri ex amicis audivi, te in Batavorum oppidulum conſeſſiſſe, & ſic è luto in arenas tranſiſſe. Dolui proſectò, quod te frui non potuerim, cum Leidæ eſſem. Non eram meus. Dum Profeſſorum unum alterumve compello, periit mihi dies. Inde diſcedendum ſubito fuit ob Overbeecquii fratres, qui conſectis rebus ſuis Hamburgum properabant. Nec tamen periit apud me memoria humanitatis, qua me excepisti in prædio avunculi, nec detractaviſſem venire iterum, ſi per alios licuiſſet. Illa tuorum officia tibi imputo, qui amicos mihi concilias, quorum in hac urbe maxima eſt autoritas. Peſtis incrementa capit. ut veriſſime dixerit Horatius:

Autumnus febres & teſtamenta reſignat.

Trajecto ad Rhenum, quia eadem illic invaleſcit, diſfluxere ſtudioſi. Superiore anno Leida itum fuit Trajectum, nunc Trajecto reditur Leidam. Vides cuivis accidere poſſe, quod cuiquam, & longè jaculantem Apollinem nec Trojanis, nec Græcis parcere. Tu extra telorum jaçtum, ut opinaris, aëre frueris maritimo, qui falſedine
ſua

sua fortè corriget aëris malignitatem, Sed quid studiis tuis fit amicissime? opinor te jam totum Martialem & Iuvenalem devoravisse. Hoc si feceris, non malè collocaveris horas ocio perituras. Sed cum Poëtas illos leges, ne lege illa, quæ fescennina sunt, aut si leges, noli intelligere. aut si intelligas, dissimula apud alios te intelligere. Iesuitæ, ne capax malorum morum juvenus pessima imbibat, Martialem castratum edidit. In quos falsè scripsit Ios. Scaliger:

*Nempe Patres sancti facere hoc, quam dicere malunt,
Quæ vates mavult dicere, quam facere.*

Hæc dum scribo, adfertur mihi nuncium de materteræ tuæ inopinato obitu. Tibi tuisque condoleo communem mortalitatis sortem. Vivimus hic inter funera, morituri quoque, cum visum erit Creatori. Illa hujus vitæ malis incommodisque expedita, ærumnas nostras ex alto despicit, & immortalitatis præmio læta fruitur. Vobis solatio sit, illam vixisse Deo pie, amicis, fratribusque officiosam, nulli gravem. Vale amicissime, & matrem aliosque amicos, quibuscum istic vivis, à me saluta. 10 Sept. 1636.

340.

P E T R O C U N Æ O.

I Am ad te parabam litteras, cognatorum clarissime, cum tuas mihi tradidit tabellarius. Suspicabar enim jam adesse tempus, quo è Zelandia domum esses reversurus. De morte filioli jam ante me certiolem fecerat Domina Over-

K 3

beequia.

beequia. Profectò funestissima tibi familiæque tuæ cuncta tempora. Infantulorum tamen jacturam minus ad animum revocant prudentiores. Si profuit minus; minus quoque noceret. Solatio magis sunt, & discutiendis parentum tædiis, quam subsidio. Nihilominus condoleo tibi, qui liberos soles tenerius amare. resarciat propediem mortalitatis dispendia simili prole fecunda mater. In urbe nostra incrementa capit pestilens lues. numerati sunt hac hebdomade, eorum qui vivere desierunt, 626. Sororem amplissimi Consulis Bickeri heri extulimus. cessit quoque fatis frater natus maximus. In Laurentii Arminii familia abstulit pestis filiam cum filiolo. Nos per Dei gratiam valemus omnes. Filiæ majores natus, per aliquot hebdomadas in prædio Realii commorata, domum rediere. Vix Leida discesseras, cum ad D. Heynsium missi sunt libelli aliquot, anonymi cujusdam Théologi, Daventria missi, quibus Epigramma quoddam meum, ante sesquiannum scriptum malitiose detorquet autor. In illo contineri ait, quæ Ecclesiæ perniciose religioni probrosa, & in Deum ac Dominum nostrum Iesum Christum impia sunt. ajunt Vedclii esse factum. Non respondissem vel ego, vel alius quisquam, huic tenebrioni, nisi atrox fuisset crimen, quod impingit. Nullius ego mihi impietatis conscius sum, licet humani à me nihil alienum putem. Deum testor, non fuisse illam mihi mentem, Iudæos amicos Dei dicere, sed nobis amicos, quoad civilem convictum esse

esse vivendum Deo. Si comma posuisssem post
 voculam *vivamus*, res fuisset plana. Socinianus
 nec sum, nec fui, vellent quidam me esse, qui
 explendi in me odii materiam sollicitè quærunt.
 Sed his innocentiam meam pro scuto opponam.
 Te cum uxore liberisque valere ex animo opto.
 Vale. 12 Sept. 1636.

341.

P E T R O C. H O O F T.

A Llegoricam tuam epistolam cum volupta-
 te legi, præstantissime Hoofdi, applicas le-
 pori Iudeum, Iudæo me, mihi Theologum Da-
 ventriensem. qui otii sui prodigus, infami &
 anonymo nuper libello in me sæviit, & epi-
 gramma ante sesquiannum, sine ullius murmure
 scriptum, in sensum à mente mea & fide prorsus
 alienum detorquet. Objicit mihi impietatem,
 Socinianismum, Iudaismum, aliaque abominan-
 da, quæ, per Dei gratiam, in hoc meum pectus
 nunquam descenderunt. Ad hæc ne filerem,
 monuerunt me viri gravissimi amicissimique.
 Addidi Scazontem, quem indignatio extorsit.
 Crede, me invitum in hanc orchestram pertra-
 hi. nec enim volupe est cum corvis & vesper-
 tilionibus congregari, quanquam jam demum
 sciam, autorem libelli esse Vedelium, Theolo-
 giæ apud Daventrienses Professore. Vbi re-
 sponderit, deliberabo quid facto opus sit. Le-
 viorem calumniam potuisssem contemnere, il-
 la non potui, præsertim ob autoritatem homi-

nis Theologi. Inveniet forte fidem ista criminatio apud eos, quibus exosum Remonstrantium nomen & causa. Misissimè tibi jam pridem. Sed nolui hisce litibus turbare arcem tuam, elegantiae omnis & humanitatis sedem. Libellum auctoris velim ad me redire. nec enim aliud habeo exemplar. Pro lepore gratias tibi ago maximas, non comedam solus. Erunt, qui debebunt per me. Tuorum in me beneficiorum catalogus immensum excurrit, ut mihi apud te quaerendus sit, non tam gratitudinis, quam obsequii & venerationis tui, modus & formula. Conscientia bonae propensissimaeque in te voluntatis me sollor. hac fruar, quoad vivam. Valetudinem tibi, uxori, liberisque diuturnam precor. Vale.
22 Sept. 1636.

342.

GODEFRIDO DE HAESTRECHT.

Solebamus per literas, nobilissime Haestrechtii, interdum de rebus privatis, interdum de publicis loqui. Fuit epistolae nobis materies modo Austriacus, modo Auriacus, modo victa Breda, modo victa Sylva Ducis. Verum, ut in virtute omni laudari solet constantia; ita & in amicitia, quae virtuti simillima est, eandem requirit Aristoteles. at hanc in te jam desidero. Videris hoc agere, ut amicitiam non dissuas, sed abrumpas. Sunt hae voces impatientiae meae & iustissimi doloris. Similis es amatoribus, qui postquam amasiam in partes suas pertraxere, missam

missam faciunt. quæ deserta, quod reliquum est vitæ, quærimoniis transigit. Simili ferè fato mihi vivitur. Olim aspectu tuo recreari solebam, uti qui in tenebris sedent ad Solis & diei conspectum exhilarantur. Nunc excurrunt anni, ex quo de te nihil audio. Contabesco, veluti viduatus compare turtur. Quæro ex notis & ignotis, ubi sit Haestrechtius meus. an apud Superos degat, an apud inferos. an amet, an studeat, an venetur, an militet. Nec ex ullo intelligere potui, ubi locorum lateas. Si fuisssem Iupiter, jam misissem per universum Belgium Mercurium, cum horridis mandatis, uti te quærat, & mihi sistat. Tandem ipse è latibulo tuo prodit, & ob Mathematices studia, secessisse te scribis Leidam. Ego licet istam Philosophiæ partem magni faciam, utpote veteribus magis, quam nobis excultam: tamen hac tempestate vellem periisse omnem Mathesin, omnes numeros, & circulos, cum angulis & radiis. Sic enim amicitiae pristinae circo inclusus, minus obliviscereris Barlæi tui. Esses rotundior amicus, si quadraturam circuli negligeres. Magis reflecteretur tuus in me amor, si minus de radiorum reflexione & refractione esses sollicitus. Fui nuper Leidæ per dies aliquot, ignarus & te istic esse. Adfui Dominæ de Poelgeest, quæ ipsa quoque ignorabat, ubi esses. Proh tuam fidem. Hoccine est sacrum illud, & venerabile amicitiae nomen in precio habere? Vix est veniale hoc peccatum. Impe-trabis tamen veniam, ubi me invises. Ad te non

veniam, nam non ita pridem Leida veni. Nolo turbare tua sacra, & studia ista, quæ amicos excludunt. Dicuntur Mathematici abstrahere quantitatem à materia. Sed tu non quantitatem solum, sed & omnium qualitatum optimam abstrahis ab amicitia, nempe benevolentiam & convictum. Nec tamen improbo institutum tuum. ingenio es omnium disciplinarum capaci, & ad gloriam iter tibi sternis, rerum abstrusissimarum indagatione. Maeste, mi Haestrechtii, populo te subduc, & amicis. nolui remorari impetus tuos, nam quodcunque petis & agis, vehementer petis & agis. Quæ de pestis apud nos vehementia scribis, non omnino vera sunt. De apparatu nostro bellico nihil scribam, quia consilia Principum ut & Deorum, in abstruso posita sunt. Te salvere jubeo, & duo credere: unum est, me esse illum in te, qui fui semper; alterum, te multum mutatum esse ab illo Hectore, qui mecum Leidæ deambulare ocreatus & gladiatus solebas. Vale nobilissime, doctissime, humanissimeque Haestrechtii, & alium te mihi præsta, nisi albis amicorum expungi velis. Raptim, 24 Sept. 1636.

343.

P E T R O S C H U Y L I O.

*A*mplissime Schuyli,

Qui nuper nuptiis tuis, & recenti conjugio gratulatus fui festivo carmine, jam ob carissimæ tuæ conjugis obitum tibi condoleo.

Vides

Vides pari passu in hac terrestri scena ambulare, gaudii & doloris causas. Dilexisti conjugem. sed & dilexit illam, qui repetiit Deus. placuit tibi uxor pia, modesta, facilis. placuit ob easdem virtutes cœlo. Poterant hæ in terris mundi for-
dibus contaminari, in cœlo non possunt. erepta est tibi, sed reddita creatori. subducta marito, sed adducta propius ad Servatorem suum Iesum Christum. Si doles, facis id, quod hominem, quod Christianum, quod maritum decet. Si modum non ponis dolori, peccas, & quærimoniis frustra te fatigas. Ita visum providentiæ divi-
næ, cujus decretis nos acquiescere fas est. Cum in uxorem illam duceres, sciebas te mortalem ducere. Nihil ergo præter sententiam, nihil præ-
ter communem mortalitatis sortem tibi evenit. Amisi & ego non ita pridem multorum libero-
rum matrem, aut præmisi potius, subsequiturus, cum volet vitæ nostræ supremus Arbiter. Si me impatientius loquentem audire vis, amisi me in illa, & omne vitæ meæ solatium gaudiumque. Sed nolo obloqui Deo, qui illam mihi liberis-
que subtraxit, at majori jam donatam felicitate. Cum tua jam beatam agit vitam, ubi nec puer-
perii labores, nec prolis cura, nec familiæ sol-
licitudo optimas matres vexant. Noli illi invi-
dere statum hunc vitæ felicissimum. Gratula-
mur amicis, quoties digniore loco illos posuit fortuna. Cur ergo non gratulantis uxori ad sum-
ma erectæ? Aut simul tibi in illa moriendum fuit, aut tu antevertere illam, aut illa te debuit.

Simul

Simul mori paucis contigit. Uti illam præverteres tu, optare non debes. Non velles illam esse miseram, & te prosequi lachrymis. Scio prudentiam tuam hisce solatiis non egere, & abundè te instructum esse præceptis, institutisque Christianæ fidei, quæ efficacissima adversus mortem solatia petit, à fidelium indubia resurrectione. Nolui ego vel amici vel hominis Christiani officio deesse. Gaudendum cum gaudentibus, & flendum cum flentibus. Amicorum voces, si dolorem non tollunt penitus, aliquà leniunt & levant. Reliqua, mi Schuyli, à te, à ratione, à tempore impetrabis. Vale & mœrori tuo da spacium, tenuemque moram. Amsteld. 5 Oct. 1636.

344.

CONSTANTINO HUGENIO.

Qui circa focos oberrant Magiri, quoties à nimio igne intumescere vident pulcram, frigidam affundere solent, ut ebulliens liquor subsidat. Idem mihi jam faciendum, Hugeni. Video ex literis ad D. Vicofortium datis, commotam tibi bilem, ob diuturnius meum silentium, quare affundam & ego frigidam, ut defævias. Placatur Jupiter donis. placaberis & tu Hugeni, licet à fulminibus tuis minus mihi metuum, quàm à Jovis Panomphæi. Corrafi obiter Epigrammata quædam, & versiculos, quos non ita pridem lusi. Videris iis delectari, licet ab acuminibus tuis longe abeant. Risi cum
amicis,

amicis , ad illud tuum , *Non tribus illa locis ,
quatuor agra fuit.* uti & ad , *pastillum & pistil-
lum.* Video te , quo es loco , non multum ab
hoste tibi metuere , ut qui serenas voces & festi-
vioris genii testes proferas. Nescio , qui fiat ,
ut humanum ingenium in isto argumento feli-
cius se explicet. Credo ego , τὸ λογικὸν & τὸ
ἐπιθυμητικὸν συμφωνεῖν. [*facultatem rationalem &
appetitivam conspicare.*] & vehementer illa affi-
cere rationis sedem , quæ vehementius amamus.
Vindicias Epigrammatis mei non ausus fui tibi
mittere , veritus ne aures tuas offenderem theo-
logico strepitu. nisi respondendi pro me neces-
sitatem suavisset calumniæ atrocitas , potuissem
leviorem accusationem & anonymum scripto-
rem contempsisse. Injuriam mihi fecit maximam ,
& verba mea iniquissimis detorsionibus cor-
rupit. Mitto libellum ipsius Anonymi , ut legas
& tanti Theologi suspicias cerebrum. Vale &
me tam crede istarum hæresium esse hostem ,
quam sum amicus veri , pacis , & tui. Amstel.
25 Oct. 1636.

345.

ARNOLDO BUCHELIO.

Amplissime doctissimeque Bucheli ,
Ægrè adduci potui , ut in sacram istam
arenam descenderem. nec enim aut cum tene-
brionibus luctari amœnum est , aut sacris con-
troversis immisceri. Si autor honori meo , (ut
venditat) consultum voluisset , & charitatis se-
qui

qui legem, debuisset ex me propius quæfivisse de verborum meorum mente, priusquam publicis me libellis differret. Iam sesquiannus est, ex quo editum fuit illud carmen, lectumque à pluribus. Sed neminem offendit, nedum ut inde quisquam foeda ista βδελύγματα [*abominanda*] per quæsitæ consequentias deduxerit, quæ in mentem mihi nunquam venerunt. Sed mittamus hominem hunc, & male natum fetum. Tecum loqui, mi Bucheli, suavius est, cui pia senectus meliores voces dictat, animumque ad omnem humanitatem, elegantiam, & amorem mei formavit. In animum induxeram te videre elapsis proximè feriis, verum amici cujusdam negotio impeditus, pedem domo movere non potui. Ex literis tuis facile colligo, senectutis te onera fortiter ferre, & quamvis languente corpore, integram adhuc tibi esse animi, & erectæ mentis vim. Solet senectus ob quatuor causas misera censerī, quod avocet à rebus gerendis: quod corpus reddat debile & infirmum: quod omnibus ferè voluptatibus privet: denique quod vicina sit morti. At tu ab hisce malis peculiari forte eximeris. Non avocaris à rebus gerendis, qui à Reip. negotiis semper fuisti alienior, & satis te rerum gerere putas, cum Deo conscientiam, patriæ, amicis, civibus fidem probas. Corporis imbecillitatem animi constantia & vigore erigis. Et licet juvenum voluptates contemnas, illis tamen frui pergis, quæ ex amœnissimorum studiorum agitatione,

ratione, & antiquitatis seria investigatione habentur. Et quanquam vicinus sis morti, Christo te propiorem esse non dubitas. quot passibus à calamitosa hac vita recedis, ad beatiorē accedis. ut quæ aliis, ob prudentiæ inopiam, gravis est ætas, tibi levissima & jucunda videri possit. Illam tibi Deus Opt. Max. lenem, placidam, & doloris expertem continuet, donec exuta mortalitate, & corporis hujus exuviis, sereniorē vultu coram adspicias Deum, & Salvatorem tuum Iesum Christum, cujus sanguine redemptus, piæ morti, gloriosæ resurrectioni, & æternæ felicitati etiamnum servaris. Vale vir præstantissime, & multis mihi nominibus colende. Amstelod. 25 Octob. 1636.

346.

IOHANNI HELMONDO.

DE die in diem litteras tuas exspectavi, charissime Helmonde, ut ubinam terrarum viveres rescirem, an Beverovici in Caninefati-bus, an in novis Hugonis agris in Frisiis, an in Leydensi territorio in Batavis. Tandem post impatiens desiderium scribis te Leydam cogitare, ut istic vivas, ubi castra olim hostilia Musarum sedi opposuit Baldæus. Si scivissem te hæcenus Beverovici hæsisse, fortè potuisset me eò pertraxisse amor tui, quò non potuit triste pendulorum turdorum spectaculum. Facile ex litteris tuis colligo, te legisse ea, quæ in turdorum scripsi suspendia. Sed hoc velim scire, an
eorum

eorum tibi copiam fecerit optimus Baeckius, quæ in transmissa à seniore Baeckio poma scripti festivius nostrate linguâ. Non possum apud amicos esse superciliosus & gravis, alias non esset mihi grave corrugare frontem, & scribere Catonibus digna. Volunt Rhetores de rebus gravibus graviter dici, de humilibus humiliter. Poma sanè, turdi, perdices, fringillæ humilis materies sunt. Reges, Duces, bella, triumphus sublimior. Alia in illis, alia in his scribentis est facies. Quod vult fieri Horatius ad Pisonem de Arte Poëtica, qui jubet:

Descriptas servare vices operumque colores.

Si de Achille loquendum, oportet impiger sit, iracundus, inexorabilis, acer. Si de Medea, sit Medea ferox, invictaque flebilis Ino, perfidus Ixion, &c. Rursus si res comica & faceta dicatur, versibus exponi tragicis res comica non vult. Quamobrem veniam dabis, si de turdis, pomis, amoribusque loquutus fuerim mollius. Ita factum oportuit ex lege poëtarum & genii mei. Et scio ea te esse indole & ingenuitate, ut ferre possis in præceptore tuo non nimis severo innoxias facetias. Invitas me in agrum Leydensum, ut turdorum capturæ intersim spectator & actor, amicissime; hæc infra curas sunt Philosophorum, nec vacat semper iis, qui Reip. debent temporis tributum, amœnitatibus profligare muneris conscientiam. Ea est urbis nostræ facies, ut sperem te propediem ad nos rediturum. Desævit per Dei gratiam pestilens au-
ra,

ra, purgatissimo hoc & saluberrimo aëre. De numero mortuorum decidit hac hebdomade Libitina 143, ut jam in censum venerint hebdomadalem cadavera 424. Sed penè oblitus eram de epistola tua iudicium perscribere. Latina est sine affectatione & quæsitis phaleris. Scribe sæpius. non peccabis apud me, qui viam tibi insisto ad bonæ mentis erectiora studia. Vale & tuos saluta. 25 Oct. 1636.

347.

CONSTANTINO HUGENIO.

HOc non est exercere amicum, sed obruerere. mittis librum Epigrammatum, qui ante hac uno aut altero Epigrammate Veterum mihi excussisti. non tot jaculis confossus fuit Sebastianus, nec tot lapidibus impetitus Stephanus, quot tu telis & acuminibus Poëta adoriris. Si tua nondum ἐν ἀρχῇ [*in vigore*] stat versificandi libido, apud me profecto languet iste furor & fervor. subducam me hac arenâ: satius est ut fugitivus evadam, quàm ut cadam victima nil miserantis Aulæ. Enecas me meteoris tuis, fumis, nebulis, tonitru, pluviis, nivibus, grandine, & quæ alia sunt ingenii tui argumenta. Totam concitas naturam, & me ad certamen honestæ æmulationis provocas. Infimæ, mediæ, supremæ regionis fluxos & evanidos foetus mihi objicis. Et de quibus seriò nos, & magno apparatu philosophamur in scholis, tu rides, & Peripatum omnem ac Stoam

oPars II. L naso

naſo ſuſpendis adunco. Ex pluviis urinam facis, ex fulmine lites, ex tonitru horrendæ Iunonis crepitus, quales erant Claudii Imperatoris, ex ventis equorum Solis ſpiramina, ex pruina ſalem, ex maculis ſolaribus guttas ſerenas, ex rore ſudorem, ex grandine Deorum pilas, ex Lunaribus maculis vitiligines. Verè naturæ miracula ludos habes, & Phyſicis tacitè conviciaris. Nec minus talia Epigrammata tua ſunt, ut gradus comparationis non admittant. Loquar verbis Honerdi Senatoris : Diſparitas non eſt, niſi quam gravitate probamus. Optima tunc & ſunt ſingula, cùm bona ſunt. Scribis te hæc meditatum, modò peditem, modò equitem. credo. nam & ſunt eorum quædam, quæ eunt leniter, ſunt, quæ altius aſſurgunt, ſed equus ille tuus aut tolutarius fuit, aut ſuccuſſator. Si tolutarius, cauſſam deprehendi numerorum & æquabilitatis in carmine. Si ſuccuſſator, aut, ut Gallicè loquar, *un trotier, qui vâ le trot*, cauſſam deprehendi, cur alicubi occurrat pes deterior & horridus, qualis eſt ille : *contacta freti ſors*. Certè non fuit equus tuus ſtrigoſus. nam ſucculenta ſunt omnia; non pavidus, nam audaciſſime in Philoſophos incurſas; non ſuſpirioſus & anhelus, nam valido ſpiritu effers, quæ concepisti; non pumilus, nam per nubes ferris; non conductitius, nam naturali pulchritudine exſurgis. Nec veredus fuit, aut *cheval de poſtillon*, quia demorſos omnia ungues ſapiunt & moram. I bone, quò virtus tua te rapit.

Ego te inter meteora evectum, velut aquilam in nubibus, non sequar, nec pedes, nec eques. Non pedes, ne quis mihi objiciat illud: sequitur non passibus æquis; non eques, quia metuo excuti, uti mihi in Galliis equitanti accidit ter. Cum de aquarum Muydensium timore scriberes, secutus fui, quā potui, te ἐρωα, [*ironice loquentem*], ut infamiæ notam diluerem. Nunc per aëra, coelos, & nubivagos tractus evectum suspicere è terra malo, quā sequi. nolo in aquis esse Palinurus, nec in sublimi Phaëthon. Pauculos mitto Scazontes, ut aliquo grati animi testimonio redimam inscriptum mihi Poëmatum Meteorologicōn opus. Illa per gravissimorum amicorum manus ambulant, & doctissimorum iudiciis crescunt. 9 Oct. 1636.

348.

P E T R O C U N Æ O.

ITa inter nos convenit, Cognatorum clarissime, ne alter alterius ægrè ferret silentium. quare non utar operosa excusatione, quod diutius præter meum morem Harpocratem egerim. Vorstium redivivum vidisti, aliosque libellos, quibus impetor,

Turbati manes Erebi noctisque profundæ.

plures symbolam contulisse video tibi mihi que notos. omnem bilem, quam multis retrò annis collegerunt jam effuderunt semel, melius posthac ipsis erit. Ego ex amicorum consilio illos ulciscor silentio. Hi motus animorum &c. Habui

L 2

nuper

nuper Orationem, vel potius Homiliam in Natalem Domini, & Servatoris nostri Iesu Christi, ut prisca studia recolligerem, quibus olim consecratus fui. Inveniunt & hîc, invidia & recti ignorantia, quod arrodant. Exemplaria quæ amicis inscripsi, tradi velim per ancillam. Pestilentia lues penè se in totum per Dei gratiam remisit. Vale. 10 Ian. 1637.

349.

CORNELIO VANDER MYLE.

Mitto Homiliam, qui hætenus Orationes tibi misi. elegi argumentum capax sacrorum acuminum. Patrum elegantias & acutè dicta hic illic insparsi. Annum ingredimur novum, cuius auspiciis quod tibi offeram nihil occurrit gratius, quam ut tibi Encomium ejus infantis mittam, in quo solo omnium nostrum stat salus. In mundi senectute vivimus, cui solatium præbet Christi pueritia. Ipse, tu Myli, viridem jam senectam penè egressus es, quæ novas vires à sacro hoc infante, & mundi Servatore capiet. Sunt hic illic quædam dicta de Præsepi per metonymiam, quæ aut de nativitate ipsa Christi, aut Christo intelligi debent, juxta phrasin veteris Ecclesiæ & Patrum. quod moneo, cum tanta seculi sit perversitas, ut facilè interpretaturi sint malevoli de ipso præsepi & ligno, quæ de Jesu Christo dici res ipsa clamat. Augustinus præsepe adorandum vocat, fontem consolationum, gratiæ asylum. Detinet nostratum expectatio-

nem

nem Coloniensis conventus, qui testudineo gradu procedit. Si lis tantum esset inter Peli- dem & Atridem, sperarem successum felicio- rem. Sed totius Europæ Principes pacare, Cæ- sare, Suecum, Gallum & Hispanum, nos & Hispanum, res est majoris operæ. Nostros hic magis sollicitos habet Regis Britanniae insti- tutum, quo mari obicem ponit. Neptuni filii sumus, assueti libero mari, quo clauso & impe- dito etiam loculis mercantium claustra injiciun- tur. quæ perrumpet insatiabilis lucri cupiditas, non minore industria, quam olim Memphitica claustra & catenas perrupere Batavi. Vale.
17 Ian. 1637.

350.
E I D E M.

Nobilissime Myli, Qui has tibi literas tradet, Matthias Deugius est, juvenis rei Mathematicæ peritif- simus, arcta familiaritate junctus D. Hortensio Matheos professori, collegæ nostro. Scripsit libros de Architectura militari, sive Fortifica- tionibus, ut vocant. quod argumentum ante hac Gallicè tractaverunt Galli, Belgice Stevi- nius, at Latinè, quod sciam, nemo. Non est mihi vis ista dignoscendi & dijudicandi seve- rius, quia castra vidi rarò, nedum ut ad ope- rum proportionem, figuras, situs attenderim. Illud tamen ausim dicere, multum in hoc opere laboris impendisse autorem, & ad singula ad-

vertisse propius. D. Hortensius luculenta commendatione & scriptorem & scriptum profequitur. Venit ad Te hoc fine, ut à nobilissimo Domino Witsio, castrorum Federati Belgii ephoro, impetret icones sive delineationes operum castrensium, quibus expugnata fuit, aut potius recuperata, Arx Schenckiana. Illas enim in opere suo desiderat. Ne autem videatur temerè hoc petere, libri sui lectionem offert eidem Domino Wits, cognato Tuo, & Zulechemi Domino, qui exactius de re omni iudicium ferent, utpote in ista Mavortis & Bellonæ oppugnantis, & propugnantis arena enutriti. Est auctori animus libros hosce publici juris facere, & quæ per N. T. impetrabit, ad communes usus transferre. Vale vir nobilissime & præstantissime, & si qua potes laudabiles conatus hujus juvenis, docti pariter & modesti, juva ac promove. Cohabitat hic Domino van Jaersvelt, cujus filios humanioribus artibus erudit. Dominam vander Myle, liberosque meis verbis reverenter saluta, etiam ubi res ferent, Zulechemi Dominum, & nobilissimum Dominum Witzium. Amstelod. 10 Mart. 1637.

351.

A R T U R O J O N S T O N O.

*C*larissime Jonstone,

Elegiam tuam, quâ in laudes Poëseos nostræ immoderatus effunderis, accepi & legi. Diu hæsi, an probare, an improbare iudicium
istud

istud tuum debuerim. Ne probarem, suadebat modestia mea, quæ tenuitatis suæ probè sibi conscia, judicia ista, commendationesque invindendas verecundè amolitur. Ut probarem, suafit perspecta tua pluribus humanitas & candor, qui voces tibi expressit magis sinceras quam veras, magis tui in me affectus indices, quam istius *ἑωροχῆς*, [*eminentiæ*,] quam mihi in carmine attribuis. Equidem studia illa amœniora amavi semper, & conatus fui viam istam calcare, quâ ad carmen itur. Verùm cum Philosophiam & Peripatum junxissem Poëticiæ, obstrepuit horridior ista sapientia suavissimis Camœnis, & stribliginem suam affricuit Apollini. Philosophia quippe, ut nosti, hodierna tetrica est, & per salebras & scholasticorum præruptas commentationes incedit; & à quibus abhorret Poëta quam maxime, impensius amat Philosophus, sive Thomistes sit, sive Scotista. Utique multum à prisco philosophandi genere, quale est apud Ciceronem, Senecam, Plutarchum, recessimus. Est adhæc Philosophia veritatis magistra: ut Poëta tunc maxime commendatur, cum aut falsa fingit ingeniosius, aut veris falsa permiscet. Atque his de causis infelicius me puto agere alterutrum, cum sociaverim artes minus sociabiles. Illud tamen ingenuè fatebor, tantum me Poëtices teneri studio; ut difficulter avelli possim. Soleo illam vocare scabiem cum perpetuo pruritu conjunctam: ad quodvis enim argumentum, sive lepidum illud sit,

sive grande subsilit scripturienti animus, & continere me vix possum, uti ad pilæ jactum catelli cursitant, aut feles. Ad te potius redeant istæ laudes, mî Jonstone, quas in immeritum accumulas. Tu Galliam, tu Scotiam, tu Angliam famâ nominis tui implesti, & imples etiamnum. Nos virtutum tuarum, & ingenii admiratores exemplum à te capimus proficiendi, & grande aliquid moliendi, quod perficere non mearum, sed tuarum potius est virium. Quidquid sit, amemus alii alios, & seposito fastu omni, exoscullemur mutuo, siquid laude dignum in singulos contulerit divina benignitas. Amicitiam tuam veneror: præconia & suffragia amicorum, uti exposcere putidum fuerit, agnoscere arrogantia, ita patienter ferre non fuerit injucundum. Vale, vir clarissime, & qui Regis maximi valetudinem curas, hoc non segnius cura, ut illi, Musis, & mihi diu vivas suaviter. Amstelodami, 18 Martii, 1637.

352.
JOHANNI BEVEROVICIO.

NOn uno nomine tibi debeo, amplissime Beverovici. Primò libros Diæteticos misisti, quibus versiculos nobilissimi Catsii, tanquam lemniscos coronæ pactili intertexuisti. In iis de rebus non naturalibus disseris eruditè, perspicuè & facetè: ut omnino videaris tutò mederi velle, quia scribis eruditè, citò quia perspicuè, jucundè quia facetè. Si ex præscripto
tuo

tuo viveret mundus, conclamatum esset de communi mortalitate, quæ neminem non manet, quia ad insolitum deflectere plus æquo amamus. Ego diætam probo, sed quam subinde flagellet *ἀνωμαλία* [*inæqualitas*] aliqua. Nam rigida illa & severa edendi bibendique ad leges ratio, bonæ mentis carnificina est, & vitæ tyrannis. Edant bibantque ad amussim, quibus grave est ridere: quiescant suis periodis, quibus moveri est labor: moveantur ad numeros, quibus sudare permolestum: æris momenta & caloris gradus expendant, qui alaudam imitari amant: dormiant moderate, quibus numquam noctu scribendi sunt versus. Quemadmodum boni Oratoris est dissimulare artem, ita valetudinis rationem optime subducet, qui in Medicorum leges non nimis religiose jurabit. Libros tuos Medicos, ex non Medicis collectos, pari voluptate legi. Horatio contradicis canenti:

Quod Medicorum est, promittunt Medici.

Physicos redarguis, quorum hoc est axioma: Generationem esse similibus productionem: nisi velis illum tuum fœtum à causâ æquivocâ productum esse, quæ effectui dissimilis est. Deucalion es, quibus ex saxis nati sunt homines, aut potius pastor Aristæus, qui ex non apibus apes elicuit. Multa unum facis, & in formam artis digeris latissimè sparsa, illorum exemplo, qui aulea ex varii coloris filis contexunt. Fecit idem in Politicis Lipsius, qui centonem rerum civilium ex tot scriptoribus, suis filis

consarcinavit. Perge, mī Beverovici, Medicinæ suum decus asserere, Tibi famam, ægris vitam fœnerare. Poscis versiculos in Calculum, quos mitto : nihil enim tibi negavero, quod à me præstari potest. Sed vereor, ne illi ipsi calculis & arenis laborent. Tu medere, & non fonte Anticore, sed Caballino illos deterge, ut leniores fiant. Vale. Iphis Nonis Apr. 1637.

353.

P E T R O C U N Æ O.

V Enit ad Te, Cognatorum dilectissime, præstantissimus juvenis, Johannes ab Helmont, Consulis nostri Andreae Bickæri è sorore nepos, eo fine, ut in Academiam vestram transeat, postquam Scholæ nostræ, & Philosophiæ curriculum emensus est. Adolescens est ad omnem modestiam & humanitatem factus, ingenio bonarum artium capaci, miro in præceptores adfectu, pietate, cultu. Fuit Scholæ nostræ ornamento & exemplo. Cuperam plures ex optimatum liberis ita præstructos ad Vos venire. Omnino confido, illum instar irriguæ arboris ad flumen positæ, ad omnem laudem magis magisque assurrecturum, & suis honori, patriæ usui aliquando futurum, quod Deus ille donet, quo teste hæc scripsi. Si dignaberis illi viam monstrare, quâ ad Themidos arcem compendiosè & sine ambagibus itur, summo & illum & amicos, quos in hâc Republicâ habet viros summos, beneficio Tibi obstrinxeris. Liberos

beros tuos serenissimâ hâc anni tempestate ad nos mittas velim. Scis, sine auræ afflatu exstingui ignes, sine convictu & alloquiis amicitiam, cujus partem Aristoteles facit *συγγίωσιν*. [*convictum.*] De Republicâ nihil scribam, postquam in Coloniensi conventu omnis publicæ pacis spes sita esse multis videatur, at non mihi. Difficile quippe est, rapaces Aquilas, efferos Leones, & pugnaces Gallos conciliare. Summus Deus consilia hæc dirigat ad Belgii, vel potius totius Europæ tranquillitatem. Vale. 17 Maji, anno 1637.

354.

CONSTANTINO HUGENIO.

DOlui & Tibi condolui vehementer, afflictissime Hugeni, ubi ad me tristissimum de uxoris tuæ dilectissimæ obitu nuncium perlatum fuit. Aphtis eam laborare intellexeram, & modò meliusculè habere, modo pejus, luctantibus inter se naturæ & morbi viribus. Tandem prævaluit morbus, & de puerpera triumphavit fatalis necessitas. Crede, mî Hugeni, optimum illum esse rerum eventum, quem Deus probat. quidquid vult ille, nostrum quoque est velle. nec pium est, ea nolle, quæ non vult nos nolle. acquiescendum nobis, quodcunque tandem moventi. quicquid à solo & summo Bono est, quid nisi bonum est? nos in præsens, ille longè in futurum prospicit, & rationes facti sui etiam aperit hinc, cum desierunt esse, qui capiunt.

piant. Magna domus mundus est. ille paterfamilias, qui domum istam in duas partes dispescuit, ætheream & elementarem. Has ordine inhabitari cupit, ita ut ab elementari in ætheream transitio fiat; nec prius in hanc, quam in illâ longius breviusque steterimus. In elementari homines hominibus jungimur. In æthereâ Deo & intelligentiis. Illa mortalitatis sedes est, hæc immortalitatis. illa negotiorum, hæc otiorum: illa doloris non unius officina, hæc gaudii statio tutissima. Est in eâdem tecum uxor domo, sed secessit in partem meliorem. cohabitas illi, & eodem quo illa tecto etiamnum tegeris. Extulisti illam è domo tuâ, quæ privata est, sed non è publicâ, quæ universorum est, quia ipsum Universum est. Habitant in diversis Aulæ partibus Principes & Principum conjuges. idem tibi jam contigisse cogita. Nec prohibitum illam adire voto, affectu, mente. Arctior animorum est conjunctio, quam corporum, & cogitatione amplectitur anima fortius, quidquid diligit vehementius. Qui peregrè abeunt, spe reditus solantur amicos. Abiit & illa, sed ut rediret & te videret, loco & statu beatiore. Nec mora erit longa. si ad æternitatem respicias, cujus omne futurum est pars, jam rediit. Nescit illa quod præteriit, & quod post venturum est præsentì, & durationum intervalla per fidem confundit. Si doles surreptam, nego surreptum quidquid oculis surripitur. tua est, quæ tua nuper fuit, nec alterius esse vult aut potest, quæ nunc quoque

que meminit se tuam fuisse. Divortium thalami si fecit mors, non fecit omne. est conjugium divortii minime capax; hoc mentium est. harum copula irrupta est, & viget quam maximè inter disruptos. Vbi conjux conjugem videt, minus attentè illam cogitat: ubi non videt, oculis illam animi intuetur consideratius. magna & vehemens res est desiderium. occupat, quod non habet, tenet remota, & finitur absentis boni validâ persuasione. Si soli tibi esse insolitum est, venisti solus sine illa in mundum: vixisti sine illâ ante illam. quod factum sæpius, hoc repetere durum tibi & molestum videtur? Nec solus es, qui matris exactissimæ ectypa plurima habes, in quibus virtutum maternarum ideas agnoscis & simulachra. Hæc contemplare, nec eris sine sociâ. modestia, cura, prudentia, fides, comitas, & quam primo nominasse debebam pietas, uxoris tuæ fuerunt Ἰδιον κῶδ &c. [*propria gloria.*] Harum virtutum semina transfudit in liberos, qui cum adoleverint, renatam in illis conjugem tibi gratulaberis. At erepta est, inquires, liberis mater. at non pater. alterutrum eripi aliquando necessum fuit. cum simul eripi nolint fata, patrem concedi illis diutius æquissimum. Quod matris est, illa præstitit. prolem edidit, lactavit, nutrit. Ad res magnas præire, monitis, exemplis erigere nascentem juventutem, flectere luxuriantes animos, veri & recti callem monstrare ejus est, quem superstitem sinunt fata. Defuncta est illa partibus suis. Ubi illa &

mater

mater & nutrix defuit, tuum est incipere. Non vis perpetuò matrem esse, hoc est miseram. Ita enim judico, miserrimam esse matronarum vicem, & centum malis affligi sexum illum, quoad gignendis liberis vacat. Inter ista, dic sodes, cuperes illam immortalem esse? Expedivit illam clementia divina iis malis per gratiam, quibus illam expediverat per naturam. Tibi si decessit boni commodique nonnihil, illi accessit plurimum. quidquid lucrata est illa, tuo quoque in lucro deputa. Communis est conjugum felicitas, communis jacturæ omnis & lucri fors. Quantum doles, quantum ingemiscis, tantum minus affici videris ejus inconcussa felicitate. Expertus didici, nullum esse sedando dolori potentius remedium, quam si rationum cumulo obruatur. Tecum disputa, & morti dic: rapuisti meam, sed & plures: rapuisti optimam, sed & plures: rapuisti intempestivè, sed & alias. rapuisti, sed necessitate. eripuisti mihi, ut Deo redderes: eripuisti liberis, ut Christo jungeres: eripuisti amicis, ut beatis mentibus infereres. Tibi dic: non est hic, nec debebat usque esse: fuit, quia fuisse hominis est. erit quod fuit; erit, qualis non fuit, quia gloriosior erit. Dic: uxorem amisi, sed quæ me plurimorum liberorum fecit parentem: familiæ & rei domesticæ administram, quæ, me curatore, in famulas transferri potest: thalami consortem, qui vixi sine thalamo: dolorum levamen, quos & levant argumenta: gaudii participem, quò jam solus fruar: vitæ

vitæ asseclam, sed quam mortalem scivi. amisi inopinatò ; at præscire hoc non tantum potui, sed & debui. Hac aut simili mentis contentione castigabis primo, mox franges, tandem elides doloris vim, & de queruli amoris causa victor triumphabis. Hæc pauca Tibi firmando scripsi, quem & natura satis fortem novi, & à sapientiæ præceptis abunde instructum. Si quæ desint, post admissa in animum Christianæ religionis solatia, Senecam adi & Epictetum. & illos si oculo vel mente leges, lugebis minus. Vale, virorum clarissime & cordatissime. Amstelod. 24 Maji, 1637.

355.

HENRICO VAN EEDEN.

Nobilissime vir,
*Accipe, sed mediis prognatum fluctibus Echo,
 Hic, ubi se falsis Amstela miscet aquis.
 Si Pindi mediis habitarem ruptibus, Echo
 Quæ sitis esset gratior illa tuis.*

Non sylvas hic habitamus, non rupes & montes, ubi Echo aptius redditur, & repellitur fortius. Planities vasta urbem nostram cingit, & paludibus innatat, ut frustra Echum expectes, qualem reddit aut Petrarchæ rupes, aut Cumarum saxa, aut Thessaliæ valles. Clamavi tamen, ut potui, & visa est respondisse Echo non aliena à vidui hominis statu & conditione. Si minus seria dixi, cogita minus seria agere omnes istos quibus vacat cum lapidibus loqui,
 & trans

& trans flumina clamare, ut reclamant stupidæ & rigidæ cautes. Socero negare carmen nefas credidi, tum ob illustre Douſarum nomen, tum ob virtutum tuarum memoriam. Viximus una, loquuti ſumus una annos complures, cum ego privati profeſſoris, tu auditoris partibus fungereris. Vbi Canicula à ſtudiis & lectionibus otium mihi fecerit, amicos Ultrajectinos, & inter illos, te ſocerumque amplectar. Vale, Amſtelod. 14 Jun. 1637.

356.

THEODORO SCHREVELIO.

Mitto verſiculos, quos petis, in Floræ flebile fatum: quos ſi Heroum iſtorum verſibus, quos in litteris tuis nominas, adungere dignaberis, principibus quoque me Achivis permixtum agnoſcam. Vt flos eſt, fortuna floris eſt; nec enim à re evanidâ conſtantiam precii exſpectes. Facile fuit cuiſvis mercari merces iſtas quantovis pretio, quæ ſine precio haberi potuerunt. Vtique crevit illud inter nondum dantes, & nondum accipientes, & didicere emptores illi, verum eſſe Philoſophorum axiomata: Non dari progreſſum in infinitum. Hunc furorem Oratione tua perſtringis, ut ſanes; ſed non intelligent illi, quibus medico opus, niſi Latinam Belgicam fieri cures: nec enim dubito, quin & gœnium ſit habitura, & ſalis multum perfricandæ infantiæ, quæ jam ἐπιδημιον [toti populo communis] erat. Redeant ad ſanam mentem

mentem omnes non libellis aut orationibus, sed desperatione. Lucri spes postquam decollavit, sapiunt omnes, quia ista spes suasit dementiam. Vale. 16 Iun. 1637.

357.

CORNELIO BOYO.

IN eo falleris, Vir clarissime, quod te haec-
nus mihi notum non fuisse scribas. Ita est.
Vultum, quod sciam, haecenus non vidi. Sed
indices erectioris animi, simul & ingenii notas
plurimas vidi antehac. Quod si id es, quod ani-
mus est & melior tui portio, omnino novi
Boyum. Accedit, quod te mihi totum ape-
ruerit jampridem amplissimus Graswinckelius,
elegantiae omnis fecundissimum pectus. Is de
candore tuo, doctrina, humanitate, & studiis
eam tulit sententiam, ut te in optimorum censu
habeamus ambo. Certè, ex quo legere cœpi ea,
quæ subinde in lucem edidisti Epigrammata,
desideravi propius tibi jungi & dextræ dextram
jungere. Nam uti artium & disciplinarum est
cognatio & vinculum, ita earundem cultores
arctius jungi oportet. Tu prævenisti, & nullo
meo merito provocatus Poëmata tua mihi in-
scribis, Zelandiæ urbium encomia. Patria est,
quam laudas, ut pietate te probes illi, quæ vi-
tam tibi & nascendi locum dedit. Ita laudas, ut
non finxisse aut anxie quæsisse laudis mate-
riem, sed oblatam selegisse credaris. Exemplo
me prævisse scribis. at tu scribendi carminis

Pars II.

M

régula.

regula præis. Mihi satis est, ea in carmine conari, quæ ab aliis præstari video. Animo meo, qui huic studio semper deditus fuit, obsequor, securus prorsus quorum judiciis surgam cadamve. Nec tamen amicorum de me humaniores voces superbe sperno, aut impense amo; ne videar aut nihil tribuere candide judicantibus, aut nimium ex adfectu vel amore mei pronunciantibus. Tibi plurimum me debere fateor, qui hunc nomini meo honorem habuisti, ut versibus tuis illud, tanquam Mecænatis alicujus, aut Pollionis præfixeris. Quod si ego forem atavis editus regibus, essem præsidium & dulce decus tuum. Interea perge Themidiungere Apollinem, & Romanum jus legesque ornare Romanis leporibus & Musis? ita illæ minus erunt tetricæ, & hæ magis seriæ. Dicitur Socrates sapientiam è cælo in domos familiasque deduxisse. Tū Poëticen è procelloso solo & cælo in amœnissimos saltus Haganos deducis, & fori strepitus laudabili castigas otio. Cogaris ad præscriptum clientis loqui, cum causas dicis. At cum Poëta es, tui juris es, nec ex præscripto loqueris. In foro à partibus stas, cum Poëta esse vis partes nescis & neuter es. In curiæ atriis justitiam adspicis gladio terribilem. In Poëtarum atriis Apollinem intueris lyra amabilem. ut mihi videaris Jurisconsultus esse, cum prodesse vis; Poëta, cum delectare. Vtrumque ut facias diu, faxit Deus Opt. Max. qui juris studia tibi secundet ad usum, poëseos
ad

ad lufum. Vale, vir doctiffime & humaniffime,
& celeberrimum Graswinckelium, ubi occasio
feret, officiofe faluta. Amftelod. 3 Quinctil.
1637.

358.
P E T R O C U N Æ O.

COgnatorum chariffime,
Septimanæ effluxerunt tres, ex quo me
tertiana febris corripuit, non quidem exquisita,
fed remiffior. Ejus hiftoria octo periodis decur-
rit, ut jam defierim febricitare: verum videtur
natura victrix morbi reliquias febriles in utrum-
que pedem exoneraffe, quos mira habet φλόγω-
cis [inflammatio] cum pruritu intolerabili. Cum
hoc mihi fymptomate jam luctandum, & uten-
dum topicis, quæ pituitam bilemve acerrimam
caftigent. Interea laborare eadem febre cepit
filiarum aliqua, quam exquisitiffima tertiana
exercet. Ea jam fub Medicorum manu eft, &
venæ fectionibus, purgationibusque excarnifi-
catur. Morbus ifte hic ἐπιδήμιος [communis]
eft, & per univerfam urbem in quosvis fine
discrimine graffatur. Doleo & filiæ tuæ male
effe. Accepi eam pectoris oppreffione, & tuffi
vehementiore laborare. Si temperantiam ho-
rum malorum cauffam arbitraris, falleris: ab
aëris intemperie hæc proficifci non negavero.
Nihil vetat ejufdem mali cauffas effe plures. De
Bredæ obfidione optima auguramur. difperfæ
hoftium copię. Eæ ut colligantur tempore

opus. Gallus opportune satis in finibus Artesiæ & Hannoniæ populatur. Castris nostris de com meatu abunde & commode prospici poterit. Quod si major vis inde Federatos depellat, erit nobis in proxima receptui locus. Faxit Deus, ut Patriæ & bonorum votis respondeant tantarum rerum eventus. Vale. 24. Iul. 1637.

359.

ROCHO HONERDO.

Lemma illud tuum, *Ad Casparum Barlæum læsæ ob silentium amicitiae suspectum*, expungo clarissime Honerde. Non arbitror lædi amicitiam silentio inter amicos dispares: quorum inferiori facile est superiorem nimiam loquacitate offendere. Alia Senatoris, alia Professoris dignitas. Alias Curia, alias Schola curas postulat. Scribendum tibi, sed rarius, ne te videar minus prudenter uti. Crabrones istos, quos in litteris tuis designas, non metuo. Sum enim & ipse, cum libet, crabro. Advocent venenum omne in aculeos. Etiam tunc pugnatur, cum

Stipitibus duris agitur, sudibusve præustis.

Verum jam ante in animum induxeram, iis qui in arenam hætenus prodierunt adversariis non respondere. Non vacat veterem cramben reponere, & supervacaneum puto instare convictis. Injuriam mihi fieri persuassimum habeo. Nullius mihi vel impietatis vel hæreseos sum conscius. Cetera homo sum, & humani nihil à me alienum puto. Hac fiducia susque deque habeo

beo lividas & atras voces, quas calumniandi studium livorque authoribus suis suggessere. Tecum sentio, vindictæ speciem optimam esse contemptum. Maledicentiæ vis, si spernatur, desæviet brevi. Non impetrabunt adversarii, ut me ab amœnioribus studiis avocent. Malim tecum, malim cum Hugenio, aliisque philosophari, quam cum sacris noctuis luctari. Novum forte carminis argumentum suppeditabit nobis Auriacus. Bella ô, bella, horrida bella, & multo video spumantem sanguine Bredam. Faxit Deus Opt. Max. ut publicis votis respondeant successus. Malim Principem castra figere in Brabantia, quam in Flandria. Transmarinæ expeditiones ex maris ventorumque pendent arbitrio. Quæ terra suscipiuntur magis se consiliis humanis regi sinunt. Mitto Elegiam, nullo mihi labore natam. Scio te hac esca delectari. Videbis facile æquam mihi esse mentem, & non prorsus exaruisse veteres latices. Vale, Vir spectatissime, & clarissime. Si ita A. T. visum, lectionem Elegiæ noli invidere nobilissimo Mylio, uti nec amplissimis Viris, Apollonio Schotto & Reigersbergio collegis tuis, quos à me plurima salute impartiri. Amstelod. 24 Iul. 1637.

360.

ARNOLDO BUCHELIO.

Litteras tuas exertissimâ manu accepi. Cum enim te videre liceat rarius, illas animi affectusque tui in me indices videre perquam vo-

M 3

lupe

lupe est. Fui non ita pridem Vltrajecti bis, nec substiti, abiturus ad Leccæ ripam, ut viderem prædium D. de Iaersvelt, quo me invitaverat filius, itineris tunc una cum aliis comes. Altius memoria tui animo inhæret, quam ut malevolorum hominum studiis odiisque evelli possit. Obitum cognati tui, Iosephi Vorstii ex animo doleo. Obiit cœlebs, ut desiderium sui nec conjugii nec liberis relinquat. Vir fuit indolis optimæ, erecti adhæc ingenii, & non minus exacti iudicii. Non alia conditione, mi Buchelli, nascimur, quam ut moriamur, & cum omnes illa maneat ocysus ferius, non est quod nos percellat vel amicissimorum mors. Me aliquot retro diebus exercuit tertiana, quæ post septimam accessionem ægro valedixit. Cum hujus adhuc reliquiis luctor. Vbi firmiore ero valetudine, firmiorem erga te aliosque amicitiam exeram. Memini me non ita pridem in climactericum tuum annum versibus lusisse: illis jam plures addidit Numinis indulgentia; & sane, quod gratulor, ætati par es animi constantia, vigore, prudentia. Si corpori decedit suum robur, animus à ratione majus capit, tantoque se sentit erigi altius, quanto ad vitæ terminum accedit propius. Versiculos hos lege, & in parte solatiorum habe. Scio enim gratissima tibi etiam illa esse, quæ nobis per incuriam excidunt. Vale. Amstelod. 25 Jul. 1637.

361.

CORNELIO VANDER MYLE.

N*obilissime Myli,*
 Paulo ante ferias Caniculares corripuit me febris tertiana, quæ tamen post accessiones aut paroxysmos octo desiit redire. Verum, cum humor peccans in pedes decubuisset, luctatus fui dies plurimos cum morbi reliquiis, ut vires pristinas pene, non tamen prorsus recuperaverim. Fui per dies aliquot in prædio cognatæ D. Overbequii, quod Poelgeestam minorem vocant. Locus est vicinus plane ædibus Domini de Poelgeest. Illic sensi me non parum convalescere ob aëris salubritatem, loci amœnitatem, Rheni & pratorum circumjacentium conspectum jucundissimum. Singulis Mundi partibus affudit Deus vim vivificam, qua vivimus, refo-cillamur, recreamur. Aliis tamen majorem: ut delectu opus sit, & Bajæ præstent Minturnis paludibus. Quod de valetudine mea sollicitus sis, est hoc à tuo erga me amore, quem pluribus antehac indiciiis ostendisti. Ego, licet jam scribam rarius, studiosissime de valetudine tua & tuorum inquirō, si quando huc Hagienfium aliquis comseat. Te sospite & Reipub., & mihi, & bonis omnibus gratulor, quos non uno beneficio obnoxios habes. Scripseram amplissimo Honerdo, ut Nobilitati Tuæ copiam faceret eorum, quæ ipsius litteris versibusque provocatus rescripseram. Invitat me in Dicecesin Ul-

M 4

trajecti-

trajectinam Dominus de Thienhoven. Sed quia feriæ excurrunt, non statui eo ire. Cras Muydam abeo ad Satrapam Hoofdium, omnis elegantiae patrem. Doleo male esse Filio tuo, Gulel-mopolis Gubernatori. Verum solet illud febrium genus, quas intermittentes vocant, esse periculi expers. Scripsi nuper versiculos in redditum Christophori Artifosky Brasiliæ gubernatoris. nescio an videris. Addo & illa, quæ in Tulparum fortunam lusi. Frater meus jam hic est, qui non semel salutem mihi tuo nomine denunciavit. Dignus est, quem ob probitatem, fidem, obsequium sui ament. Vale, Vir nobilissime & præstantissime; Dominam vander My-le, filiam, generum meis verbis saluta, etiam filium Gubernatorem, cui ut valetudinem pristina-m reddat Deus Opt. Max. serio & ex animo precor. Amstelod. 24 Aug. 1637.

362.

E I D E M.

GRatissimus mihi fuit litterarum tuarum & adspectus & contactus : sed flagellavit gaudium meum filii tui Gubernatoris Willemstadii adversa valetudo. Impetrabit, meo iudicio, à victus ratione, quod à medicamentis vix poterit. Patriæ universæ, & Celsissimo Principi gratulor illustris victoriæ laudem, publicis commodis conspicuam. Non defui meis partibus. Elapso die Lunæ proximo Orationem hic habui Panegyricam de Obsidione Bredana, qua tria
hæc

hæc exequor. Primo, comparisonem instituo inter Principis nostri, & veterum Græcorum & Romanorum celebres obsidiones. Deinde Spinolæ obsidionem cum hac nostra, quam multis nominibus illustriorem esse contendo. Tertio inter se comparo Bredam captam à Mauritio astu, à Frederico violento Marte. Hic illic in Hermannum Hugonem, scriptorem laudatissimum, incurro, & quas in Isabellam Spinolamque confert laudes ad Principem nostrum redire contendo. Acclamavit ille Isabellæ, ut matri castrorum: ego Auriaco, ut patri castrorum. Acclamat ille Isabellæ his verbis: *Vna mulier fecit confusionem in domo Regis Nabuchodonosor*. Acclamavi ego in Oratione mea Celsissimæ Æmiliæ: *Vna mulier vidit confusionem in domo Regis Hispaniarum*. Ingressa est Isabella (illius verba sunt) urbem Catholicæ religionis restauratrix: ingressus est urbem Auriacus Pontificiæ reformator. Hermannus Hugo prodigia & portenta plurima narrat, quæ obsidente Spinola accidisse memorat. Ego illi quatuordecim similis farinæ miracula repono. Forte salivam tibi moveo, quam discutiet Orationis, quæ jam sub prælo est, lectio. Vale. Amstelod. 23 Octob. 1637.

363.

CONSTANTINO HUGENIO.

NOn statueram tibi scribere, nobilissime Hugeni, nisi deditâ Bredâ, ut & lætior esset

M 5

scri-

scribentis dictio & legentis lectio. Celsissimo Principi ac Patriæ universæ gratulor illustris victoriæ laudem, gratulor tibi inter tot bellorum & castrorum incommoda incolumi. Expugnavit urbem Auriacus, quam Marchio Spinola ad deditionem compulit aliquot retro annis. Diverfum utrique Duci consilium fuit, & vincendi modus valde dispar. Spinolæ Iulii Cæsaris institutum placuit, fame potius quam ferro urbem expugnandi. Auriaco Domitii Corboulonis, qui dolabrâ, hoc est, operibus hostem vincendum esse dicebat. Qui Auriaco placuit modus, majoris fuit animi, qui Spinolæ majoris patientiæ. Auriacum erexit fiducia aperto Marte vincendi; Spinolæ timor suasit cunctationem & moram. Ille audenti, hic timenti similior. Alterius obsidio Numantiæ ac Sagunthinæ similis, alterius Carthaginis ac Alexiæ. Auriaci obsidio minorum fuit impensarum, plurium funerum. Spinolæ minorum funerum, majorum impensarum. Spinolæ, obsessis non minus, quam obsidentibus tædium attulit. Auriaci subita fuit & ad miraculum brevis. Alter cum viris pugnavit & ad bellum admissis; alter cum famelicis potius stomachis. Hujus difficilis, ob brumam ad comportandum è longinquo commeatum difficilem. Illius difficilis, ob hostem animosè pugnantem. Auriacus festinandum sibi rebatur, ob menses æstivos aptos quaquaversum auferendo bello. Spinola minus à mora sibi metuebat, ob hyemem & pluvios menses ineptos ad inferendam

dam vim. Alter brumam duravit, alter æstatem : alter opportuno tempore bellum gessit, alter importuno; ut alterius obsidio magis pertinaciæ æ finis fuerit, alterius prudentiæ. Auriacus obsidione cœpta, & urbi institit à fronte, & hosti à tergo; Spinolæ nec cum urbe negotium fuit, quia pugnare cavit, nec cum hoste, quem non nisi sero habuit. Spinola potentissimi Regis, Asiæ, Africæque Dominatoris opibus vicit. Nos nostro, hoc est, benevolorum civium succo. Ille, ut tutam redderet obsidionem, auxilia ex Germania advocare necesse habuit : nos solito milite tuti minore motu vicimus. Illi cum pluribus præfidiariis res fuit, sed contra quam volebant, otiosis. Nobis cum paucioribus, sed pugnantibus & fortiter resistentibus. Auriaco Patria sua obsidionem imperavit ut Civi, Respublica ut Duci. Spinolæ peregrina tellus ut Duci quidem, sed alienigenæ : ut alter pietatis motu, alter regia solum autoritate rem tantam aggressus fuerit. De his aliisque fusius differit oratio nostra. Serius, quam volebam, excusa fuit, propter obitum uxoris Blaeuwii Typographi. Qui hætenus Panegyrica mea celsissimo Principi libens obtulisti, rogo, ut hunc quoque Panegyricum sermonem eidem submisce & reverenter offerre non graveris. Quam ex se non meretur, à tuo contactu impetrabit gratiam. Vale, Vir nobilissime & clarissime, & tui amantissimum redama. Amstelod. 19 Nov. 1637.

364.

P E T R O C. H O O F T.

EX urbe nostra, Magnifice, præstantissime-
que Hoofdi, aut potius orbe, si me sinas
aliquid dicere hyperbolicus, transisti in oppi-
dum, Batavi Principis fato, Velsii facinore, nec
minus studiis tuis celebre. Vbi illi & publicæ &
privatæ calamitatis invenere materiam, tu famæ
& immortalis gloriæ multiplex paras argumen-
tum. Eadem sedes autores illos habuit magno-
rum motuum, & te præconem & testem. Illi hor-
renda facere ausi, tu scribere. Non minor laus
est, res omni ævo victuras posteritati tradentis,
quam eorum, per quos illæ primum gestæ sunt.
Velsius Principem gladio sustulit, tu utrum-
que grandi calamo extulisti, & sepulta dudum
protulisti in lucem. Ille quod fecit, minus lau-
dabili ausu fecisse putandus est. Tu quod ag-
gressus es, omnium applausu confecisti opus.
Habitas in ea arce, quæ spectaculum præbuit
Batavis fortis Principum, & divinæ tuæ mentis:
quæ tanto Principum sorte felicior est, quanto
ab istis casibus abesse gaudet longius. Quoties
secessum tuum cogito, Musarum subeunt late-
bræ & diverticula. Quibus gradibus ad illum
indies ascendis, ascendis ad cœlos & summa
omnia propius. Illic tua Claros est, & Patara, &
Phocis. Illic Phormiæ tuæ, & Tusculum, &
nunquam bonis fatales Capræ. Cœlestibus
adsuescis, cœlitibus vicinior, & dum terras ex
alto

alto despectas, supra illas animo erigeris. Illic
 positus nec sapias cum vulgo, nec loqueris. Ora-
 tione sublimi res sublimes æquas. Quæ effaris
 magna, dicendo majora facis, quæ exigua, ma-
 gna. Quanquam exiguum nihil sit, quod tra-
 ctare in animum iuduxisti maximus. Principes
 canis, ubi nullus Principum fulgor. Regum vi-
 tas describis, ubi Regiæ majestatis ignota hæc-
 nus fuere & decora & imperia. Belli Belgici
 historiam contexis eo loco, qui tantarum re-
 rum capax non est, ut major sis & eâ, quæ te
 habet, arce, & rebus, quas secundo toties pecto-
 re depromis. In otio tumultuaris, in pace præ-
 liaris: vastitatem facis scriptor inter agrorum
 culturam. Federa publica nectis, ubi absunt
 Federati. Rumpis eadem ubi nullæ sunt partes.
 Obsides urbes & capis, ubi nullus jam ab obsi-
 dente metus. Regis longius remoti iras & ira-
 rum causas narras, ubi irasci ob illas digne vix
 quisquam præter te potest, qui ea omnia ad
 animum revocas altius, quæ Reipub. nostræ
 olim incubuere gravius. De Albani dira severi-
 tate verba facis in lenitatis domicilio. Plectun-
 tur capite optimates, cæduntur Belgæ, exulant
 cives, ubi litteris tuis & libris mitescunt omnia
 & feritatem exuunt. Quam feliciter migrasti,
 celeberrime Hoofdi, ex urbe strepera in eruditi
 silentii & beatæ tranquillitatis domum, ubi non
 Mercurio, sed Phœbo, non Divæ Monetæ, sed
 Palladi litas; ubi dum privata minus, ea magis
 curas, quæ omnium interest scire. Mutas so-
 lum,

lum, & constas tibi. Mutas aërem, sed non quo in amicos ferris, affectum. Opulentis Amstelodamensium portis egrederis, & minus opulentas Muydæ subis, ut & summæ fortunæ theatrum intueri te, sine morum noxa, posse ostendas, & minoris non adspernari. E domo tua in arcem transiisti, ut longius arceas, quæ domi objiciebantur graviora agitati impedimenta. Obis mœnia tua & mœnium ambula-cra tacitus, ut mox Taciti tui præcepta efferas disertus. Flevo propinquior in ejus scriptoris intima admitteris, qui Romanorum fatis flebilem Flevum, ejusque proxima notat. Vixisti pridem, ubi aliorum imperio vixisti civis. Iam vivis, ubi tuo imperio legibusque vivitur. Hic illas accipere non indignum te credidisti, illic dare dignum Satrapa & Præfecto putamus. Inter alitum voces & linguas, quæ turre tuas circumsonant, humanam reformas, & dum illas pro oblectamento habes, Belgico idiomati & elegantiam & pristinum nitorem quæris, & invenis. Vocibus prudentiam ubique, & rerum peritiam addis. Levia ingeniorum minus æstimas, & quotquot animi tantum delicias sectantur, & λόγων, [*sermonum*,] ut, cum Euripide loquar, εὐμορφίας. [*pulchritudines*.] Ad Vechtam nunc sedes, nec minus doctrinæ tuæ radiis Amstelam & Yam cognata flumina illustras. Quas illi merces vehunt revehantque precium à te non leve capiunt. Gaudet Typhis eo in portu explicare vela, ad cujus oram tragici poëmatis
vela

vela primus Batavorum explicuisti. Ædium raritatem supple non perituris ingenii tui monumentis. Et qui deest habitaculis civium tuorum decor, Musæ tuæ beneficio singulis confertur. Superbiunt villæ te præside, & humiles casæ te Prætore prætoria ipsa laceffunt. Portarum custodes dum urbi, dum arcu invigilant, Batavi Apollinis securitati invigilant, & pro hostibus barbariem, ac recti ignorantiam exesse jubent. Prope exsuccas paludes eo doctrinæ succo abundas, quo adolescit publica salus, ne desint præsidia, quibus illa, quibus Muyda, quibus domus tua aliquando insistat. Scribo hæc, clarissime Vir, ut scribam, & horas fallam otio graves. Majoribus officiis tuum erga me adfectum probavisti. Ego meum erga te minoribus testari non possum, quam si rerum inopes epistolas mittam & canoras, ut ille vocat, nugas. Valetudinarium invisisti sæpius, excepisti humaniter, & cordata erexisti oratione. Quid rependam? verba & voces, sed eas, quæ te, quæ humanitatem tuam, & singularem doctrinam, quæ conjugis tuæ matronæ erectissimæ officiosam erga me comitatem grato pectori æternum inscribent. Tibi, uxori, liberis, valetudinem solidam & diuturnam precor ab Illo, qui largiri illam solus in manu habet. Vale. Amstelod. 14. Maji, 1638.

365.

IOACHIMO VICOFORTIO.

Postquam hinc discessisti, dilectissime Vico-
 forti, discessi tecum. quæ te naves, qui te
 currus hinc abduxere, unà abduxerunt me. Feci
 cum corpore divortium, & comitatus abeun-
 tem, non fui ultra hic, si quod sum eâ parte
 æstimes, quâ se Anaxarchus Philosophus, & So-
 cratici omnes homines censebant. Negant Sa-
 pientes animam dividuam esse. Ego te absente
 falsum hoc comperio: nec enim totus vivo, sed
 portiuncula mei, ex quo tu animæ meæ & præ-
 sidium, & dulce decus à nobis abivisti. Scis tri-
 plicem esse animæ potentiam, eam, qua vivi-
 mus cum plantis; eam, qua sentimus, cum bru-
 tus, & eam qua sapimus cum intelligentiis &
 divinis mentibus. Nulla harum jam integra mihi
 superest. Vivo languidius, quia tu vitæ meæ fo-
 mentum eras potentissimum, ac vultu, sermoni-
 bus, officiisque pluribus, quæ referre non atti-
 net, protrahebas dies minus subinde lætos, &
 afflatu tuo alebas vitalem flammulam. Diminu-
 tos quoque sensus sentio, quia quem videbam,
 audiebam coram; cujus dexteræ jungebam dex-
 teram perlubenter, nec videre jam, nec audire,
 nec tangere conceditur. Et cum animalium sit
 loco moveri, ego remoto Achate meo penè
 plantanimal sum, & spongiæ similis adhæresco
 tenacius domesticæ rupi. Refecta est è ratione
 pars, quia tu bonæ mentis argumenta objicie-
 bas

bas indies, nec sinebas marcescere intellectus vim, qui dum te absente feriatu nimis, desiderio tui carpitur magis. Voluntas, quæ omnium animæ facultatum maxime est divina & materiæ expers, vix jam sua, vix jam mea est. Perit illa, quâ te diligebam, amore, ut in scholis loquuntur, complacentiæ, qui circa bonum præsens est. perit illa, quâ inter honestissimos te, ut non fictæ & fucatæ honestatis exemplar, amplexabar quotidie. Desii velle jucunditatis & elegantiae omnis patrem & arbitrum. Desii velle usibus publicis & amicorum natum, Gratiarum & Musarum corculum, in quo & antiquitatis studia veneramur, & quidquid inter nova sine affectatione excellit, stupemus. Adversus hæc abitionis tuæ incommoda remedium non aliud superest, quam ut absentem præsentem fingam. Est animorum nexus inter loco distitos, & coalescunt illi sejunctis maximè corporibus. Sæpius opto, verum illud esse, quod Averroi verum videbatur: Vnum esse omnium hominum intellectum, ut tuus meus sit, meus tuus. Sæpius opto, veram esse illorum sententiam, qui corpus idem pluribus locis præsens esse contendunt, ob hoc solùm, ut tibi jungar propius. Sæpius me recreat illa cogitatio, terras omnes, si cum extremo cœli margine compares, centrum esse, & quantitatis expers punctulum, ne ulla sensibili diametro secludamur. Sæpius cogito avidius expeti, quibus ad tempus carere cogimur, & voto possideri longius

remota. Occursat subinde illud, quod proverbio dici solet: amicus alter idem, ne si duo simus, sejungi nos ac dirimi possibile sit. Nec ignoras, mi Vicoforti, somnia fingere eos qui amant. quare ut solatia undique conquiram, fingo me Eurum esse, ut te sequar per nubila: vel Solem, ut quavis te diei parte intuear: vel Lunam, ne de nocte me fugias: vel Oceanum, ut navigantem insequar: vel Tritonem, ut valetudinis tuæ nuncium quaquaversum ad amicos deferam. Quin sexus immemor fingo me Berecynthiam esse, ut dum per turritas urbes verheris, rerum tuarum sim conscius: vel Famam, quæ non nisi vera, & fausta omnia de te nunciet. Cum Scepticorum placita volvo, cuperem illud cum ratione asseri, non magis te abiisse, quam non abiisse. Cum Peripateticorum, cuperem illud mihi probari, intellectum fieri illud, quod cogitat, ut quoties menti objiceris, ab eâ arctius tenearis, idem, quod ille est, factus. Cum Pythagoræorum; vellem migrare animas etiam vivorum, ut ad tempus tu à meâ, ego à tua capiam Hæceitatem, aut, ut loquar Latinius, formam singularem. Sed desinam fingere paradoxa, & commentis indulgere. Redditus sum mihi, & divisam misere animulam sensi redintegrare, ubi de tuo in Galliam adventu sum factus certior. rediere ilicet vita, sensus, ratio. Maris & prædonum periculis, per Dei gratiam, subductus pedem jam incolumis fixisti in solo, ubi studiosissimos tui habes viros summos

summos maximosque, qui operâ & consiliis tuis uti in felicitatis suæ parte habent. Regem vides, quem iusti amor Deo, & subditis Belgis nostris jungit. Ducem adis, qui Galliarum opibus, virtute suâ, stirpis avitæ & tot tantisque majorum exemplis subnixus, labantem Germaniam novo Marte suffulcit, & salutare sidus, turbulento hoc imperii statu, pulsus afflictisque populis affulget. Nos hic absentem te prosequuti sumus & prosequimur indies animo, votis, precibus, etiam, ut festivè verum dicam, poculis. Inter tot salutes & faventium tibi omnia, non potes non esse salvus & sospes. Non est locus morbis, ubi hos proscribunt publica vota. Interfui cum uxore tuâ, matronâ supra sexum sagaci erectâque, nuptiis filiæ Pauli de Wilhem. Tuo (credas) strepuerunt nomine mensæ: nec dubito, quin tinnierint tibi aures amicorum gratulationibus & benignis vocibus, quibus te non Fortunæ reduci, sed Deo servatori, & tutori omnes & singuli commendavere. Vale, vir summe, & illustrissimum Legatum D. Grotium, aliosque mei amantes reverenter saluta, etiam amplissimum D. Iunium, ubi Rhenum trajeceris. Duci Wismarienti opto, uti sicuti nunc est, præliis, bello pergat esse superior. Tua, fratresque omnes valent. Plurima te salute impertiunt Satrapa Muydensis, collega meus D. Vossius, Mostartius, & liberorum meorum tui observantissima turba. Amstelod. 16 Maji, 1638.

DVm tu Gallias felici itinere peragras , Vi-
coforti præstantissime , nos hic amicis va-
camus , & feriarum dies domi transigimus non
infelici quiete. Fuimus Pentecostæ festo Muy-
dæ, unâ cum lectissimâ tuâ conjugē , & amplis-
simo viro D. Mostartio , quò nos evocaverat
Satrapa Muydensis , vir demerendis bonis na-
tus. Etenim anni tempestas ea est , quæ occu-
patissimos à studiis avellere possit , & sibi totos
vendicare. Illic cum essem, tibi absenti hos ver-
ficulos in convivas nostri hospitis inscripsi :

*Tres sumus hic Muydæ, scriptor, tibi nupta, professor,
Expers ille suæ conjugis, ille suæ.*

*Nec patiens tibi nupta tui est. sine compare quisque
Ambulat & mediis solus inerrat agris.*

It magno Leonora viro comes una, suisque

Hospitibus fato prosperiore præit.

Illa tamen nostræ dantur solatia sorti :

Tres sine conjugibus, tres sine lite sumus.

Muydâ domum reversus nuptiis interfui am-
plissimi viri G. Bartolotti , una cum Collega
meo clarissimo D. Vossio. Invitata quoque fue-
rat uxor tua , sed absentia sua fefellit expecta-
tionem sponsi , sponsæque. Vis causam ? non
est illi plenum gaudium , te absente. Hæc nu-
ptialis scena, si fuisses hic, & spectatorem te ha-
buisset & actorem. Nunc magis seria tibi cor-
di , dum Principibus , summisque Ducibus ad-
fuescis,

suescis, quorum per Europam universam fama celebritasque maxima est. Profecto digniore forte abes. Hic sponsis fruimur placidissimis, illic tu bellicosissimo Duce. Hic in Veneris arena castrisque stamus, illic tu in Bellonæ circo & pulvere. Hic privata amicorum res agitur, illic publica Christiani orbis. Hic inter inermes convivas sedeo, illic tu inter armatos & cataphractos. Hic de expugnandâ virginitate agitur, illic de expugnandis urbibus & castris. Hic Hymen lenioris belli facem ventilat, illic Mavors asperioris & cruenti. Hic cythara, testudine, cantu animi mansuescunt, illic tympanorum, tubarumque strepitu & clangore ad ferociam excitantur. Illic morti præluditur quotidianis præliis, hic vitæ quotidianis osculis. Ita dispare fato vivimus mortales, nec eadem ubique omnes agimus. Fama est, Wismarium Ducem,

Successus urgere suos, instare timenti,
quod de Cæsare Dictatore cecinit Lucanus. Hâc via calcât iter laudum, atque ipsis caput inferit astris. Nos, licet longius positi, gratulamur victori & votis juvamus rerum lapsum restituere. Nec quiescunt Federati Ordines, qui dum Ducis tui felicitatem in lucro deputant, novâ expeditione Hispaniarum Infantem terrent. Auriacus jam movit. prope Sylvam Ducis copiarum coitio est. conscribuntur naves vehendo militi. An in Brabantiam, an in Flandriam iturus sit Gubernator noster in incerto est. Gallorum exercitus Duce Chastillonio

Duynkerkam, ut ajunt, petit. ejus portum clausit Archithalassus Federatorum. Bella, ô bella, horrida bella. Sed Deo, & qui illi proximi sunt, Principibus hæc relinquo. Comes Henricus Bergius desit vivere, & victima esse odii Philippici. Te vivere & valere cupio, & semper quo te cœlestis clementia duxerit, ire. Vale, amicorum ocelle. Salutant te amici omnes, & septenarius meus. Amstelod. 4 Junii, 1638.

367.

P E T R O C U N Æ O.

ADventum tuum, & uxoris tuæ dilectissimæ per dies hosce festos avidè expectavi, verum remoram illi injectam ab inopinato conjugis morbo, ex litteris tuis illubenter accepi. Ita facile humanis consiliis intervenit casus aliquis, & quæ proponimus facile mortales, vetat fieri *moïeg.* [*divina providentia.*] Illud tamen gratioris fuit commatis, quod desæviisse æstum febrilem scribas, & fractam morbi vim inducias dare laboranti. Eam prorsus jam convalescere spero, & eo esse valetudinis statu, ut excurrere tecum ad nos possit, quod promissa exsolvatis ambo. Omnis ille dies festus mihi erit, quo vos videre & amplecti licebit, etiamsi nefastus maximè fuerit. N. N. in Gallias abiit, & salvus trajecit, inde ad Vimarix Ducem profecturus, qui jam victor lapsas Germaniæ res aliquà restituit, & Austriacorum vires accedendo, Gallis nobisque non leves rerum gerendarum

rum occasiones subministrat. Donatus est N. à Rege ejus Ordinis insignibus, quem vocant S. Michaelis. Nec petiit hos honores ambitiose, nec oblatos ultrò repudiare prudentiæ credidit. Fui elapsis proxime feriis Muydæ unà cum amicis aliis, quo nos evocaverat Satrapa, vir in quo maximarum virtutum fyllogen miror. Vale. 8 Junii, 1638.

368.

JOACHIMO VICOFORTIO.

BInis te litteris à discessu tuo affatus sum, Vicoforti præstantissime, respondisti nondum. nec ægrè fero. scio pluribus tibi scribendum esse, & de rebus ejus argumenti, quod ad Philosophum non spectat. Et tamen toties te respondisse arbitror, quoties me uxoriis literis salvere jussisti. Ita perge. sufficit, si memoria mei curis tuis occupationibusque subinde intercurset. Sic me tecum equitare, navigare, ire, prandere, cœnare fingo. Soleo diebus Sabbathis quibus tabellarius Gallicus se exonerat, domi tuæ esse, ut de te & valetudine tua reddar certior. ubi fausta omnia lætaque percepi, ridemus, gaudemus, plaudimus omnes, uxor, fratres affines, ego,

— *Amyclæis velut exultabit arenis*

Pastor, ad Idæas Helenâ veniente carinas.

Sequanam, Ligerim, Rhodanum, Rhenum, & quæ alia attinges flumina vel trajicies, pacata tibi & propitia optamus. Dignus es, cui ob-

sequantur aquæ minores , & Oceani filiæ , qui Oceanum nuper conscendisti , ut terrarum Diis morem geras. Dignus es , cui montes , colles , rupes obviæ sternant iter , quia nihil tam excelsum editumque , quod non modesta animi tui magnitudo transcendere possit. Dignus es , cui valles omnes & depressa famulentur , cui nihil tam humile & submissum , quod non virtutum tibi materiam uberem , & sublimioris curæ suppeditet. Legisti olim odam istam Horatianam : *Integer vitæ &c.* Istam jam tibi applica. Non eges custode , cujus valetudini invigilat custos temperantia. Non metuis tibi à latronibus , cui tutelare nomen est innocentia & probitas. Non opus jaculis , arcu , pharetrâ , qui pacis studia bellis præfers , nec iusta ulla arbitraris , nisi quæ pro aris & focis suscipi suadet imperatque necessitas. Comitem itineris (ita statuo) habes Amp. D. Junium , & in illo comites tres , doctrinam , prudentiam , comitatem. Hæc postrema pro vehiculo est. Væstat te non semel equus veredus , ut celeritate caballi conficias iter , quod instituto jam absolvisti. modò tolutim incedis , & ad numerum colligis equi ungulas , ut non Principibus solum , sed & privatis lentè festinandum esse tuo exemplo doceas. Ita te mi Vicoforti , securum tutumque præstant viæ , comites , flumina , mare , montes. Cæterum publica quod attinet , non unius belli signum in Europæo Orbe erexit Bellona. In arenam prodire magni actores , Austriacus , Gallus , Suecus , Federati.

derati. Austriacus non uno Duce & loco pugnat, non uno Suecus. Gallus alibi duce Chastillonio, alibi duce Wimario victor pugnat. Hic postquam captivos abduxit Cæsareani exercitus Duces plurimos, urbes jam suas facit, & cladem Nortlinganam gloriôsè ulciscitur. Non poterat Gallus certius vincere, quam per Germanum Principem, nec illustrius, quam per Saxonum domo natum, nec fortius, quam per illum, qui Austriacorum terror, & fatalis tempestas habetur. Hic Auriacus noster pergit *ἀεὶ σθένειν*, [optimè rem gerere,] & grandibus ausis promovere res Federatorum. Exercitum navibus receptum secundo Vahali Bergas ad Zomam traduxit; partem ejus sub moderamine Guilielmi Nassovii in aggeres istos arcesque immisit, quæ Wasiâ tuentur. & jam fama est, quosdam ex iis expugnatas nobis accessisse. Illud certum, S. Mariæ Castellum, quod aggeri *Blockersdijk* impositum est, à dicto Comite obsessum teneri. Timet sibi Antverpia, timet Hulsta. Illam expugnari posse vix mihi sit verisimile, & tamen habet paradoxa sua Imperator noster, & res maximas præter omnium spem non semel confecit. Gallus ad Fanum S. Audomari castra posuit, & mœnibus instat. cæsis aliquot Gallorum cohortibus urbi providit Hispanus à milite, pulvere tormentario & comæatu. Duynkerkam sollicitè tuetur, ne tot nostrorum spoliis famosâ urbe excidat. Nondum inclinationem fecit Mavors, suspenso adhuc

730 C. B A R L Æ I

belli eventu. ubi fecerit, gaudebo tecum aut do-
lebo. prius malim. Uti & hoc : Te valere &
amplissimum D. Junium salvere. Salutant te
conjunx tua, fratres, affines, amici complures,
& inter hos liberorum meorum tui studio sissi-
ma turba. Amstelod. 18 Jun. 1638.

369.

P E T R O C. H O O F T.

QUibus hactenus supersedi, magnifice
Hoofdi, jam stabo promissis. Scribam &
quod non offertur ultrò, quæram argumentum.
Dicam aliquid de lite tuâ, de bello nostro, &
studiis meis. Nascitur non rarò lis inter eos,
quibus opes validæ sunt, & qui de herciscunda
familiæ hereditate cogitant. Ideo Philosophis
hoc nomine pax est; nec Hagam excurrere ne-
cesse habent, qui omnia sua secum portant. non
male cum iis agitur, quibus Plutus forensis con-
troversiarum materiam subministrat parcus. Non
opus Iudicibus aut Supremæ aut Provincialis
Curia, quibus sors obtigit infra mediocrita-
tem, liberorum numerus supra eandem. nec ci-
tantur illi, nec citant; causâ nec superiores nec
inferiores sunt. Te, maxime Hoofdi, invitum
scio pertrahi in rostra & forum, qui cum Musis
tuis loqui domi mavis, quam coram Themide
de rationibus accepti & expensi altercari. Sed
his incommodis causæ primum bonitatem, inde
patientia constans robur, denique spem faci-
lioris à Curia pronunciati oppone. Bella no-
stra

stra quod attinet, infelici nuper Marte pugnavimus. Est sua judicii & foro alea, est & bello, utriusque jactus casusque anceps. prioris fortunam experiris privatus, posterioris experimur omnes. Nec tamen in id discrimen adaectæ res, ut locus sit Lucani versibus :

— *Cadit alea fati,*

Alterutrum mensura caput.

Novimus nullibi minus quam in bello respondere eventus. levissimo motu maxima cœpta eludi, parvis momentis in spem metumque impelli animos videas. Invasit nostros Panicus terror, & in fugam se recepere non fugati. Hæsit olim in Minturnis paludibus miles Romanus, noster in Flandricis æstuariis. Fatali ista ripa non semel malè stetimus. Dixerim penè cum Polydoro :

Heu fuge crudeleis terras, fuge littus iniquum.

Proverbio fertur : matrem timidi non flere. sed hac clade multæ timidorum matres flent, sive captivos flere libeat, sive mortuos. Utinam per virtutem potius novissimum spiritum reddidissent, quam per ludibrium & contumelias hostium. Nunc nostrum est, quæ inauspicatò acciderunt, consilio & prudentiâ flectere in melius. tristibus pares quoque nos esse oportet, nec unius prælii eventu pavescendum. Inter initia contra illos magis fuit, quos postremum respexit victoria. Mars communis nunc victum erigit, nunc adfligit victorem. Infirmi ingenii est, lapsu aliquo summæ rei diffidere.

fortes

fortes & strenui contra fortunam insistent spei. Quare nec exaggerari velim calamitatem nostram, nec contemni. *clades scire qui refugit suas, Gravari timorem.* Stulta dissimulatione remedia potius malorum differuntur, quam mala. Tribus magnis urbibus simul institit belli vis, Brisaco, Fano S. Audomari, & Antwerpiae, sed frustra. magnis ausis excidimus nos Gallusque federe promovimus parum. augurent alii alia. ego futurum spero, uti hæc clades acuat nostrum fortitudinem, & quæ fortitudinis cos est, iram. quasi in triumphum per Brabantiae urbes missi captivi discent posthac mortem præferre ignominiosæ captivitati. res secundæ negligentiam ferè, adversæ curam creant & vigilantiam. Nunquam populo Quiritium plus fuit animi; quam cum plus esset periculi & malorum. Sed de his satis, ne sutor ultra crepidam. Iam de studiis tria verba. Nobilissimo Realio scripsi Epitaphium, flagitantibus id amicis. Sed tantisque viri virtutibus non potui parem reperire orationem. Si quid minus placeat, aut frontem tibi corruget, mone & significa. Te suasore, mutabo quidvis. Vale, vir summe, & uxorem matronam spectatissimam, liberosque patris matrisque *ἐκτυπα* [*expressas imagines*] & generosum germen à me saluta. Amstelod. 19 Jul. 1638.

370.

IOACHIMO VICOFORTIO.

NVper in Gallias, è Galliis in Germaniam proficiscentem ad Ducem maximum, literis, animo, votis profecuti sumus, Vicoforti præstantissime. Iam à Duce reducem indies exspectamus, & in iis terris coram videre & amplecti desideramus, ubi charissima habes pignora, Creusam puta tuam, fratres, & intimę admissionis amicum. Illa menses, dies, horas absentis mariti magnâ supputat curâ: & si benè calculum posui, vellet momento confici posse & negotia tua & itinerum spacia. Aliter amor, aliter Peripatus philosophatur. ille longioris moræ impatiens motum optat fieri in instanti: hæc fieri posse pernegat. Nec dubito, quin & te Belgii tui & Belgarum capiat desiderium, ubi bellorum omnis vis defæviit, & minore motu Mavors res suas agit. Post cladem Flandricam & frustrâ tentatam Wasiam, nihil à nobis gestum illustre & laudabile, nihil ab hoste. Captivos nostros præter militiæ morem durius habet Infans Cardinalis, ut plurimi mutato sacramento sub Hispano jam mereant. nec dimissurus illos creditur, priusquam apta bello anni tempestas transierit. Exasperabitur hoc exemplo Imperator noster, & de clementia fortè suâ, ubi similis casus manebit hostem, nonnihil remittet. Obsidionem Fani S. Audomaro sacri solvit Gallus, minus, ut ajunt, gloriose. maluit lentè vinci & circumveniri, quàm non vincere citò.

Etiam

Etiam Brisaco à com meatu & armis prospē-
ctum esse per Cæsareanos constans fama est. In
Insubribus Vercellas recepit Hispanus. Illud in
tantâ malorum sylloge pro solatio sit, prædones
Morinos in portubus suis contineri, ne grassari
in inermes suo more possint. Summâ hoc agit
solicitudine Federatorum Archithalassus, ut na-
vium, quæ in Flandrico hic illic sunt littore,
egressum prohibeat. nuper aliquot egressum
parantes laudabili facinore, in arenas & brevia
egit, ut securus jam naviget mercator & navita
nostras. In Novo Orbe Comes Mauritius in-
sulis aliquot, quæ Portui omnium Sanctorum
objacent, potitus est. Nec tamen spes est, fu-
turum, ut Urbe ipsa potiatur, ob validum quo
tenetur præsidium. Annonæ penuriâ vinci eam
citius posse autumant prudentiores, quam ar-
mis. Ex Orientali India appulere naves gran-
diores septem, opimis mercibus onustæ. Ho-
stem ubique invenit Hispanus vel militem no-
strum vel mercatorem. bello atteritur, & mer-
catu. pugnat Respublica, pugnant privati, &
quod publicis deest opibus, suppleant civium fe-
rè singuli. Goam Lusitanorum in Asiæ finibus
metropolim classe clausimus, ne se Olyssiponem
recipiant galeatæ naves. Felicius foris, quàm
domi hac æstate pugnatum. non ubique pari
nos vultu respicit fortuna. Illud audivisti, in
Hispaniæ portu naves aliquot onerarias in po-
testatem Ducis Condæi cessisse, magnamque
insuper armorum vim. Ita alibi de Gallo trium-
phat

phat Hispanus, alibi de Hispano Gallus, & divisa belli sorte ambo gaudent, ambo dolent. Nobis feriæ sunt ob Caniculæ æstus, quæ flere vult fessas profitentium linguas. Hoc tempore modò in Bamestræ agrum, modò Muydam, modò aliò me ad amicos recipio, ut ab his impetrem hilaritatis pabula, quæ domi negantur. Vale vir summe & amicissime. Amstelod. 28 Jul. 1638.

371.

P E T R O C. H O O F T.

INcipiam à gratiarum actione, magnifice clarissimeque Hoofdi, quam tuæ ac uxoris tuæ prolixæ, penè dixeram profusæ, humanitati debeo. Solent saxis marmoribusque inscribi magnorum virorum laudes & merita. Ego recentis tuæ erga me benevolentiae & benignitatis encomia inscriberem iisdem, nisi animo illa inscripsissem, cujus cum immortalitate vivet in me æternum, vigebitque recordatio tantarum virtutum. Hæsi diutius apud vos, quam oportuit. Sed detinuit me suavissima consuetudo tot subeuntium in vicem amicorum; detinuit me candor tuus & inaffectata comitas; detinuit modulis suis, & non invita cantillatione Alcmariana Siren, aut ut magni Hugonii versibus loquar:

Almerii faxque Pharosque soli.

Cum Muydam irem, ibam ut essem lætior sereniorque. Cum isthic essem, factus sum Aëtes
alter

alter, & veluti recoctus visus mihi juvenescere. Domum reversus tot dierum felicitatem coepi castigare curis domesticis & studiis, cum quibus in gratiam redire perquam mihi difficile est.

Non semper idem floribus est honos

Vernus, neque una Luna rubens nitet

Vultu.

Neque nos in illa suavitate & animorum diffusionem semper esse expediat. Quare, reduxi me, & contraxi, contentus moderata sorte, quam Parca adsignavit. De Gelriæ obsidione nihil certi constat. Hæret in confiniis Princeps cum copiis. In expectatione iterum tristium aut lætorum sumus. Præsidium Gelri intus validum habent, adhæc loci situs & vergens in Autumnum anni tempestas, difficilem reddent expugnationem. In Brasilia spes non levis nostros erigit, futurum ut urbe S. Salvatoris propediem potiantur. Sed hæc aliaque ex fastis hebdomadalibus intellexisti, chartulis tam ficti pravi que tenacibus, quam veri nunciis. Scripsissem heri, sed non licuit per interpellationes amicorum. Vale, Vir maxime cum uxore & liberis præstantissimis. Omnes saluta, & clarissimam Tessellam, amoenissimi ingenii matronam, non unius lætitiæ datricem, discipulam meam suo tempore salvere meis verbis jube. Valete & vivite. Raptim Amstelod. 23 Aug. 1638.

372.

E I D E M.

M *Agnisice Hoofdi,*
 Iam ausim scribere Gelriam obsessam
 esse ab Auriaco. hætenus dubiis ad nos rumo-
 ribus ea de re perlatum fuit. Solet fama ea quæ
 in votis habemus adseverare confidentius, &
 quæ futura sunt in vulgus spargere præmatu-
 rius. Hostis ad Venloam & Mosæ ripam co-
 pias colligit, ut Potentissimorum Ordinum
 & Principis nostri cœpta turbet. Ut se res dant,
 possent committi exercitus, & Cardinalis prio-
 re victoria audacior prælio potius experietur,
 quam ut propugnaculum istud eripi sibi sinat.
 De Duce Bernardo ea perscribuntur, quæ au-
 dimus libentius. Ego victoriæ momentum non
 ex cæsorum & captivorum numero, sed ex suc-
 cessu æstimandum puto. Nisi Brisaco potiatur,
 non difficile erit Cæsari jacturam istam resarci-
 re. Scribit D. Vicofortius ex hostibus desidera-
 tos mille quingentos, totidem captos & vulne-
 ratos. Inter captivos tribuni sunt, & turmarum
 equestrium pedestriumque Duces plurimi. Bel-
 li ferè impedimenta omnia intercepta. Sed hæc
 ex litteris Vicofortii intelliges plenius & pla-
 nius. Regina mater Hagæ est. Ejus in urbem
 hanc adventus in diem Mercurii aut Iovis ex-
 pectatur. Redimicula & ferta & corollas, alia-
 que ad spectacula requisita jam confecere ma-
 tronæ istæ sorores, quæ à piscibus patrium

Pars II.

O

nomen

nomen deducunt. Carmen meum, quod Tibi aliisque placuit, minus arridet iis, quibus arridere debebat. Malint Amstelodamum paupertatis suæ esse præconem, quam magnificentiae & opum. Verum tueri me possum exemplo Iulii Cæs. Scaligeri, qui in Urbium encomiis, singulas ad eundem modum loquentes introducit. Noti sunt versus ejus in Antverpiæ laudem. Vellent DD. Coss. me aliquid scribere de Maximiliani corona, qua urbem hanc donavit. Sed longè petitum videtur hoc argumentum; nec convenientius præsentī rei excogitari posse puto, quam illud de Berecynthia. Vereor tamen ne in idem argumentum inciderint & alii, quos primū adibit Medicea. Quidquid præter illud Epigramma conor scribere, invitâ omne Minervâ scribitur, & præ illo displicet. Vale, vir summe, cum uxore liberisque. Amstelod. Raptim 28 Aug. 1638.

373.

JOACHIMO VICOFORTIO.

L Iteras tuas Basileâ ad me datas accepi, Vicoforti præstantissime, veteris tui & sinceri erga me affectus testes. Ternas à me accepisse te scribis, cum præter illas miserim alteras & alteras. Scripsissem sæpius, sed excussit non semel manu calamum adversa belli nostri fortuna. abstinui à tristibus, cum quæ scriberem lætiora non suppeterent. adverso Marte nusquam non pugnavimus, nec favit hâc æstate coëptis exercituum

cituum Deus. ideo laborante publica fama, filii privatus. Didicimus, prohi dolor, malo nostro, Martem alium atque alium esse, nec victricem semper laurum suspendere Federatorum vertici. Ita eunt res humanæ: castigantur subinde magni Principum successus suis calamitatibus, ne humanis præfidiis fidamus nimium. Interim gratulamur omnes felicibus ausis illustrissimi Ducis Vismariæ, qui solus in Europæo orbe de Austriacis triumphat. Obsedimus nos Geldriam, sed superveniente ocyus hoste solvimus obsidionem, capto Principis Portugalliæ filio. Venit in urbem hanc Regina Mater, Maria de Medicis, ipsis Calendis Septemb. ab amplissimo Senatu civibusque ea qua par est veneratione excepta. Obviam adventanti ivit equitum urbanorum turma, phaleratis equis decora & conspicua. Nec enim ad pugnam ibat aut bellum, sed ut dignis honoribus exciperetur augustissima magni Regis conjunx, trium Regum mater, è Cæsaribus maternum, ex Etruriæ Ducibus paternum genus ducens. Civium quotquot sunt signa & centuriæ, in armis adesse jussæ, intrantem prolecutæ sunt. Exhibita spectacula plurima, erecti arcus triumphales, explosa per urbem tormenta, quæ locis opportunis disposita illustrem clarumque adventum fecere. Inter spectacula Berecynthia fuit Deorum mater curru vecta, nec non collatio Coronæ Cæsareæ, qua ex Maximiliani Imperatoris dono hæc urbs gloriatur. Neptunus adhæc

Nereidesque Reginae in aquis adventum gratulantes : Nuptiae insuper Henrici Quarti & Mediceae , aliaque plura quae longum foret recensere. Excepere eam rariore convivio Praefecti Societatis Indiae , quae ad Orientem mercatur. Pro ferculis fuere omnis generis aromata , quae Aurora mittit , quorum alia sapore , alia odore , alia colore , alia omnibus simul placere poterant. Ego inter alios hunc strepitum edidi brevi Epigrammate , quod augustissimae Reginae , magni Henrici conjugii , trium Regum matri , Caesarum & Etruscorum Ducum stemmate illustri inscribere ausus fui :

*Qualis per Phrygias quondam Berecynthia portas
Vecta fuit, partu tot celebrata Deum ;
Ingredere auspiciis nostram felicibus urbem ,
Atque oculos per me fer, Medicea tuos.
Quos portus, quae tecta vides, turresque ratesque ,
Templaque, fortunae sunt monumenta meae.
Per terras fluctusque vagor : sua munera mundus
Mittit, & hic precio prostat uterque suo.
Caesaream felix, abavo donante, coronam
Et decus à vestro sanguine grande tuli.
Ad te praeteriti redeat nunc gratia facti ,
Et non immemorem, maxima Neptis, habe.
Sic placui defensa tuo, Regina, marito :
Sic nato de Te Rege beata fruor.
Si majus genuisse Deos, Regesque, Ducesque ,
Iam matri liceat tot placuisse Deum.*

Reditum tuum exspectamus omnes exerto collo. Noli diutius nos mulctare absentia tua.

Non

Non puto futurum, ut novis mandatis alio deflectas, priusquam domum veneris. Vocant te huc plurima tibi tuisque nota magis, quam mihi. Domi tuæ omnia salva. Salutant te amici omnes, quos plurimos habes & tui studiosissimos. Vale, mi optime, mi fidissime. Et *nil mihi rescribas, attamen ipse veni.* Amstelod. 16 Sept. 1638.

374.

CORNELIO BOYO.

NON morabor tua tempora longa oratione, nam sponsus es, cui non vacat iis distrahi, quæ procul absunt à sponsæ gaudiis. Nuptias dignas te, dignas tuis virtutibus, summisque ingenii laudibus tibi gratulor, non minore aut minus sincero adfectu, quam tu amas amari à te dignissimam. Gratum mihi fuit hoc intelligere, atque hoc unum inter tot tristitia fere lætum. Debetur Iurisconsulto conjux, cui conjugum & conjugii leges probe notæ. Debetur Poëtæ; cui amor Venusque sæpius pro argumento est. Sed petis Epigramma in nuptias tuas, & ut impetres, meam in hoc officii genere facilitatem meis mihi versibus amice & suaviter objicis. Mitto disticha aliquot inter febris quartanæ, quæ me miserum habet, & glebæ Amstelodamensi affigit, symptomata nata. Ab illa si vitium labemque contraxere, contraxerunt autem maximam, tu malo vati & jam insuper male habenti imputa. Vidi & legi poëma tuum

de raptu Benjamitarum, arduum profecto & plenum majestatis. Peccatum in ordine. Nisi in Paradiso meo gesta præirent tempore, tuo poëmati primæ debebantur. In editione Cynismi velim attendi ad illa, quæ correctione egere putavi. Scripsi amplissimo Catsio, quos versus & quomodo emendari cupiam. Iam vale, amicissime Boye, & sponsa tua felicissime frue-re, cui ut clarissimi Iurisconsulti & vatis amores bene cedant, Deum obnixè rogo & precor. Magnifico viro, Blocklandiæ Toparchæ, socero tuo μέλλοντι [futuro] plurimam meis verbis salutem dicere ne graveris. Salveant quoque viri amplissimi, mihiq; conjunctissimi D. Sebastia-nus Franco Consiliarius, & urbis Dordracenæ Senator dignissimus Beverovicus. Raptim Amstelod. 6 Octob. 1638.

375.

I O H. I S A C I O P O N T A N O.

Historiam tuam Gelricam, celeberrime Pontane, lætis ac gratis animis exceptam esse à Gelriæ Proceribus utique tibi gratulor. Digno profecto & honesto honorario profecti sunt labores tuos, si vera sunt quæ ex amicis accepi; licet tantæ industriæ tamque consummato operi vix respondere possit publica liberalitas. Me quod attinet, non merui exemplar, quod mihi destinās, pro misso carmine. Exosculabor illud ubi miseris, & simul eruditionem tuam, & diffusa late scientiarum spatia
tacitâ

tacitâ animi veneratione recolligam. Fuit hic Henrici Quarti Galliarum Regis conjunx, Maria de Medices, magnifice & splendide à Magistratu excepta. Hanc pompam & festivitates publicas brevi historia superiorum jussu conscripsi. Mittam, ubi prælum effugerit. Ab ejusdem Mediceæ generosa humanitate fluxit, quod effigiem suam, cui pingendæ sedentariam moram rarissime commodat, Ampp. Coss. promiserit. Hæc ipsa jam imagini invictissimi Imperatoris Caroli V. Mariæ proavunculi, Provinciarum Belgii olim Principi, lateri in Senatoria domo æternæ memoriæ destinatur, cum hac mea subscriptione :

Sic ivit nostram grandis Medicea per urbem,

Sceptrorum mater suspicienda trium.

Vale, 10 Ianuar. 1639.

376.

CONSTANTINO HUGENIO.

Hesternam vesperam inopinato tuo adventu lætiores mihi reddidisti, nobilissime Hugeni. Totam noctem dormivi securus, quam alias cum morbo & domesticis curis soleo dividere. Solis officium videris mihi præstitisse, qui Fovet & Discutit : quod Ducis Alenzonii fuit symbolum. Redeunt ad te versus tui graves, pii, eruditi, qui sacro clarissimi scriptoris operi facem præferent. Posui censuram, aut potius sententiam meam? dicam quod res est. In Epigrammate omnia sana sunt, argumentum,

O 4

dictio,

dictio, numeri, genius. In censore laborant & vacillant valetudinis & ἐνεξίας [bonæ habitudinis] momenta penè omnia : actiones, partes, spirituum vis, sanguis, aliaque. In carmine tuus es, & recto stant omnia talo. Censor nondum suus languet, dum divinæ auræ particulam in societatem mali trahit febrile contagium. Utar tuis verbis : Summa tua manus hic quasi prima fuit. Merum manna fundis, panem Cœli & Parnassi. Cœli, quia pia loqueris, & sanctitatis rore tinctos sensus effaris. Parnassi, quia poëtice illos ipsos effers, & Apollinem Musasque ea phrasi loqui facis, quam olim in mediâ Phocidae ignoraverunt. Totus sacer es & minime plenus. Sudavit hic non minus pietas tua, quam in grandi opere magni Heynsiadæ. Hoc est, mî Hugeni, convenientia scribere & apta τῇ ἐπιθέσει, [argumento,] non delphinum appingere sylvis, aut fluctibus aprum. Valde apposite precaris, ne Zoili leonis unguis sentiat hic Daniel, plurium enim judicia experietur. Sed tutus est varia eruditione, & præsertim Græca Ægide hic Palladis alumnus. Et si bene calculum posui, non patietur se in speluncam Leonum vel à Regibus, hoc est doctorum principibus, detrudi, sed causam dicet teste die & sole. Nec desunt huic Danieli unguis, quibus se Leonum unguibus opponat, ut citius Samsonem futurum putem aut Herculem, leonum domitorem, quam Danieli isti similem, qui non nisi divina ope protegi potuit. Vale, vir maxime,

me, & Barlæum tuum constanter, ut facis, ama. Nobilissimos Dominos Mylium, Thienhovium, & Catsum, ubi occasio feret, saluta. Raptim Amstelod. 20. Ian. 1639.

377.

JOACHIMO VICOFORTIO.

PEdem unum in cymba Charontis habui, nobilissime Vicoforti, amicorum ocelle, è qua me præter spem retraxit divina clementia. Adcò me per quadrimestre afflixit & attrivit, gravissimis paroxysmis, pertinax quartana, ut fractis omnino viribus, plurium iudicio deploratæ fuerim salutis. Sed erexit me inter febres & febrium symptomata & liberorum amor, à quibus avelli durum parenti videbatur, & perpetua tui memoria. Putabam enim injuriam mihi fieri à fatiis, si ante tuum reditum hinc migrarem. Etenim longa tua absentia non solum conjugem tuam dilectissimam & fratres germanos multas, sed & me, qui pro adoptivo fratre haberi possum & cupio. Vide quales quantasque ex amicitia nostra colligam conclusiones. Scripsissem N. T. sæpius, sed lectulo diu affixus non fui par solitis officiis. Senas ad te dedi litteras; an omnes in manus tuas pervenerint, utique nescio. Nunc immunis à febre per Dei gratiam tibi litterulis meis iterum obstrepo. Ægrum adhuc & languidum traho corpusculum, ut non nisi tremula manu hæc ipsa scribam. Nondum progredior foras ob frigus & metum recidivæ. Gaudium ob ca-

O 5

ptam,

ptam , post longam molestissimamque obsidionem, Brisacum, non Germanos solum & Gallos victores , sed & longius positos Batavos affecit , & inter hos me quoque , qui gratulabar N. T. ea te tempestate & rerum facie , Ducem maximum accessisse , qua virtuti ejus felicior fortuna respondit. Ingenti se gloria involvit, & totius Europæ applausum meruit , ut qui solus hac æstate belli famam cum laude sustinuit , & toties de hostibus suis triumphavit , idque exigua militum manu , qua potiores numero Austriacos exercitus contudit , fugavit , vicit , tandemque invictam urbem inter tot discrimina , post tot hostiles insultus , media bruma ad dedicationem compulerit. Te , mi Vicoforti , tantæ victoriæ testem & nuncium ad Galliarum Regem ab addictissimo tibi Duce missum lubens intellexi. Hæc legatio uti tibi tuisque gloriosa est, ita, si bene calculum posui, honestis quoque te commodis beabit. Inter Musas & elegantiora studia enutritus profecutus es Aquilas , belli præmia, & pacis Phœbique alumnus turbulenti Martis opima spolia suspendisti in templis. Quantum mutatus ab illo , qui mecum familiaris deambulare , & de studiis sermones habere solebas. Obiit ante sex hebdomadas Academiæ Leydenfis grande decus & lumen D. Petrus Cunæus , cognatus meus , ex febre, quæ in Zelandia ipsum corripuit , & jam valetudini pene restitutum recollectis viribus exstinxit. Vxor simili febre correpta, & mœrore contabescens hesterno

hesterno die mariti manes comitata fuit, & ingens sui desiderium apud quinam prolem reliquit. Inter hæc amicorum meorum funera, parum abest, quin & ipse funus fiam. Scripsi historiam publicæ gratulationis, qua serenissimam Reginam, Mariam de Medices, excepere Senatus propulusque Amstelodamensis. Ea sumptibus publicis, cum imaginibus & iconibus, apud Blaeuwium excusa jam jam lucem videbit. Exemplaria aliquot vestita magnifice in Angliam abeunt. Nec dubito, quin in Galliam quoque ad Regem & Cardinalem missuri sint Coss. nostri. Ego exemplar N. T. & illustrissimo D. Grotio mittam. Opusculum hoc invita Minerva, & gliscente indies febrili æstu scripsi, hoc est minus serenus. Itaque veniam dabis, si Reginæ causam & honores, minus erecta & sublimi dictione exequar. Scripsi rogatu eorum, quorum postulata sunt imperia. Vale, vir dilectissime, ac Barlæum tuum, dum isthic es, eorum favori insinua, quos humaniorum artium novisti esse præsidia & solatia. Amstelod. 20 Ianuar. 1639.

378.

A D R I A N O P L O O S I O
A B A M S T E L.

Nobilissime vir, Patriæ nostræ publicum, & litteratorum privatum decus. Tota hac æstate elapsa nihil ad te litterarum dedi, nihil etiam hac hye-

hyeme. Æstas, quæ lætitiæ mihi argumenta sup-
 peditare solebat, tristibus tragicisque bellorum
 motibus funesta nobis fuit & feralis. Primum
 infelicius pugnavimus ad Scaldis ripam, mox
 cum Sicambris. Clade nostrorum dolui, nec
 concoquere potui, nostra magis negligentia ve-
 cordiaque vicisse hostem, quam virtute sua.
 Levissimo motu magna cœpta eludi videmus,
 parvisque momentis in spem metumque im-
 pelli animos. Ea res mihi scribendi materiam
 subduxit, & animum pene expectoravit, ut of-
 ficia, quæ amicis & præclare de me meritis vi-
 ris debebam, intermiserim. Per hyemem vero,
 ob adversam valetudinem. Ex amplissimo vi-
 ro D. Petitio cognovi filium tuum secundo ge-
 nitum, magnæ expectationis juvenem fatis
 concessisse in Galliis. Solatia vis suppeditem?
 ea à moriendi necessitate, à divinæ providentiæ
 arcanis consiliis, à resurrectionis spe, à vitæ hu-
 jus incommodis & tædio peti solere, non igno-
 ras. Faxit Deus, ut quæ cum morte in illo
 exstimata sunt magnarum virtutum semina, in
 aliis filiis resurgant, & ad maturam frugem ad-
 olescant. Vale. Amstelod. 1639.

379.

JOHANNI UTENBOGARDO.

R *Everende, doctissimeque senex,*
 Nescio an congruum tibi mittam mu-
 nusculum, cum Mediceam Hospitem mitto:
 nempe discursus ludicri & festivitatis, ac pom-
 pæ

præ triumphalis apparatus omnis ad te venit, una
 cum imaginibus & iconibus, quæ caligantibus
 tibi præ senio oculis graves fortasse erunt &
 molestæ. Debebam res sacras tibi mittere po-
 tius, & sermones legales vel Euangelicos, eaque
 verba apud te loqui, quæ senectutem Christia-
 nis solatiis suffulciunt, & fatiscentes ætate an-
 nos divinis meditationibus erigunt. Scio te ta-
 lia meditari & scribere, & animæ tuæ medici-
 nam petere à cælestibus eloquiis. Anhelat illa
 ad Deum, & Servatori suo Christo propius jun-
 gi desiderat. Quare dum moratur hic & adven-
 tum suum differt, tu orationibus piis & san-
 ctis migrationis tuæ ex hoc vitæ curriculo mo-
 ras lenis, & ævi hujus acerba edulcas Christia-
 næ pacis monitis solatiisque. Quæ cum ita se
 habeant, illud rogo, ne hæc mea legas, nisi
 quando spiritus tristior egebit aliquo jucundio-
 re diverticulo. Non est Deus voluptatis hone-
 stæ hostis, cui totum hunc Orbem & mille in
 eo modos aperuit. Et si Reges Reginaeque
 suæ in terris potestatis gloriæque participes
 esse voluit, non erit à virtute & pietate alienum
 ea legere, quæ in gratiam Majestatis Regiæ
 S. P. Q. Amstelodamensis fecit, & publice vi-
 senda exposuit. Scio etiam non esse tibi moro-
 sam senectute, nec adspernari te subinde minus
 tetricas voces amicorum. Ideo audeo benevo-
 lentiae tuæ hæc paginas inscribere, ne merno-
 riam pristinae tuæ erga me benevolentiae & hu-
 manitatis exolevisse credas. Lege, & quæ dis-
 plicent,

plicent, uti catapotia solent nauseantes pueri, exspue. Vale. Amstelod. 1639.

380.

CONSTANTINO HUGENIO.

Literæ tuæ, nobilissime Hugeni, ipso æquinoctio verno scriptæ, mihi traditæ sunt sole æquinoctium egresso. Nec enim ea parte cœli, quâ se mutuo decussant magni circuli & crucifigitur Phœbeia lampas, morari diu amat. Non poteras commodiore anni tempestate tam præclara scripsisse, nec ego tam chara ingenii tui pignora accepisse. Scripsisti æquinoctio ea, quibus æquaris clarissimis seculi nostri scriptoribus. Scripsisti æquinoctio, quæ noctem omnem & tenebras fastidiunt. Scripsisti æquinoctio, quæ raptæ in sublimia, in Cancris chelas, & eccentrici Solaris evectissimum Zenith, mentis tuæ solstitium arguunt. Æquinoctio Sol omnibus mundi populis lucem & tenebras pari mensura dividit. Hoc ipso, tu Zulecheme, & luctus tui, quem tenebras voco, conscia mihi mittis carmina; & simul solatiorum tuorum, quæ lucem interpretor, luculentos thesauros. Æquinoctio Sol veterem annum orditur. Tu hoc ipso tempore veterem amicitiae telam retexis, missis ad me eruditissimæ epistolæ ac optimi poematis radiis. Æquinoctio reficit Sol, quos affligerat tristior bruma. Me, quem maligna pertinaxque febris attrivit per hyemem, tu literarum tuarum verno tepore refocillas, & mortis umbræ

bræ subductum huic ipsi æquinoctio fovendum reddis. Ascendit altius cum Ariete Sol, & tu cum Phœbo & Pallade. Piscium madorem frigusque effugit idem; & tu in stellas cum Stella tua abreptus pituitæ frigorisque pessimam *ἡγᾶσιν*. [*temperiem.*] Æquinoctio verno creatum mundum plurium sententia est: & illo tu me censorem mundissimorum tuorum carminum creas. Tunc inter tot creaturarum exercitus creatæ stellæ. Nec alia tu anni parte Stellam tuam, sidus tuum, cœlo locas. Sol caloris tunc incrementa capit, & tu novas validasque in carmina vires. Ille renasci mundo videtur, & Tu poëtarum ordini. Æquinoctio Sol se medium inter Austrum & Septentrionem dividit, & tu hoc ipso die inter aulæ & amicorum officia medius incedis. Inter Arietem & Taurum cornupetas gyros suos jam conficit Titan. Tu hoc ipso tempore bella, quæ inter cornupetas Principes vigent, militem ex hybernis evocando promoves. Non poteram ego aptiore fidere illa tua de Susannæ fidere accipere & legere; quàm quo medius inter decidentiae & convalescentiae (ut cum Medicis loquar) statum verfor, uti Sol inter adscensus sui & descensus hemisphærium. Sed ut cum Phœbo æquinoctio exeam; quam tu es mi Hugeni, rigidus nominum tuorum expunctor. Si sic rationes suas subducerent mercatores nostri, non frangerent rem, nec necesse haberet Horatii Damasippus operam Sapientiae studiis navare, post opum
suarum

fuarum insigne naufragium. Non vis quicquam mihi debere. Pro carmine carmen, pro epistola epistolas, pro libro libros poematum tuorum remittis, opera elaborata, seria, vitæ mortisque piè eruditæ paradigmata. Et hæc tu pro modestia tua paleam vocas & festucam Prætoris, & ea deprecias, quæ ut maxima admiramur. Qui stuporem aliorum animis inducit luctus, tuo facundiam extorsit. Qui ἐγχεκομμένοις ῥήμασι, sive tertiatis verbis loquitur dolor, te ore rotundo loquentem facit. Egeritur tot linguarum, quas calles, præsidio mœror, quem lachrymæ in aliis explent. Nec debebat una lingua præfica esse matris tot virtutibus præditæ. Græca, Latina, Itala, Belgica, Gallica, masclarum gentium idiomate cani à te meruit, tot masculorum marium parens. Et horum schediasmatum, ut vocas, me censorem esse cupis, qui censuræ talis officio aliorum censuram incurrerem. Non opus censore, ubi ad amussim & normam omnia exacta. Et quis ille tuus calamus? qui & Martem ciet & Musas, qui militem conscribit & imbelles versiculos ordinat ad cædes evocat cohortes & ad otia Phœbum. Dura loqueris & mollia, horrenda scribis & flenda, publica & domestica, Bellonæ iussa & Palladis. Opera in dies præscribis tibi & virtutum exemplo præis omnibus. Pharos es & cynosura & Helice, quam ut ducem recti sequi habemus. Velut Ariadnæ filo vitæ hujus labyrintho & erroribus nos expedis. Maxime Hugeni, talia scribendo patriam

patriam universam & quotquot pietatis ac doctrinæ sunt amantes, tibi devincis, & debendi reos habes, quotquot animas suas cælo devotent. Redeunt ad Te Iambi tui disertis, faciles, eruditi, pii. Fulgebit iis Stella tua inter cœlites & nos inferos. Donas famæ immortalitate, quam vitæ beatioris immortalitate donavit creator Deus. Ad istam tuam Stellam ut serus accedas, neve te nostris vitiis iniquum ocyor aura tollat, faxit idem. Vale nobilissime, clarissime, & amicissime Hugeni, & valetudinis meæ eam esse rationem crede, ut lectionibus publicis sufficiam, aut scribendo carmini vel epistolæ, sed non palæstræ, non curriculo, non cæstui, non disco. Amstelod. 26 Mart. 1639.

381.

GUILIELMO BORELIO.

*A*mplissime Boreli,
Ex morbo per Dei gratiam convalescens, cepi cum Musis in gratiam redire. Primitias valetudinis Amplitudini Tuæ consecro: qui enim laborantem non semel invisere, qui Christianis solatiis, & vocibus insuper boni ominis erexisti languescentem, fructum jam aliquem refeci (si modo fructus dici possit officiosa Poëtæ loquacitas) humanitatis tuæ & officiorum, quæ immerito præstitisti. Utinam in me dignum aliquid, tuisque virtutibus aptum reperire possim, quod devinciendo Tibi conveniens sit. Ab his bonis licet imparatus, testabor gra-

Pars II.

P

titu-

itudinem solâ tuorum erga me meritum confessione, & quæ meæ sunt facultatis explicabo in Te, qui optimæ ac benevolæ voluntatis documentis pluribus me prævenisti, nec cessas eos mihi conciliare, in quorum manu privatorum positæ sunt fortunæ. Nihil dicam ultra, ne videar currenti calcar addere, & tuo in me adfectui movere controversiam. Pauculos hosce jambos lege, & benigne interpretare. Aliis alia largitus est Deus, mihi pauperis Camœnæ tenuem spiritum indulgit. Vale, cordatissime Boreli, & sine ut in amicorum Tuorum cœtu nomen quoque meum inveniam. Amstelod. 4 Non. Apr. 1639.

382.

P E T R O C. H O O F T.

N *Obilissime Hoofdi,*

Hoc epitheto Te compellant intus litteræ meæ, alio foris. Scio nobilitatis & quidem equestris insignia Tibi collata esse à Christianissimo Rege, ideo nobilissimum virtutibus & regali suffragio alloquor. Sed cum litteræ hujus rei testes, una cum pendulo Michaële & Dracone nondum, quod sciam, in manus tuas pervenerint, nolui huic epistolæ recentem, ac insolitam summæ dignitatis appellationem foris inscribere. Vbi fidem rei fecerit manus regia, isto mihi & amicis omnibus nomine compellaberis, magna fiducia & propensissimo adfectu. Pluribus iste honos splendorem adfert minus suâ luce splendidis. Quin gravis est iis
Domi-

Dominis , quibus fortunæ magis felicitate obtingit , quam suo aut suorum merito. A te ordo equestris splendorem capit ; nec gravis hic est viro , ob eruditionis , facundiæ , muneris , & parentum , suaque erga Patriam & Rempublicam merita illustrem. Accedit , quod Galliam universam & maximi Regis Henrici IV manes Tibi singulari scripto devinxeris , & immortalī famæ donaveris Borboniæ domus bellicosissimum Principem. Non fecit Te nobilem Gallia , sed declaravit. Fuisti dudum opere & studiis , quod nunc es Augustissimi Regis Lodovici testimonio. Mihi verò , Vir dignissime , tanto nobilior crederis , quanto pulchrius est , parari nobilem , quam creari :

— *perit omnis in illo*

Gentis honos , cujus laus est in origine solâ.

ait ad Pisonem Naso. Inito inter Franciscum I. Galliarum , & Henricum VIII Angliæ regem federe , Franciscus in Equitum aureæ periscelidis ordinem receptus est , Henricus in ordinem D. Michaëlis. Ut jam honoris hujus titulum communem habeas cum Regibus. Ita dum in aliis generis fulgor desinit , à Te incipit. Vnum peto , ut qui extra conditionem poneris civilis ac popularis fortunæ , amicos tamen & inter hos me , cultorem nominis tui ac virtutum ferium , prioris fortunæ cancellis includas , & amare pergas ob candorem & literarum studia , qui N. T. ex animo hoc adblandientis purpuræ lenocinium gratulatur. Vide , quam captem ,

mî Hoofdi , tibi scribendi occasionem. Dum nihil agunt Reges, Infantes, Celsitudines, Duces , in amicorum sortem & felicitatem privatam diffundo sermonem. Quem in adversâ valetudine sensi fidum , & in omne , quod ægro præstari potest , officium pronum ; jam prosperiore valetudine Dei frueris beneficio , affari amo verbis non , ut ante , tertiatis , aut , ut Græci vocant , ἐγχεομύενοις. Cognatus tuus nobilissimus D. Vicofortius è Westphalis salvus sospesque domum rediit. Hamburgo visendæ sororis causa venit soror uxoris D. Vicofortii. Arcem tuam Muydamque , superbi Illi minus æmulam, ante abitum suum cum amicis videre cupit & gessit. Clarissimus Vossius collega meus, postquam febre tertiana ipsum expediit Deus & medicina , colico dolore miserè excruciatu fuit. Ab hoc immunis calculorum laborare cœpit , tot eruditarum animarum domestico tortore. Iam meliusculè , per Dei gratiam, habet , & cum libris rediit in gratiam. In Daniam moderandis ac mitigandis , quæ exigit Septentrionis necessitas , vectigalibus abibit non Consul Bickerus, uti opinio fuit, sed amplissimus D. Albertus Conradi Burch , & Abelus Coenders Groeninganus. Princeps Auriacus exercitum propediem educet. Eduxit , aut in procinctu est ut educat , Galliarum Rex. Infans Cardinalis castra movisse creditur. Bella , ô , bella horrida bella ! Dux Wimariæ sub communibus Galliæ Germaniæque signis ,
Ba-

Banierius sub Sueonum Leone feliciter adhuc militant, non invito me, nec Te invidente. Vale, Vir nobilissime, ac doctissime, & D. Hoofdiam filiasque, & filiolum honoris novi confortes ac hæredes à me saluta. Amstelod. 18 Maji, 1639.

383.

IOHANNI HELMONDO.

P*Ræstantissime Helmonde,*
 Silui diu, quia loqui, nedum scribere vetuit pertinax quartana, quæ debita amicis officia malo more interrupit. Iam per Dei gratiam mihi restitutus, restitutor tibi, restitutor Musis, restitutor Scholæ. Cum Lugdunum abires ad erectioris doctrinæ celebre forum, prosecutus sum te litteris meis, & ultrò properanti monitis suavibus subdidi stimulum. Nunc è carceribus Iurisprudentiæ missus stas in meta, ubi palma decernitur victoribus. Eruditionis tuæ ac virtutum præmia exspectas; nec fallet vota tua Senatus Academicus, tantarum rerum iudex arbiterque. Tempus fuit, cum vix prætextam exutus ex ore meo penderes, Aristoteli & sapientiæ horas tuas locares, rationalem, naturalem, moralem Philosophiam omninò animo comprehenderes omnis disciplinæ capaci. Postea in Themidis adyta admissus, veteris ævi jura perlustrasti, per Imperatores, Instituta, Digesta, Codicem, Novellas cupidam veri mentem circumduxisti iis progressibus, ut jam de pileo

cogitet & modesta tua ambitio, & Iustitia ipsa, quæ suum cuique, etiam honorum insignia, distribuit. Dum ergo in procinctu es, ut publicè tibi applaudat Arausionum Schola, urbs tibi patria, consanguinei omnes, & amicorum quisque, nolui silentio solus in te peccare. Testis ero, quamvis fortè absens, tui & laboris & honoris. Versiculos lusi in futuræ promotionis publica insignia, tum ut animos tibi addam ad alta omnia contendenti, tum ut mei erga te tuosque affectus leve hoc documentum seponam, in id tempus, cum tempestivum erit illud depromi & legi. Vale, Juvenis præstantissime & amicorum ocelle. Deus Opt. Max. ingenio tuo robur, doctrinæ incrementa, modestiæ, humanitati, & in me præceptorem amoris vim largiatur. Amstelod. pridie Non. Iun. 1639.

384.

IOACHIMO VICOFORTIO.

Nobilissime Vicoforti,

Sto ad Rhēni ripam, inter Romanorum castra & arces : illud sæpe cogitans, non minus regnis imperiisque, quam fluminibus sua esse divergia. Non idem ubique, qui fuit olim, Rheno est alveus, nec eadem hic imperii facies, quæ fuit sub Quiritium Imperatoribus. Ignota jam hic Romanorum nomina, & cum fluviis retracta & accisa, imò abolita illorum potestas dominiumque. Tenemus Ordinum titulo eas terras, quas alio possedit Latium. Fruor hic eo
aëre,

aëre , qui sereniori menti convenit , & nebulas animi discutit , & quidquid torpidum est ac se-
gne & remissum erigit , excitatque. Fui Hagæ-
Comitis , ubi , absente Domino , lustravi ædes
Hugenii mei , ad Vitruvii leges exstructas. Vidi
atria quadrata, gradus conscendi laxos commo-
dosque , sphæras adhæc quatuor fumariis altè
impositas , quibus fumum suum aulæ exprobrat
industrius conditor. Vidi hortum , ob loci fi-
tum , in triangulum malè coactum , equorum
etiam stationem , cellas promas & condas Ce-
reris ac Bacchi , Musæum eruditæ pueritiæ sa-
crum, quibus visis dicebam mecum :

Hæc sunt Nassovii bene nata palatia Scribæ

Fultaque non unâ nobilitate domus.

Digere, Vitruvi , lapides & saxa ; perennem

Quod facit hanc, in se maximus Hospes habet.

Etiam, cum isthic essem, conspexi surgentia cul-
mina Comitis Mauritiï , qui dum in Occidente
militat , in Septentrione ædificat, & gloriæ suæ
commodisque receptaculum parat illustre. Præ-
torium Principis , quod Ryswici est , vidi atto-
nitus , & Arausionensis magnificentiae monu-
mentum grande oculis usurpavi. Responder
sumptibus opus, & operi sumptus, quæ virtutis
istius prima & ultima lex est. Hinc digressus
Lugdunum Batavorum, veterem Musarum mea-
rum sedem, viros doctos compellavi, non unius
illos indolis & genii. Exceptus fui magno ap-
paratu à generosissimo D. Barone Kinsky , qui

in valetudinem tuam inquisivit studiosus. Volebat me prandii sui consortem, sed cum dentes addixissem alteri, dolui non posse me iisdem maxillis apud plures edere. Iam apud magnificum virum D. Schonckium versor, ubi cum arboribus & plantis incrementa capiunt prædia ipsa, & villæ magna accessione auctæ. Inter has voluptates, gaudia & festivitates, risus ac jocos amicorum, illud dolori est, quod tuo me adspectu mulctet presens fatum, & felicitatem meam flagellet amicitiae tuæ durâ ἐμείψει. [*intermissione.*] Heri apud Amplissimum D. Surckium cum Satrapa Muydensi & D. Hoofdiâ pransus sum. Cras Illustrissimum D. Camerarium invisam, qui me Alphenum per filium humanissime invitavit. Sic postquam per omnium hominum ordines circumduxero feriantem animum & curis omnibus expeditum, ad lares meos & Te, virorum cordatissime, cum bono Deo sub finem hujus hebdomadis revertar. Habes periodum degressionis meæ, & itineris historiolum. Salutationum, quibus te hic illic salvere jubent viri gravissimi doctissimique, fasciculum explicabo coram. Vale, Vir nobilissime & amicorum ocellle. Raptim Coudekerckæ, 13 Jun. 1639.

385.

I A C O B O M Æ S T E R T I O.

C *Larissime vir,*

Non alio fine filium meum Leydam misi, nisi ut ex ore tuo sanioris Iurisprudentiæ theses

theses hauriret. Famâ quippe nominis tui & industriæ excitus, lectionum tuarum ac disputationum accuratissimarum incredibili amore flagrabat : & sensit me hac parte facilem , cum Tuæ erga me humanitatis & erga plures benevolentia victus conscientia , Tibi charum hoc mihi pignus consecrare jam pridem in animum induxerim. Maximo viro D. Cunæo , cognato meo, successisti dignus Atlas , facemque præbes ad Themidis adyta studiosæ juventuti. Tua laus est ἀίεν δρῖσεύειν , [*semper bene rem gerere* ,] non addam reliqua, ne modestiæ tuæ gravis sim. Prævenisti me non uno beneficio , dum & filium ad lectiones tuas admittis ἀσύμβολον , [*nil conferentem* ,] & doctrinæ tuæ recenti fructu patrem filiumque beas. Mearum partium est cogitare , qua ratione tot me liberem nominibus : obsidem habes sobolem , quæ dum sub te proficit , patrem velut perpetuâ tibi obstringes Emphyteusi. Institutionibus sub doctissimo D. Corvino hic initiatus, togam sub te affectat. Faxit Deus, ut quæ mediocria in illo sunt bonæ mentis semina ad maturam aliquando frugem adolescant. A me vitæ hujus usuram habet , à te melioris expectat. Nos quod naturæ est contulimus ; tu culturam adde , & solidioris doctrinæ masculam faciem. Ita tibi faveat clementissimum Numen , faveat erectior Astreæ genius , & felix te præceptore juvenus. Vale, Vir clarissime, & me tibi addictissimum redama. Munus tuum exosculatus sum , & gratias tibi

maximas dici cupit Collega meus, clarissimus Vossius. Amstelod. 25 Jun. 1639.

386.

P E T R O C. H O O F T.

ERysipelam tuam jam deferbuisse prorsus spero, celeberrime Hoofdi, ut purgato jam à biliosis succis corpore, valetudinem posthac Tibi solidam, & omnis noxæ nesciam polliceri audeam. Nec expedit profecto alium te esse, ut qui te totum amicorum officiis indefinenter impendis, qui uno ore omnes Te, ut alterum Romanorum Lælium, vel Atticum, viros *χαρίεντας*, hoc est, gratiosos, amant & venerantur. Hæsit diu inter Typographorum, mox Bibliopolæ manus versio Medicæ Vondeliana, ad quam etiam suffragium tuum, & Prætorias voces sermonis Belgici Dictator contulisti. Volebam exemplar hoc ipse tradere magnificæ tuæ heroinæ, cum hic esset, sed moræ operariorum impedivere, ne facerem, quod intenderam. Iam per nautam submitto munusculum chartaceum, quod ut benevolæ suæ manus contactu dignetur excellens matrona, supplex rogo. Non peto ut legat, ne nugis terat tempus, quod penatum sibi vendicat propior cura. Fārre litant, mi Hoofdi, qui thura non habent. Quæ me valetudinarium & convalescentem, & pristinae valetudini per Dei gratiam redditum invisit sæpius, fovit, & veluti mater sollicita nutrit, sermonibus suavissimis, bellariis in
gratiam

gratiam delicatioris palati, imo aulicæ culinæ invidiam conditis, totâ Pandorâ honorari meruit. Verum cum hæc Deorum munus sit, non hominum, do malè natum & inter febres scriptum libellum, quo festivitates Mediceæ describuntur. Has κλήσθ [possessione] sibi habeat Leonora tua. Χρησθ [usum] filiabus suis, Susannæ & Constantiæ, lectissimis virginibus indulgeat. Abundant illæ otio, & dum hæc legent, ferias sibi indicent ab amasiorum attentâ cogitatione. Hesdinum in potestatem Regis Christianissimi cessit 29 Iunii. reperta in urbe tormenta bellica 54, dimissi præfidiariorum mille & quingenti. Rex ipse urbem tenet futuram belli sedem. Quæ inter Anglum & Scotum viguit sacra lis, composita est, maximi optimique Regis stupendâ facilitate. Actæ in templis Deo publicæ gratiæ. Vale, Vir clarissime & cordatissime, & me favore tuo & blandissimæ uxoris porrò involve. Amstelod. 9 Iul. 1639.

387.

Serenissime Principi

BERNARDO, SAXONIÆ DVCI,

*Exercituum Federatorum Regum ac Principum,
in Germania summo Præfecto.*

FACIT rerum à Te gestarum magnitudo, Serenissime Princeps, ut etiam longius positi in laudes tuas abripiantur, qui Celsitudinis Tuæ fortitudini ac divinæ felicitati ex animo gratu-

gratulantur. Ad Rheni fontes bella moves , & eorum grandi fama Orbem Europæum imples. Nos circa Rheni ostia armorum Tuorum strepitu & clangore exciti, reflectimur in Te læta acclamatione. Idem fluvius & Te authorem habet maximorum facinorum, & me testem, Te victorem, me præconem. Vrbes capis, nos captas loquimur; arces expugnas, nos expugnatas prædicamus; regna imperiaque Austriacorum Tua facis, nos armorum jure tua esse publicè fatemur. Et quamvis perfecisse ea majoris sit operæ, quam celebrasse, tamen & suum est celebrantis Poëtæ momentum: & posteritatis interest, nosse majorum gesta, præliâ, triumphos. Nulla sæcula virtutum suarum vatem sprevere. Modestas laudes Regum Principumque generosa magnanimitas admisit semper , & illa dici non ægrè permisit, quæ gessisse gloriosum fuit. Tuis bellis, Excelse Princeps, natalium Tuorum splendor , proavorum virtus & celebritas ingens adfert auctoramentum. Qualis natus es, talis vivis. Origini tuæ respondes militiæ gloriâ , & Witikindi Regis infractum animum præstas Germanis tuis , quorum tutelam & vindicias , partes putas à summo Deo Tibi concreditas. Urbem Brisacum aggressus es, opere, milite, loci situ munitissimam & oportunitate inter Elsatæ primas. Aggressus es cum modicis copiis , & paucis mensibus claudis , oppugnas , capis. Quæ hæc vis animi , vel benignitas fortunæ? Vtraque adfuit , & illa ut auderes dedit , hæc ut posses. In
una

una ista urbe animos tuis fociisque addidisti, hostibus ademisti. Ex eo Burgundiæ urbes plurimas invasisti & pervasisti, & non audenda ausus Germaniæ margines latè tenes, ut in interiora hostium tutius penetres. Tibi, Dux consideratissime, hos lauros, hæc trophæa, poëtica hac Panegyri suspendo, quam ut benignæ manus Tuæ contactu digneris, supplex rogo. Parem summis meritis orationem si non repperi, cogita, non semper Iovi hecatombas offerri, sed & gratum esse tenue libamen, ab humili puroque adfectu profectum. Faxit Deus Opt. Max. ut quæ bella inchoasti fortiter, indies promoveas alacriter, Christiani orbis ac præsertim Germaniæ Tuæ bono consummes feliciter, & quam poëtis pacem impetrare nequis, victricibus armis extorqueas, Ita vovet

Serenissimæ Tuæ Celsitudinis

cultor humillimus C. BARLÆUS.

388.

P E T R O C. H O O F T.

Nobilissime Hoofdi,

Scripsi aliquando, Poëtices studium scabiem esse cum perpetuo pruritu conjunctam. Quid alii statuant, equidem nescio. Illud sentio, ut ut maxime velim Musis meis indicere silentium, loquacissimum tamen me esse, & nihil minus, quam Silentiarium. Si simiæ vel catellis pomum objicias, vel aliquid pilæ simile ac rotatile, accurrit animal quietis impatiens, & stupenda

penda agilitate movet se quaquaversum. Quoties illustre aliquod carminis argumentum mihi suppeditat publica felicitas, motus meos impetusque compescere nequeo, & volens nolens rapior in veterem insaniam. Superiore anno militavimus nos, sed sine gloria. Nec Gallo bene cessere sui conatus. Solus Saxoniae Dux Bernhardus famam belli victor asseruit, & communem causam expugnatâ Brisaco valide suffulciit. Freno Rhenum coërcuit, Austriacis avitum peculium eripuit, & Germaniae propugnaculo, situ, opere, ac praesidiis munitissimo Istri dominum exiit. Ad insignem animi fortitudinem accessit fortunæ benignitas, quarum illa ut auderet, fecit, hæc ut posset. Ego, cui nimia in poësin proclivitas vitio vertitur, tam illustris victoriæ testis & præco esse volui, præsertim hortante illo, cujus apud me preces pro imperiis habentur. Moris mei est exemplaria hujusmodi Poëmatum amicis impartiri, inter quos cum agmen ducas, rogo ut claudicantium hoc carminum agmen, favoris tui ac æquioris judicii tibicine erigas fulciasque. Cum erysipelatis tui incommoda oculis excusserit Salus, lege laudes maximi Principis, qui præliorum suorum ac Martii strepitus clangore orbem Europæum latè implet. Concessi hodie in agrum Bilemerium, ubi cum famem exemero prandiolo, circa vesperam ad meos revertar. Comes itineris est Amplissimus Quæstor Utenbogartius, cui Muydam proficiscenti ausus fui hanc Panegy-
rin

rin tradere, ut de manu Quæstoria in Prætoriam deponat Bella per Ellatiæ plus quam civilia campos. Ubi domum reversus fuerit N. Vicofortius, excurram ad tecum D. Mostartio, non ferculorum sed amicorum suavissimo condimento. Interea vale, Vir honoratissime, & consideratissime Satrapa, ac nobilem thori sociam, familiæque tuæ spes fœmininas submisit meis & liberorum meorum verbis saluta. Amstelod. 16 Jul. 1639.

389.

GERARDO NIENDALIO.

A Micissime ac disertissime Niendali,
 Nolo de verbis tecum ultra contendere. Ad rerum te provoco certamen, hoc est, amicitiae, benevolentiae, humanitatis. Tu signum tollis & me filiamque peramicè invitas. Et ut pertrahas, viduam juvenculam, vegetamque itineris mei vis esse comitem, me ducem. Non renuo, licet impare congressu lentum ac rude donandum amatorem, jungi cupias vernanti & integræ matronæ. Amicitiae officia præstare illi possum, amoris minus. Scis Tu, quid scripseris nuper filiae meæ. Ultrajectinum tunc amasium designabas & depingebas, communem nostrum amicum, cui rubentes malæ & calidus circum præcordia sanguis. Deducam illam ad vos, ut oculos pascat aspectu ejus, à quo amari pluribus creditur. Nundinas vestras odi cane pejus & angue. prævenire statui. Cupio tecum prandere

dere ad normam, edere ad amussim, bibere ad
 perpendiculum, ambulare ad numeros, & om-
 nia agere ordine, pondere & mensura. planè ut
 philosophum decet & sobrietatis Professore.
 Quare cave, ut culina tua majorem fumum vi-
 deat. Curii dapes appone. Chamæleon sum in-
 ter amicos. fabulis, narratiunculis lepidis & ho-
 nestis pascor, velut rore. Et ne sine munere ad
 Te accedam, mitto Panegyrim inscriptam ma-
 ximo Duci. Exemplar unum tibi habe, alterum
 clarissimo Poëtæ fratri tuo trade. reliqua ad
 amplissimum doctissimumque virum D. Peti-
 tium deferri per ancillam cura. Apud te divertet
 vidua cum filia. Ego hospitis mei Petiti ædes
 invadam, non ut barbarus grassator aut Croata,
 verum ut mitioris genii Lepidus, vel Atticus. Il-
 lum ut & fratrem officiose saluta, sed ante om-
 nes focerum tuum virum doctissimum gravissi-
 mumque. Amstel. 21 Jul. stylo Gregor. 1639.

390.

P E T R O C. H O O F T.

Nobilissime vir,

Quem carmine nuper celebravi, cujus
 bellicæ fortitudini hederam suspendi, cujus tro-
 phæa & triumphos in Apollinis templo vates
 fixi, Serenissimus Saxonæ Dux Bernhardus,
 Fuit. Triumphat de Principe mors, quem vir-
 tus sua felicitasque non finit esse mortalem.
 Quem Austriacus horruit, timuit Saxo, minus
 amavit Gallus, obiit & abiit. Cessit fatis, cui
 flumi-

flumina, urbes, regnaque indies cedebant, glifcente famâ, obsequente fortunâ, stupefcente Europâ omni, & quotquot armis caussam Libertatis Fideique assertum eunt. Decessit Neoburgi, quæ inter Brisgovix est urbes. Triduo mortis telam detexuit, non sine veneni suspitione. Moriturus Duces quatuor exercitui præfecit, usque dum Sueciæ Regina dignum successorem castris constituerit. Militibus singulis testamento bimestre stipendium scripsit. Quid animi jam putas esse Cæsari & Saxoni, sublato hoc Induperatore? imo quid Celtæ? qui successibus tantis creditur invidisse. Quam vereor, ne multi Duces Cariam perdant, & Germaniæ Principum æmulatione, magno labore & discrimine parta dilabantur. Iam in Philippicas artes incumbunt, hinc Ister, hinc Sequana: ut omnino metus sit, urbem armis invictam, auro muneribusque in alterutrius potestatem cessuram. Nobiliss. Vicofortius Hagam ab Electore Palatino evocatus concessit, reversurus hodie. Litteras ipse mortis hujus nuncias nondum accepit. Sed Francofurto, Argentorato, & aliis è locis fatales tabulæ advolant hujus rei uberrimæ testes. Insignia tua & redimicula S. Michaëlis jam in manus cognati tui pervenere. Solennem horum traditionem interturbat & remoratur funestum hoc nuncium. Usque adeò nulla est sincera voluptas, sollicitumque aliquid lætis intervenit. Nolui N. T. hoc ignorare, cum jam occupatissimus sit cognatus tuus & vix suus.

Cras Ultrajectum abeo, mansurus istic, si bene calculum posui, per octiduum. Vale, Vir nobilissime, titulo, virtutibus ac poësius historięque illibata fama. Dominam Hoofdiam, filiasque generosissimas, & filiolum, in tuas patrięque spes succrescentem surculum, saluta. Amstelod. ipsis Cal. Sextil. anno 1639.

391.

Serenissimis Ducibus,

FRATRIBVS DVCIS BERNARDI.

Serenissimi Principes,

Mitto ad Vos Panegyrim hanc inscriptam famę laudibusque Serenissimi Principis Bernardi, Fratris Vestri; quem vivum dilexit Germania sua, horruit Austria, suspexit quaquaversum Europęus Orbis. Maluisssem eam superstitē ipso legi, quam mortuo, cum viventium encomiis applaudamus læti, mortuorum tristes adflicti-que. Nunc, ita volentibus fatiis, offero maximis Fratribus laudationem Principis, cujus virtutibus cum minor esset Orbis, recepit spatiosius cœlum grande illud depositum. Scio, Principes Serenissimi, non egere Poëtarum laudibus tanta belli fulmina, quę luce suâ clarescunt fulgentque: sed nec fastidit gratę posteritatis benevolas voces Principum Majestas. Amant in hominum animis memoriã vivere, quos hominum, & publicę utilitatis causã terris dedit sublimius Numen. In Fratre vestro duo mecum stupuit universitas: vitę innocentiam, & fortitudinem

tudinem militarem : quarum illa inter Principes rarissima est , hæc gentis vestræ propria. Laudum ejus fastigia solum perstrinxi ; nec enim in iis singulatim enarrandis suffecerit nova Ilias. Rerum ab illo gestarum magnitudinem, pondus, discrimina vix Historicorum annales , Oratorum ambitiosa oratio , nec Poëtarum grandiloquæ voces adæquare possent. Omnia minora sunt quæ cogitamus, loquimur, scribimus. Ego, qui vatum studia impensius amplexus sum , inter tot laudatissimi Herois applausus partibus meis deesse nolui. Facile mihi vocem extorsit tanti Principis fama , quæ jampridem non privatis tantum Germanorum , sed totius Europæ suffragiis fulta, mortalitatis terminos egressa est. Utinam ab illis, quas lactanti Germaniæ commodatis curis , tantum ocii impetrare queatis , quod Poëmatis hujus lectioni detis. Non poenitebit in compendio perspexisse Fratris de Republica optimè meriti non unum facinus: quem dum lugemus mortuum , virtus sua felicitasque non finit esse mortalem. Quod si benigniore oculo hæc nostra accipere & legere dignemini, non perierit labor vati. Hæc operæpretium retulisse suffecerit , superesse Serenissimo Principi Bernardo Fratres , qui & condolere fati Fratris possint, & laudum ejus testem favore suo irradiare non dedignantur. Valete Principes Serenissimi. Deus Opt. Max. Vos vestræ & publicæ saluti diu superesse patiatur. Amstelod. Aug. 1639.

GERARDO NIENDALIO.

Non tanto opus est apparatu, cordatissime Niendali, ut amicum è paludibus evoces in Trajectinorum Tempe. Iam pridem vidisses me, & dexteram dexteræ junxisses, nisi moras neçteret dignissima vidua, cui gerendus mos & gratificandum. Obstrinxi me promisso, Dî cuius jurare timent ac fallere numen. Legisti proverbium, Mulier pûdica non it sola. Comitem me itineris illi fore & dixi coram, & scripsi non semel. Eget custode, quicquid charum secretumque homines habemus. Mihi manda, si quid istius generis, vel sexus rectè curatum velis. Die Martis proximo hinc, Deo volente, Langherodam me conferam cum filia. Die verò Mercurii vel Iovis, si accinctam ad iter reperero testudinem illam domesticam, ad Te properabimus. Est hic Amplissimus D. Petitijs Ultrajectum iturus jamjam. Sequar præeuntem. Hoc ago, ut declinem tempestatem vestræ solennitatis, & poculorum, quibus amicos excipere soletis, grandines ac imbres devitem. Mihi si Niendalius unum, Petitijs alterum clauscrit latus, & accumbenti & ambulanti benè erit; nec ultra quid posco. Fabis pisisque & lactucis instructam mensam præfero gallinis, & anseribus. Si lactis aliquid coagulati subministrant mensæ secundæ, non abhorrebit Peripateticorum sapientia. De itinere aut digressionem potius

tius Amersfordiana coram deliberabimus. Noli novis literis me sollicitare, convivam facilem fatis & obsequentem. Vbi venero diem unum aut alterum tecum dividam, & fruor sermonibus tuis, & orationum cincinnis, & comitate & festivitate, quæ omnia majoris facio,

Quam si me liquidus fortunæ rivus inaurret.

Vale disertissime, & integerrime Vir. Salveant à me uxor, socer, fraterque. Te salutant mei & meæ. Amstelod. 2 Aug. 1639.

393.

E I D E M.

TAndem à dierum Canicularium cumulatissimis gaudiis domum reversus, mihi reddor, charissime Niendali, & simul tibi. Tu in feriarum promulsæ delicias mihi fecisti eas, quas nondum decoxi: ea præstitisti mihi filiæque meæ officia, ut majora expectare vel à sanguine junctis non possim. Plurimas horas commodis tuis succisas mihi ocianti, & sine compare ambulanti impendisti. Risi tecum, philosophatus sum tecum, pransus sum tecum. Omnibus penè sensibus, si joculari libeat, lenocinia quæsisisti; non contentus picturis visum, ferculis palatum, floribus nares demereri, etiam aures stupendo Musices fascino deliniisti. Egi gratias coram, jam litteris absens eas repeto, & unum hoc rogo serio, ut mutuis dentibus ulciferis impudentiam meam, quam in culinam tuam, in pernam, laridum, & fumen tuum exer-

Q 3

cui.

cui. Non præfigo tempus : tuum est illud, quod opportunum maxime erit rebus tuis captare. Omne sidus, quantumvis hybernium vel glaciale, arridebit tibi adventanti. Non minus focus quam umbra amicos conciliat. Ædes tibi aperio meas : sternam lectulum tomento mollissimam, sternam mensam philosophicam, non ferculis turgidam ac superbis condimentis crustisque, sed tenui salino & pisciculis, iisque dapibus instructam, quales Corvini & Fabricii esse solebant. Pro prunis, ecce poma aliquot citrea mitto, ut languidiores cibos acuas acriore succo. Vale, & conjugem saluta. Amstelod. 1639.

394.

R E I N E R O N E U H U S I O.

Ignosce, doctissime Neuhusi, quod diutius expectationem tuam moratus fuerim : ferias egimus, & ab amicis in vicinos agros invitati, valetudini quæсивimus lenocinia. Amat tenella juvenus studiorum horas diffindere ludicris, quæ apud illam quantivis sunt ; nec nostra, hoc est, Professorum gravitas ab istis vicibus abhorret. Domum heri reversus ex Bamestræ agro, revocavi ad animum promissi fidem, quàm me tibi obstrinxeram. Petiisti nuper à me carmen per litteras, petiisti coram, & humanitatem tuam erga me explicuisti prolixè & candidè : næ à gratiis omnibus alienus sim, si amico, si studiorum amœnissimorum consorti, si Viro ad elegantiam omnem & nitorem facto exile
hoc

hoc officium, quod immeritis sæpius præstiti, denegaverim. Habe disticha aliquot, si elaborata minus, attamen ab animo tui studiosissimo. Scriptis tuis studiisque accommodavi orationem, & ea dixi, quæ scripsisti & scribis indies non sine genio & venere. Transisti à Frisiis ad Frisios, à majoribus ad minores. Faxit Deus, ut minores hi majoris tibi & famæ & fortunæ argumentum subministrarent, & desertis calcatisque non uno loco Musis, hospitium præbeant quale exoptas. Vale, Vir doctissime, & me, quem totum possides, ama. Tibi familiaræque omni faveat rerum nostrarum Arbiter supremus. Amstelod. 1 Sept. 1639.

395.
P E T R O C. H O O F T.

Nobilissime Vir,

Dum strepitus magnæ urbis & encænia averfor, secessi in Bamestram, ubi me prædio suo perhumaniter excepit Vir amplissimus Theodorus van Os, aggerum ibidem Præfectus. Ita transacta mihi feriarum tempora inter literata & faceta nomina, Hoofdium, Ossiumque, ad quorum memoriam mihi dextra tinnit auris, & lævæ mamillæ melior particula salit. Illic dum sum, & de die lenocinia quæro honestæ voluptatis, ecce, noctu ab insectorum genere volatili vexor lancinorque: ab animalculis inquam, quibus proboscis est minor elephanti, rostrum minus aquilæ, guttur minus sonorum famelici

Q 4

bovis,

bovis, corpus minus crassum quam Arcadico apro, pedes Colossi Rhodii pedibus graciliores. Volant, susurrant, sibilant, sedent, terebrant, bibunt, non missura cutim volucris, nisi plena cruoris. Memor ego culicum, quos Muyda tua per æstatem fovet, comparisonem feci inter Muydenses & Bamestrios, & utroque diris, pace tua, devovi. Qui seria tibi aliquando, jam etiam ludicra impartior. Facit amicitiae nostrae fiducia, ut impunitatis spe audeam apud N. T. non audenda. Classem Hispanicam statio habet Britannica.

*Illæ per æquoreos numeroso milite fluctus
Ibat ovans, tristesque minas & bella ferebat,
Cui dedit exiguis sese manus obviam transiris,
Auspiciis quæ freta Dei, & cœlestibus ausis,
Disjecit toto volitantia carbasia ponto,*

Inque Britannorum captivam transiit arenas &c.

Jam quinquaginta & ultra Federatorum navibus cincta, stat in littore certa futuræ mortis, & instanti fato servata ruinæ. Ita sperant, quotquot Batavi sunt, & spes suas erigunt hostium internecione. Si Regis Angliæ ratio habebitur, posset elabi: sin minus, præda victoris erit. Ius est in armis. amant istiusmodi controversiæ decidi, post prævaricationem, quæ, ut valde utilis est, ita patronos inveniet. magna facinora successus probat. minus mali habentur qui potentes peccant. placet quibusdam axiomata istud: salvis auspiciis geri, quidquid pro patriæ salute geritur. Est exlex necessitas, & veni-

niâ digna. Præstantissima Tessela Amersfortiam abiit cum sorore & affini ac fratre. Voluissem me illi præbere comitem, nisi ad labores redeundum fuisset. Te cum uxore & filiabus expectamus, ut perunctam fecibus ora Galliam loquentem audiat. Cuperem tunc Nobilitati tuæ loqui ea fide, eo silentio, quo Pylades Orestis, Pirithoö locutus fuit Theseus. Vale doctorum ocelle, & amicorum cordatissime. Nobilissimam suo & tuo nomine Hoofdiam, filiasque tantis parentibus dignas, submitte, reverenter, ac vernante vultu à me saluta. Raptim summo mane 28 Sept. 1639.

396.

C A S P A R I B A R L Æ O.

LEgi cum voluptate maxima, poëtarum, oratorum, philosophorum clarissime, Mediceam hospitem, opus & tua eloquentia, & ejus quæ celebratur Majestate dignum. Simul, neque minore cum gaudio, cognovi ejus urbis, cui & respublica plurimum & ego non parum debeo, crescentem indies Magnitudinem, quam servet augeatque Regum, Reginarum, civitatum summus Arbiter. Delphinus, cujus augmentum nomen felicem facit libri tui clausulam, nutrices non lassat tantum sed & lacerat. Ejus interim Avia Generorum terras perambulat, magno fortunæ, nihil à suo jure excipientis, documento. At tu

Das solatia grandibus sepulchris.

Pars II.

Q 5

Sepul-

Sepulchra dico, Laberiano illo sensu :

Sepulchri similis, nil nisi nomen retineo.

Relinquat te intactum ventosa illa Dea, &, ut
superba est, præteriens plana, in montes po-
tius fulminet. Hoc tibi precor : te vero, ut
sæpe tua, id est, longe optima, dono accipia-
mus, legamus, laudemus. Lutetiæ, 27 Augusti,
1639.

*Virtutum Barlæanarum non ingratus æsti-
mator*

H. GROTIUS.

397.

HUGONI GROTIO.

V*Ir maxime,*
Misi nuper Mediceam Hospitem, quam
te accepisse & legisse gaudeo. Sed nimius es in
exaggerandis authoris laudibus, quibus tanto
est ille inferior, quanto tu omnium artium api-
ces transcendis. Interim laudari abs te, mi pa-
ter, dicebat ille apud Comicum, maximum pu-
to. Adscriberem illud Horatii, *Principibus pla-
cuisse* &c. Nisi nimio usu evluisset jam dudum
gravissimi Poëtæ sententia. Mitto jam Excel-
lentia tuæ Brisacum captam. Quid alii de me
sentiant, scio & nescio : at illud experior &
sentio ipse; ut ut maxime velim, Musas meas
ἔχεμυθεῖν, [*silere*,] loquacissimum tamen me
esse, nec quoties illustre aliquod argumentum
offertur, motus meos impetusque compescere
posse. Velim nolim, relabor ad veterem insa-
niam,

niam, præsertim hortantibus amicis, quibus non obsequi religio mihi est. Superiore anno sine gloria militavimus non uno loco, nec Gallo bene cessere conatus fui. Solum Saxoniae Dux Bernardus belli famam victor asseruit, capta urbe situ, opere, præsidiis munitissima. Ego, cui nimia in Poësin proclivitas vitio verti solet, tam insignis victoriæ testis & præco esse volui, memor istius: Non decere Principes sine vate trophæa suspendere. Non leget hæc ipse Dux, nec sivere fata publicæ laudis sensu frui præclare meritum de Reipublica Christiana Principem. Tibi, Vir illustris, Scazontes hosce transmittere minus horreo, cum propria hæc tua laus sit, in amicorum vitiis non cernere acutum; sed aspera plana, distorta recta interpretari, & quæ forte claudicant recto talo locare. Nobilissimus Vicofortius, quo amicus pectus non habet Amstela, etiam clarissimus Vossius Idololatriæ gentilium scriptor gravissimus valent, & te in Batavis circumfusus amicis videre malunt, quam eminus, & te longinquo alienis in terris tibi gratulari. Amstelod. 30 Octob. 1639.

398.

C. BARLÆO H. GROTIUS S.P.D.

V. Ir. eximie,

Res illustrissimi Saxonis, tanto dictas spiritu quanto gestæ sunt ab ipso, legi cum dolore quidem, ob ereptum nobis tantum Principem, cum solatio tamen cum video gloriam ejus tam feliciter ad omnia sæcula propagari. Epithalamium autem legi cum solida voluptate, tum ob summam carminis venustatem, tum quod amo & honore prosequor plenas omnium virtutum domos, unde sunt novi mariti & eorum uxores. Et ipsis & tibi tuisque si omnia è voto succedant nulli id hominum quam mihi erit lætius. Scribebam Lutetiæ 22 Octob. 1639.

Vidi & de Bamestra carmen, dignum loci amœnitatem & justissimam de Culicibus ultionem, spicula pro spiculis.

399.

CONSTANTINO HUGENIO.

Pugnativimus, vicinus, triumphavimus, clarissime Zulecheme. Arenæ Martis arenæ Britannicæ fuere; causa libertas; partes Hispanus & federatus Belga; modus certamen navale, commissis inter se classibus & veliferis arcibus; vindex fautorque noster Deus. Succubere Belgarum signis Dî hominesque, vel sacris vel profanis appellationibus clari. Terefas, Polonias, Fortunas, Famas, Orpheos, Petros, Jaco-

Jacobos, Michaëles, Alexandros, &c. merissimus, exussimus, cepimus. Totius victoriæ momentum in duobus positum est. Primum illud est; quod paucis navibus potentissimam & numerosissimam classem invaserit imperator noster, & in castes truserit. Alterum illud: quod nullo navali facinore major dignitas & reverentia Reipublicæ nostræ accesserit, quam hoc ipso. Dum alii civium domi gaudent, alii minus φιλοπάτρες [*Patriæ amantes*] dolent, alii festis ignibus lætitiā testantur, ego ad exemplum celebris Cynici, triumphantibus ob similem victoriā Athenis, literarum mearum vascula, quæ quotidie pauper inhabito, per ora civium non indoctorum pergo volvere & rotare, ne publica gaudia fastidire videar, & tacita morositate damnare aut vilipendere Superum favorem. Elocutus sum ea, quæ scio, & quæ eloqui posse volupe admodum mihi fuit. Sinistra quippe silemus libentius, quam fatemur. Circa prospera facundi sumus, & ab argumento eloquentiam mutuamur. Scripsi Orationem, quam habui publice, præsentē Venetorum Legato, qui tum temporis nuptiis intererat Papenbroeckii filiæ. Cumque viderem omnes gratulantium voces in Trompium dirigi, Auriacum meum non in laudis partem pertraxisse putavi satis, sed ut victoriæ authorem præcipuum, imperio maritimo, ac autoritate maximum prædicavi, & poëmate, uti meus mos est, celebravi. Tu, cum non nisi literatis doctorum asellis & nullis

mullis elegantiarum vesci ames, nec nisi conditos aromatibus, & sesamo adspersos carminum globulos emunctis naribus adhibeas; nihil quoque contingere cures, nisi planum, floridum & vernans; nihil audire, nisi harmonicum & concentibus conspirans: veniam peto obsecroque, ut orationem tumultuarie scriptam, & Poëma inter deliberationes eroticas natum, mitiore censura dstringas. Obstrepuit sæpe poëtico furori Cyprius, & quia bonam mentem non ejuravi, volui & amator esse & vates, Cirrham & Paphum, Parnassum ac Cythæram concutere. Accipe, Amicorum illustre sidus, exemplar unum tibi, altero se oblectet in patrias artes erudiendus Constantinus junior. At illud auratis lineolis fulgens Celsissimo Auriaco pro me offer. Si modesta prædicatione illud Patriæ Patri probaveris, reliquis hoc ipsum tuis erga me meritis attexam. Vale, præstantissime clarissimeque Hugeni, & me quod facis constanter ama. Decemb. anno 1639.

400.

JOACHIMO VICOFORTIO.

ITa est, mi Vicoforti: publico hoc Patriæ gaudio, ob natum Principi Principem, non difficile mihi erit publicum lætitiæ, ut scribis aptissime, testimonium à Musis meis impetrare. Post gratulationes Illust. D. D. Ordinum Legatorum, etiam ejus, cujus mentionem faciunt litteræ tuæ; post ingeniosissimum disertissimi

Brasetti

Brasetti commentum, accipe Epigrammata duo summo mane sub diluculo nata. Prius mihi vendico, posterius Brasetti est, si materiem spectes; si numeros & verba, Barlæi tui. Utrumque exosculare, ut soles me. Nolo eruditissimo Brasetto, invito Domino, suffurari inventum suum. Verum si transactione illud meum esse velit, vel emptione, vel mutuo, vel commodato, vel donatione inter vivos, subjungam illud Poëmatio, quod in victam Hispanorum classem scripsi. Si emptione meum esse patiat, redimam optimi viri indulgentiam alio, cum res feret, Epigrammate. Si ex velleris aurei essem ordine, glomos pretiosæ istius lanæ transmitterem. Nunc repertum istud aureum redimam Musarum opibus, & officiosa gratiarum actione: cui si, humanissime Vicoforti, gratiæ tuæ nonnihil adsperferis apud agentem res Galliæ, compos voti fiam, præter votum. Cupio te videre ad undecimam in ædibus pictoris Baudringeni, ut videas qua fronte, qua patientia premam pictoriam sellam. Adeo ad vivum expressit vultus meos, ut dubitem, an prototypum ego sim, an tabula. Vale amicorum cordatissime, & me ama. Amstelod. 4 Non. Decemb. 1639.

401.

D. J U S T I N I A N O ,

*Venetorum Reipublicæ Legato.**I Illustrissime Domine ,*

Cum nuperrime de victâ Hispanorum classe verba facerem , velut salutare quoddam ac faustum sidus illuxisti. Etenim illustri tua præsentia non mihi solum peroranti animum addidisti ac fiduciam, verum etiam toti auditorio ac Reipublicæ nostræ splendorem decusque non leve contulisti. Equidem apud tantos viros loqui in felicitatis parte putant , qui in umbra dicunt. Ego , quod feci coram , jam per litteras quoque gratias ago , quod vacivas aures concesseris Academicæ declamationi. Et cum ingrata non possit esse lectio eorum , quæ volupe fuit audire, mitto exemplar Orationis, cui Poë-
mation subjunxi ; ut utroque orationis genere animum Patriæ felicitatis sensu explerem. Vale Illustrissime Domine. Amstelod. 19 Dec. 1639.

402.

J O H. M A U R I T I O ,

*Nassaviæ Comiti , Brasiliæ Præfecto.**I Illustrissime Comes ,*

Dum in novo Orbe Hispanum oppugnas , & moenibus suis castrisque exuis , nos in Veteri eundem hostem nuper pari animo fiduciaque per cognati sanguinis Principem oppugnavi-
mus.

mus. Ut illustrissimæ tuæ gentis familiæque virtute potentissimo Hispaniarum Regi terribiles sint Federati Ordines. Vicimus, cum vix ulla esset victoriæ spes: paucis navibus aggressus est maris nostri Vicepræfectus Trompius numerosam Hispanorum classem, & minoribus longè majores fabricas & stupendas moles exussit, merisit, cepit. Hujus rei testes mitto Excellentiæ Tuæ hæc paginas, quæ quia Patriæ & ejus parenti Auriaco inscripti, operæ precium me facturum putavi, si Tibi longius adversus eundem hostem bella gerenti, hæc publici nostro Orbe gaudii documenta transmitterem. Videbis victoriæ hujus momentum in duobus positum. Primum illud est: quod exigua navium vi hostem validissimum invaserit Trompius: Alterum illud, quod nullo facinore navali major dignitas famaue accesserit huic Reipublicæ quam hoc ipso. Didicere Philippi jam altera vice infelicitè ab ipsis subiri angustias Britannicas. Sane levius hinc vobis erit bellum, quod in Brasilia geritur tuo ductu & moderamine. Nec enim metus erit vobis à Galeatarum navium insultu, quas noster hic maris Dominus Arausionensis ferro ignique subvertit. Vale, Comes Illustrissime, & egregium hunc virum, qui Orationem hanc meam Tibi tradit, favore Tuo ac benevolentia complectere, nec minus me, nominis tui & famæ Nassoviorum studiosum, impensè. Amstelod. 15 Decemb. 1639.

GERARDO NIENDALIO.

D *Ilectissime Niendali,*

Tu leporem mihi misisti hirsutum, ego tibi galeatum remitto, hoc est Ducem timidum. Ocquendum dicere volo, quem galea ducem facit, fuga leporem. Non dubito, quin publicæ felicitati mecum gratuleris. Ego gaudia mea oratione & poëmate elocutus fui. Vtriusque Te compotem facio, cujus humanitati, & candori omnia summa debeo. Verum ut ad leporem tuum revertar, scis quale quantumque mihi miseris munus? Si nescis, misisti animal, ex cujus esu vultus formosiores reddi dicebat Martialis Gellia. Si nescis, misisti Terentii jocum, Lepus es & pulpamentum quæris. Felicitatis rusticæ partem misisti, teste Horatio, pavidumque leporem, & advenam laqueo gruem, jucunda captat præmia. Sapientiæ culinariæ argumentum mihi donas, juxta eundem Flaccum:

Fœcundi leporis quis non sectabitur armos?

Quam lætor me Iudæum non esse, cui leporem edere nefas. Licet enim ruminet, ungulam bifidam non habet. Non edi leporem tuum solus, sed cum amicis magnis & intimæ admissionis. Nunc periit victima nil miserantis Orci. Tibi gratias habeo & ago, & si precium tanti animalis non æquem chartaceo hoc libello, cogita mercaturam quotidie vel eementis, vel vendentis damno contrahi. Vale charissimum pectus, &

con-

conjugem liberosque non sine osculo, meo rogatu (si tantam rem impetrare dignus tibi videor) saluta. Socerum quoque fratremque salvere jube. Misissem & illis exemplar, sed summa eorum penuria laboro. Vbi legeris, lectionem illis noli invidere. Nihil decedit illi, qui de lumine lumen accendi patitur. Amplissimo Consiliario Strateno me totum trade, & libellum hunc, proni in ipsum animi & debitæ reverentiæ testimonium, exhibe. Iterum Vale. Amstel. 24 Dec. 1639.

404.

I A C O B O C A T S I O.

QUod benignis animis Panegyricum meum exceperint Potentissimi Ordines, à tua est suffragatione, nobilissime Catsi. Honorarium mihi decretum magnificentiæ magis quam liberalitati affine est. Illud quantivis est pretii, quod non displicuisse intelligam Patriæ Recto-ribus studium meum, & pronam in publicos Federatorum, prosperosque successus benevolentiam. Posuere Te eo loco fata, & ingentia tua merita, in quo non Rempublicam solum tibi quotidianis officiis devincis, verum etiam favoris tui & generosæ humanitatis radios, in amicos quaquaversum diffundis. Hoc est non sibi soli natum esse, sed & aliis. Inter hos tuo beneficio censeor, qui hominem complecteris & diligis, tua amicitia & familiaritate potius, quam suis bonis amabilem. Vt infimæ sortis homi-

nes sibi & aliis crescunt, ab alloquio & comitate regum : sic nobis fit, cum Te admoves propius ; & esse aliquid videmur ab æstimatione vestra. Vsu, mancipio, jure omni tuus sum, clarissime Catli. Impera, quod voles. Quidquid mearum erit virium, in N. T. id omne explicabo officiosissime. Vale, Vir maxime, & annum hunc quem jam ingredimur, felicissime & gloriosissime decurre. Amstelod. 3 non. Ian. 1640.

405.

IOHANNI BEVEROVICIO.

Amplissime Beverovici,
 Uti per brumam ceu mortui latent ranarum exercitus, caloris & vigoris expertes, ita scriptoribus Belgis ; cum adversa & minus gloriosa fluunt tempora, fortiter silent mortuis similes. Vbi vernum tempus & genitabilis aura Favoni aquas terrasque pervadit, prodeunt è latibulis canora animalia. Nec minus rebus prosperis excitati omnes, quibus viride est genu, loquimur, scribimus, cantillamus in fossulis quisque suis, & publicæ felicitati pro modulo suo applaudit. Ego à plaudente Republica inter coaxatores primus conscendi suggestum, & in Hispanum pro victoribus declamavi, fatis audacibus, quales victorum esse solent, buccis. Rupturam fortè passus fuisset, nisi eloqui licuisset conceptum ex prosperis & grandibus patriæ successibus gaudium. Hoc foetu liberatus

tus melius habeo & detumui. Vidi quoque cantus Mattiacorum in victam Hispanorum classem, & Kinschotii junioris erectum carmen, etiam Xerxen tuum Cantabricum. Vt credas verum esse, quod jam dixi; plus laxari fibulam, postquam Trompius in Ocquendum felici Marte detonuit. Ego meos tibi mitto strepitus. Videbis in easdem cogitationes non uno loco nos coincidisse. Feci & ego comparisonem inter Xerxen & nostros, sed brevior fui, cum hanc unam prosequi tui fuerit instituti, mei plures. Misisti ante hac libellos tuos eruditos, succinctos & solertiæ tuæ testes. Pro omnibus accipe Panegyricum, mole exiguum, argumento maximum. Ego Hispano maledicere ausim domi, & eminus lingua ipsum ferire, quam cæsim ac punctim in Dunis Britannicis pars esse belli, ubi desinunt esse, qui fuere. Vale, amplissime Vir, cui ut leniter fluat, quem exorsi sumus, annus Deum precor. Amstelod. 7 Ian. 1640.

406.

GUILIELMO BORELIO.

M *Agnifice Boreli,*
 Distrahimur singuli in curas varias, nec idem semper agere libet aut meditari. Me modo Schola illustris possidet, modo domus, modo amici. Schola doctorem, domus patrem, amici amicum agnoscunt. Iam apud te posterius hoc ago, ut qua possim demerear mihi addictissimum pectus. Notus tibi est mercator

R 3

apud

apud nos celebris artis suæ peritus N. N. vir multum terris jactatus & alto, qui utriusque fortunæ remediis instructissimus res Serenissimi Daniæ Regis hic agit, in cujus fragranti dicitur esse gratia. Sagacitate sui ordinis homines vincit, comitate neminem non in amorem sui pellit. Habet quod petat ab Amplissimæ Reipublicæ hujus Coss. quorum cum sis os & interpres, voluit se honestis verbis tibi tradi. Causam ignoro, nec scire satago. Illud peto, ut si quod apud Te est momentum nostri, obsequi velis hujus desiderii, quoad honesti ratio, & Reipublicæ, cui te totum vovisti, tranquillitas feret. Ni fallor, cum Imperatore magno judicas diem te perdidisse, quem non impendisti amico. Vale. 7 Mart. 1640.

407.

CORNELIO VANDER MYLE.

V Ehementer me perculit, nobilissime Myli, triste nuntium de obitu nurus Tuæ. Luges uxorem filii, matrem nepotis tui, eamque recens puerperam. Non decessit ingloria uxor, quæ Gubernatori gubernatrix nupsérat. Non decessit ingloria mater, quæ peperit sæpe. Obiit puerpera, postquam de filiolo, patriarum virtutum & nominis hærede, prospexisset Reipublicæ & familiæ tuæ. Debuiſſet longiore vita redemisse partus dolores, nobilioris vitæ & masculæ prolis parens. Ita querimur nos, quoties humanitati supra modum indulgemus. At cum
in

in diviniore sapientiæ sacraria imus, illud omne probamus placidi, quod cœlo probatur. Adversus privatas tuorum calamitates, rectæ rationis Ægide munitus, patienter fers, quæ ut feras, fata imperant. Non unius funeris dolore tangeris. Decoxisti majores & propius ad animum admissos. Possem accusare minus salubrem & mari proximam urbem. Sed

*Nulla fata loco possis excludere, cum mors
Venerit, in medio Tybure Sardinia est.*

Possem incusare Poëtarum more præcipites & crudeles in juvenulam conjugem Parcas. Verum:

*Hæ magnos parvosque terunt, quin fortibus
æquant*

Imbelles, populisque Duces, seniumque juventæ.

Græcus senarius est: ὃ γὰρ φιλοῖ Θεὸς, ἀποθνῆσκει νέῳ. Quem diligit Deus, moritur juvenis. Et qualis vixit illa? pie, caste, prudenter. Pie Deo, caste marito, prudenter liberis domesticisque. Talis conjunx terræ satur alia loca, alias sedes cogitat, & à vitæ hujus ærumnis ac catenatis laboribus expedita, beatorum sedibus debetur. Venimus huc, sed ut abeamus modò. Moramur aliquantisper, sed ut moriamur. Hospitio excipimur, non æternis carceribus includimur. Solatia hæc animæ sunt, corporis ergastulo dimitti captivam. Nurus tua illic habitavit, ubi Hannibal ad portas fuit, ubi adversus hostem vigilandum & excubandum. Iam malorum omnium secunda, dicit:

— *Spem, vota, timorem*

Læta parens placido sine relinquo aliis.
 Est Batavorum, est Mattiacorum præsidium
 Guilielmopolis. At defunctæ jam arx cœle-
 stis pro custodia & tutiore est munimento. Non
 jam turbido mari pulsatur, nec nubilo aëre in-
 volvitur tenella. Vbi nunc est, halcyonia sunt
 & malacia, & sempiternæ felicitatis præsens
 facies. Si Te, si maritum affligit fatale divor-
 tium, corporis illud solummodo est, non ani-
 morum. Sequimur animam animo, & ubique
 mens est, quæ Deo, Angelis & beatorum sedi-
 bus adesse amat. Non divellimur toti, sed parte
 tenus. Perdimus, quod caducum est: serva-
 mus, quod perire nescit. Accedit beatæ resur-
 rectionis spes & fiducia. Hæc mortem nostram
 peregrinationem brevem putat. Præimus solum
 alii aliis, secuturi serius, ocyus. Imus omnes
 ad metam. Cave revoces eam, quæ ad metam
 pervenit. Malus & præposterus athleta est, qui
 athletas ipsos, non metam spectat. Hæc nobi-
 litati Tuæ, hæc Filio jam viduo, & mihi, pro
 dolor, consorti scribo. Condoleo vobis omni-
 bus jam atratis, qui lætis candidisque malim
 gratulari. Sed in utramque fortunam præparan-
 dus animus, cordatissime Myli, ne vel dejicia-
 mur arduis, vel efferamur insolentius secundis.
 Ego illud singularis tui erga me adfectus testi-
 monium interpretor, quod in partem doloris
 tui me quoque admiseris, & consolationem ex-
 spectes ab eo, quem stupenda humanitate Tibi
 tuis-

tuisque obnoxium habes. Vale, nobilissime Vir, & hæc si leges mente & oculo, lugebis minus & minus dolebis. Filium Willemstadii Gubernatorem meis verbis saluta & solare, etiam Dominam Myliam, filiam generumque. Amstelod. 10 Mart. 1640.

408.

E P H O R O

MEGAPOLENSIVM DVCVM.

D Octissime vir,

Quæ in laudem nostram cumulas magnifica verba, modestè prætervehar. Quod urbi-
bus, regionibus, ædificiis accidere solet, evenit
literarum & humaniorum artium studiosis. Ab-
sentia nec visa unquam, veneramur & miramur,
fastidimus præsentia. Omnium rerum major è
longinquo reverentia est. minuitur coram con-
specta res, quam remotam ex oculis fama cla-
ram facit. Illud ausim profiteri, me benevolen-
tiæ & humanitatis studiis concedere nulli, do-
ctrina & eruditionis typho cuivis. Petis, ut Me-
thodum studiorum tibi præscribam, qua instru-
ctus viam monstres Principibus tuis, quos in
patriæ suæ totiusque Germaniæ ingentem spem
educas & præformas. Non dubito, quin ritè
noris illa, quæ scire à me exigis, nec alio fine
hæc exigere te arbitror, nisi ut videas, quam
idem tecum sentiam, quo majore fiducia, alio-
rum suffultus suffragio, aggrediaris rem glorio-
sam tibi & Megapolitanis Ducibus perutilem.

R 5

Præ-

Præscribi potest methodus Principi, quam communem habeat cum studiosis quibuslibet, etiam infra Principum fastigium & maiestatem positis. Præscribi potest & altera, quæ illorum propria sit. Sunt enim in lectione & prælectione clarissimorum autorum quædam cum delictu notanda, quæ Principes potius, quam vulgares animas tangunt. Ego communem ita persequar, ut Principes tuos juxta defigam in eorum contemplatione, quæ Principatum maxime decent & illustrant.

Scribis tyrocinia linguæ Latinæ addidicisse Illustrissimos Adolescentes, & Grammaticorum pulpæ saturas mentes, ad altiora & edita Sapientiæ templa contendere. At eundem illis recto calle, ne per ambages errent & circumduci se patiantur per flexus & mæandros, cum compendio ire præstet, & plana eligere, ne inter prærupta & fragosa artium hæreant.

Magna superiorum sæculorum veneratio fuit, ideoque per veterum vestigia eundem potius, & celebratissimorum autorum monumenta, quam per posterioris & languescentis ævum minus erecta & solida commenta. In illa collimare fas est posteros, quia de assequenda majorum perfectione desperamus nepotes. Post Grammatistarum ergo carnificinas & carceres, manumittendos suaserim Iuvenes prælustres in Ciceronis Familiares Epistolas, ob dictionis nativam & minime fucatam elegantiam, ac juxta in Terentii comœdias, tum ut suavitate rerum

rum tenellæ mentes edulcentur, tum ut mores veteris ævi civiles domesticosque addiscant, maxime ut purissimi ævi cupediis, & delicatioribus dicendi floribus adsuescant. Adjungerem & Plautum, ob facetias & ingeniosissima responsa. hoc tamen delectu, ut ex epistolis Ciceronis, Plauto & Terentio ea excerpas & inculces maxime, in quibus Principum & rectorum reip. virtutes vitiaque notantur. His enim observationibus imbutus à teneris animus, servat diu, quæ adolescens imbibit. Exempli gratia, in Terentio notetur Thraſonis audacia, in Plauto Miles gloriosus, aut in Amphitruone Dialogus Iovis & Amphitruonis de rebus in exercitu & bello præclare gestis, victis hostibus, vulneribus acceptis & inflictis. In Pænulo Actus secundus, ubi colloquuntur Lycus & Anthemonides miles. In Truculento Stratophanis militis colloquium. In Epistolis Tullii observent, quam sine fastu & procul omni adulatione scripserint Cæsar Ciceroni, Cicero Cæsari, Brutus Cassio, Atticus Ciceroni, cum ignota essent amplissimorum, nobilissimorum, doctissimorum, prudentissimorum vocabula & superlativi.

Post hos prælegerem Cæsaris Commentarios, cum perpetua rerum militarium lectione excitetur generosa Principum indoles, & orationis Romanæ minimè affectatum leporem spiret maximus Imperator. Unus quippe semper

per habitus est, qui eas res gesserit, ut à quovis scriptæ essent, admirationi hominibus futuræ viderentur: unus qui ita scripserit, ut quibuscunque de rebus scriptam historiam reliquisset, maxima voluptate legeretur.

Curtius, Salustius, Iustinus, Florus gravius & magis elaboratis verbis loqui amant. Itaque hos cuperem submitti prioribus. ita tamen, ut feligantur Orationes Charidemi ad Darium, ex libro tertio, Legatorum Darii ad Alexandrum lib. quarto, Alexandri ad milites lib. sexto, & lib. nono. Philotæ libro sexto, Hermolai & Callisthenis libro octavo.

In Salustio advertere velim Principes tuos ad nefandas artes Iugurthæ, & laudatam severitatem Catonis, in puniendis Catilinæ conjuratoribus. Legantur studiosius Orationes Catilinæ ad conjuratos, adversariæ C. Cæsaris & Porcii Catonis, super captis & convictis perduellibus, Oratio Micipsæ regis ad Iugurtham. Oratio Adherbalis à Iugurtha regno pulsi. Oratio Marii ad Quirites de expeditione Africana. Omnium gravissimè & sententiis, ad argumenti majestatem ad miraculum compositis, maximas res effantur Livius, Suetonius, Tacitus. Hos dum legunt Principes tui, attentius ipsos advertere velim ad Romani imperii incubula, simplicitudinem, fortitudinem, alienos ab ambitione, avaritia & luxu Consules. Inde ad crescentis & adulti imperii vitia, seditiones, tumultus, parricidia & causas malorum, ambitionem,

tionem, avaritiam, adulationem, tyrannidem, luxuriam. Seligantur è Livio Orationes hæ: Lucretiæ de violatione. Legatorum ad plebem de reditu in urbem lib. tertio. Valerii Consulis hortantis ad pugnam, ibidem. Camilli ad pædagogum Faliscorum lib. quinto. Oratio M. Valerii Corvini ad seditiosos milites lib. septimo. Fabii Maximi ad populum de deligendo imperatore libro vigesimoquarto. Scipionis reddentis sponsam lib. xxvi. Oratio Annibalis ad Scipionem de pace, & Scipionis ad Annibalem lib. xxx. Oratio Philippi Regis Macedonum de regni hæreditate lib. xl. In Tacito diligentius expendantur Orationes Germanici Cæsaris l. i. Senecæ ad Neronem, & Neronis ad Senecam l. xiv. Peti Thraseæ lib. xv. Galbæ imperatoris ad Pisonem l. xvi. Othonis ad milites ibid. Cerealis lib. xx. Agricolæ in vita Agricolæ. In Flori historia notetur dictio elegans, & florida, & ut nullibi ferè non poëtam agat historicus. Iustinus res Græcas Latino sermone compendiose perstrinxit, maximi scriptoris Trogi Pompei abbreviator. Illud quoque perutile fuerit, Principes tuos ob oculos sibi ponere ideam vitæ Imperatorum, ex Epitome Sexti Aurelii Victoris à Cæsare Augusto usque ad Theodosium. Is enim scriptor, uti est multo jucundissimus, ita nescio, an ad vitam bene instituendam Principi ulla magis narratio conducatur.

Nec dissuaserim in Ciceronis libros de Officiis,

ciis, de Amicitia & Senectute illos dimitti, etiam in lectionem orationum Ciceronis, præsertim earum, quæ vel ob dicendi vim, vel ob rerum sententiarumque momenta, vel ob oratorium artificium præcellunt. Tales sunt Oratio pro Archia poëta, quæ poëtarum & literarum laudes habet: pro lege Manilia, quæ Imperatorias virtutes recenset: pro M. Marcello, quæ de Clementia disserit: in Catilinam, qua in proditores & perduelles invehitur: pro Milone, qua docet vim vi repellendam.

Quin illo, quo jam sunt, ætatis curriculo, maximorum Poëtarum lectione illaquearem Principes pueros. Eclogas Virgilii, præsertim illam, quam Sicelidum memoriæ inscribit, memoriæ mandare pulchrum fuerit & perjucundum. Exordia itidem augusta librorum Georgicorum. Ex Æneide Neptuni Æolum increpantis stupendam invektivam. Æneæ de Trojano excidio narrationem coram Didone. Hujus amores pathetice libro quarto descriptos, ejusdem fulmina & diras in abeuntem Æneam. Anchisæ de Platonica philosophia perorantis orationem libro vi. Romanarum rerum seriem scuto Æneæ insculptam libro octavo. Digna hæc sunt carmina, quæ Principes tui perpetua versent agitatione. Ex Metamorphosi Ovidii librum primum de Creatione mundi & diluvio, nec non secundum de Phaëtonis temeritate & lapsu, legant sæpius. Narcissi quoque sibi placentis descriptionem, & Orationes adver-

adversarias Ajacis in Ulysssem & Ulyssis in Ajacem, super armis Achillis. Has enim posse recitare juniores Principes excellentius puto, quam si majorum genealogias ab Ænea vel Antenore aut Heraclidis arcessant. Ex Tristium libris Elegiam secundam & tertiam libri primi, ex secundo libro Elegiam secundam, ex Fastis operis procemium ad Germanicum memoriter discant.

Post hos legatur Horatius. nec pudeat heroicam sobolem in succum & sanguinem vertere ex libro primo Carminum Odam primam de variis hominum studiis, & duodecimam de laudibus Deorum & hominum, & decimam-quartam de turbatæ Reip. statu, & trigesimam quartam de providentia & numinis reverentia, & vigesimam secundam de vitæ integritate. Ex libro secundo Carminum pro melle sit Oda secunda adversus avaritiam, pro nectare tertia de servanda mediocritate in rebus secundis & adversis, pro ambrosia Oda prima libri tertii, de beatitudine. Oda secunda & tertia ejusdem libri Principum propriæ sunt. Agunt enim de fortitudine militari & recti Constantia. Augusti laudes & Attilii Reguli virtutes Oda quinta deprædicat, populi rectoribus in exemplar & virtutis incitamentum. Oda decima sexta auri vim exponit, & moderatam ejus cupidinem probat. Harum gravitatem diluet Oda nona procantis Horatii, qua nihil suavius & festivius scripsisse Flaccum testari solebat I. Scaliger.

Laudes

Laudes Drusi magnifice exequitur Oda quarta libri quarti Carminum, nec possunt non erigi ejus recitatione bene nati juvenes.

Vitæ rusticæ laudatio Oda secunda Epodon, ruris interdum licentiam Principibus facit, ne solius vitæ Aulicæ beatitudine inebriari se fiant, sed à strepitu urbium remoti dulci ruris otio & simplicitate castigant aularum murmura & fulgorem.

Libri de Arte Poëtica omni auro cariores esse debent erectis Principibus, quibus non est satis tribunali & foro jura dicere, sed & in poëtas censuram stringere, & Dictaturam exercere in illos cives, quorum propria laus est eruditis commentis & prodesse & delectare.

Ex Satyris cupiam placere Satyram primam lib. I Sermonum ad Meccenatem, *Qui fit Meccenas*, &c. & secundam ex libro secundo, qua luxuries traducitur & frugalitas commendatur. Ex Epistolis primam, & secundam, ob summam operum Homeri, nec non primam libri secundi ad Augustum, ubi de scriptorum antiquitate & novitate sententiam fert.

Quin & illud minime negligendum, ut Principes tui graves vernantelque sententias per universum Horatium sparsas, referant in libellum & familiares sibi illas reddant. Nam in quotidiano sermone & litteris scribendis pro flosculis erunt & mellitis globulis & orationis condimentis. Nec inutilis fuerit opera, si in aliis poëtis idem faxint.

Mox

Mox Seneca tragicus ob sententiarum gravitatem, & poëmatis sublimitatem, & argumenti majestatem, Principes ad sui amorem lectionemque invitat. præsertim ad Troadis lectionem, ut regnorum inconstantiam & victoris hostis efferam insolentiam mature animo præconci-
piant. Dignas imperantibus voces audient in Thyeste: quales sunt: *ubi non adest pudor, Nec cura juris, sanctitas, pietas, fides, instabile regnum est.* in Hercule furente, *raptâ, sed trepida manu, Sceptra obtinentur. omnis in ferro est salus. quod civibus tenetur invitis; scias, Strictus tuetur ensis. alieno in loco Haud stabile regnum est.* & ibidem: *Ars prima regni est, posse te invidiam pati.* in Thebaide, *Qui vult amari, languida regnet manu. Invisa nunquam imperia retinentur diu.* in Octavia, *Decet timeri Cæsarem, at plus diligi.*

In Lucano dum morari libet, devorent imperatrices animæ Orationes hinc Cæsaris, hinc Pompei, & Bruti pro libertate Patriæ alloquentis Cæsarem. In Claudiano versantibus pudor fuerit non addidicisse excellens illud & vere divinum Exordium in Ruffinum, *Sæpe mihi dubiam, &c.* aut non lectitasse bis terve vitam succrescentis in maximas spes Honorii, cantatam magnificis versibus libro de Consulatu Honorii tertio. Ex libro de Consulatu ejusdem Honorii quarto, recitet grandibus alumnis Chiron aliquis Principis officium:

Hoc te præterea crebro sermone monebo.

Vt Te totius medio telluris in orbe

Pars II.

S

Vivere

*Vivere cognoscas. cunctis tua gentibus esse
 Facta palam. nec posse dari regalibus usquam
 Secretum vitiis. nam lux altissima fati
 Occultum nihil esse sinit, latebrasque per omnes
 Intrat, & abstrusos implorat fama recessus.
 Sis pius imprimis. nam cum vincamur in omni
 Munere, sola Deos æquat Clementia nobis.*

Et post:

*Tu civem patremque geras, tu consule cunctis,
 Nec tibi, nec tua te moveant, sed publica vota.
 In commune jubes si quid, censesque tenendum,
 Primus jussa subi. tunc observantior æqui
 Fit populus, nec ferre vetat, cum viderit ipsum
 Autorem parere sibi. componitur orbis
 Regis ad exemplum. nec sic inflectere sensus
 Humanos edicta valent, quam vita regentis, &c.*

Quid scire, quid discere oporteat Principem,
 quomodo in Philosophorum libris versari; do-
 cet Claudianus exemplo Mallii Consulis, in Pa-
 negyri de Consulatu Mallii. De bellicis & po-
 liticis virtutibus differentem audiant in lauda-
 tione Stiliconis. Ab his patiantur se deferri ad
 lectionem Epithalamii in nuptias Honorii &
 Mariæ, & Palladii ac Serenæ, ob carminis amœ-
 nitatem, & poëticæ artis facundiam & suavita-
 tem argumenti. quod alienum minime est à
 Principibus. quia interest ipsorum, dignis con-
 nubiiis jungi. Illa cum legent,

gliscent primæ sub pectore flammæ,

Et poterit placuisse Duci, Dux femina regni.

Qualis vero uxor Ducibus ducenda, docet laus
 Serenæ,

Serenæ, uxoris Stiliconis. Ex Epigrammatibus Claudiani maxime placeat illud, de crystallo & Sphæra Archimedis.

Ubi è Latia in Græciam migrare lubebit, post perceptas Grammaticæ Græcæ regulas, legant Duces tui Novi Testamenti Scriptores sacros Græcè, & speciatim cap. 13 ad Romanos. Isocratem ad Demonicum. Epicteti enchiridium, & Ceberis tabulam, Lucianum ob facetias & erudita dictoria, Xenophontis Cyropædiam ob Atticismum, non quod ad historiæ fidem scripta sit, sed ad effigiem recte imperantis. Maxime vero volvant & revolvant Plutarchi Moralia, ob omnigenam & conferatam doctrinam. Excerpendus hic Commentarius, *Cum Principibus maxime debere Philosophum sermocinari.* & alius, cui lemma: *Ad indoctum Principem.* nec non ille *de instituendis liberis.* & iste, *Quomodo audiendi poetæ juvenibus.* & similes.

In Poëtarum Græcorum ordine familiam ducat Hesiodus, Phocylides, Theognis, inde Homerus, cujus Ilias *Stultorum regum & populorum continet iras.* Odyssæa vero, *Quid sit pulchrum, quid turpe, quid utile, quid non, Plenius ac melius Chrisippo ac Crantore dicit.* Theocritum, Sophoclem, Euripidem postea legendos suaserim. Atque hæc quidem linguæ Græcæ vel mediocris cognitio Iuvenes Principes populo & doctorum vulgo secernit, & fontes monstrat, unde omnis in Latium dimanavit Sapiencia. Etenim

& philosophia universa, & historia, & Medicina, & artes Poëtica & Oratoria, Græcos primum Scriptores agnoscit.

Philologiæ studium licet minus necessarium Principi, tamen ex Plinio, Plutarcho, Gellio, Macrobio, præclara multa posse recitare, generosum & illustre. Hac doctrinæ parte in pretio habeantur Chiliades Erasmi, opus infinita scaturiens eruditione. Seligantur Adagia, quæ Reges Principesque concernunt. qualia sunt: *Regis cerebrum, Regia vaccula, Regum offensæ vitandæ, Regum aures atque oculi multi, Regum manus longæ. Quidquid delirant Reges, plectuntur Achivi. Multi Duces Cariam perdidervnt. Bellum dulce inexpertis. Imperator bonus & idem miles. Aureus pons sternendus hosti. Pax redimenda, &c.* Nec in hoc studio destitui eos cupiam à Calepino, qui de quovis argumento breves discursus facit, nec à Thesauro linguæ Latinæ H. Stephani, nec à Græco Lexico Constantini vel Stephani: uti nec à doctissimis libris Rhetoricorum Cl. Vossii, ejusdem Historicis Græcis & Latinis, & de Arte Grammatica.

Logicis exercitiis nolim Principes diu detineri. Suffecerit terminos artis Logicæ, Prædicamenta, Prædicabilia, doctrinam de Interpretatione, Sillogismi conficiendi, ac Definitionis, Divisionis, Methodique regulas in compendio didicisse. Atque hæc ex Aristotele haberi possunt & debent.

His παιδείας [institutionis] studiis defuncti,
Philo-

Philosophiam ipsam adeant, & primo Mathematicam; tum puram, Geometriam & Arithmeticam; tum mistam, Astrologiam & Opticam. Etiam Chronologiam & Geographiam, ob historiarum intelligentiam, cui illæ facem præferunt. Geographia namque locorum, regionum, urbium situs, & in iis portus, flumina, montes aperit. Chronologia seriem temporum exponit, & velut terminis quibusdam finit imperia, bella, eventus.

Adhæc Naturalium rerum scientia imbui Principem perquam necessarium, ut discat, quomodo & ipsis Regibus Ducibusque imperent astra; & terris hominibusque non unius indolis, diversissimi temperamento Principes. Harum arcana ex Physicis Aristotelis petantur.

Metaphysicam scire Duces, præsertim ubi de Deo, Angelis, & statu animæ separatæ & corpore disputat, prorsus *ἡνωτικόν* [*generosum*] est. Reverenter illum discant habere, cujus unitatem, simplicitatem, omnipræsentiam, omnipotentiam, æternitatem, omniscientiam, bonitatem, justitiam naturalibus rationibus evicerint.

Moralem Philosophiam & Politicam ex libris ad Nicomachum & Politicis Peripateticis hauriant, & capita illa de triplici regimine eique oppositis vitiis addiscant non segniter. Nec grave sit Ducibus, Politica Iusti Lipsii perlegere sæpius, ob dispositionis artificium & sententiarum cumulum & auctoritatem. De hac Philosophia loquitur Plato, cum pronunciat beatas

fore Respublicas, in quibus imperarent Philosophi, aut qui imperant philosopharentur.

Hoc philosophorum circo inclusis, Senecæ & Plutarchi lectionem unice commendo, sive de moribus severe judicare, sive de Natura subtiliter pronunciare cupient.

Tum amplissima Historiarum spatia se Ducibus pandunt. Discant hic, Historiam vel Divinam esse, vel Humanam. Divinam, vel Iudaicam esse, quæ è libris sacris, Iosepho & ejus interprete Hegesippo est haurienda: vel Christianam, quæ ex Novi Testamenti libris & Historiis Ecclesiasticis Eusebii, Sozomeni aliisque petenda. Humana, præter prudentiam & rerum peritiam, *Virtutum stimulos & semina laudum, Atque exempla dabit.* Si publica scire desiderant, Orientalem, Græcam, Romanam, Barbaram historiam legant. Orientalis, res Iudæorum, Ægyptiorum, Syrorum, Persarum exponit, quæ nosci poterunt ex Iustino, uberius ex Herodoto & Diodoro Siculo. Græca Spartanorum, Atheniensium, Thebanorum, & Macedonum res gestas recenset, authoribus Thucydide, Plutarcho, Arriano, & è Latinis Q. Curtio. Romana, vel vetus est, vel media, vel recentior: Vetus ab urbe condita ad Augustum excurrit, illustris Scriptoribus Græcis & Latinis, Dionysio Halicarnasseo, T. Livio, Polybio, Plutarcho, Appiano, quibus addi possunt compendia Vellei, Flori, Eutropii, Orosii. Media, Tacito & Suetonio superbit, aliisque Augustæ historiæ Scri-

Scriptoribus , è Græcis Dione Cassio & Herodiano. Recentiore scripsere Zonaras , Zosimus, Procopius, Agathias, Nicephorus, Gregoras, Græci.

Barbaram historiam voco , quæ scisso fractoque imperio gesta , cum major pars ad Gallos , Germanos, Turcas ivit, enarrat. Scriptores sunt, Iornandes, Procopius, Agathias.

In harum lectione dum versantur, seligant, & transferant in libellos , res maxime memorabiles, ritus & consuetudines gentium, sententias, exempla tum virtutum, tum vitiorum.

Theologia licet ad Theologos spectet, tamen dedecet Principem Christianum ignorare Fidei Christianæ capita , ne in regno suo quasvis dissensiones schismatum esse argumenta sinat , aut quosvis errores nimis tepido religionis amore terat ac foveat. Occurrit his malis lectio Scripturarum , quæ hæresin à leviori errore discernunt , etiam receptæ inter Protestantes Fidei formulæ, nec non Patrum in Fidei fundamentis consensus.

Ad horum omnium scriptorum lectionem animum Duces tuos adferre velim alacrem & defecatum. Conferent illum, si studiorum temporibus interponant dilucida intervalla. nec enim tetricos istos & rigidos Ephoros amo , qui heroicas mentes horis & clepsydræ alligant, tanquam mercenarias & servas. Ludant , saltent , equitent , currant , canant , venentur , horas eligant , quibus maxime ipsis animus le-

gendi scribendique. Nutriuntur à Iove tenerius Principes , & ab aura cœloque foveantur propius. Hoc cum serenius est , vel studeant, vel se recreent. cum nubilum magis , exercitio honestiore serenent mentem. Extinguuntur generosiores igniculi confertis studiis , & uti vascula angustioris orificii superintusum copiosius humorem respuunt , nimio lectionum numero obruitur avidissima sciendi ætas. minus quoque proclivi ad meditationes sunt animo , qui invitis temporibus student. Exercetur tyrannis in viros à male imperantibus. exercetur quoque à præceptoribus in discipulos. blandos vult esse Doctores Flaccus , & pueris crustula dare, elementa velint ut discere prima. Vti corporum nervis robur accedit ab ætate , ita iudicii, memoriæ, phantasie, ingenii organis. hæc fatigata intempestive , languent citius , & spem solidæ & maturæ eruditionis incidunt. Herbas vide & olera , quæ sub initia veris ab avaris colonis fornacum calore & fimo fervidiore repellecta germinant ocyus , at mox adultiora deficiunt & exarescunt. Est illud seculi nostri cacœthes. gloriamur parentes , si videamus præstare posse puerulos , cruda adhuc ætate , quæ non possunt alii annis aliquot majores. ideoque atteri patimur ingenia & spirituum fontes exficari per pædagogos , ac affligi rationales potentias, quæ, ubi adoleverint illi, marcent & stупent , attrita ad perpetuarum & crebrarum lectionum cotem ingenii acie. Caveant ergo
ante

ante omnia prudentiores Ephori, ne memoriæ Principum graves sint, & addiscere illos memoriter velint prosa oratione scripta. Carminum alia est ratio, quæ ob connexionem & pedum vincula facilius se ingerunt.

Præterea, dum legunt, ad manum sint codicilli & adversaria, in quibus phrasæ sententiasque elegantiores transcribant: aut ad finem librorum, quos legunt, inferi curent pagellas aliquot puras, & in illis & paginam libri, & argumenti alicujus nobilioris caput notent. Sic, cum opus erit, ad chartas illas recurrere dabitur, tanquam ad locos communes.

Insuper styli exercitiis quotidie aut alternis diebus incumbant. Latine scripta vertant in linguam vernaculam, hac scripta in Latinam vel Græcam. Cum scribenda erit Epistola, Cicero nis pro paradiſmate erunt. Inde salutandi, gratulandi, condolendi, gratias agendi, hortandi, dehortandi formulæ petantur. Nec Senecæ aut Plinii legi diſſuaſerim, ob rerum gravitatem & uſum. In ſcribenda Oratione, præeat iterum Cicero, hinc Livii, Saluſtii, Curtii maſculæ & erectæ orationes. Interdum velim ſolos ſingulosque ambulare per Muſæum, per hortum, per agros, & meditari orationem vel Epigramma. Sic ſine ſubere diſcent natate, & à ſe quidvis impetrare, ac propriis ingenii viribus fidere, qui aliorum hætenus ſucco, & veluti præmanſis buccellis victitarunt.

Latine ſemper loquantur, præſertim cum do-

etioribus. imperandi iussa Principem accipere ab inferiori nefas, at loquendi scribendique flosculos fas omnino.

Denique quibus curæ sunt Duces, inter deambulandum, ex iis, quæ oculis sensibusque aliis se offerunt, occasionem captent docendi & quærendi, modo de Sole, Luna, stellis fixis, cœlorum magnitudine, figura, motu, incorruptibilitate, operationibus, modo de elementis, de metallis, stirpium & animalium natura, Solis accessu & recessu, dierum noctiumque incrementis ac decrementis, Eclipsium Solis & Lunæ causis, de animæ facultatibus, &c. Etiam vicinorum Regum ac Principum studia, molimina, successus prosperos adversosque recitent, ut à teneris assuescant ea cogitare, quæ agere viros oportebit.

Quod si forte Ducibus ad exemplum Augusti, Germanici, Meccœnatis, Ciceronis, Neronis, Adriani, animus sit, non in castris solum & bello, sed & Parnassi vertice lauream mereri & vatibus inferi, hanc, qua ad Carmen itur, viam insistant:

I. Poëtam faciunt, Natura, ars, exercitatio.

II. A natura duo sunt: Inventionis facilitas, & impetus sive furor dicendi poëticus.

III. Inventionis facilitas & felicitas ab imaginatione est. Cum enim poësis naturæ sit imitatio, poëta imitator: oportet eum naturas rerum cœlestium & terrestrium, adhæc affectus amoris, odii, iræ, metus, & quæ his sunt similia,

lia, animo circumferre, & phantasia agitare.

IV. Quicunque ergo imaginatione valent, aptiores sunt per naturam ad pictoriam artem & poësin.

V. Furor & impetus poëticus itidem à natura est, & calidiore spiritu & sanguine. qui uti incitatur facile, ita præcipitat venam poëticam, ut expeditius fingat mens, quæ & sunt & non sunt in rerum natura.

VI. Idem furor versuum copiam suppeditat, sicut copiosius fluere solent aquæ, quæ impetu feruntur, juxta illud Horatii: *Monte decurrens velut amnis, imbres. Quem super notas alluere ripas, Fertur, immensusque ruit profundo Pindarus ore.*

VII. Ad artem, præter præcepta Grammatica, de syllabarum quantitate, & pedibus, utile erit ex Scaligero discere diversa carminum genera, & genium singulorum. Quid nempe proprium sit Heroici aut Epici carminis, quid Elegiaci, quid in Iambico, Scazonte, Hendecasyllabis, Choriambico, Sapphico sit maxime observandum.

VIII. Quid differant carmen Tragicum & Comicum, quibus legibus Tragoedia, quibus Comœdia scribi debeat, quid sit carmen Lyricum, quid Satyricum, &c.

IX. Necessum quoque est ad artem poëticam, lectitare poëtas clarissimos, Virgilium, Horatium, Ovidium, Senecam, Iuvenalem.

X. Virgilium, Lucanum, Claudianum imitandos

tandos censeam in Epico carmine, Horatium in Lyrico, Ovidium in Elegiaco, in Comico Terentium, in Tragico Senecam, Satyrico Iuvenalem.

X I. Hoc etiam agendum, ut unum aliquem è multis poëtam familiarem nobis reddamus, eumque velut in succum & sanguinem convertamus. Ita fiet, ut impressa menti optimi carminis idea, habeant quem in scribendo imitentur.

X I I. Opus insuper est cognitione aliqua universali rerum naturalium & moralium, avium, quadrupedum, piscium, arborum, fluviorum, montium, silvarum, regionum, Deorum, & Dearum. Faciunt enim illa ad elegantiam carminis, & locuples argumentum suppeditant vatum commentis.

X I I I. Plura præcepta ad Artem poëticam pertinentia, petere licet ex eruditissimo libello Horatii de Arte Poëtica.

X I V. Denique exercitatione opus, sine qua nec natura nec ars quicquam laudabile præstare valent. Itaque crebro scribendi versus. nec tam laborandum ut multos scribant, quam ut bonos. Quare premendum est poëma, & sæpius ad incudem revocandum.

X V. Eligenda etiam materies apta poëticæ commentationi, ut bellum, pax, tempestas, Aurora, Vespera, Meridies, Ver, Autumnus, Virtutes, Vitia, &c.

X V I. Vbi versus aliquot scripserint, paulisper deambulent, & spiritum recolligant; quo
alacrio-

alacriores redeant ad intermissum opus, & veluti novo perciti cestro.

Interdum adsuescant scribendo Epigrammatici : quoties enim lepidum quid, aut memorabile accidit, quodque acumen ferre possit, disticha duo aut tria meditentur, &, quod proprium est Epigrammatis, acute & nerveose concludant.

Hæc de formandis Ducum Tuorum studiis dicenda habui, non ut Te, doctissime Vir, doceam, sed ut videas eadem me dicere, quæ tu facienda sentis. Præscripsi normam, non fixam & immobilem, sed Lesbiam, quæ accommodari debet genio, captui, indoli discuntium. ut enim cuivis pedi non quadrat quivis calceus, ita nec eadem methodus cunctis conveniat. Vti æger à Medico, animus à præceptore curandus. ætatis, temporis, temperamenti habenda sollicita ratio. Nec est, quod deterreat Duces tuos autorum multitudo & discendi labor. sunt in flore ævi, & ut corpus labori, mens ferendæ intentioni par redditur. Non est quod cessent iter doctrinæ & honoris ingredi,

dum res & ætas & sororum

Fila trium patiuntur atra.

Nihil tam arduum, quo non penetret studiosa & fervida animi vis. quisque dies opus suum probat. proficimus indies tacitis incrementis, ut herbæ & virgulta. mox profecisse nos sentimus, & cum Sole progressos esse progressus nostros. Adsit tenor & constantia. & si à Sapien-
tiæ

tiæ omnes autore Deo ingenio vim, moribus & affectibus moderationem petent, rem factam habebunt optimi Principes. Non poterunt non excellere scientia Duces, religione, pietate, & tot heroicis virtutibus præparati. Scripsi hæc rogatu tuo, ob singularem, quo in Duces Megapolenses feror, affectum. Debent Maximis Principibus istiusmodi officia, quorum quoque interest, ut regnorum rectores sapiant, per quos non imperiis solum, urbibusque, sed & humanioribus litteris earumque professoribus, suus constat honos, dignitas, & excellentia. Vale Vir doctissime & amicissime. Amstelod. 1640.

409.

CONSTANTINO HUGENIO.

Nobilissime Hugeni,

Mitto tibi exemplar Methodi, quam rogatus præscripsi Ducum Megapolensium studiis. Ea Germanorum indoles est, amant & efflagitant methodos, quia artem longam esse prudenter judicant. Ideo student compendiis, & integras artes non addiscere sensim, sed devorare cupiunt, quas Dii non nisi magnis laboribus vendunt. Non volo hæc te legere. Legat Constantinus tuus, qui licet Megapolensium Dux non sit, dux tamen est sui ordinis, hoc est fratrum, inter quos ἀεισέυδ. [*optime rem gerit.*] Est jam Delphis amatorum Tessela facta pila, cujus soror Anna Te vitri stupenda inscriptione beavit. ego meum exspecto, cum hoc
elogio :

elogio : *Ungula vatum*. Percussis enim à Liberi patris Lyncibus , uti à Pegasi ungula Parnasso , scaturiunt uberius poëtis carminum fontes. Tu, ut audio , ad castra & bella abis. abeunti prosperrimos precor , ut & Patriæ, eventus. Vellem glorioso Marte , magnis commodis , at paucò sanguine juvari posse Rempub. & incruentis sacrificiis redimi Federatorum libertatem. Hic terræ motu quassatæ ædes & in ædibus supellex mira portendunt. Porrexit se σεισμός [*motus*] iste Coloniam usque, & ultra. Quæ causâ? An quia apertæ , verni caloris vi, telluri & in vapores resolutæ supervenit nuperum gelu , egressumque vaporibus præclusit , qui exitum molientes terram magnis occultisque insultibus concussere? An quia novam Orbis Europæi concussionem minantur fata? Tu rerum divinarum & humanarum conscie , judica. Vale, Amicorum corculum , & Tesselam meis ac tuis verbis saluta. Raptim Amstelod. 13 April. 1640.

410.

DANIELI SCHONCKIO.

Nobilissime Vir ,

Quem dolorem meum coram testatus sum verbis , jam scripto pergo profiteri apud plurimos. Debui hoc officium dilectissimæ tuæ coniugi, partim ob veterem amicitiam , partim ob perpetua & nunquam interrupta humanitatis officia , quæ erga me ambo profusissime explicui-

plicuistis. Non loquor ad os ; illud affirmo serio, amisisse Te, aut potius præmisisse honestissimæ exactissimæque conjugis ipsissimam ideam, quæ morum facilitate, modestia, fide erga maritum, erga amicos benevolentia, & quod potissimum est, pietate se erga Deum & parentes probavit quam maxime. Beata est, quia in Domino mortua. Sed ô cladem alteram, & vulnus vulneri superadditum morte filiolæ unicæ! Vide quam Te diligat ter Maximus. exercet Te adversis, ut fervet: invisit paterne, ut creatoris jure plura ipsi in te licere discas. Ego solatia omnia non repetam, nec in unum congeram: Poëmate meo fusius illa exequor. Non sufficiunt illa ad explendas conjugis laudes, sed temporis angustia intercluso non licuit mihi esse prolixiori. Exequiis Leydensibus interesse non possum, sed sistam me, si Deus volet, Ultrajecti, ut postrema illic justa persolvamus. Vale. Amstelod. 3 Jun. 1640.

411.

P E T R O C. H O O F T.

INvitas, Hoofdi nobilissime, magna nomina, Vicofortios & Coymannos, una cum uxoribus virtute ac forma eximiis. His me socium adjungi vis, ut illorum splendor meæ tenuitatis ac deplorandæ orbitatis conspectu illustrior sit. Solent hoc factitare pictores: vultum deteriorem inferunt tabulæ exquisitissimas formas exhibenti, & loripes Vulcanus jungitur Veneri,
ut

ut appareat ingens amantium discrimen. Diem Jovis mensæ tuæ fatalem destinavere omnes, nisi grandis causa impediat. Venirem ego lubens una, nisi Dialectici & Peripatetici mei Auditores prohiberent, veriti ne malo ad pigritiam ipsis exemplo præirem. Die Solis domum reversus sum à funere nobilis & eximiae matronæ Catharinæ Overbeequæ, quæ Domino Schonckio minoris Poelgeestæ Dominæ nupserat. Extincta est optima mater anginâ, quam ejusdem fati consors triduo post secuta est filiola unica. Ille calamitate tanta perculsus stupet, & num superis an mortalibus accenseri debeat, dubius hæret. Ego Sisyphi jam saxum post longas ferias volvere occœpi, & de Temperantia verba facio, cujus nomen monet, ut voluptatibus, quas Muyda profuse promittit, fruam parcius. Non est viri temperantis ejurare lepores & honesta ærumnosæ hujus vitæ condimenta. sed & obvias non semper amplecti, officii quoque sui esse putat. Alias contabesco & desiderio loquendi tibi, & iis sermonibus pascendi animum, quibus per te ad sapientiam, comitatem, urbanitatem, & nullam non *ὁμιλικὴν* [*civilem*] virtutem præformamur. Cuperem videre florentem hac anni tempestate acanthum, & spinosa ista moeniorum tuorum arbuta. attraherem odores in intima cerebri, in ipsos ventriculos spirituum animalium capsulas & focos, ubi Poëtarum animæ simili aura nutriuntur. Si adesset Tessela, impatiens

moræ accurrerem, ut aures meas cœlesti harmonia permulceret cœlestis femina. nunc Caucaſo alligatus, ſino, ut cor meum exedant Ariſtotelici vultures, & me objectamentis ſuis lancinent Socratici juvenes. At quam tu graviter de militantis Europæ laboribus ſententiam pronuncias, & in Principum arcana penetras judex ſerius. Magna omnes moliri video, agere nihil. Heri litteræ à Conſiliario D. Brederodii tranſmiſſæ nunciant, Principem exercitum omnem luſtraſſe, & ut ſe moveret quiſque juiſſe. Circa veſperam accepi, Auriacum reflexo curſu trajeciſſe, deſideratis ſuorum pluribus, Leyam, & in Waſiam, relictamque malo fato Calloam, cum exercitu omni magna celeritate contendere. pugna ad arcem S. Donati, alterius expeditionis πρόφασις [prætextus] fuit. Certiora exſpectamus, & in majorum omnes ſpe ſumus. Vale, Vir maxime, & uxorem digniſſimam, filiasque meis verbis ſaluta. Amſtelod.
12 Jun. 1640.

412.

DANIELI SCHONCKIO.

Non ita pridem per omne honeſtiſſimarum voluptatum genus me circumduxiſti, nobiliſſime vir. Piſcati ſumus, & piſces cepimus: venati ſumus, & ceſſere in prædam lepores: aucupati ſumus, & ſturnos glande è quercu dejecimus. Quin toto Rheno nos non una voluptate adſperſit Nayadum & Dryadum vicinarum

rum hilaritas. Ita per jocos & facetias periere dies Caniculæ. Statueram omnino serio apud te agere, & describere mihi meditata: sed non est tua domus severitatis & Philosophiæ tetricæ sedes, verum amœnitatis omnis, & comitatis, & suavitatum locuples domicilium. Illud sane ad gravitatem facit, quod primus me docueris balistam explodere, & pulverem nitratum flammæque circumfusas capiti non exhorrescere. Hactenus imbellis fui civis, & parum vehemens Patriæ assertor. Iam pollem non versibus solum, sed & pilis ferreis in Hispanum detonare, quanquam metus non sit ne mea manu pereat hostis. Pro his officiis tantum tibi debeo, quantum mihi roboris, animi, vigoris & boni spiritus addidisti. Nunc satur voluptatum vultum, vocem, manum, & calamum compono ad Academicas exercitationes & desuetos labores. Illud doleo incidisse in hæc feriarum tempora infamem istum casum convivarum quatuor, quibus repulsam passis famendum erat, nisi per focrum tuam famelicis stomachis consultum fuisset. Vale. Amstelod. 1640.

413.

P E T R O C. H O O F T.

Nobilissime Hoofdi,

Cum me nuperi itineris turbonem & festinantium matronarum virginumque remoram tuis ad nobilissimum Vicofortium literis incess-

T 2

sis;

sis ; tanto æquiore animo hæc tua maledicta fero , quanto tu minus iniquo ista scripsisti. Opus est Davo , non in fabula solum , sed & in mensa , & lecto , & itinere. Languet sine tumultu vita humana. excitandi interdum fluctus in placido mari, ne dormiamus nauræ. Matronas virginesque quod attinet, servavi invitas. dum enim abituritionem modeste simulant, mea importunitate detentæ fuerunt non male. Ex quo à vobis discessi , epulati sumus opiparè ego & cognatus tuus cum Andromache sua in Lacubus Diemensi & Bylmensi. Iam nova audi , ut credas mihi ferias esse , & indulgentiam magni otii. aliena negotia curo , excussis propriis. Appulere , uti audivisti ante , naves onerariæ octo ex Oriente , totidem ex Occidente, aliæ è mari Mediterraneo, pretiosissimis omnes mercibus onustæ. Mihi quanquam ex tam immani messe spicilegium nullum reliquum sit , meo tamen gaudio juvo patulas fauces multa petentium ; gallis gallinaceis similis , qui ubi ova peperere gallinæ , nec ipsi , nec sibi , sed domino ingenti cantu & strepitu insolentiore gratulantur alienæ felicitati. Utinam exoticæ istæ merces culinarum solummodo essent solatia , non avaritiæ , superbiæ , luxusque nostri scelerata materies. In Insucribus pergit Gallus & Hispanus gloriam ex hominum laniena quærere. Hostes sumus humani generis , quotquot flocci facimus hominem , mundi imperatorem , Dei Opt. Max. artificiosissimam fabricam. Venetus
suo

suo more spectatorem agit , ne partes offendat. Banirius grandem exercitum non armis , sed fame atteri dolet. nec hostem habet , quem prælio aggredi possit miles, nec quod mordeat. Ratisbonæ de Imperii rebus concilia habentur, majore, ut auguror, apparatu, quam rerum successu. Wimariensium aliquot copiarum, amisso Duce Bernardo , degeneres , ob ignaviam alicubi vapulavere. Gallia & Hispania concussis certatum viribus de Atrebato dimicant. Longæ Gallorum moræ suspectæ prudentioribus. Interest Cardinalis Hispani , ne urbs illa liliis coronetur. Forte & hic , ut nostrate proverbio dici solet , magnam controversiam dirimet μάχη. [*conquus.*] Imperator Ottomannicæ portæ vivere desiit , ne putes Mahometem dare posse suo successorì, quod nequìt sibi. Britannus terret , & terretur. Nisi egeret æris maximus Rex , posset diffringere adversantium portas, & montes sylvasque Caledonias penetrare. Nunc nobiscum pacisci cupit, ut litem veterem redimant Societatis Indiæ opulenti negotiatores. Sclopeto ictus Gubernator Neomagensium , sensi , nullo fata loco posse excludi, & in medio etiam Tibure esse Sardiniam. Auriacus altero molimine frustratus, tertium jam non minore animo audet. Belli incerta, prudentia, mora, occasione reguntur. Ausim nobis adhuc polliceri facinus tanta indole dignum. Vale cordatissime & suavissime Heros , & syllogen hanc publicæ & privatæ fortunæ argumentum crede indu-

bium oscitantis & somniculosi scriptoris. Salutant Te, Dominamque Hoofdiam, non Hoofdii, & propagines vestras filiæ meæ filiusque. Amstelod. prid. Cal. Sextil. 1640.

414.

JOACHIMO VICOFORTIO.

N*obilissime Vicoforti,*
 Magnam hujus æstatis partem tecum in amœnitates distribui. Dum belligerantur purpuræ, nec finibus suis contenta ambitio regna urbesque patulis faucibus devorat, nos contra-cto cupidine ea voluptate fruimur, quæ Deorum felicitatis æmula est. Legisti puer apud Homerum, Iovem à mundi curis fessum subinde ad Afros & Æthiopas commessatum defle-ctere. Legisti, eum modò in Cretam patriam suam rusticatum abire, modò Iunone sprete in Thessala Tempe ad Penei fluminis ripam sece-dere. Quod si hæ voluptates Deos capiunt, quid ni nos homunciones, quorum gaudia tot cala-mitatibus indies flagellantur, quorum sanguini admixtus est succus iste nigræ loliginis, eos captabimus locorum secessus, in quibus nec de nummi valore controvertitur, nec quid discre-pet à Stoâ Peripatus, à Socratica barba pallio-lum Cynicum, anxie disquiritur. Fui tecum Muydæ, ubi Hoofdus, Leonora, Susanna, Con-stantia, egregiis exemplis magnarum virtutum documenta nobis dedere. Equidem in Hoofdio præter facundiam, prudentiam, comitatem, ad-miratus

miratus semper fui priscam illam morum simplicitatem, nec fluxos hujus seculi ritus, quibus vicina Gallia Batavorum constantiam expugnat, & in Proteos transmutat. In Leonora, tanti viri conjuge, Cornelias, & Sempronias, & Placidias, & Flaccillas, & Serenas adspicio; hoc uno ab illâ dispares, quod à magnis virtutibus secreverit grande supercilium, nec prodote triumphos numeret. Susanna comis est sine fuco, disertâ sine arte, modesta sine affectatione, sine ostentatione sciendi avida. Constantia primam virtutem putat, omnes complecti posse, & dissimulare singulas. Postea in villa Domini de Tramâ combustissimus dies aliquot, ambulando, ridendo, edendo, bibendo. Memini, cum nos exciperet Beverovici facetiarum pater P. de Wilhem, & in agro Diemerio Breenius, ubi in cerasis hæsimus oculis, manibus, dentibus, totaque epiglottide. Iam, pro dolor, à te, mi Vicoforti, divortium feci & aliis amicis. permistus in Rheni ripa, alium aërem haurio, alium succum bibo, alias terras calco, aliis ignibus ustulor. De aëre concedes facile, eum hic puriorem esse vestro, qui paludibus stagnisque Amstelæ gravis incubat. Succus, quo hic vivo, merè Rhenensis est, & quidem Moguntiacus, interdum Hispaniensis, interdum è Cypro aut Candia Malvaticus. tuus rubet, & cruento colore terret imbellem philosophum. Terras hic calco non fabulosas, sed glebosas prorsus, non arborum fruticumque va-

cuas , sed frondosas undique umbrosasque. Quod si de ignibus sciscitaris , oberro hic inter desertas Creusas ἀγαμέμνων [cælebs] Professor , & dum plures adipecto , dum precia singularum expendo , & velut ad stateram argentariam suspendo , hæreo anceps animi , nec quam fugiamve petamve , aut quo me vertam , nescio. similis iis , qui in trivio constituti , stant , nec pergunt. modo formosissimam saluto , sed juvenculam nimis , cuius amoribus vix Leander suffecerit aut Pyramus. Modo quinquagenariæ arrideo , sed quam circumstrepunt pueri innuptæque puellæ , quas si meis accenseas , imperator ero grandis & numerosæ Reipublicæ. Est & alia , quæ me reverenter procantem non dedignatur , verum advocatis caussidicisque fervent limina & porticus. Inter has sollicitudines positus nullum ego colorem imbibo , & oculis meis impero , ne videant vanitatem. Non displicet tibi hoc amici tui sapiens decretum , nec Annæ tuæ , nec Leonoræ Hoofdiæ , quæ amica conspiratione in secunda vota mea conjuravere. Mihi nobilissimus Schonckius plenis modiis omne officiorum genus exhibet , cuius ego recentem & crudum adhuc dolorem Philosophiæ feriis monitis , etiam jocis non illepidis , & prorsus ineruditis , castigo & lenio. Interea de Atrebatensi obsidione læta inaudivimus. Habet Gallus miles quod edat , quod bibat , quo bellaces manus in hostem exerceat. Victoriæ magnam in spe magna habet. necdum

dum tamen victor est. nondum inclinationem fecit Mavors. Quam multa inter calicem supremæque labra cadant tot veteris tot recentioris ævi exemplis didicimus. Nescio, an Gallorum sit, lentè festinare. Sed videbor Tibi fortè nimis βαρυκέφαλος, [ponderosi capitis,] & sententias eloqui ultra crepidam. Vale, suavissime amicorum, & magnum Hoofdium saluta, at ante tori tui consortem incomparabilem. Poelgeestæ ad Rhenum, 12 Sextil. 1640.

415.

GUILLIELMO BORELIO.

I Illustrissime Vir,

Quod abeunti non præstiti officium valedictione, jam reduci præstabo benigna gratulatione. Ivisti trans maria & terras, & altius elevari illic Vrsam vidisti, quam in Batavis. Informe illud animal est, & efferæ indolis; non tamen efferi quotquot sub illo fidere degunt. Oxensternios, Gabrieles & Schuttos salutasti, doctrinæ, humanitatis, & civilis prudentiæ patres proceresque. Horum prudentia monstrat, summos sæpe viros, & magna exempla daturus, agresti in patria crassoque sub aëre nasci. Iam ad tuos reversus causas perspexisti, cur finibus suis olim egressi Gotthi Vandalique in australes terras concesserint, quamque amœnior hic sit habitatio, & natalis soli dulcis fruitio præ exterarum gentium terris moribusque. Sueciam nunquam vidi, nec videre valde gestio. Habet

Batavia nostra quos veneror & colo, quos in oculis & pectore gero, quibus me debere fateor plurimum. Inter hos Tu es, maxime Boreli, cujus facundia Batavi domi forisque clarescimus, & Federatorum causa summis Regibus principibusque probatur. Fruere hac felicitate, & legationis tuæ fulgori sine intermicare amicitiae nostræ radiolum. Heri dum obversabar meditanti, lusi disticha aliquot, quibus redeuntem ad nos exosculor. Ea benigno & placido vultu, quo adspexisti Reginam & Borealis oræ dominos, lege. Vale.

416.

CONSTANTINO HUGENIO.

Nobilissime Hugeni,
 Torporem meum in perscribendis literis excutit sæpius perpetuus scriptor Vicofortius. Iam Tu versibus tuis, velut alter Miltiades, somnum mihi adimis. Religio est silere, te præcinente. Liberis tuis masculis graviter & ingeniose, tuo more, gratularis. Sequor & ego, verum ut patrem apud inferos sequitur Claudius, non passibus æquis. Parentas Didenii herois manibus validis epigrammatibus. ego unicui scripsi, cum ad plura non sufficiam. Ad effigiem tuam & dilectissimorum pignorum suaviter, nec minus doctè, alludis. ita, ut à novercante thalamo tibi videaris metuere. Ego & Tibi & mihi ἀπὸ τῆς μητρὸς [à novercâ] timui semper, ob lapsam aliquando in privigni caput

caput mortuæ novercæ statuam. Ita est in Græco Epigrammate:

Στήλην μητρὸς μικρὸν λίθον ἔσπευε κῆρος,
ὥς βίον ἡπάχθαι, ἢ τρόπον οἰόμενος.

Ἡ δὲ τάφῳ κλιθεῖσα καλέκτανε παῖδα πεσόντα.

Φεύγετε μητρὸς ἢ τάφον οἱ πρόγονοι.

Cippum novercæ saxum non adeo magnum corona-
bat juvenculus

Existimans ut vitam ita mores eam commu-
tasse:

Ille vero in sepulchrum inclinatus ruina sua pue-
rum extinxit.

Fugite vel ipsum novercæ sepulchrum, ô Pri-
vigni.

In hunc diem steti ἀμετάπλωτος [immutabilis]
& τετράγωνος, [quadrangularis,] nescius tamen
fati fortisque futuræ. Interea γυμνασίᾳς ἕνεκα
[exercitii gratia] secundas nuptias versibus & dia-
logis propugno. Sunt inter Epigrammata tua
apud nobilissimum Vicofortium, quibus Lydiam
& Pollucem, & Mæviam, nescio quam, exerces.
Cum legeret ista incertus author, fescennina
quædam reposuit. An concoquere has pernas
possis, non facile dixero. Si nauseam pariant,
exspue, uti catapotia solent pueri. Sed quantis,
Zulecheme, conjugiiis erigitur Federatorum
fortuna & Auriaca domus. Num canendum
propediem:

Conjugio Anchisa Veneris dignate superbo?

Quantis contra motibus concutitur Austriacæ
dominationis apex, & ἐν γυμνασίῳ [late imperans]

Hi-

Hispanus. Quam diversis studiis surgimus nos ,
premitur ille. alia nuptiarum , alia rebellionum
indoles. illæ nectunt , hæ dissolvunt federa , ju-
ramenta , populos , sceptrâ. Nos hic nuper an-
niversario festo Nobilissimi Satrapæ Hoofdii
interfuimus , cui jambis aliquot applausi , quos
mitto. Aderat Tessela. Aduisti & Tu, sed uti
adiunt absentes , qui bibunt alienis faucibus , ne
de hospitis intemperantia querantur. Vale, Vir
summe, & Constantinum tuum mone , ut subin-
de mihi sua impartiat. volo enim de ipsius pro-
gressibus esse certior. Amstelod. 30 Ian. 1641.

417.

CORNELIO VANDER MYLE.

Nobilissime Myli,

N Iamdudum scripsissem ad Te, sed recen-
te adhuc , ob filiæ obitum , luctu , nolui unguis
esse in ulcere. Distuli studio , quæ dicenda
erant; ne dum solatia conquiro, refricem intem-
pestivè eorum causas. Fatale nuncium jam ad
me pertulerat Nobilissimus Vicofortius , quod
non minus me affecit , ac si sanguis me Tibi ,
profapiaque junxissent. Vir Maxime, quantum
liberorum tibi deceditur , tantum repetitur bo-
norum , quæ indulgit antè divina clementia. Et
vult Deus in uno filio residuam tibi esse spem
nepotum , qui nomen Mylium propagent , ne
inter plures degenerem fortè aliquem reperi-
as. Perit puerpera, nec discessit , nisi suffecta in lo-
cum suum , prole. Non habet ergo viventium
minus ,

minus, aut hominum mundus, etiamsi è terris migraverit filia. Vivit proles, & in illa mater; uti exarescente flosculo superstites sunt bulbuli. Dolendum utique puerperam mori, avelli à matre, à nutrice sua sobolem, nec educari posse ab ea, cui nascendi proxima debet principia. At quid facias? Inter Homeri eloquia sententiasque grandes, illa prima est: *Διὸς δ' ἐτελείετο βῆλη.* [*Iovis autem perficiebatur consilium.*] Cum Christo, cum Ecclesiæ Christianæ insertus esset partus, illa dimitti cum Simeone in pace voluit, postquam oculis vidisset infantem, quem salvum faceret suo sanguine Iesus. Vix abluta per Baptismum fuerat infanti primæva labes, vix recepta erat in gratiam peccatrix animula, cum matrem à sordibus mundi ablutam purgatamque in gloriam recepit, qui creaverat. Si à marito divortium mortua fecit, capiti suo Christo unitur. Si liberis educandis non vacat, Angelorum familiaritate lætior fruitur. Si Te, si matrem invisere desiit, at Dei Opt. Maximi ora intuetur propius. Quanto ab aula Hagienfi abest longius, cœlesti vicinior est. & parentis terreni alloquio ac convictu destituta, summi patris intuitu beatissima gaudet. Vixit probè filia, virgo, conjux, mater. sexus sui partes explevit omnes. & virtutibus sui ordinis cessit nulli. Quanta hæc solatia sunt, Myli præstantissime, quæ repetere me nec necesse est, nec nocet. Tales genuisse & naturæ & divinæ gratiæ est. Tales pietate moribusque sanctissimis imbuisse

buisse, & gratiæ & curæ tuæ. Ego orbitati tuæ condoleo ex animo, dives liberorum. & si simili fato premerer, à Te patientiæ & fortitudinis exempla peterem. Neque enim hæc scribo, ut animum tuum muniam præceptis, sed ut quomodo erga Te affectus sim, pro officio meo, exponam. Pro versibus B. gratias N. T. debeo. quanquam à longo tempore non viderim jambos minus concinnos, & magis distortis incedentes pedibus. Sed hæc soli tibi, Vir maxime, scripta sunt. Equidem doctissimorum virorum hallucinationibus veniam dare, si quisquam alius, paratissimus sum. Audio clarissimo Salmasio in Galliis doctrinæ præmia tanto viro digna à Rege offerri, coronatorum millia duo, annuatim. Creditur vacillare, non in fide, qua se Deo obstrinxit, sed qua Vobis. Sed agendum hoc sedulò, ut quæ de primatu Papæ scripsit, edantur in lucem, ne dum valde placet Gallis suis, fortè per humanam infirmitatem, minus velit displicere Tarpejo patri. Vale Vir summe. Nos per Dei gratiam valeamus. Salveant Domina vander Myle, & Filius gubernator. Amstelod. 16 Febr. 1641.

418.

CONSTANTINO HUGENIO.

Valde me recrearunt Epigrammata tua, Nobilissime Hugeni, nec minus Constantini tui. Totis mihi modis admetiris versus, toto me cælo & meteororum omnium ingenti congerie,

gerie, domesticâ adhæc suppellectile donas. quæ dum in argutos singula sensus contorques, imperium mihi in superos inferosque exercere videris. Vapulant tibi Sol, Luna, pluviae, grando, nix, cometæ, fulmina, ignes fatui, totusque exercitus imperfectorum corporum. inde ex suppellectile Satyram contextis, & acum, pectines, specula, forcices, forcipes, dentiscalpia, & nihil non istorum impedimentorum, tanquam stultitiæ nostræ argumentum, traducis. Expendi cum nobilissimis doctissimisque viris, Satrapa Muydensi & Vicofortio, acumina tua & subtilissimas cuspides, in quas desinunt Epigrammata. Multa sunt, quæ ipsam Bilbilim obtundunt. Sed hoc unice velim, ut istius generis poemata omnia colligas in unum;

Ne turbata valent levibus ludibria ventis.

Magnam vim habes hujus annonæ. collecta ede in lucem. erunt pro acetariis fastidientibus stomachis, & lactucæ; malvarumque officium præstabunt Sophroniscis. Meditationes tuas de Organorum in templis usu & abusu, legi non oscitanter. Est Peripato suum Organum, est Ecclesiæ. Illud procul à fano, hoc fanorum proprium. Illud rectæ rationis regula est & norma, hoc voces cantusque nostros moderatur. Illud in scholis, hoc in templis sonat. Illud sapientiæ præludit, hoc pietati. Prius ignorantia & errori, posterius tristitiæ ac dolori medetur. Templorum Organa digitum pedesque movent ludentium. nostrum Organum doctæ

doctæ profitentium & docentium voces. Illa ventus inflat & subballio ædituus ; hoc nostrum Simplicii, Philoponi, Ammonii, Aphrodisæi, Averroës, magna nomina. Ut prærogativis non levibus præcellere videantur Peripateticorum Organa, Triplici delectamur Musicâ. eâ, quæ vocis est : eâ quæ pedum est, ad numeros saltat : & eâ, quæ Organica est, numerosque instrumentis, tibiæ, citharæ, testudini, cymbalisque applicat. Hæc postrema in templa irrepfit, sed malo apud plurimos more. etenim, quæ non nisi sacra loqui debebant, profanos subinde & lascivos sensus auribus oggerunt. Et licet nulla soni, in non viventibus, sit impuritas labesque, hoc tamen illa peccant nomine, quod memoriam injiciant rerum minimè cœlestium, vocibus ad numeros eosdem factis expressarum. Clamant passim Organa, dum abitionem è templis paramus, dum garrimus saturi sacre auditionis, dum de prandio vel coena cogitamus, dum ambulationibus diem horamque dicimus. Hæc aliaque plurima correctâ cupis, aut saltem, ut corrigenda, indicas. Omnino tecum sentio ; non abhorrrere pietatem à cantu & lusu. Vetus illud est ; Deum canere fidi-bus & citharâ. non est superioris sæculi inventum tertia hæc Musicæ species. Antiquissimus organorum inventor Iubal fuit. Noachum & Iapetum antevertit hæc hominum solertia. Eger animus adminiculis quibus ad Deum se & cœlestia erigat, humo aliàs affixus & languens. Facit

cit hoc Musica , quæ dum aërem percutit harmonicè, percutit illum , qui aurium anfractibus continetur, illisque vernaculus est. Hic spiritus afficit , quos animales vocant , animæ operantis proximum instrumentum. Hi animam movent, & eam maximè vim , quæ concupiscibilis dicitur, ubi gaudium , lætitia , amor jucundi & tristium fuga odiumque stabulantur. Et quia gaudio hoc fruitur attenta imaginatio , gaudet imaginatione delectabili ipsa ratio & intellectus. Hic dum numeros accipit sanctioris cantilenæ aut poëmatis, quod de Deo , vel Angelis , vel Christo & salutis nostræ mysteriis loquitur , excitatur & erigitur horum cogitatione mens , & animali gaudio succedit spirituale & verè divinum ac coeleste, quod nos subductos humo, Deo propius jungit , & velut ecstasi quâdam abripit mentem , & coetibus , (dixissem penè Dis) miscet Superis. Quæ cum ita sint , pessimo divortio ab Organis attentionem , ab attentione pietatem & rerum divinarum seriam meditationem separamus. Tu , mi Hugeni , medicinam publico errori quæris & invenis. Nec dubito , quin admissuri illam sint , & amplexuri sacrorum antistites. Ea quippe observas , quæ & caveri debent religiosè , & fieri minus superstitiosè. Scribis te aurium apostemate laborare. non debebas sanè , ut qui crassas & Batavas habuisti nunquam. aperto abscessu auribus eris purgatissimis, uti naris es & fuisti emunctissimæ. Certè olfacere potuisti tot organorum apostemata ,

& attendere ad illa, quæ in eorundem in templis usu inconcinna prorsus sunt & dissona. Valetudinem tibi quavis corporis parte validam ex animo precor. Filiorum quadrigam saluta. Constantino respondebo intra dies pauculos. Mira scribit Adolescentulus iste, ætate puer, prævenit arte senem. Nec à te degenerem se præstat Christianus, qui licet à fratre secundus sit, non vult esse secundus. Vale, vir maxime, nec odisse velis unquam, qui te deperit & virtutes tuas pro interula habet:

Pectoris illa tui virtus candorque fidesque

Proxima Barlæi tangit operta tui.

Amstelod. 26 Feb. An. 1641.

419.

CORNELIO VANDER MYLE.

*N*obilissime Myli,

Cum nuper Leidæ essem, intellexi professionem linguæ Græcæ in Academia ista vacare. Decreveram jam tunc N. T. commendare D. Iohannem Brosterhuysium, à multis mihi annis ab egregiis virtutibus notum. Verum Amstelodamum reverso occurrit frater, & se à Sparta ista alienum non esse significat. Quin literas commendatitias efflagitat, quas illi ut negem, ipsa pietas vetat. Studuit sub clarissimis viris D. Vossio Dordraci, D. Bertio Leidæ, in Illustrium Ordinum Hollandiæ Collegio Theologico, ubi, Te Curatore, ad Senatus Brielani designationem Philosophiæ primum, inde Theo-

Theologiæ operam dedit. Hinc exacto sexennio dimissus, in Galliis Generosissimo Domino de Langerack, apud Christianissimum Regem Legato, à concionibus fuit, annos octo & ultra. Inde in patriam reversus, oblatum ab Amstelodamensibus Conrectoratum arripuit. Quo summa cum laude functus fuit annos duodecim. Latinas litteras & quæ ad Romani sermonis puritatem & elegantiam faciunt, probè novit. Græcis non tinctus, sed imbutus est. Epigrammata Græca scribit non sine genio. Quin & cum necesse est, Græcè loquitur. Vitæ est inculpatæ. Indole & moribus placidissimis, & ad omnem humanitatem modestiamque comparatis. Non dicam plura, ne à fratre profecta videatur commendatio. Hoc ausim dicere, non novisse me alium isti professioni idoneum magis. Faveo ego Academiæ vestræ, in qua aliquando docui, & è qua invitus dolensque abii. Honori ejusdem consultum volo, si quisquam. Non ambit professionem hanc frater meus, ut luculentiore fruatur stipendio, habet hic non minus luculentum. Verum labores scholæ redemptos cupiat faciliore provinciâ, & horas plurimas unius lectione; præterquam quod honoratius sit profiteri apud Academicos, quam inter pueros cum barbarie & petulantia luctari. Vale Vir nobilissime & præstantissime, & has ipsas litteras nobilissimo D. Catsio, aliisque ad quos hæc res spectat, prælegi non ægrè feram. Scriberem Domino Catsio, sed scriben-

da essent eadem. Orationem meam, quam de Christo patiente habui, mittam proxima hebdomade, ut & Venerem Britannicam in Nuptias Domini de Heenvliet, &c. Circa nuptias Celsissimi Principis Auriaci jam ungues mordeo & pluteum cædo. Amstel. 7 April. 1641.

420.

JACOBO VANDER BURGH.

Litteras tuas ad sororem datas vidi non semel, quibus in amicorum censum etiam nomen meum adscribis, & me salute impartis. Hoc nomine gratias me tibi debere fateor, & te non immemorem esse mei non illubenter cogito. Sed quam tu jam in beatitudinis humanæ stas apice, ut qui à Principum aulis in Regum palatia translatus es, & eos scribis articulos, quos ego me ignorare non doleo. Satis mihi est Principis nostri celsissimi germen iis sponsalibus innexum, quæ ipsi gloriam, imperio munimentum, & Patriæ universæ maximam securitatem parabunt. Est profectò, quod sibi gratulentur Federati Ordd. qui tantis præfidiis insistentes minus jam ab Hispaniarum Rege sibi metuere habent. Federe, nuptiis, religione jungimur. Primum illud vinculum disjungi non patietur secundum: secundum disjungi non patietur tertium, quod dissolvi non patitur Ecclesiæ Anglicanæ status & Parlamenti sedula cura. Commovit aliquando similis tempestas Belgium hoc nostrum, quæ jam Britanniam & Scotiam.

tiam. Emersimus nos , emergent etiam per Dei gratiam Britanni. Humana sunt quæ aguntur, quanquam & divina. Excitat è veterno Deus Ecclesiam , ut commissam contentionibus exerceat & probet. Ego mentionem tui apud tuos facio sæpenumero. Viximus unà , risimus unà, versus scripsimus una , serios jocosos prout res dabat. Hæc vita nostra est , vander Burghi, quasi tessleris ludas : hoc jactu gaudemus , illo dolemus. Mihi illa placet, quæ à morositate est aliena, & à sycophantiis. Sed ecce filium meum inter Britannos. Cum enim in Britanniam transiret Princeps juventutis Batavicæ, & secum traheret magnum nobilium syrma , volui eum inter umbras esse , non ut aliorum splendori aliquid detraheret , verum ut majores sorte & purpurâ suâ illustraret humilitate. Si quid tibi dulce meum est , talẽm te illi præsta , qualem te mihi præstitisti semper. Vale , & si me odisse potes , ego me ulciscar majore tui amore , & benevolentia. Amstelod. 11 Apr. 1641.

421.

CORNELIO BOYO.

ITa est, clarissime Boye , fui Haghæ , nec reperi te. Iunxisset nos mensâ nobilissimus Catfins , qui juncti animis studiisque sumus. Sunt inter nos litterarum & carminum commercia, sed alloquiorum & confabulationum & leporum nulla hætenus fuere. Exspecto ut aliqua occasio nos societ : exigam hinc rationem Epi-

grammatis, quod in effigiem meam scripsisti. Si Batavus mihi subdit Homerum, ego illum Batavum in alios istas laudes congerere malim, quàm in me. Plurimum illæ possunt ad conflandam invidiam homini minimè præfidenti, & sibi Suffeno. Mi Boye. novi amicos, quibus oculi ex humorum illapsu cœcutiunt. An non Tibi idem accidit, ista cum scriberes? cujus mentem propensior fortè in me adfectus velut densa nube occupavit, ut, refractis benevolentiae radiis, minima maxima tibi appareant. Satis fuerit, si inter Bavios & Mævios censeri merear, quorum in Bucolicis mentionem facit Maro. Effigiem istam meam; quam te vidisse scribis, non vidi. cuperem illam habere. Delineavit me ante semestrem pictor aliquis Leydensis; verum non noveram me ex istis lineamentis. Mitto aliam ante plures annos sculptam. Desidero videre tuam, cui hoc Epigramma subscribam:

*Qui Themidi loquitur Phœlus, vatesque tribunal
Concutit, & trepidos asserit ore reos;*

*Talis Boyus agit. Walachrum cui fluctus & undæ,
Et patriam dulces dant Heliconis aquæ.*

Exuvias hic Vatis habes. nihil adspicis ejus.

Mentitur verum tota tabella virum.

Sed Rhodopen, raptasque nurus, Silonque pererra.

Non alibi Boyum cernere, Belga, potes.

Vale, vir præstantissime, & maximo virorum
D. Catfio me officiaque mea omnia trade penitus. Amstelod. 27 Apr. 1641.

422.

IACOB O CATSIO.

Nobilissime Catsi,
 Misi nuper N. T. Poëmation in Nuptias Celsissimi Principis Guilielmi, ut illud Ill. Præpot. Hollândiæ Ordd. Delegatis offerres. Tu, quo es in me affectu, ut illustrior esset offerentis gratia, toti Ordd. Hollandiæ Confessui illud exhibuisti, ut me favore publico totum involveres. Est quod hoc nomine Tibi æternum debeam. Fateor ingenuè, non tam mihi gratum fuit isto Fortunæ rivo inaurari, quam intelligere, communibus omnium Civitatum suffragiis in me defluxisse illam liberalitatem. Tu Intelligentia illa es, quæ orbem istum rotavisti, & Planetas Reip. nostræ felicissimâ coitione mihi conciliasti. Quid rependam? memorem tantorum beneficiorum animum εὐς τὸς αἰῶνας. [*in secula.*] Si quid porro à me officii N. T. præstari possit, id omne Tibi militat uni. Impera, & manda, meque peculium tuum habe, & vadimonio nunquam redimendo obstrictum. Summum hoc studiorum & Musarum mearum solatium est, Tibi placuisse. Vtinam ea à me proficisci possent, quæ exacta iudicii tui vis, ingenii solertia, facundiæ torrens probet. Annitar ut talia sint, & conabor Te illis astris quavis occasione inferere, ubi Meccœnates, & Attici, & Lælii habitant. Vale, præstantissime Vir, penè dixissem, mi Catsi; nisi veritus fuissetem,

fem, ne amicitiae & benevolentiae vox muneris
tui & virtutum splendori obstreperet. Amste-
lod. 17 Iun. 1641.

423.

CORNELIO VANDER MYLE.

Nobilissime Myli,

Dudum est, quod fratrem meum tibi
commendaverim, ut ea professione potiri possit,
ad quam totus factus est. Non video, quid in
illo desideret quisquam, quod ad honorem &
decus Academiae vestrae spectet. Aetas illi iusta
& matura est annorum 48. A studiis divortium
nunquam fecit, nec per intervalla cum iis rediit
in gratiam. Ex quo Leida juvenis discessit,
Theologiam concionator professus est, & in
Galliis linguam Graecam excoluit sedulo, ut
saepe mihi tum temporis Epigrammata Graeca
transmiserit, quae D. Cunæo p. m. cognato
meo perplacebant. Gallia relicta, ubi per annos
novem vel decem Illustri Legato Potentissimo-
rum Ordinum à concionibus fuit, Scholae hic
correctoratu functis est, summa cum laude,
D. D. Consulibus, Curatoribus, discipulis suis
charissimus. Cum peritia linguae Graecae junxit
Latinae & Gallicae & Italicae linguae studia. Et si
pacis esse studiosum & alienum à similitudinibus
ad tranquillitatem & gloriam Academiae ve-
strae facit, certè in ipsam incidistis lenitatem &
modestiam. Quanquam de fratre loquar, vera
tamen sunt, quae dico. Docet adhuc feliciter,
quod

quod in professore primum est. Non satis est, novisse multa. Professoris est eloqui illa posse, quæ scis, ut ex te sciat & discat alter. Quamobrem non petam à N. T. ut in veteris nostræ amicitiae & ejus reverentiæ, qua N. T. colui semper, gratiam, suffragium commodas fratris desiderio. Verùm ut ea examinentur, quæ professionis istius propria sunt & *οἰκεῖα* [*peculiaria*] decora, rogo. Vale Vir maxime, & me, quod fecisti conitanter, ama. Amstel. 18 Jun. 1641.

424.

CONSTANTINO HUGENIO.

Nobilissime Hugeni,

Cum aquæ in euripos & cataractas magno impetu irruunt, sisti eas hinc inde objectis valvis portisque necesse est, ne mole sua obruant vicinas terras. Mihi tanta rerum scribendarum moles incumbit, ut punctis mille & commatibus & parenthesibus singultientibus opus sit, ut scribenda determinem, & suo singula ordine efferam. Ex quo Haghâ cum Principe abivisti, ego individuum vagum fui, modo Poelgeestam, modo in Bamestræ agrum, modo Muydam, mox Beverovicum & Alcmariam abreptus. Vbi-que inter meos tuos quoque amicos repperi, quibus benevolentiae tuæ & comitatus characterem impressisti. quam ob causam meminisse tui amant, sive ficci seria agant, sive adpersi Libero Saliaribus dapibus ornent Deorum pulvinaria. Poelgeestæ apud cognatum tuum, D. Schon-

V 5

kium

kium censum iniuvimus tuarum virtutum. verum hoc unum in vitio posuimus, quod cum omnes devincias tibi, argumentum invidias & bonas occasiones demerendi te. Debere tibi nos majoris, quam debere nobis, & corporibus Diisque coelestibus similis inferioribus te tuaque donas, at accipere quidquam à sublunari mundo nescis. Bamestra Riccios, Ossios, Ransios mihi obvios cum pilentis & quadrigis objecit, quibus regaliter vectus accessi Tesselam, cui epistolæ tuæ partem prelegi, quæ de rivalibus agit

Illa suos prudens mecum suspendit amores,

Et solum Veneris nomen, siccosque poetas

Sicca colit. neque tota gelu. blandissima posset

Basilis & versiculis matrona resolveri.

Abejus facundia est carmen hoc, quod mitto, inscriptum albo Nobilissimæ Virginis Trajectinæ Ogel. Beverovici apud amicos te totum Parisinis uvis immersumus, & ibidem in prædio Coymannorum asparagos non una tibi propfide sacravimus, optavimusque omnes, ut quam cito illi crescunt, tam cito te incolumem videamus, & victorem Auriacum. Quod interpretem te præbueris Veneris meæ Britannicæ apud Celsissimum Principem, est quod Tibi æternum debeam. gratiores sunt aulicis chirothecæ, quibus iridis pulverem adpersit artifex. gratiores quoque fuere versus mei, quibus tu scholiis tuis, velut myrothecio, fragrantiam addidisti. Cogita, mi Hugeni, grandi te munere functum, cum ista ludicra interpretaris. Est
quippe

quippe inter Deos Ἑρμῆς, [Mercurius,] inter-
 ores Deorum. Vivat Princeps in Musarum so-
 ciatum, & μέγα πένθος Ἰβήης. [magnum luctum
 Iberi.] Vivas & tu, qui Celsitudines facundia
 tua & exaggerationibus argento emungis in
 amicorum gratiam. Nobilissimus Vicofortius
 in Hagienſi agro habitat. Ego tanto amico or-
 batus erro, velut viduatus compare turtur, &
 Pylade Orestes. Commutavi jampridem cum
 filio tuo Constantino epistolae & versus. Obiit
 Trajecti ad Rhenum pictor celebris Iacobus
 de Gheyn, & vander Burghium nostrum per-
 ditum ivit legato octo mille florenorum. Gau-
 det simili beneficio soror vidua, exactissimæ
 matronæ exemplar. Eidem Gheynio hoc disti-
 chon meum suspenderunt in Trajectino templo
 amici :

Praxitelem Xeuxinque duplex discriminat urna,

Hic unâ Xeuxis Praxitelesque jacent:

Scripsit jampridem Parisiis Nobilissimus Stella
 ad D. Vicofortium, Eminentissimum Cardina-
 lem Richelium unice optare, ut versibus meis
 dici posset. Est is Stella in flagranti apud Ri-
 chelium gratia & mihi addictissimus, nuper le-
 gatione functus apud Brisacenses, nunc ad Hel-
 vetios missus, aut mittendus. Ego, ne videar
 deesse votis tam clari Ducis, meditor Pane-
 gyryn de ejus laudibus. Redeunt ad Te Epi-
 grammata tua doctissima & acutissima, quæ
 gradibus iterum distinxī, ut qualitates primas
 solent Phisici. Si malus fui censor, expecto,

ut

ut mihi accidat, quod Tiresiæ aut Marfyæ. De nova Poëmatum tuorum editione velim serio cogites, præsertim Epigrammatum, quibus salivam moves omnibus, adde & splenem. Erunt pro acetariis fastidientibus stomachis, & sunt inter illa plurima quæ Bilbilim obtundunt. Vale, nobilissimi Hugeni, & me, quod facis, amice constanter. Amstelod. 9 Jul. 1641.

425.

JOACHIMO VICOFORTIO.

DUm tu, mi Vicoforti, amœnitatibus prædii tui fruëris, ego absentia tui mulctor crudelissime. Quod malum nunc me coquit & versat sub pectore fixum. Quid agam? hæc Philosophiæ lex & vis est, posse frui, posse carere ad tempus amico. Concoquendus mihi fuit & est etiamnum acerbissimus viduitatis dolor: concoquam & hunc. Nec dubito, quin & tibi molestum sit, non accingi ense Vondeliano, quem me tibi esse finxit allegoricus & hyperbolicus poëta. Discam ego & assuescam ferre abitum tuum, qui ferre deberem obitum. Nec abes prorsus, quem præsentem, scribentem, jocantem, prandentem, mecum ambulantem animo circumfero. Nosti illud poëtæ magni:

Absens absentem auditque videtque.

Si oculis te non assequor, adsequar literis, quæ pro alis mihi erunt, quibus ad te transferar. Scribebat olim Tullius ad Quintum fratrem

Asiæ

Asiæ proconsulem : Cum tua lego , te audire ; cum ad te scribo , tecum loqui videor. Nescio an Athenis , an alibi fuerit Epicurus , cum ad amicum scriberet : sic fac omnia , tanquam spectet Epicurus. Certe in Campania erat Annæus Seneca , cum ad Lucilium in Sicilia degentem scribens , eum hortatur , ut secum studeat , secum cœnet , secum ambulet. Quod facere nec ille aliter quam animo potuit , nec ego facio. Nonne absentem Balbum in oculis gerebat Cicero , quamvis ille in Galliis sub Cæsare militaret ? Absentibus Evandro & Pallante , canit de Ænea Virgilius ,

— *Pallas Evander in ipsis*

Omnia sunt oculis.

Dicam & ego , Vicofortius hisce hæret adhuc absens oculis. Ruri habitas , sed ad aulam factus. In agris ambulas , sed Principum negotia curas. Viridariis delectaris , sed aliter , quam Tiberius suis Capreis. Honestas voluptates capis inter ruricolas Melibæos & Damœtas , quod & fecit Scipio Africanus princeps ille Romanus. Inter arborum quincunces & hortorum quadras & pulvillos incedis , quod & fecit in Tusculano suo Arpinas : ubi vel Philosophiam meditabatur , vel ob patriæ statum lætum tristemque gaudebat vel dolebat. Nec dubito , quin idem hoc facias tu : licet de philosophia suavius cogitare posses , me præsentem , cui ex hoc succo vivendum est. Amas illic videre armenta gregesque. Sed aut male ego calculum posui,

posui, aut amicum me videre malles, quam cornutas bestias. Simia illic gaudes, vel cercopitheco. Sed cave, ne osculantem te videat conjugem: nam imitari amat ingeniosissima bestiola, quidquid videt. Pavonem forte alis, avem visu pulchram, sed tartareâ voce horribilem. Piscinas tuas laudas: laudabo & ego ubi pisces esse licebit. Utinam illæ ostrea alerent, uti alebat in vivariis suis in Bajano littore dis Lucullus. Aves cantillantes audis, sed non cantillantem me, siue epos mihi pangere libeat, seu Lesbœum digitis tendere barbiton. Nutris gallinas & gallinarum pullos, quorum generatio debetur gallo. Utinam tu pullos aleres tuo de sanguine natos. Hoc futurum spero, quia columbis illic affluis, quæ tibi perpetuis osculis inspirant mollem per pectora amorem. Sed desinam suavissime nugari & joculari; quia nescio, an supercilium sumpseris ex Curia utriusque & tot aularum vicinia. Interea me & D. Satrapam expecta, ubi amicis tuis fratribusque litaveris. Væ cerasis tuis, væ pyris, væ pernis, quanta sumini erit ægritudo, quanta pestis larido, quanta piscibus tempestas, ubi venerit ad te famelicus Barlæus. Fac me participem rerum novarum, si placet, tribus verbis, præsertim quid judicent sapientiores de fatali hora deductionis Gennepæ. Vale, amicorum erectissime & candidissime, & summos viros D. Braffettum, & Boswellum saluta. Raptim Amstelod. 10 Jul. 1641.

426.

E I D E M.

Post longes errores terrâ fluminibusque, tandem solpes domi veni. Fui, ubi non fueram, vidi, quæ non videram, terras tetigi intactas hactenus, locutus fui cum Bructeris, Sicambris, & Drusianæ fossæ accolis. Steti iis locis, ubi Roma aquilas defixit, ubi Drusus, ubi Corbulo fossas fecere. Legi oram Vahalîs, & Tielam, Bommeliâ, Buram lustravi. Ne mirare tardius iter meum processisse. Accidit mihi, quod Vlyssî: incidi in Circen, in Cælypsion, in Polyphæum, in Læstrigonas, verum honestiore titulo. Nec defuit legata à latere, jam virgo, jam viri non inappetens vidua. Docui hos, num cælum stet immobile, num terra; quod elementorum quatuor maxime amoribus sit conveniens: ut creaturæ omnes æthereæ & sublunares amantium sint symbola & characteres: quomodo perdices, quomodo pisculi ament: an amor constet ex punctis indivisibilibus, an continuitatem amet: an suavius sit amare, an amari: osculari, an osculum pati: an amoribus aptior sit nobilis, an mercator, an theologus, an philosophus, an poëta. Quid decisum sit, non scribam, ne longior sit epistola, quam brevitâs commendat, præsertim cum iis scribendum est, quos aula moratur & publica responsa. Literas tuas domi meæ offendi, una cum Elogio Richelii, Hispanismum & Barbarismum

rismum redolente. Tu Haghæ dum exposcis
suppetias obsessæ urbi, frustra es, mi Vicoforti.
Nihil dicam amplius. Aut seipsam defendat
oportet, aut aliunde auxilia expectet, aut, quod
auguror, mutabit dominum. Sed quam male
rebus suis consulere Galli; quod obsidentes ob-
sessi jam sint, & recente victoria triumphum
canere prohibeantur. Verum nondum fabulæ
istius videmus catastrophem. Nescio an deli-
neationem hanc urbis Ariæ videris: tibi illam
habe, nisi jam habeas accuratiorem. Me vide-
bis, ubi trans pontum vectæ volucres tibi præ-
da esse volent & deliciæ. Laqueos para, quibus
illaquees insontes. Ego feriarum & otii satur
jam Palladi & Phœbo reddor. Tu, virorum &
amicorum selectissime salve & vale, cum thori
solia & amicis. Amstelod. ipsis Cal. Septemb.
1641.

427.

P E T R O C. H O O F T.

LEgi aliquando, Hoofdi præstantissime,
apud Theocritum:

Κωμάσω πότε τὴν Αμαρύλλιναν,
hoc est: *Abeo procatum ad Amaryllidem.*

Verum ego cras ὀρνιθεύσω πότε τὸν Φικοφόρον.
hoc est, *aucupatum abeo apud Vicofortium.* Re-
tiis & laqueis captabimus volucrum non unum
genus, quod Autumnus frigore primo, è Septen-
trione Austrum petit, & terras Meridionales
magis. Est, mi Hoofdi, capturæ ratio mul-
tiplex.

tiplex. Est hominum, est avium captura. Capie homo hominem suadâ, promissis, osculis, lucelli spe. Capie idem aviculas laqueis, retiis, visco, glauco, decipula. Ego retiis & laqueis rem omnem peragam, Romanorum Mirmillonum more, quorum alii, ut nosti, retiarii erant, alii laquearii, qui antagonistam vel laqueo vel retijaculo involvebant. Retia parabimus & casses fringillis, laqueos turdis. Si adesses, posset prætoria tua gravitas condolere miseræ exoticarum avium, aut captivis ignoscere. Sed non licet tibi jus extra territorium tuum dicere. laniationem hanc exercebimus sub Wassenariorum dominio. Si animus tibi sit excurrere in idem prædium, amplexabitur te Vicofortius & Vicofortia, cognati cognatum. Etiam de loquacibus turdis garriemus, iterantes illud:

Dulci turdile docte gutturillo

Asperas animi levare curas, &c.

Etiam de perdicibus, quæ superno solum volatu, sine contactu, concipiunt, testibus Plinio lib. 10, cap. 33. & Aristotele, quem prius nominasse debebam, lib. 5, cap. 5. Hoc cum aliquando accumbens narrarem viduæ Septentrionali, illa metuens, ne ejusdem essem indolis & facilitatis, longius sedem à me removit. Hodie librum hunc Trajectinæ Ogeliæ mihi misit, cui doctissimos & suavissimos versus inscripsit. Iam maximæ virginis nomine rogo, uti ab humanitate tua impetres lineolas aliquot, quibus librum hunc illustres. Irradia ingenio tuo pagellam,

gellam, qui orbem nostrum concussisti tragico pede. Malim sententiam aliquam rhythmis tuis diducas, quam ut in laudes modestissimæ virginis digrediaris. Debes hoc virtutibus maximi patris, Gubernatoris Trajecti ad Rhenum, qui difficillimus temporibus, tuo exemplo, Reipub. non defuit. Quid rerum agant Germani, Galli, Belgæ, ex fastis hebdomalibus intellexisti. His quod addam non habeo, nisi ut Te, cum uxore eximia, & liberis mellitissimis valere & salvere jubeam. Cras ad Colvense prædium abeo. Tu sequi velles non invitus, nisi uxorem duxisses, cui mos gerendus. Ego ἀνταρξατωρ [*nullius imperio subjectus*] sum, & sub solo Deo mei juris. Vale, & mane in Velsiano carcere. mihi libertas alas indulgit. Amstelod. 13 Sept. 1641.

428.

. . . B R A S S E R O.

*P*restantissime vir,

Cum nuperrime Haghæ essem, ostendi Tibi Epitaphium soceri tui, prout rudi illud Minerva delineaveram. Dein, ut mentem tuam propius cognovi, mutavi mutanda, & ea forma descripsi, ut vel saxo incidi, vel litteris conspiciuis in nigro marmore scribi possit. Si quid ultra vel addi, vel demi velis, significa, facilis erit correctio. A nimia affectatione & laudibus heterogeneis alienas esse oportet istiusmodi inscriptiones. Si illud in fine: *ruit irrevocabile fatum*, displicet; substitue: *Hæc meta laborum*. Excepisti

Excepisti nos nuper profuse : nec enim simplex ferculum , sed omnium ferculorum velut miscellam apposuisti, uti in Te non simplex virtus , sed omnes mixtæ habitant ; præcipue eæ , quæ ad civilem honestamque conversationem faciunt, quales Aristoteli sunt Comitas, Veracitas, Urbanitas. Non dedecent hæ eos , qui in luce Reipub. positi sunt , sed ornant maxime. Facit muneris autoritas ut venerabiles sint ; at dictæ virtutes , ut gratiosi sint & amabiles. Utrumque Tibi concessit benignior natura & educatio liberalis. Si quæ es modestiâ , laudes istas adversaris , testem habes Bataviam omnem, & inter Batavos me. Vale. 6 Oct. 1641.

429.

JOACHIMO VICOFORTIO.

Nobilissime Vicoforti, scriptor expeditissime ,
 Facestant viduæ , & illices istæ voces , quarum me cura nimis diu momordit. Tempus est , ut Sapientiæ monitis istam insipientiam jugulem, & quietem mihi imperem, quam oderunt istæ. Cum apud vos sum, in agris, sub Iove frigido , facile obliviscor istius sexus , quam tamen indigentia nostræ opitulari voluit prudentissima Natura. Verum cum in publicis theatris, & amicorum mensis latus forte claudolevibus violabile telis , redeo ad ingenium , & sentio me nondum ejurasse bonam mentem. Quid facias homini nec effæto nec fatuo ? ad fatum confugio , & quo illud trahet retrahetque

que sequemur. Est hoc desperantium sæpe solatium : cum prudentia deficit, Dis imputamus rem male gestam. Sed quam lætor tua ad nos remigratione. Adventas, priusquam venias, & crastinum illud vehementer amas. Quæ nova penultimis literis scripsisti, prælegi D. Satrapæ, aliisque. Panegyris magni Richelii sub prælo est, magnifico illam charactere excudet Blaeuvius. Habet effigiem Cardinalis æri incisam, quam præfigere vellet, cum hoc, quod subjunxi, tetrasticho. Cogita una cum amplissimo Brassetto, num digna tanto Principe breviter dixerim, & an probetis præmitti effigiem, nec ne. Etiam frontem Operis insignibus Cardinalis ligno incisis exornare instituit, nisi vos Trebatii dissentiat. Sed de his dabitur occasio disserendi, ubi ad nos reversus fueris. Quoties clarum mane fenestras intrat, videor mihi videre te ambulante per hortum, & summo colligentem studio suspensa è laqueis cadavera, & laceros turdorum artus. Interea, dum thori confors caligas pedibus aptat, & verum est illud Maronis : *Pone subit conjux*. Optarem Poëmatio meo inferi posse liberationem *Æræ*. sed vincit spem metus. An verum hoc : laxatos per universam Galliam carceres & ergastula, ut fervorum & perditorum hominum audacia succurratur obsessis ? Fecere hoc Romani, sed conclamatis rebus. Vale amicissime, & uxorem sororemque salutationis meæ aurulâ è longinquo involve. Amstelod. 14 Octob. 1641.

430.

E I D E M.

Q Uid hoc rei est , mi Vicoforti , quod tam operose & diserte ad me de Sue perscribas ? à cujus ego indole alienissimus sum. Nul- li prodest sus , nisi mortua : ego mortuus nulli prodero. Non callet vel Rhetoricam vel Poë- ticam sus : ego utramque mediocriter. Grun- nit sus , & luto gaudet : ego modulator , & Mu- sarum nitorem elegantiamque , etiam tuam , amo. Sus , si sursum adspicere cogatur , fileat , & ἄφω- vos [muta] redditur. Ego cum cœli convexa in- tueor , canere occipio , & suis creatorem dignis laudibus celebro. Illa sacra est Baccho , ut & capra , cujus vinetis nocent ambæ. Ego sacer sum Apollini , cui innoxios pango versiculos. An de sue loqueris , ut ob fœcunditatem ejus mihi exprobres liberorum frequentiam ? an ob suis lasciviam mihi exprobrare vis liberio- rem vocem de perdicibus , & gallinarum anserum- que comparatione ? An porcum mactasti , uti amicitiae nostræ fœdus hac hostia sancias ? me- mor istius Maronis :

Et cæsa jungebant fœdera porcâ.

An vis me de Epicureorum esse secta ? de qua Flaccus : Me pinguem & nitidum &c. An po- tius de Pythagoreorum ? qui animas voluptua- riorum ,

Suis immundæ pingues detrudit in artus ,
ut est apud Claudianum. Non vis , opinor , me

Arcadibus & Bœotiis annumerare, qui proverbio locum fecerunt ὅς βοιωτία. [*sus Bœotia.*] istiusmodi pecora non scribunt Panegyricos Cardinalibus. Sed video facile ex litteris tuis, quò tendas. Ad sinciput, & pernas me invitas: non abnuo. Modò non transformer in simile sinciput. Est enim indocile valde, nec elephanticas artes capit. Palæmon Grammaticus mordax doctissimum Varronem vocabat litterarum porcum, cum multa undecunque congereret sine delectu & iudicio. Talis haberi nolo. Itaque in pernīs malo exercere dentes meos, quam in sincipite: longius enim absunt à suilla fronte. Doleo sane porcā tuā caruisse uberibus, hoc est delicatissima sui parte. Nihil enim magis in deliciis erat Romanis fumine, hoc est, suis abdomine. Interdicta legi apud Plinium, censoriis legibus abdomina, testiculos, vulvas, & sincipitia verrina. Verum hæc leges, mi Vicoforti, non obligant fratres sociosque Imperii Romani. Pridie Cal. Decemb. nuptiarum suarum memoriam epulo celebrabit Satrapa Muydensis. Fac adsis cum conjuge, ne tanta felicitate excidatis ambo. Exspecto, ut nova perscribas de Gallia & Germania, postquam erudite satis de Gryllo philosophatus es. Vale, pectus amicissimum, & charissimam tuam Penelopen, cognatasque meis verbis suaviter saluta. Zulechemi Domino me totum offer, & dic Tragœdiam hic recitatam, authore vitriario, homine omnis litteraturæ & Græcæ & Latinæ ignaro, cu-

jus vix pudeat ipsum Sophoclem. Stupent mecum Hoofdius, Burghius, Vondelius, & quibuscunque vis est tanta dignoscendi. Amstelod. 10 Novemb. 1641.

431.

ARNOLDO VINNIO.

Non est, quod tam cupidè carmen meum expetas, doctissime Vinni. Non eget præcone Commentarius tuus, qui tibi & sibi ad laudem sufficit. In succum, ut ajunt, & sanguinem dudum convertisti omnem Iuris sapientiam, ut nihil nisi coctum elaboratumque à te expectemus. Cum superiore anno incidissem in paginas aliquot Operis tui, valde placebant illæ, quæ oculis tunc objiciebantur lineæ, non ob res solum bonas, verum ob sermonis, quo res enunciabas, elegantiam & nitorem. Quia tamen vis, ut qui herbæ parietariæ instar ubique ferè conspicior, me operi quoque tuo suffragari, en, habe quoque calculum meum. Scazonibus elocutus sum quæ occurrebant scribenti. Satur Epici carminis interdum ad alios modulos deflector. Nihil enim æquè cantori molestum, quam iisdem numeris canere, aut citharædo, quam eâdem chorda oberrare. Dixi ea, quæ ad Ius vestrum spectant & Iurisconsultos. Si rectè, benigne annue: sin minus, nec hoc dissimula. Parum enim refert, si præfigas operi, si malè ardenti foco subdas. Ego illud mercium genus susque deque habeo, cum nullis illas

las impensis à me non difficulter impetro. Vale,
 & si amicitiam nostram tibi minus gravem pu-
 tas, eâ fruiere sapius. Amstelod. 16 Novemb.
 1641.

432.

GERARDO NIENDALIO.

MOdò versiculos, modò lepores mittis,
 amicissime Niendali: diversa profecto
 munera; quorum alterum in Parnasso, alterum
 in agris natum: alterum lentis, alterum celer-
 rimis vadit pedibus. Prius illud à genio tuo est,
 qui dum causas dicit, & lites mortalium disce-
 ptat, cum Musis subinde congredi amat, &
 exosculari exsanguis Deas. Posterius à liberali-
 tate tua est, qua me serò amicum perpetuis of-
 ficiis beneficiisque obstringis. Lepus tuus ani-
 mal fuit cum viveret hirsutum, levipes, barba-
 tum, timidum, auritum. Hirsutum fecit natura,
 ne villosam vestem grandi precio sibi compara-
 re haberet. Levipes, ut hominum canumque
 crudelitatem & capitale odium pedum veloci-
 tate effugeret. Barbatum, ne barbati Stoici
 superbirent hoc decore: cum videant etiam
 non Philosophis barbam obtigisse. Timidum,
 quia insequentem hostem fugit, unde fugitivi in
 bello duces galeati lepores vocantur. Auritum,
 ut strepitum adventantis molossi percipiat tem-
 pestive, & aurium, velut alarum, ministerio aë-
 rem secet. Hoc peculiare habet, quod clausis
 palpebris vigilet, & apertis dormiat. Ecceun-
 dita-

ditatem leporum non aufferim tibi optare, ut qui singulis mensibus pariant. Satis bene tecum agitur, si quotannis te prole beet Lucina, uti nuper filiâ, quo nomine tibi & conjugii ex animo gratulor. Faxit Deus, ut castitate Penelopen, fide maritali Porciam aliquando referat. Vtroque jam sexu superbis, & domi numeras, qui & Procuratori tibi succedere, & uxoris puerperæ officio, ubi adoleverint, fungi poterunt. Sed redeo ad leporem, quem cum aliis amicis læti hilaresque discerpimus. Exspectas carmen de itinere nostro Gelrico, & quidem Belgicum. Verum scis me hâc lingua infantem, & balbutire. Vobis sermo iste magis cothurnatus est, mihi humilis & humi repens. Vale, Vir suavissime, & pro lepore eas accipe gratias, quas à plurium dentibus & palato expectes. Amstelod. 11 Decemb. 1641.

433.

CONSTANTINO HUGENIO.

LEgi, nobilissime Hugeni, syllogen Poëmatum, quibus Britanni Nuptiis Principis Batavi & Principis Britannicæ accinunt. Ignosce vera loquenti: miserum scriptum Pseudo-le. Non est olorum iste cantus, quibus Tamesis abundat, sed sturnorum, aut potius vespertilionum & noctuarum stridor. Nescio, quæ pestilens & maligna aura afflaverit Britanniam. Commissæ sunt domus magnæ. Tumultuantur cives, Aaronem & ordinis sacri capita calcat pro-

fanum vulgus , Parmeniorum suum trucidari finit Alexander , & super hæc nugantur & ineptiunt in re seria poetæ. Certè diviniore œstro hic vitriarius noster , homo illiteratus , tragœdiam scripsit, ficti licet argumenti. Recitata est sæpius , nec adhuc saturari auditor potest. Ego audiui septies , præter morem meum , qui istis actibus non nisi semel aures commodo. Audiuit, me hortante , Hoofdius , & stupuit. Audiuit vander Burchius , & hæsit attonitus. Audiuit Vondelius , & portentosi ingenii virum dixit. Verbis loquitur quibus Zulechemus, Dominus Satrapa , Vondeliusque loquuntur , & scribunt. Sententia graves sunt & densæ & plane *πρὸς δίκνυσον*. [*ad rem.*] Nullam habet tota antiquitas Tragœdiam magis tragicam. Et fortè ob hoc unum frontem corruget rigido censori, quod nimis tragica sit. Interim duos Tragœdiæ partes mirificè explet , *τὸ ἠθικὸν* [*mores*] & *τὸ παθηλικὸν*. [*affectus.*] Totam tragœdiam , prout recitata est , memoria circumtulit per semestre, postea dictavit. Tragœdias nostratium, etiam scripta tua omnia ad unguem callet & recitat. Digna est , quam vel audias coram, vel legas , est enim sub prælo. Vbi huc veneris , pulsabit in tui gratiam orchestram Andronicus , præcipuum Tragœdiæ drama. Ego versiculos aliquot Belgicos illi scripsi , ut quid de authore & opere sentiam, publicè testarer. Illos mitto , ut credas me Latinos felicius scribere. Accipe Panegyrim meam de laudibus Eminentissimi Riche-

chellii, quam per ferias Caniculares Haghæ, Poelgeestæ & Ultrajecti scripsi. Vnum exemplar tibi habe, alia duo filiis inscripsi. Vale, Vir summe, & me venæ tuæ & tot suavissimorum carminum quæ mihi impertis admiratorem perpetuum ama. Raptim 15 Decemb. 1641. De Tragœdia judica ex choris, quos mitto, ut salivam tibi moveam.

434.

TILEMANNO STELLÆ.

Accipe, Vir nobilissime, Panegyricum de Eminentissimi Cardinalis Richellii laudibus. Voluisssem illum à Te offerri potuisse: verum cum intellexissem Te adhuc in Sabaudis morari, misi illum per Regis Christianissimi Legatum, D. Thuillerium. Tuam Panegyrim plenam majestatis & sententiarum, quibus firman-
tur imperia, perlegi, & pro paradiigmate habui. Verum quæ Tu soluta oratione exequutus es magnifice, ego stricta oratione minus graviter videor eadem elocutus: & tamen cum hæc scriberem, incalui subinde, & sensi me sublimius raptum admiratione virtutum, & rerum gestarum tanti Principis. Si Parisiis esses, posses levare tuâ suffragatione conatus nostros, quod cum fieri jam per te non possit, sufficiet malè natum foetum exposuisse. Fortè propitium invenient Musæ illum ipsum Principem, cui Poë-
mation inscripsi. Interea reficit me recordatio suavissima convictus tui, & sermonum, quos,
ali-

aliquando à nobilissimo Vicofortio excepti ,
 amice commutavimus. Nec despero futurum ,
 quin aliquando dexteras juncturi simus, & con-
 fabulaturi de rebus publicis & studiis , quæ non
 minus ad regnorum decus roburque facere pu-
 to, quam arma & lituos. Vale , & me Tui cul-
 torem iis inferere , quos non remissè amas. Am-
 stelod. 10 Ianuar. 1642.

435.

GERARDO NIENDALIO.

O *Rnatissime Vir & amicissime Niendali ,*
 Priores tuæ literæ de Cardinali , liberis
 tuis, vidua, focero tuo , fratre , versibus tuis &
 vitriarii tragœdia loquuntur. Misces summa
 imis , sacra profanis , sanos ægrotis , uti in epi-
 stolis ad amicos fieri solet. Quæ de Cardinali
 scripsi , maxima esse putas , quia talia esse oport-
 erat , licet infra tanti Principis virtutes longè
 subsidant. A liberis tuis gratiarum actionem
 expectabo , ubi desierint esse infantes. Quod
 ubi concedent fata , ego puerorum gratitudine,
 tu pater superstitum frueris dulcedine. Quæ de
 vidua ista eximiâ scribis, jam ante percepi. Sci-
 mus & hæc nobis non altius inferet Ammon.
 Verum de Diis, & Principibus & viduis par-
 cius per literas philosophandum. Socerum
 tuum meliusculè se habere gaudeo. Faxit Deus,
 ut recuperata valetudine , pari qua antehac fa-
 cundia, apud populum diu loquatur. Perge fra-
 trem monere , ut poëmata sua colligat & edat.
 Vbi

Vbi carceres mordebit editio, ego Epigramma ipsi scribam. Versus tui Belgici ejus sunt indolis, ut filias meas magis afficiant, quam me canescentem jam, & Veneris ore loqui desuetum. Amant crepundia & pupulas pueri innuptæque puellæ. Ego, qua sum (credis?) gravitate, nil nisi quod Professore & Philosophum deceat, spiro & loquor. Vitriarii tragœdia maximam optimo viro invidiam creavit. Solet illa res magnas comitari, non inepta vilissimaque commenta. Posteriores tuæ literæ petunt, ut censura dstringam Epigramma scriptum D. Zutphenio. nimis, mi Niendali, timidus es. Omnia benè se habent, dispositio, syllabarum quantitates, aliaque. Me judice ita excudi poterit. sed audi. Tu in carmine talem te præstas, qualem in tragœdia se præstitit vitriarius. Ambo supra captum vestrum, aut potius vitæ genus scribitis, tu procuratore erectiora, ille vitriario. Nisi candorem tuum nossem, auderem suspicari, illa ad Zutphenium scripta, fratris tui calamo exarata aut expolita esse. Vale amicissime, & uxorem, liberos focerumque, etiam amplissimum D. Stratenum & D. Petitiū saluta. Amstelod. 16 Jan. 1642.

436.

IOACHIMO VICOFORTIO.

LEgi, dilectissime Vicoforti, fastos tuos & rerum gestarum hic illic periochas, quas Satrapæ Muydensi misisti. Totam Europam
peram-

perambulas, & Regum Principumque fata prospera adversaque disertâ oratione enarras. D. Satrapa ex iis quid fugere, quid imitari habeant populi rectores, politicorum more, colligit. Ego supra versiculos meos & poëtarum commenta nec sapio, nec sapere cupio. Quin hanc maximam sapientiam puto, quæ aliena est à strepitu, à cædibus & innocentum injuria. Tu aulæ propior alia agis & cogitas. Ita cicadæ rore, apes melle, chamæleon aëre aurulaque pascitur. Non eadem omnes appetimus, aut fugimus. Nec eosdem planetas rectores habemus. Tibi imperat Iupiter inter Deorum cœtus vivere suctus. Mihi, ut verum fatear, imperat Luna, quia cum lunaticis viduis fabulari amo, & vultus earum intueri, nunc ecclypticos, nunc pleno fractoque lumine fulgentes. Tales sunt matronæ istæ inopes viri sociique cubilis. Sed quid super his apud Te nugor, cum cæsos exercitus, captum Lamboyum & triumphantes Wimarios audiam. Divident hujus victoriæ laudem commodaque Celtæ & Catthi. Ego illam magni æstimo cum Archiepiscopatus Colonienfis pateat Gallis, nec metus sit, ne Hispano cohortes istæ primo vere in suppetias veniant. Etiam humiliores hac clade erunt Aquilæ, & prouiores ad pacis studia. Rediit domum classis, quam Lusitanis in auxilium miserant Potentissimi Ordines. Nihil gessit, præterquam quod Tagum viderit pro Vahali & Mosa. Sed quando huc iter parat Zulechemi Dominus? ad Gratiarum con-

onventum, de quo meliora mihi promitto, quam de pacificatoribus Westphalis. Noli abesse. Litabimus hilaritati & Tethalicas artes adhibebimus, ad incantandos animos eorum, qui mansuescere, nisi cantu, nequeunt. Urbis huius pomceria deducuntur in Yam, & latius habitabitur ad fluenti ripam. Desidero scire an Poëna meum in Galliam pervenerit, an mari absorptum perierit. Legent illud Najades, si non possunt Druidæ. Vale, Vir nobilissime, & Zuechemi Dominum, D. Brasettum aliosque amicos officiose saluta. Amstelod. 25 Ianuar. 1642.

437.

IOANNI SCOTO-TARVATIO.

M *Agnosce Vir,*
Itane ad animum revocas, quod ante annos aliquot præluferim Scotorum Poëtis, quos singulari erga humaniores litteras adfectu lucem adspicere voluisti, ut à nobis legerentur supra Thylen scripta. Familiare hoc mihi est titulis librorum subjungi, & præcinere aliorum operibus. Tibi probari quantivis puto, qui non publica solum curas, verum etiam in Musarum adyta penetras, & postquam cum Themys & Astræa locutus es, etiam Apollini & Musis vacas, aut earum cultores in tutelam recipis. Exigui momenti officium est, quod præstiti lubens. Illud majoris apud me est, quod studium meum tam levi Tibi beneficio probaverim, qui majora à me exigendi jus arbitriumque habes.

Mitto

Mitto poëmatum meorum & orationum opuscula, neque enim ignoro novitate sua placere exteris ea, quæ transmarini hic vates scribimus. Major utique eorum quæ è longinquo adferuntur reverentia est, quantumvis illa mediocria sint, nec ad Scotorum palatum, qui uti polis proximiores sunt, ita in acumina desinunt, & circa se, velut axem, verti adspectant vicinarum gentium ingenia judiciaque. Lege ubi Regni cura otium fecerit: sin minus, pro derelictis habe, quas mitto chartas, nec enim iis Regum Principumque indulta enarrantur. Potes utique sine grandi jactura his Belgarum commentis carere. Interea pectus hoc Tibi addictissimum trans vastos pelagi fluctus, montes sylvasque Tibi, ceu proprium mancipio. Dum Scotos tuos amas, etiam me Batavum amplectere. Poëtarum tellus ubique est, quia materiam carminis ubique venantur, & quia communis & occulta est inter vates adfinitas, facile pretium aliquod sui foris reperiunt. Vale. Amstelod. 20 Febr. 1642.

438.

CORNELIO VANDER MYLE.

BInas à Te, nobilissime Myli, literas accepi. quarum priores de Archidiacono, posteriores de Cardinali loquuntur. Hæ tanto gratiores, quanto gratiora scribunt. Bonifacium meis verbis reverenter & officiosè saluta. Iungit vir maximus me Salmasio, hoc est viburnum

cu

cupresso. Ostendisse debebat quantum dissimiles simus, non quantum similes. Impar congressus Achillei. Sed demus hoc σφάλμα [erratum] tanti viri erga me amoris & sincero affectui. In laudibus amicorum nimis si itur contra veritatem, non itur contra charitatem. Panegyricum dictum Eminentissimo Cardinali misit in Gallias, cum suis & meis literis, illustrissimus D. Thuillirius, Regis Christianissimi apud Federati Belgii Ordines Legatus. Verum quo animo sacra illa Eminentia illum acceperit, nondum mihi constat. A Legato habendum, si quid super hac re eveniat. Ut fictum prorsus putem, aut ab amicorum affectu profectum, illud commentum de Honorario. Nihil mihi in hunc usque diem de tam magnifica benignitate constat. Et fortè non vacat Cardinalibus legere versus, dum legunt & conscribunt exercitus. Sed quis ille vir non infimi nominis, qui ista affirmat? aut cujus fide? Legit Poëma meum illustrissimus Grotius, & hæc scribit: *Legi, quæ soleo tua omnia, cum voluptate atque etiam admiratione, Panegyricum dictum Eminentissimo Cardinali & Ducum Illustrissimo. Multi jam se in tam benigna materia exercere. Nemo majore spiritu. Plane ut ille vir magnus, nec cuilibet dicendus hanc demum agniturus sit sui imaginem veriorcm, quam illa est satis feliciter facta partis in oculos venientis, quæ Poë-matis tui accessio est. Satis tua te opera monstrabunt: sed tamen mea etiam tibi præconia non deerunt, &c.*

Vale Vir nobilissime & præstantissime, cum

Pars II.

Y

Do-

Domina Mylia & Filio, quem ubi feret occasio
à me saluta. Amstelod: 7 Mart. 1642.

439.

IOACHIMO VICOFORTIO.

Gratias tibi maximas ago, nobilissime Vi-
coforti, quod chartas illas polemicas mihi
transmiseris. Legi ea aviditate, quâ recens ad-
vecta ostrea solemus vorare. Verum, ignosce
falso, non tanti apud me sunt Formæ substan-
tiales aut essentielles, ut jam tempestivum putem
aperire sententiam. Scis, nec eum me esse, qui
Aristotelem inauditum damnare possim, nec
eum quoque qui in verba ejus juraverim. Ha-
beo quædam dicenda ad sententiam doctissimi
Cartesii, sed dicam, ubi erit opportunum, &
plura planiusque locutus fuerit. Statim ab abi-
tu tuo tribus me viduis expedivi. Excessere om-
nes adytis. In Tesselæ ocellum sinistrum scripsi
querelam, vestro hortatu. Ubi legeris, da Zu-
lechemi Domino. Placuit Satrapæ. Ejus le-
ctionem noli invidere D. Brasetto, & si res ita
feret D. Catsio. Vale, amicorum integerrime,
& uxorem lectissimam saluta. Amstel. 10 Mar-
tii, 1642.

440.

ERYCIO PUTEANO.

Qui eruditam juventutem sæpe litteris meis
prosecutus sum, Vir clarissime, jam ma-
tronam ingenii & Poëseos famâ apud Batavos
cele-

celebrem Tibi commendo. Nihil petit, nisi ut
alloquio, hoc est, ipso Romanæ facundiæ ore
rui possit, dum Lovanii est. Scis aquilas so-
is conspectum ferre; etiam hæc doctissimo-
rum virorum in Belgio vultibus se intrepida of-
fert. Nam & ea loqui potest, quæ à doctrina
& humanioribus litteris aliena non sunt, & ea
scribere, quæ sexum anteveniunt. Inclaruit hic
apud nos multis retro annis Belgica poësi, gra-
a maximis Patriæ viris, quos nominis & erudi-
tionis fama eruditiorum vulgo secrevit. Est illi
oror, Tessela dicta, quæ Poëma Belgicum pan-
git in summorum Poëtarum invidiam. Huic no-
men est Annæ Roemerix. Pater argutissimi in-
genii vir plurima edidit Epigrammata sensus
cutissimi, ad exemplum Bilbilici poëtæ, ut non
no nomine favore tuo digna videatur. Gestit
la Arcem tuam, Grudiorum nempe Heliconæ
onscendere, ut ingenii sui monumentum ali-
quod ejusdem Arcis laudatione apud Te depo-
at. Religionis vestræ est, filiosque duos disci-
linæ Iesuitarum apud Vos commisit. Illi jam
d Academiam adspirant, & propediem demit-
endi è trivio. Quidquid officiorum præstiteris
audatissimæ matronæ, mihi præstitum putabo,
& humanitatem tuam diffundes in plures, apud
uos illa in pretio est. Panegyricum Richelii è
manu ejus accipe. Non dubito, quin vos etiam
irtutem in hosce sitis laudaturi. Vale, & me
odem quo bonos soles adfectu involve. Am-
elod. 4 Apr. 1642.

CONSTANTINO HUGENIO.

Nobilissime Hugeni ,
 Fasciculum Epigrammatum tuorum tra-
 didit mihi Muydensis Satrapa, quorum alia La-
 tio , alia nostro sermone effers. Perinde enim
 Tibi est quâ me lingua exerceas , dummodo lo-
 quacitatem meam provoces , & muto dudum
 extorqueas vocem. Quæ Belgicè lusisti in Da-
 masippum pictorem , pastilli nobis sunt & offu-
 læ melle soporatae , licet pictori cicuta sint al-
 liumque. Illud in Iohannem Vos, vitriarium no-
 strum, planè ad palatum meum est, & ipso vitro
 pellucidius. Illis versibus elatior

— *pedibus per summa volaret.*

Culmina, nec teneras plantâ contingat aristas.

Dignus est honorum amore , ob egregias natu-
 ræ dotes , quas si arte expolivisset , invidendus
 esset seculo. Comœdiam joculari scripsit ,
 quæ sub proelo est , tam densa facetiis & è me-
 dia plebe petitis salibus , quàm tragœdia gravi-
 ter dictis. Tessellæ nisi tetrastichon tuum. re-
 spondet tetrasticho parisyllabico , nec inelegan-
 ti. Etiam viduis sua bilis inest. Epigrammata
 reliqua , nisi à Te profecta scirem , imputarem
 prioribus seculis. Elaboratissimum illud est in
 Reginæ adventum. Nec Patrem secutus infe-
 liciter fuit filius, ubi scribit :

*Puduit quoque frigoris Orbem
 Dum calet Auriacus.*

Ego

Ego heroïcos aliquot deproperavi, quos aliâ occasione depromam :

*Altera jam nostris mater Bercynthia terris
Cernitur, & Regum præbent spectacula nuptæ.
Nil facimus vulgare. Deas nataſque Deorum
Excipimus. ſurgant Batavis clariffima mundi
Lumina, ſceptrifero rurfum ſplendefcimus oſtro,
Purpuraque imperiis ſe bellatricibus offert &c.*

Sculptitur hic effigies Elizabethæ Principis Bohemiæ. In eam hæc luſi :

*Fortunæ domitrix, anguſti maxima Regis
Filia, Palladii grandis alumna chori.
Naturæ labor, hoc vultu ſpectatur ELIZA,
Et faciem fati vim ſuperantis habet.
Exulat, & terras quas nunc ſibi vendicat Iſter,
Iure, patrocínio, ſpe putat eſſe ſuas.
Si patriis Cæſar titulis ſuccenſuit: illud
Frangere debebat Cæſaris arma caput.*

Vale, Hugeni præſtantiffime, & ubi militem ex hybernis exciveris, ipſe ex hybernis prodi, & in Muydenſi Te arce, vel hic Apollinem, aut Parlamenti futuri præſidem, ſiſte. Filiis meis verbis bene precare. Amſtelod. 6 Apr. 1642.

442.

Clariffimo ac eruditiffimo viro,

G A S P A R I B A R L Æ O, S. P.

Heroicum carmen tuum accepi, legi, perlegi. eo gratius fuit, quod veluti miraculo factum eſt, ut dum Panegyricum meum ad me miſeris, tuum à te acceperim. Laudantis ſal-

tem & laudati Panegyricus est libellus tuus. Dum, quæ nobis tribuuntur, gesta extollis, ingenii tui acumen & industriam exhibes, eruditionem tuam prodis. Sic tibi met ipsi gratias debes, sed non solus, referam pro utroque & merito. cum tuo factum sit beneficio, ut majorem tui quam mei curam habere tenear. Religiose id me præstiturum agnosces, si res locustue dabunt.

P. S. *Versibus tuis qualis esse debeam Orbi Christiano palam fecisti. Eclypum meum ad te mitto, ut te doceat, qualis sim. Si in eo affectum erga te meum non cernis, agnosces, si usui unquam tibi esse possim.*

ARMANDUS Card. de Richelieu.

Datum Parisiis 8 Kal. Febr. 1642.

443.

Eminentissimo Cardinali

ARMANDO IOHANNI PLESSIA CO,

Richelii Duci, Franciæ Pari,

C. B A R L Æ V S S. P. D.

Litteras Tuas, Eminentissime Cardinalis, ad me datas 8 Cal. Febr. accepi 4 Calend. Maji. quod noto, ne festinam Tuam liberalitatem videatur excepiisse tardior mea gratitudo. Antehac solo adfectu & illustri Tuæ famæ cymbalo excitus Panegyricum scripsi. Nunc, grandi insuper beneficio Eminentiae Tuæ obnoxius, gratiarum actionem molior. Cum manus Tuæ veneranda lineamenta cernerem, erubui,

bui, Celsissime Princeps, & sortis meæ sphæram excessisse mihi visus fui. Nec mirum, ruboris materiam dari, quem irradiat fulgidissima Europæi Orbis purpura. Primus (loquor ingenuè) umbraticum doctorem nominis Tui majestate adeo involvisti, ut jam domi apud meos splendescere Tuo lumine incipiam. Cujus nulum nisi à paupere Musa fuit precium; jam à Tuo, optime Cardinalis, alloquio est maximum. Iis in epistola me vocibus affaris, quibus humaniores ne ab ipso quidem Iove expectem. Ea mittis, quæ supra Poëtarum sunt fortunam. Cum imaginem Tui adspecto; omnium quas in Principe requiras virtutum ideam contemplor, & Regis Christianissimi fidelissimum Nestora, Galliarum Atlantem, eruditorum omnium patrem decusque in oculis habeo. Non Eminentiaæ Tuæ solum ectypum mihi mittis, sed & clementiaæ: non dignitatis solum & honoris Tui characterem, sed & Tuæ erga me benignitatis & amoris. Adamantini fulgores, dum luminum meorum aciem præstringunt, Tuæ magnificentiaæ totidem fulgura exhibent, quot lapillos. Phœnicem intueor, Principis tot Cardinalium Ducumque, ut ego interpretor, hieroglyphicum. Circumpositæ urbes, castella, prætoria, aut victoriarum tuarum monumenta esse crediderim, aut securitatis publicæ privataeque munimenta. Quæ in oris fulgidi monilis spectantur naves bellicæ & veliferæ arces, Thalassiarchi sunt insignia, & maris Gallici, cui impe-

ras, præsidia. Ago gratias, Celsissime Dux, verum sentiendo copiosius, quam loquendo. Si Iupiter essem, mirabilem metamorphosin aggrederer. Singulis illis adamantibus largirer linguam, & eam facundiam, quâ & debiti mei magnitudinem, & muneris Tui excellentiam eloqui quisque, digna oratione posset. Ne credas me terminum egredi tanta profitendi, cum Tua Eminentia terminum egressa videatur me honorandi. Coëunt facilitas Tua & felicitas mea, utraque merito meo major. Majus loquar. Si secerni posset ab instituto meo ambitionis & gloriolæ, qua vexamur Poëtæ, suspicio; illas ipsas Tuas litteras in omnibus portibus & urbis nostræ amplissimæ portis, instar publici edicti, pendere mandavero, & tot mihi statuas erectas imaginatione contenderem, quot in Epistola Tua acuuntur periodi, stant voces, currunt lineæ. Omnium largitionum Tuarum pondus istâ apud me superasti: cum non præsentis solummodo Tui favoris, sed etiam futuri, cum res feret, præter spem, fidem faciat. Itero atque itero gratias, quin etiam referre cupe-rem, nisi à Deorum & Principum gloria alienum scirem, mutuum à mortalibus accipere. Nec possum non referre illud, quod passi semper sunt referri sibi Superi Principesque, nempe Carminis Eucharistici ἀντιδωρον, [*remunerationem*,] ut quod libera oratione non possum, vincula & catenata felicius exequar, memor catenarum, quibus me, Eminentissime Cardina-
lis,

lis, æternum devinxisti. Vale, Princeps meriti-
tissime. Deus Opt. Max. valetudinem, quam
afflictam fuisse toti Galliæ condolui, etiam meis
precibus ac votis, si qua Deum tangit pietas, &
gratia vatum, Eminentia Tua restituat, & resti-
tutam diu conservet. Amstel. 4 Id. Maji, 1642.

444.

TILEMANNO STELLÆ.

Nobilissime Domine,
Quam provide me superiore æstate per
litteras monuisti, ut aliquid in laudes Eminentis-
simi Cardinalis meditarer. Prævidisse siquidem
videris, uti gratiam maximi Ducis illa res mihi
conciliaret. Feci ego id perlubenter, nec scio
me majore animi alacritate scripsisse quidquam,
cum convictam circumferrem de maximi Du-
cis virtutibus, quas universus orbis stupet, con-
scientiam. Laudare eos, quorum virtutes an-
gustæ sunt, ingenuæ menti perquam est diffici-
le. Verum ubi virtutum campus latè patet, luxu-
riatur poëta, & dicendis rebus magnis, quas
voces non invenit facit: & dum panegyristam
agit, & laudationi illustrium virorum incum-
bit, similis videtur suo argumento, siue iis quos
laudat; si verum, quod Aristoteles ait: Intel-
lectum fieri omne illud quod cogitat. Verum
nescio quo fato contigerit, ut dum maximi
Principis encomium molior, in tuum incide-
rim Panegyricum, quo syllabum prætexis Car-
dinalium virtutum. Præstitisti Stella stellæ offi-
cium

cium, & veluti hæc errabundis viam monstrat,
qua eundum, ita Tua Panegyris instar fili Ariad-
næi fuit, quod sequeretur. Et videor, Te iudice,
non omnino infeliciter exequutus, quod facere
intenderam. Gratulor utique mihi tali censore
& benigno interprete, qui gratia & authorita-
te vales apud θαυμάσιον [*admirandum*] illum.
Tu, mi Stella, igniculos favoris Cardinalitii
erga me suscita, & cum faciles erunt aditus, to-
tum me Eminentissimo Cardinali offer, quo
Duce ausim me tollere humo, vatesque ducum
volitare per aulas. Iis me honoribus dignatus
est, ut effigiem suam cum cimelio transmiserit,
additis litteris humaniter, prudenter, heroice
scriptis. Ego primam ineundæ Tecum amici-
tiæ apud Nobilissimum Vicofortium occasio-
nem majoris facio, quam Hispaniarum Rex
apertas Novi orbis terras. Fruar hac felicitate,
& futurum spero, uti cujus benevolentiam
mihi conciliasti, ejus benevolentiam constantiam
perpetuitatemque possim meo aliquo merito
& Tua intercessione promereri. Vale, Nobi-
lissime vir, & amicorum lectissime. Utinam
supra horizontem Batavorum stares stella, suspi-
cerem te, uti alterum ex fratribus Helenæ.
Amstelod. 24 Maji, 1642.

445.

JOHANNI SCOTO-TARVATIO.

M *Agnosce Vir,*
Abunde mihi satisfactum putassem, si
litte-

litteras litteris redemissem. Nunc & loqui litteras, & ob adjunctum munus tinnire facis. Potuisset sanè mihi suffecisse tanti amici recens conciliatio. Nunc etiam me iis intricas nominibus, quibus me expedire propter ingenii paupertatem non possum. Deos imitaris, qui inferiorum reverentiam submissionemque beneficentia compensant. Solent ex Septentrione procellæ tempestatesque in terras hæc magis australes incumbere. Verum, Tuo beneficio,

Optima tempestas ex Aquilone venit.

Scilicet vis Tuæ erga me benevolentiae pignus aliquod oculis meis obversari, ut cum illud intueor, virtutes tuas illustres, prudentiam, fidem publicam, erga litteratos amorem animo revolvam. Est sibi poësis pretium, ut & virtus. Præter honestam de studiis & bonorum existimationem nihil poscimus ultra. Si qui pretium intendant, ab ipsorum benignitate est & magnificentia. Videtur affectus inumbrasse Te, ut majora tibi, velut refractis iudicii tui radiis, nostra appareant, quam sunt. Iam contentus ero verbis egisse gratias, verum tempus erit,

— *quo totum laxabo in carmina Phœbum,*
Et tibi Pieridum saltus, Tenedonque, Claronque,
Et Pataram, grandemque tuis Heliconæ recludam
Officiis, Scotusque mihi Tarvasius amnes
Castalios, & Pimpleas exhauriat undas.

Salina duo apud nos deposuit Wallasius mercator, quorum alterum candoris tui, alterum sapientiæ erit monumentum: utrumque ad natu-
 ram

ram salis, quod & candore commendatur, & Sapientiæ, quâ condiri oportet hominum consilia, hieroglyphicum est. Mediceam Hospitem benigno vultu excipe, & si minus apta Regiæ Majestati dixi, crede hominem de Diis verba fecisse. Quæ vobis sacra sunt nomina, etiam ob federis communis religionem nobis verenda sunt & veneranda. Vale, Amstelod. 6 Jul. 1642.

446.

IACOBO VANDER BURGH.

Accipe Propempticon, Vir amplissime, & veteri mihi amicitia juncte. Debui hoc tuis virtutibus & meritis. qui in mei gratiam sæpius Heliconæ concussisti, dignus es, quem pari officio discedentem prosequar. Ad eam dignitatem proventus es, quæ ad majora tibi iter sternet. Eo loco resides, quo & Belgis tuis & vicinis Gallis operam tuam commodare potes, ut hinc inde inclarescas. Non dubito, quin reperturus sis Leodii inter Canonicos complures, quibus ingenii tui amœnitates & mores suavissimos sis probaturus. Hoc si fiet, non valde grave erit è natali solo decessisse. Reverendissimum Muffonii Abbatem velim tibi concilies, non solum ob eruditionem, sed & prudentiam & rerum civilium, præsertim quæ Gallos & nos & Eburones attinent, peritissimum. Scribitur mihi Ducem Bullionem Casalix Regis jussu detineri, ob communiacum Deffiato consilia. Ducissam (memorem fortè illius Maronis :

Furens

Furens quid femina possit,

Sedanum Lotharingiæ Ducis militi aperuisse. Harcourtium cum exercitu eo contendere, ut & Franciscum de Melo. Si ad manus deveniatur, metuo Gallis tyronibus. Meministi istius Fabii Cunctatoris: *cum hoste victore non esse pugnandum.* In litteris tuis ad vitricum scribis de honorario, quibus verbis offensus decreveram nihil scribere; verum decussit bilem sororis tuæ facilitas, & gratioſa comitas. Nihil à privatis amicis petii unquam, vel exspectavi. Si Regum, Principumque subinde benevolentia inaurer, hoc ſcias, nec à me exempla ista cepisse, nec debere Poëtas quidquam Regibus ingratis. Ita statuas, quidquid ad me missurus es, redibit ad te id omne. noli offendere amicum, nec sinistre de eo judicare, qui nimio fortè candore tibi probare se cupit, & probavit hætenus. Unum tamen efflagito, ut mihi Leodiensis casei particulam mittas, quo vehementer delector. hoc si impetravero, redemisti abunde Musarum labores. Vale. 15 Jul. 1642.

447.

IACOBO PETITIO.

Quidquid aliunde ad nos venit munerum, Orbis particula sunt: Tu totos orbes mittis, ut tanto habearis magnificentior. Quin & mobiles mittis, hoc est, Copernicanos, non immobiles, quales sunt Ptolemaici. Adhæc lacteos mittis, non cruentos sanguineosque, qualis

lis est hodie, proh dolor, Orbis Europæus. Ut non uno nomine perplacere tui debeant, potissimum hoc, quod cum Orbis Orbem voret, vetus novum, novus veterem; tui orbes nulli graves ac molesti devorari se patiantur à famelicis, & in succum sanguinemque converti. Si mihi fundus esset & ager, etiam tibi ad mulctralia venirent vaccæ. Nunc gratias tibi agere verbis contentus sum, quia verborum mihi plus, quam agrorum, atramenti plus, quam candidi lactis superest. Interfui superiore hebdomade nuptiis D. Iacobi Bickæri feri amatoris. Filiæ meæ jam se adornant ad iter, & te tanti itineris ducem expectant. Vbi ad vos venerit clarissimus Sylvius, volo cum illo diem unum alterumque fallere. Sed hæc ex futurorum contingentium numero sunt, de quibus nihil determinat Philosophus. Ajunt à vestris in Indiæ oris ereptam Lusitanis navem onerariam: rapina ditescat, an mercatura nullo discrimine habet, qui iuste pugnat. Vale.
30 Junii, 1642.

448.

T I L E M A N N O S T E L L Æ.

M *Agnosce Vir,*
Dum per ferias hæc Caniculares Hagæ Comitum apud nobilissimum Vicofortium diverto, afferuntur commode tuæ ad ipsum literæ, quibus dum perscribis publica, etiam privati tui erga me amoris lineas aliquot ducis
valde

valde emphaticas. Nec enim contentus honeste de meis versibus sensisse & locutus esse, illud porro agis, ut me Eminentissimi Cardinalis favori insinues, & Principem erga me beneficum & munificum reddas, quem me versibus dicis populo secrevisse. Nec linam ego unquam, ut lateant tanti Principis decora, & virtutum ejus solis invidenda hostibus fulgura, quibus uti Patriæ suæ nebulas & tempestates discutit, etiam devotas humanitatis studiis animas domi forisque promovet. Et eris, Tu mihi Stella, propediem pro argumento novi furoris. Aut enim tuam illam erga me animi singularem propensionem eloquar publice, aut iratum mihi Apollinem & averfas Musas suspicabor. Extulit olim Deus Hebræum fratrem, ut prodesset fratribus: Fortè Te extulit in Galliis, ut prodesse absentis amico. Ego Tui in me adfectus notam tanti facio, ut mihi optem vim eloquendi hæc ipsa pro neritis & referendi. Quod dum non possum, truar tacitus officii conscientiam, & hoc agam, ut Te norint, quotquot fidem, eruditionem, facundiam, quibus Eminentissimo Duci places, sacra habent. Vale, & mihi apud Ducem esse velis, quod fuit Virgilio & Horatio apud Augustum Pollio, apud Gratianum Ausonio Paulinus.

449.

REINERO NEUHUSIO.

PErgis, doctissime Neuhusi, bene mereri de
juventute. Nuper Poëtam egisti, & quæ in
Parnasso somniasti vates publici juris fecisti.
Placere hæc ob facilitatem & perspicuitatem,
quæ duo uti in pluribus hujus seculi poëtis me-
rito desideres, ita in tuo versu apparent maxime.
Saxa & lapides loqui infra laudem boni Poëtæ
est, uti & tenebris involvere veritatem aper-
tam. Utrumque mecum caves, qui nec salebro-
sus esse studeo, nec obscurus. Nunc quæ Rhe-
torum pulpam sapiant promittis, & eloquen-
tiæ tyrocinium. Ita veterem artem revocas, &
illud dicendi genus, quo

*Agrestes homines sacer interpretque Deorum
Sedibus & fædo victu deterruit Orpheus.*

Loqui omnium est: sed ita loqui, uti tu loquen-
tes facis tuos, paucorum. Nempe doces bel-
lariis & crustulis involvere quæ persuasa vis, &
fesama & papavera spargere in minus sapidam
orationem, illos imitatus, qui saccharo incru-
stant amariorem medicinam, & dum dulcedine
aliqua alliciunt, ingerunt valetudini salutaria.
Omnes mimi sumus & agyræ, hic carmine,
alter oratione trahit auditorem. fascinum quis-
que suum adhibet, ut fidem inveniat & gra-
tiam. Habent suum Poëtæ, habent suum Ora-
tores. Vox & dictio omnis ad lenocinia com-
ponitur, nec satis est hæc nos scire, docemus ea
juven-

juventutem & tyronibus instillamus. Suadæ medullam, quæ expectoret τὰ πάθη, [*affectus*,] & leniat animi impetus. Utilia hæc sunt iis, quorum munus est ad alios loqui. Quamobrem gratias tibi debent quotquot tuis artibus discent, vel meliora suadere peccanti populo, vel jus suum cuique asserere, vel Principibus salubria consulere, vel ad gloriam famamque publice de quovis argumento verba facere. Addis Epistolarum tuarum libris Gymnasium Eloquentiæ parentis tui, ut ostendas fortes fortibus, etiam Rhetores Rhetoribus nasci. Mirum illam dicendi vim etiam cum sanguine propagari. Adeo bene loqui vobis proprium est, ut natus videaris Rhetor potius, quam factus. A me vicissim accipe poëmatia hæc, quæ sæpius egerimus quasi pituitam matutinam. Sin minus elaborata sunt, crede esse de fungorum genere, quos natura præcipitat verius, quam studio efformat. Vale, & sæpius procellis istiusmodi litterariis è Septentrione in me irruere. Amstelod. 19 Aug. 1642.

450.

IACOBO VANDER BURGH.

Literas tuas, amplissime vander Burchi, non amplexus solum, sed & exosculatus sum. Video vim Latina loquendi & scribendi, quantumvis longa desuetudine, nondum in te defecisse. Debebas sæpius mihi, aliisque melioris notæ amicis scribere, & acuere stylum in me

Pars II.

Z

cote.

cote. Caseos tuos, munus gratissimum, accepi, qui non solum digerendis cibis facient, sed & probandis vini saporibus pro Lydio lapide erunt. Minores caseolos præfero majori. hoc dijudicasse non fuit tuæ potestatis. sunt illa infra curas res publicas Agentium. magis, quod jam tuæ est functionis, dijudicare studes, quo in patriam nostram animo sint, Leodienses & Leodiensium Episcopus, & Cæsar & Gallus. Tibi gratias debeo, & referam, ubi res exiget. Impera, quod voles, & impetrabis ocyus. Apud Ebersteinium & Guibrianum Comites, jam puto notum esse nomen tuum. etiam ad Mussonium Abbatem scripturum mihi promisit is, quem nosti. Hoc fac, amicorum candidissime, ut D. Vicofortio super hac re scribas, & res novas, si quæ istic sint, impertias. demereberis his officiis virum A. T. addictissimum. Theologiam istam Gallicam jam ante menses duos Hagæ Comitum legi. autor ejus creditur esse Pastor Parochiæ S. Servatoris apud Leodienses. Quæso, inquire prudenter, in autorem & nomen. Mecum judicas, non esse dignum Principis ira. Nugatur in re seria & cavillatur. Poësin * aut non capit, aut malitiosè detorquet optimè & innoxie dicta. præterquam quod manifeste impietati affinis sit, dum sacrosancta nomina SS. Trinitatis calumniarum suarum & sycophantiarum argumentum facit. præstat hominem sibi insanire, quam ut, ex solida respon-

* Panegyricum Card. Richelieu dictum.

sponsione inclarescat. tenebrio est & lucifuga. quare latibulis suis illum relinqui satius est, quam in lucem præter meritum protrahi. Annon doles mecum sortem Buillionæi Ducis & Thuani? Magni semper fecisti virtutes ejus bellicas. at hæc in patriam & Regem suscepta consilia mecum detestaberis. Britanniarum Rex discit indies, quantis rebus impar sit. Non est Parlamento negotium cum Henrico Octavo. Felicius res Gallus conficit, victo Perpenniano. Vicinorum Principum portis undique incubat. Brisacum Germaniam, Atrebatum Artesiam, Casale Italiam, Perpennianum Aragoniam & Catalauniam aperit. Suecus de hybernis in Silesia faciendis cogitat. Wimarienses Agrippinæ populo graves esse pergunt. Nos, te absente, dolemus subinde. Tantum apud me est sinceræ amicitiae & honestæ comitatis pondus, ut malim tuos sermones imbibere, quam aquas Spadanas. Illud malè me habet, quod retulis hoc ipso mane pater non pater, afflictiore te esse valetudine. Hanc cura diligenter, & amicorum absentiam solare studiis amœnioribus, Omne solum forti patria est. non distamus totis hæmisphæriis. concurrunt animi, literæ, vota. Vale Vir amplissime & dilectissime, & ubi negotiis tuis chartisque publicis subducere momentum poteris, certio rem me fac de rebus tuis, & valetudine, & amicis, omnique vitæ & studiorum potissimum ratione. Salutat te respublica mea. Filius meus denuo Gallias repetiit,

tiit, jam Parisiis est. Amstelod. 5 Non. Octobris, 1642.

451.

CONSTANTINO HUGENIO.

Nobilissime Hugeni,

Cum non in castris, sed Hagæ te esse ex amicis acceperim, scribendi ad te officium non difficulter à me impetravi. nam & literis tuis respondere necesse habebam, & pro missis carminibus luculentas gratias dicere. Quomodo tibi in castris tam multa scribendi suppetat oportunitas, non capio. An classicis & tympanis excitaris ad carmen, & quæ ferociam aliis suadent, tibi lenitatis & tranquillæ mentis otia imperant? Est nota Phycis ἀντιπερίστασις. [*pugna rerum se mutuo circumcingentium.*] nec minus Tibi, cui turbæ strepitusque castrenses animum componunt, ut dum cingeris illis undique & pene obrueris, trusa in arcum ingeniosissima mens, in suo velut centro, collectis viribus, fortior exeat. Placuerunt quæ ad fraga Tessalica reposuisti. Sed cavebo ego sedulo, ne illis perducam cum magno Imperatore Plus ultra. Nolo, ut ille, trajicere Mare mediterraneum Tessellæ, vel de Novo orbe cogitare. ne vel illo mergar Icarus, vel hujus obtinendi spe excidam. Perculit me non leviter fratris tui germani obitus. Non ita diu est, quod cum nobilissimo Vicofortio ipsum inviserim in diverticulo, quod ad latus sylvæ habet amoenissimum. Sunt hæ,

mi

mî Hugeni, rerum humanarum vices. præsentis & præteriti tempora etiam extra Scholas discimus. Exemplis docemur mori, sed optimorum; quorum uti vita pro paradiymate fuit viventibus, ita & mors regula est aliquando morituris. Obiit cum fratre innocentia, candor, probitas, facilitas, & coctum generoso pectus honesto. mortuus est plurimorum dolore, qui plurimos sibi officiis demerebatur. qui publicæ rei profuit, publicis lachrymis effertur. Desideramus in uno, quæ sperare ab aliis vix possumus. Tu fratrem luges, ego tuo beneficio amicum. tuus à sanguine dolor est, meus à consuetudine. non irascor fati, quia consuluerunt bene merito. non querar de vitæ brevitate, quæ honeste venti fuit longissima. Non opus hic præficis. Sumus hoc singuli. qui ereptum immoderatus dolent, nesciunt carere concessis. Fidem juraverat Patriæ Patribus, sed ut illa tandem absolveret Pater omnium. Probavit se Dominis suis obsequio, Tibi dilectione, amicis benevolentia. Singula hæc viventium solatia sunt. obstreperit luctui tot virtutum memoria, quæ superstites recreat, mortuum illustrat. Hæc apud te repetere, prudentissime vir, supervacuum puto, qui tibi es maximorum solationum promus & condus. quare non monentis hæ voces sunt, sed condolentis; non docentis quid te facere oporteat, sed quod facis. Loquendum mihi fuit in funere isto, quia Te tangit. equidem, tantum tui apud me momentum est, ut communibus tecum ma-

lis bonisque afficiat usque. Vale Vir maxime & luctum doctrina, religione, & tot amicorum precibus subige & frange. Filios meis verbis amice saluta. Amstelod. 5 Octob. 1642.

452.

IOACHIMO VICOFORTIO.

Post discessum tuum nihil de te, nihil de rebus tuis intellexi. Si salvus tu, si salva uxor domesticique, salva sunt tibi omnia. Nec peto, ut scribas mihi. sufficit excusatio una, Gellius ædificat. Favet hætenus ædificanti aër, ficcum illum & serenum expertus es, aptissimumque feruminandis lapidibus. Iam puto in domus apice sudare operas, & pluvia hac tempestate recto claudi architectum. ita voveo. ubi perfecta erit domus, adero censor & hospes. Aderam heri in prandio D. Paulo Wilhelmio à funere Hugennii reduci. Si fuisset isthic, etiam tecum traxissem syrma. Filius meus Parisiis est. inde Aureliam abiturus, ut promotionem obtineat. ea impetrata statuit morari Bloesii vel Salmurii. Sed quam in angusto aut præcipiti sunt res Britanniarum Regis? ab exteris & domesticis auxiliis destitutus, se arbitrio Procerum dedat oportet, nisi Deus è machina adsit. unum omnia contra Tela Latinorum. Sparguntur hic rumores de clade exercitus Regii, capto rege, occiso Principe Roberto. Sed non ego credulus illis. Etiam nunc dicere habemus:

Victrix causa Diis placuit, sed victa Catoni.

Galli,

Galli, ut acutissimi sunt, ajunt Bullionæum Ducem dentes sibi eripi passum *Ses dents* *, ut capiti suo consuleret, *pour sauver sa teste*. nescio, an Gallice hæc efferam. tu corrige, nam mentem & acumen capis. Raptim, 5 Octob. 1642.

453.

GUILIELMO GROTIO.

V Ir amplissime,

Litteras tuas mihi tradiderunt filii tui, ex quibus percepi & parentis institutum & filiorum. Ad Academiam nostram eos mittis, ut præceptis institutisque Philosophiæ abundare discant. nec renuunt illi mitti, & in disciplinam nostram admitti cupiunt, ut expoliamus ingenia ad frugem optimam nata. Feci periculum: idoneos judicio, qui è trivio in Peripatum migrent. Audiunt lectiones meas & D. Vossii: illas, ut sapientiæ præcepta imbibant: has, ut Historiarum & literarum studiis sapientiam illustrent. Præter hæc privatim illis prælego τὰ Λογικά [Logicam] Aristotelis, mox prælecturus Physicam & Ethicam. Dum publicè loquimur, philosophamur, Philosophantur nobiscum Auditores, & privato examine obstetricamur discentibus. Non ignoras ex domesticis institutionibus plus fructus referre juventutem, quam ex publicis: hæ enim ad gloriam magis docentium, quam ad usum comparatæ sunt. Illæ discentium captui accommodantur. Annitar omni studio, ne frustra huc missi videri possint, & si nostris labori-

* Sedan.

bus respondeat ipsarum industria, futurum est, ut doctrina & virtute adolescant. Observo, nec ætate valde, nec progressibus discrepare. Indoles parentem loquitur : cetera nostrarum erunt partium. Iam collegio Logico nomen dederunt cum aliis. Non minus erunt mihi curæ tui quam mei. Scio nihil parentibus nobis charius esse rectâ liberorum institutione & educatione; præfertim cum parentum oculis subducti alibi discunt sapere. ut faciam quod petis, suadent pietas, vocationis meæ ratio, & amicitiae veteris memoria. Impetrabunt hæc quidquid præstare erit mearum virium. Vale. Amstel. 5 Oct. 1642.

454.

CORNELIO VANDER MYLE,

Nobilissime Myli,

Literas tuas una cum poëmatibus clarissimi Bonifacii accepi. illi scribas velim, me singularem ejus erga me humanitatem animitus exosculari, sed judicia ista & comparationes modestè amoliri. Verum illud est, Claudiani cothurnum jam inde à pueritia imitandum sumpsi, sed accidit mihi quod Ascanio, qui non passibus æquis sequebatur. Facit mentionem Bonifacius Oëni cujusdam Britanni, non est Oënus, sed Ouwenus, epigrammatum scriptor. Multa ingeniose scripsit in isto carminum genere. sed intercurrunt non pauca vilioris mone-
tæ. Magno applausu apud Anglos leguntur. Prostant ubique. Postremum clarissimi Grotii
respon-

responsum legi, & perlegi. placent multa, non omnia. nec enim ea largiri Romanæ Ecclesiæ velim, quæ antiquitatis præsidio nixus, largitur. Ego etiam primis seculis errores irrepsisse in Ecclesiam puto. Quidquid sit, non debebat optimum Illustris Viri institutum tam indigne exagitari. Scio minore cum fructu hæc nostratibus scribi, verum in Galliis maximo. Alia illic tempora sunt, alia gens. Qui Grotium Papistam scripsit, furiosus est rabula. nomen nescio, sed creditur Parisiis D. Grotio familiaris fuisse, & postea ob vitam minus inculpatam dimissus. Leidæ ajunt hominem morari, & Lutheranum esse Concionatorem, qui facile illic incentores invenit, qui famam maximi viri proscindi amant. Plenus est mendaciorum libellus, nec dignus Cæsaris ira. Est mihi domi sponsa, filia natu maxima, Adriana, quæ juveni Roterodamensi Carolo Wolphio nubit. Velim hoc scire filium tuum Governatorem Willemstadii. Utinam ab ipsius liberalitate & humanitate impetrare possem, ut in nuptiarum diem, mihi aviculas aliquot Brabantinas, aut leporem, vel si quid est istius generis, quod palato non displicet, transmittere dignetur, in memoriam veteris convictus & filix gratiam. Non ero ingratus, agam carmine gratias, his enim opibus apud N. T. gloriari liberius ausim. Tu præstantissime Myli, tua suffragatione à filio impetrabis facile, quod peto. Vale & D. Myliam, Filiumque si Hagæ sit, meis verbis saluta. Amstel. Octob. 1642.

SYLVESTRO DANCKELMANNO.

V Ir præstantissime,

Nuper tesseram amicitiae dedimus accepimusque. Affulsit mihi dies iste, quo apud Advocatum vander Maast pransi sumus auspiciatissimus. Vix enim credas, quam in lucro deputem amicos doctos candidosque. Eram tum hilarior & minus severus, nec enim libet semper contracta fronte Catoni esse. Professoriam vitam ago, hoc est, inter discipulorum cathedram gravem seriamque. Quare conviviiis coetibusque amicorum immixtus, videor velut è carcere & servitute manumissus. Adde, quod Poëticae quidquid in me est indolis, versus τὸ περπνὸν [*delectabile*] & ἐντραπελὲς [*facetum*] vergat. Volo Te hoc scire, ne putes me casu aut fortuito ludicrorum atomorum concursu tunc fuisse χελωλοποιόν. [*excitatore[m] risus.*] Semper talis sum & destinato apud illos, qui non solent ad stateram argentariam expendere convivales sermones. In Te eam tum humanitatem & morum facilitatem deprehendi, ut veniam non difficulter impetraturus sim liberioris linguae. Quod si in sectam concedendum sit, malim illam Democriti, quam Heracliti. Tu, vir doctissime, longius à me abes, quam ut Te frui possim. Lingam inhabitas, & loca meo nunquam trita pede, sed belli famâ celeberrima. Illic cum Musis tuis & Apolline neuter es, & hostium partes nescis.

Gra-

Gratulor tibi hoc nomine : sed metuebam numer tuæ felicitati ab adventu Exercitus Vismariensis , qui locustarum Ægyptiacarum instar omnia quaquaversum detonder. Abeuntes hostes hospites videre mavis, quam venientes. Procellæ sunt & turbines publici , & ut sacris verbis utar , virgæ furoris divini. Vide quam faustis nuper auspiciis Tibi innotuerim. Pergo amicus esse, & quam dexteram abeunti porrexì, porrigo absenti affectu , epistolâ, carmine. ubi res tuæ ferent , ut viro eruditissimo D. vander Maast scribas, tribus lineis mei meminisse digneris , & eandem quam ipsi , etiam mihi salutem candidus imparti. Vale Vir doctissime , & in eorum me censu habe , qui Te colunt & amant quam maxime. Amstelod. Kal. Nov. 1642.

456.

IACOBO VANDER BURGH.

OMnino mihi videris, præstantissime vander Burghi, factus disertior, ex quo ad Eburores concessisti. opinor malleorum ictus tibi facundiam extundere. contrà accidit Nasoni, qui apud Tomitanos se Romana verba dedidicisse non semel queritur. Legunt literas tuas Zulechemius, Hoofdius, Vicofortius alique , qui te

In Latium spretis ajunt migrasse Batavis.

Dolemus omnes singulique te subductum nobis. Solebas severitatem nostram castigare eruditis jocis , & Professoriam morositatem non ficta comitate. Eramus sæpè, da veniam verbo, homun-

homunculi belli, quoties materiam urbanitatis nostræ daret vel Medici filia, sororis convictrix, vel nescio quis Ayala, leporis filius; aut subtilissimus ille Scotus, itineris tui aliquando in Galliis socius, quem negant esse è septem sapientum numero. Quicquid sit, non solemus duotresve convenire & symposium facere, quin in ore omnium nostrum natet vander Burchius. Indicta sunt amicorum comitia Muydæ, post dies bis septem. Sessiones habebimus dierum aliquot. Synodus erit provincialis non nationalis. Solum ex Hollandia advocabuntur viri docti, gravesque. Haga duo, Alcmaria Pontifex femina, Amstelodamo Alopecius, & lentus Empirici refutator, & γυναικονεγλέμυς & [muliebri imperio subjectus] scriptor. non adscribo nomina, quæ divinatione facile est assequi. Non erit sermo de excussis Iaponia mercatoribus nostris, aut dedita Perpennia, aut captis in mari Libyco navibus, verum de studiis solummodo. De successu & eventu tanti Synedrii faciam te certior. Nullis scribemus Anathema, nisi duris & ficcis. Literas propediem à N. D. Vicofortio expecta. Quæ Ubiorum terris incubuerunt cohortes non unius gentis, fames inopiaque alià vocant. Sensit Colonienfis Archiepiscopus etiam has locustas detondere prata. De Germania liceat dicere: duo sunt populi in utero meo, graves matri ac perniciosi. Bohæmiam quisque spe devorat. Britannia fabulam de Cadmæis fratribus denuò orbi exhibet. Hispanus à mora rebus

us suis quærit solatia. Gallus duabus victoriis
 incruentis, Perpiniani & Sedani deditioe, illu-
 ris, meritò canit. Nobis hac æstate nullam in-
 linationem fecit Mavors. Vis privata? domi-
 neæ Hymenæus filiam natu maximam Adria-
 am Virginum choro it secretum. nubet juveni
 Roterodamensi Carolo Wolphio. Pro te festo
 nuptiali intererit soror vitricusque. celebrabun-
 tur nuptiæ 22 Novemb. Hic dies ubi illuxerit
 Tibi, cogita quid sit *συγσολίζειν*. [corre.] Si Syl-
 æ Ducis aut Vianæ habitares, peterem à te per-
 licum par, aut leporem. Mitto A. T. sortes
 Gallicas profanæ industriæ testes. In obitus
 Domini Cinq-mar sii, & Thuani, hoc Epigram-
 ma quidam scripsit :

*Morte pari periere duo. sed perdidit illum
 Fracta fides, socium perdidit arcta fides.
 Morte pari periere duo. sed dispare causâ.
 Fit reus ille loquens, fit reus ille tacens.*

Filius meus natu maximus jam Aureliæ est, pi-
 eo togaque donatus. Vale Vir amplissime &
 iuxta amicissime. Scripsi jocosius, ut si mederi
 non possim pedibus, medear isti parti quæ τὸ γε-
 λασμὸν [ridiculum] amat. Salutant Te soror,
 vitricusque, etiam respublica mea. Amstel. ipsis
 Cal. Nov. 1642.

457.

J A C O B O Z A S.

Q Uæ mittis munera, amplissime Zassî, du-
 plici nomine grata fuere : & quia à Te, &
 quia

quia ultro missa. Dicitur solet proverbio : tela prævifa minus ferire : at munera non prævifa ferrunt magis , & plus afficiunt animum de tuo erga me adfectu prorsus convictum. Quæ petuntur , aliquo titulo debita videntur : quæ non petuntur , dantis virtutem benevolentiamque arctius commendant. Certe aliquam gloriolæ materiam subministrari sentio , cujus filiae nuptiis Aula, Curia, Nobilitas, Mars ipse applaudunt. Donis me agrestibus cumulavit Saltuum Hollandiæ præfectus, hic Aula est. Willemstadii Gubernator , hic Mars est : Haestrechtius, hic Nobilitas est , & Senator Zassius , qui mihi pro Curia est. uti prioribus, ita Tibi, vir consultissime, gratias debere fateor. Prævenisti me officiis & beneficiis. Sequor ingenua gratitudinis professione. Lepores misisti , animalia à velocitate, metu, auribus, pilis nota. Omnia hieroglyphica mihi videntur. Velocitas humanitatis Tuæ symbolum est , quæ nescio qua celeritate me , nullo tibi merito obstrictum , antevertit ocyus , & vix perlato ad Te nuntio de nuptiis filiae, velut leporino saltu occupat absentem, & tantarum rerum prorsus ignarum. Metus animalis etiam me tangit , qui vereor ne par sim tuis meritis & exspectationi. Sed adnitar , uti me tibi prona animi propensione & obsequiis posthac impensius probem. Etiam aures me adficiunt : uti enim hæ ad strepitus insequentium Molossorum gnaviter attendunt ; etiam ego aures arrigam , ut intelligam quibus maxime officiis

his gratiam & benevolentiam tuam redimere
possim. Hirsuta & incompta pellis agrestium
erarum nota est; quæ tantis Te parasangis à ru-
ticitate & inconditis moribus abire testantur,
quantis à mansuetis animalibus distant effera.
Exercuisti tuis leporibus convivarum dentes,
& nunc exerces calamos. In mensis seriæ disser-
ationis materiam præbuere avidis faucibus,
nam ludicræ. Quam voluptatem ex pulpamen-
to cepimus, nostra fuit: quam capis ex jucunda
allusione, Tua erit. Accepi beneficium, & pa-
tutus sum reddere. Non mittam lepores, nam
Actæon non sum, aut ex Dianæ famulis: Apol-
linis sum mystes, & Musarum. Has ubi loqui ve-
lis, ostendam me pari celeritate posse Pindo de-
ducere Phœbum, quam Tu *montibus attonitos*
lepores deducis & agris. Vale Vir præstantissime,
& qui fastum fucumque odisti, me amicorum
uorum ordini erecto apertoque inferere. Am-
stelod. Nov. 1642.

458.

ADRIANO VANDER MYLE,

Domino in Myle, &c.

Nobilissime Myli,
Cogor jam mutare literarum mearum
titulos, & obitu maximi parentis Tibi illas in-
scribere. Certè perculit me afflictim ferale nun-
cium, de patris excessu, quem amore singulari &
veneratione summa tot retrò annis prosecutus
sum. Sub illo Curatore studui adolescens. Sub
illo

illo Curatore ad Academiam evectus fui. illo etiam non Curatore usus sum familiariter, iis temporibus, quibus in fædas eclipses protrusa fuerunt præstantissima Patriæ nostræ lumina. Ex illo, sedatâ nonnihil publica tempestate, non destitit, & ille me affectu maximo complecti, & ego vicissim me totum Nobilitati ipsius tradere. Luges tu parentem, ego studiorum meorum columnen & Meccœnatem. tu generationis insuper causis gloriaris, ego curæ publicæ & mei. Semper in Parente tuo suspexi, quicquid in terris suspicere solemus mortales. Pietatem, cuius cultor fuit serius: integritatem, quam nulli non probavit Batavus: fidem, cuius testis est Respublica, & Principum, ad quos legationibus functus fuit, vox: literarum curam, consciâ Leidâ, ubi Curatorem egit annos viginti & ultra, ea dexteritate & facilitate, ut etiamnum in animis Professorum & studiosorum passim vivat. Hæc dum cogitas, nobilissime Myli, invenis dolori tuo solatia validissima. Ea demum felicitatis humanæ pars est, ita vixisse, ut superstitum omnium verbis orneris, & posteritatis laudabile expectes testimonium. Quam foris placuit viris maximis doctissimisque, quam domi. omnium amor suffragium optimi civis, etiam ab hostium conscientia, impetravit. Nec secundis rebus insolens fuit, nec adversis fractus succubuit. æquam mentem vidimus rebus in arduis. majorum suorum fulgorem auxit meritis suis, & Auriacorum Principum benevolentiam, patriæ

riæ dignitatis hæres, continuatim usque possedit. Rempubicam benè compositam iuvit, afflictam & concussam non deseruit. Vbique amicos habuit, & quos habuit extulit, literis, officiis, beneficiis. Non privatus est dolor tuus, charissime Myli, lugemus plures. Academia, aula, patria omnis indemnes non sunt. quo vivo lux vitæ affulsit omnibus, eo mortuo veluti tenebris involvimur. Volui hæc N. Tuæ scribere, ut quæ coram non queo dicere, credas me coram velle dicere. Quod si me illo honore dignaberis, cuperem Parentis tui optimi & celeberrimi funus prosequi. non quod mei tantum sit precium, sed quod paternorum erga me officiorum precium sit maximum. Fac me certiorum per famulorum aliquem de die exequiarum. sistam me, Deo volente, in id tempus Hægæ, ut postremum hoc persolvam munus amanti, non sine Lugubri Carmine. Vale Vir nobilissime & mei studiosissime, & sine, ut quam cum Parente dignissimo colui amicitiam, in te tuosque porrò derivetur. De missis agrestibus ferculis, nihil scribam, ne videar luctus tempore de festivitibus intempestivè verba facere. Domina Myliæ, matri tuæ afflictissimæ solatia hæc mea imparti, & me dolori ejus meum jungere significa. Amstelod. 29 Nov. 1642.

459.

GODEFRIDO DE HAESTRECHT.

*N*obilissime vir,

Iam respirandi otium à nuptiis nactus, de iis cogitare incipio, qui eas munificentia sua & beneficiis illustrarunt. Inter eos Tu es, quem audacius super hac re compellavi, quia amavi hætenus ardentius. Multum de veteri nostra amicitia præsumo, quam impræsentiarum heroicis & augustis ferculis redintegrasti. Expectaveram leporini generis aliquid: mittis præter expectationem & sortem Professorum cervos aëris & sylvarum spolia. Mittis ea copia, ut nuptiæ meæ Principum luxum videantur æquasse, ut aliquid dicam ὑπερβολικῶς. [*hyperbolicè.*] Videre erat perdices deauratis rostris, videre erat lepores, præter viventium morem, crustæ auratæ inclusos. Videre erat hinnuli armos multo sumine perfossos: Nam mihi conviva nullus Apella fuit. Dicebam hæc à Te profecta, & tui favoris luculenta documenta. Rhenensi nectare diluebamus quidquid in feris istis erat agreste. Laudatus es à Satrapa Muydensi aliisque, quod hoc honore dignum judicaveris vatem tuum. dico tuum: quia meministi me aliquando scripsisse:

Accipe laudatum, sessor generose, caballum.

Iam accipe laudatum hinnulum, qui tibi verbis Poëticis gratias aget. Ego à facundia destitutus, quâ tibi pro meritis gratias dicam, malim hinnuli

nuli manes hoc dicere, quam emeritum Poë-
tam. alias de perdicibus apud te, nî fallor, verba
feci: nunc cervorum prolem alloquor, dicturus
aliquando de lepore. Non vacat semper Prin-
cipum & Cardinalium laudes dicere. Etiam
Dianæ venatricis victimas, quæ voluptati pu-
blicæ præbent causam, laudari fas est. Illi de
regnis bene merentur: hæ de famelicis convi-
vis. Illi regna & gentes devorant, hi devoran-
tur à gentibus. Desinam apud gravitatem tuam
nugari & joculari, si me, quod feci sæpe, tibi omni
affectu & officio devoverim. Vale, & quam à
me, etiam à novis nuptis gratiarum actionem
accipe. Amstelod. 19 Decemb. 1642.

460.

CONRADO GODDÆO.

Vir doctissime,

Concessit mihi lectionem Satyræ tuæ
nobilissimus Hoofdus, Satrapa Muydensis.
Valde me affecerunt Ululæ tuæ laudes, in qui-
bus cum eruditione urbanitatem, cum utraque
prudentiam junxisti. Prodes & delectas: prius
facis saluberrimis monitis, posterius non illite-
ratis jocis & salibus. Doctrinam tuam per tot
scriptorum paginas & latifundia diffusam pro-
dis, apposite quæ ad rem præsentem faciunt
explicando, ut nusquam vel delphinum sylvis
appingas, nec fluctibus aprum. Istiusmodi scri-
bendi genus amo, & simili fere modo res serias
dixi, in Orationibus meis de Ente Rationis &

A a 2

Reali,

Reali, etiam in Nuptiis Peripateticis. Quæ
 severitate dictionis persuaderi non possunt, in-
 crustas venustate & verborum suavitate, ne fa-
 stidio sint. Multum tibi debent Ululæ, quas æ-
 ternitati consecrasti, uti Moria plurimum debet
 Erasmo, Calvitium Synesio, Umbra Douzæ.
 Certe hæ nugæ seria ducunt, & ingenia morta-
 lium moresque hominum depingunt, sub spe-
 ciosi animalis imagine. Si verum est Pythago-
 ræ placitum de animarum transmigratione, pu-
 to sæpius ulularum animas in nostra corpora
 transire, ad quarum indolem mortales singuli
 plus minusve componuntur. Vnum dicam: non
 debebas in ulularum sedibus, & desertis Vela-
 viæ locis vivere, verum in luce hominum, &
 quidem doctiorum, ne præclaræ ingenii tui do-
 tes cum jactura publica inter ruricolos eva-
 nescant. Fui nuper Hagæ Comitum, & doctri-
 næ tuæ apud Zulechemi Dominum præco fui.
 Exemplar illi mittas velim libelli tui. Vellet
 Muydensis Satrapa te hic apud populum dice-
 re, ut amœnissimi ingenii tui fructu propius
 frui liceret. Ego amore tui, & libelli suavitate
 captus, hæc ad te scribere in animum duxi, ut
 credas non deesse alibi, quibus vis est dijudican-
 di bene dicta. Vale. 11 Ianuar. 1643.

461.

P E T R O C. H O O F T.

Q Uæ argute ad præstantissimam viduam ar-
 gutaris, nobilissime Hoofdi, aliena non
 sunt

sunt à genio tuo & sorte mea. Tu more tuo
 jocis me petis, quia domi Penelopen habes in
 usus tibi necessarios. Ego miser & vacui lectuli
 possessor ferre cogor ludibria beatorum. Illud
 vectatione retrograda, aut averſa effeci, ne aver-
 ſus aut retrogradus eſſet amor meus: licet in
 aureæ Cherſoneſi dominas & Deorum matrem
 Cybelen ille minime feratur. Amo claudican-
 tem & tardigradum Vulcanum, non Venerem.
 Non ignoras Mezentii tyrannidem, de quo
 Maro:

Mortua quin etiam jungebat corpora vivis.

Nec poenitet iſtius ſeſſionis. una vecti ſumus
 ante fores arcuatæ domus. ingredi juſſum per-
 humaniter excepit diſ Berecynthia, in concla-
 ve introduxit, & Coloniensî neçtare rubello ab-
 luit pulverem, quem collegerant garrulæ fau-
 ces. Aderant etiam filiæ Cybeles, quibus ſpiri-
 tus robuſtior, frons explicatior, & genu viri-
 dius. Potui ab harum contactu ſine ſcclere in-
 caleſcere. Schedulam tuam curavi & chirurgo
 meo tradidi. Iam in exſpectatione es, magna-
 rum rerum & ſacculorum, quos araneæ inha-
 bitant & blattæ: Verum tu à ſitu purgabis mu-
 cidam & carioſam ſupelleçtilem, quin novis
 vocibus indues plebeam dictionem. Res Bri-
 tannorum in ancipiti ſunt. dividunt victorias
 ex æquo. cædunt & cæduntur in vices. In Gal-
 liis libertas carcere, & carcer libertate per-
 mutatur. Cardinalitii exciderant ſuo cardine.
 proſcripti proſcribunt, & viceverſa. Quisque

suos patitur manes. alii in Elysiū , alii in tristia tartara mittuntur. Nos longiore mora videmur majora optare quam sperare. Ibitur iterum, ut fama fert, in Flandriam. Faxit Deus, ne ad Cannas eamus aut Thrasymenum, hoc est Calloënsē lacum. Torstensonius velut novus Ziska Cæsarem territat, & Pragæ instat. prælio sternenda ipsi via est, aut occludenda. Vale Vir maxime, & si quid forte fando tuas pervenit ad aures, candidus impartiri. Saluta Dominam Leonoram, & matre pulchra pulchriorem filiam. Amstelod. 20 Jun. 1643.

462.

GODEFRIDO DE HAESTRECHT.

MAluissē te hic amplecti, & dextram dextræ jungere, quam absenti per litteras respondere. Feram patienter absentiam tui. proficiscere bonis avibus & navibus. Sic te diva potens Cypri, ventorumque regat pater. Vbi in Brabantiam veneris, cogita te in patria mea stare: ubi Antverpiam, in natali mea urbe. Si in doctos incidas & pacis studiosas animas, dic me ægerrime ferre bellorum nostrorum pertinaciam: hoc unice cupere, ut placato Marte philosophari liceat liberior, etiam cum iis qui sacris differunt. Non pertinent ad Musas Hispanorum & Batavorum lites. Non sunt solliciti de prolatandis imperii finibus Poëtæ, quibus totum hoc Univerſum in poëticæ commentationis argumentum cedit. Latius imperant

rant Vates, quam Orientis & Occidentis domini. Ad leges & numeros nostros venire ipsos Reges necesse est, cum libet insanire nobis. Bruxellis si qui sint, aut alibi ad quos forte fando pervenimus, iis me & officia mea trade. Si quid illic rerum geratur quod sine crimine me ignorare posse judicabis, fac me certiores, ego vicissim de rebus nostris scribam liberalius. Princeps Auriacus, ut fama est, in Flandriam movit aut Brabantiam melioribus, ut auguror, auspiciis, quam ad Calloam pugnaturus. Ea parte itur in jugulum adversæ partis: illa pars viderit. In Galliis reciprocas vides imperantium vices. Cardinalis vixit: jam multis invisum est nomen, quod terribile fuit toti Europæ. Multi qui ejus metu velut in Ægyptum aufugerant, illo extincto velut in Iudæam suam redeunt. Britanni non aliter quam Cadmæi fratres in se mutuo sæviunt, & nisi male calculum posui, præda erunt aliquando exteris. Appulerunt hic è Brasilia naves onerariæ plures, auro, ebore, aliisque mercibus graves. Induciæ cum Lusitanis pactæ credentur noxiæ fore: nec enim involare jam in ipsorum ditiones & portus vel ad Orientem vel ad Occidentem licebit. In Germania prope est, ut iterum committantur exercitus. Si Suecus proelio superior evadet, erit propediem bello. A Francisco de Melo non est quod hac æstate sibi metuat Gallus. Si successus militari prudentia moderari sciet, bis vicerit. Vale Vir nobilissime, & me amare perge. Amstel. 24 Jun. 1643. A a 4 463. P A U.

463.

P A U L O V E R L A N O.

*N*obilissime vir ,

Iam credo , de quo non dubitavi hactenus, Græciam mendacem esse. Fingit illa Parnassum, Phocidem, Cyrrham, Heliconam & Aganippen sua nomina esse & decora. Si ob Apollinis numen sacra habentur illa quæ jam recitavi, certe Oostvorna jam Parnassus & Phocis, & Cyrrha & Aganippe est. Migrant è terris in terras alias populi, quid mirum etiam transmigra- re deos deasque; præsertim cum barbaries hodie Musarum domiciliis incubet, & Atticam omnem Ottomannica gens possideat. Non exspectaveram tam excultum carmen ex iis oris, ubi Neptunus Tethysque littora pul- sant, & gratulabar mihi etiam inter rura, & Corydonas & Phyllides nasci heroicos poëtas. Accidit hoc Andino vati: nunc multis post seculis tibi. Hoc tuo poëmate non solum ostendis te cum Musis postliminio in gratiam rediisse, sed etiam veterem amicum & ejusdem tecum ferulæ fati, hoc est, sceptris pædagogorum olim obnoxium tibi devinxisti usque adeo, ut quem amavi puer, jam annis judicioque adultior colam & venerer. Nimis operosus es in exaggerandis laudibus nostris, quas modeste prætervehar. Scis in usu perspicilla esse, quæ rerum magnitudinem mentiuntur, & ex musca elephantum faciunt. Forte istis in legendis
meis

meis poëmatis usus fuisti. Si aberrasti iudicio , non aberrasti affectu & benevola animi in me propensione. Arenas quas isthic inhabitas, calcavi sæpius. Collem istum, in quo psittacos glandibus dejicere solebant ex alta trabe ruri-colæ tui, conscendi aliquoties, victoribus applausi, licet non Olympicis. Iam habet Oostvorna quod gratuletur te cive, te vate, te domino. Perge frui memoria nostri. Ubi comitem aliquando nactus fuero D. Steurium communem nostrum amicum, non invitus ad te transvolabo, ut Brielam videam, & te ejusdem mecum calamitatis socium, hoc est viduum, jam amplectar & exosculer. Vale. Amstelod. 3 Jul. 1643.

464.

JACOBO WESTERBANO.

NImis prolixa es in me humanitate, nobilissime Westerbani. Equidem non contentus me opipare excepisse, submittis leporem, agrestia munera. Ita non tantum præsentis, sed & absenti amico benefacis, & nobilium cibos edere vis doctorem umbraticum. Esto, fruar tua liberalitate, & cum major sit dantis, quam accipientis gloria, patiar me hoc gloriæ genere lubens vinci. Sed ut videas poëtis facile arripi facetæ dissertationis argumentum, à lepore tuo didici plurima. Lepus est, sed usum ejus non ad formæ elegantiam, ut Gellia apud Martialem, sed ad famem deponco. Lepus est, olim cum vive-

A a 5

ret

ret levipes , ut Grammatici nugantur. auritus adhæc , ut attentionem imperare videatur Physicæ auscultationis prælectori. Etiam pilosus , nec tamen Numa Pompilius , cui hirsutum dicitur cor fuisse. Meticulosum animal mittis , qui nihil præter culpam & honesti infamiam timeo. Victimam das molossorum viro , qui illam hominum victimis & lanienis præfert. Feram agrestem homini plane cicuri & mansueto. Cruentam adhæc , ne contra veterem Noachidarum legem de non edendis suffocatis peccem. Comedimus illum condimento tinctum aromatico , quali primis mundi temporibus verisimile est caruisse venatores , etiam ipsum venatorum principem Nembrodam. Nondum cognitas Moluccarum insulis dapes cum amicis edimus , quorum colloquia & sermones convivales alterum condimentum fuere , quale à magnis frustra expectes. Ita singula leporis tui dogmata dictavere carnivoro non Pythagorico Philosopho. Gratias tibi debeo ob ferculum nobilius , & rarius , nec vulgaris plebei que saporis. Vbi Nobilitatem Tuam posthac invisam , veniam sine comite tibi noto Domino Mylio , ut credas amicitiae nostræ fiduciam crevisse. Hac fretus , mitto Orationum mearum librum , quas sparsim editas in fasciculum collegi. Vbi à venatione aut ambulatione fessus domi confidebis , vel foris propter aquæ rivum , non injucunda erit prorsus earum lectio. Amas enim , si bene memini τὸ καλὸν ἢ τὸ περὶ τὸν , [*pulchrum & suave,*]

suave,] quod sectatus in iis fui. Vale, & sopitos veteris amicitiae igniculos vel litteris vel alloquio excita. Amstelod. 22 Octob. 1643.

465.

JACOBO VANDER BURGH.

Heri oportune admodum mihi traditæ sunt literæ tuæ, Vir amplissime. eo nempe momento, quo apud Senatorem Doubletium prandendum mihi erat. Dedi legendas Zulechemio, Vicofortio, Consiliariis Reygersbergio, de Willem aliisque, antequam accumberemus, ita ut pro promulsæ suavissimi convivii fuerit epistola tua. De literarum tuarum tarditate non est quod conquerar. Pro literis mihi sunt perpetuæ & toties iteratæ salutationes, quas parentis tui literis inseris. Sum hic Hagæ, ubi ferias brumales dispurgo lepidis amicorum contuberniis. Singuli dies singulis voluptatibus decurrunt. alium quotidie salem comedo, alios amicos amplector. In Vitaudio combustissimus sine tropo meridiem. dico sine tropo, quia frigus intensius luculento nos foco admoverat. Conqueris, præter tuum morem, de filia diaboli. adversus illam remedia pete ab amicis, à poculis, ab epigrammatibus jocosis: qualia hic tibi mitto duo, unum meum, alterum incerti. Legisti regem Cissæum à malo spiritu vexatum, ad se rediisse cantu Davidico. An hic poëtarum idem sit præstiturus utique nescio. De Pace quæ scribis, ficta credimus & portam eburneam dimissa,

fa, Qua falsa ad coelum mittunt infomnia manes. Nihil hic ejus rei agitur. Nec videtur tam esse pusillanimis Hispaniarum Rex, ut rebus hic illic nonnihil afflictis, pacem sit oblaturus. Lenta sunt Austriacorum consilia, sed sic satis certa. Britanniarum Rex, qui exercitu suo se tueri potest adversus Procerum suorum vim, hoc cunctando efficit, ut Londinenses coepti poenitere incipiant. Urgent conciliationem cum Rege & concordiam, cum discordia oculis ipsorum gravis sit. Princeps Robertus apologiam scripsit adversus illos, qui velut grassatorem & praedonem publicum traduxere optimum Principem. Crede mala haec transmarina etiam Rempublicam nostram contagio adflasse. Distrahimur & hic in partes. & pro Rege hic, alter pro Parlamento contendit, usque ad vulnera. Eboracum obsidione liberavit Comes Novi Castelli. de navibus nostris triumphant raptores Morini. Obitu Emin. Cardinalis plurimi sibi licentiam promittere visi sunt. Sed inhæret etiamnum Rex consiliis defuncti, & grandes corporis Gallici nervos movet adhuc idem spiritus. Advocatus Sylvius fati cessit. dubitatum diu fuit, an vivis an mortuis annumerandus esset, adeo languidum traxit corpusculum. Vale, Vir optime, praesertim novis anni hujus auspiciis, quæ tibi saluberrima faxit salutis nostræ autor & moderator summus. Hagæ Comitum, ipsis Kal. Decemb. 1643.

466.

JOACHIMO VICOFORTIO.

MAjus aliquando commisisti facinus, dilectissime Vicoforti, quam quod litteras Eburonensis amici referaveris: illud nempe, quod litteras ad nobilissimam Viduam missas pro tuo in me jure (ut facinus credas veniale esse) citius ab aliis legi siveris, quam ab ipsa. Hoc nefas, quale quale est, plurium osculorum abstinentia expiari debēbat. Nihil mihi arcani est cum Eburonum Agente: cum viduis multum, idque ineffabile. Sunt sua Theologis, Chymicis, Politicis, Medicis mysteria, adde & viduis, quæ non minus silentio involvi oportet, quam quæ in aurem presbytero dicuntur. Mira scribis de Gallorum mensis, quibus excepti sunt Principes nostri. Si illas vidissem, exclamassem forte cum Ergasilo apud Plautum: Quanta pestis pernisi accidit, quanta labes larido, Quanta sumini abstūmedo, quanto callo calamitas, Quanta lantiis lassitudo, quanta porcinaris! Frustra ingenium in cerebri panniculis hætenus quæ-sivimus. in gula, in ventre, in abdomine quæ-rendum. His non minus ingeniosi sumus, quam ea parte, qua sapimus. Non singulas aves patinæ, sed avium exercitus exhibuere. vix nata animalia cessere in pastum, & naturæ matris moras antevertit erudita fames. Geometricè ordinantur, quæ minus Geometricè comeduntur. ut etiam secula nostra Apicios habeant, qui-

quibus longiore collo opus, ut fruantur diutius. Sed dandum hoc viris principibus & magnis, qui Regis sui majestatem non bellis solum & armis, sed mensis etiam explicant. Quam vellent Hagienfes tui, Monasterii prandere legatos, ut habeant, quod comedant liberalius, & minus caro. Iam preciosius vivunt ob paucorum magnificentiam, uti rivulis ac torrentibus suus decedit liquor magnorum fluminum voracitate. Ego tam feliciter Illustrissimos Legatos velim crudas Principum Europæorum lites emollire, quam rem cibariam feliciter perfece-
re Francorum magiri. Sed jocorum satis. Datus ringitur. Suecus intra Cimbricæ Chersonesi limites stringitur. Pax Monasteriensis à variis varie fingitur. Britannia scinditur. Italia in novas partes distinguitur. Castellæ Rex contemnitur. Gallia victrix pingitur. Ego fausta tibi omnia, mî Vicoforti, & prospera voveo, & cum uxore & familiâ omni salvere & bene rem gerere jubeo. Amstelod. 17 Febr
1644.

467.

J A C O B O B A L D E.

IAm menses aliquot exacti sunt, vir clarissime
cum litteras tuas mihi traderet pictor celeberrimus Sandrart. Non expectaveram è Bavaria tam luculentam amicitiae tesseram, & al-
Alpium radicibus tam grande erectioris ingenii
pignus. Videntur tibi pauculi versus quos i
effi

effigiem Principis vestri scripsi, salivam movisse, ut extranei hominis amicitiam aliquo in precio haberes. Ego sicuti eruditionis fama cuivis, ita humanitatis & benevolentiae officiis nulli cessero. Eorum quæ è longinquo mitti solent major est reverentia & precium; quam obrem summa veneratione excepi aureum poematum tuorum opus, quorum lectione non semel incalui, & per similia commenta præcipitavi audacem spiritum. Restituiſti nobis lyricam neglectam diu & intermissam, ut jam merito vocari possis Lyricorum scriptor, aut potius Bojorum fidicen lyræ, ut ad Horatii verba alludam. Mire mihi placet copia, & naturali pulchritudine assurgens oratio. Sacra libentius & felicius tractas, ut tibi non parum sancta & beata nomina debeant, quæ uti immortalitatem à Deo & Christo habent; ita à te ab hominum in terris oblivione gloriose vindicantur. Isaro, nî Baldæ, tibi pro fonte Castalio est, Parnasum in Vindelicis & Nariscis invenis, Danubii & Oeni ripas Lyricorum carminum laude illustras, uti Tyberim suum olim Flaccus. Sunt qui his in terris de poematum tuorum nova editione cogitant. Interea me adfectu tuum puta, licet in aliis disparem; & si qua est studio-rum cognatio, crede me hac quoque affinitate tibi junctum. Amstelod. Cal. Mart. 1644.

FREDERICO SPANHEMIO.

PRævenisti me humanissimis tuis litteris, clarissime Spanhemi, sed non adfectu & virtutum tuarum admiratione. Cum militem tuum Suecum ante annos complures legerem, didici plus te quam Theologum esse: cum docentem audivissem, non adfectatam facundiam stupui, & qui plures ex ista cathedra loquentes audivi, ausus fui Hagæ, & alibi viris magnis dicere me par decus eloquii à nullo audivisse priorum. Vbi nos effers humanitatis & benevolentiae voces agnosco, quæ tantum à vero abeunt, quantum ego ab eruditione. Ex Milesiorum numero sumus, neque τρίτοι [tertii] neque τέταρτοι. [quarti.] Si à carminis mediocritate gratiam mereor, quadruplavi rem meam. Amicitiam tuam in maxima felicitatis parte puto. Possum amare ingenuos, & labem me amari patior. Nihil magni promitto, ne malum nomen fiam debendi reus. Misi nuper poëmation breve: jam totis modiis tibi admetior faburram poëticam. Varii illa est, sed amœnioris argumenti. Intercurfant sacra non sacris, ut credas etiam à vatum suavitate non abhorreere pietatem. In dialogis non insueta leges. Scis Iovem Homericum non semper de Trojanorum bello deliberare. Interdum apud Æthiopas commessatum abit, ut rideat. Prout homines sumus, loquimur & scribimus. Quibus pituita non est molesta, facile

cile sibi risum imperant. Est inter virtutes
 ὁμιληκὸς [civiles] Urbanitas & Comitas, quas
 qui exesse è cœtibus humanis cupiunt, inter
 quercus vivant oportet, aut Septentrionis im-
 mites scopulos. Quem mihi commendasti Ma-
 thematicum, eodem me momento accessit, quo
 accedebat clarissimus Pellius, jam à DD. Cura-
 toribus ad professionem vocatus. Exspecto ut
 tempestivus imperes, quod confici per me pos-
 se putabis. Vale, & collegas, præsertim claris-
 simum D. Polyandrum meis verbis saluta. Am-
 stelod. 28 Jun. 1644.

469.

THEODORO GRASWINKELIO.

H Actenus & animorum nos & studiorum
 junxit affinitas, Vir clarissime; jam tertio
 vinculo jungimur, hoc est, conjugali copula,
 quæ dum filium meum in cognatæ tuæ amo-
 rem insinuat, nos quoque arctius nectit. A prio-
 ribus facile impetravimus, ut interdum essemus
 unâ, veluti in κεκτήρι φιλοτησίῳ. [poculo amici-
 tiæ.] A tertia affinitate ut idem illud impetrem
 æquissimum puto. Non ignoras desponsatam
 filio meo cognatam tuam Pelgromiam, scivisti
 & promovisti amantium causam, honestissima
 apud socerum tuum suffragatione. Socer tuus,
 quæ est animi æquitate & facilitate sponsalio-
 rum moderator fuit, & arbiter. Dies nuptiis
 designatus est 24 Julii, in quem ut Te hic sistas
 cum uxore, & festo nuptiali intersis seridè & ef-

Pars II.

B b

flictim

flictim rogo : nec ego solum, sed rogamus tres, sponsa, sponsus, Barlæusque senex. Multis nominibus adesse debes, amici, Advocati, cognati. Singula urgent præsentiam Turni. Vis mixta gravitate esse comis, exemplo erit Satrapa Muydensis. Vis frontem explicare & citra affectationem esse facetior, vis sine hypocrisi exhaurire quod debes, discas hanc virtutem à pluribus. Vis inter pocula erudiri, recludet sacra sua charissimus Vossius. Vis super impositis firmemus pocula dextris; non abhorrebit aliquis. Scenam intrabis virtutum convivalium, & quot videbis convivas, totidem videre te putabis senatores, sed pomeridianos, quales auroræ vultum referunt. Veni, amicissime, & hac quoque tessera obsigna veteris amicitiae fidem. Nullum in nobis humanitatis, benevolentiae & observantiae officium desiderabis. Pueri innuptæque puellæ fundent vina tibi, acues hilaritatem amicorum, & decus addes grande nuptis. Dies Solis nuptialis erit, quo Curiae & litibus non vacas. In domo mea flagrabunt tedæ, tu Talesio sis, & novis nuptis bona verba dic. Hac spe adventum tuum præstolabor comite D. Vicofortio. Vale 14 Jul. 1644.

470.

IACOBO WESTERBANIO.

Post nuptias & nuptiarum ἐπόμενα [appendices] illud primum mihi negotii dari credidi, ut amicis circumquaque gratias agerem, & muni-

munificentia singulorum occurrerem grata beneficij confessione. Inter hos cum agmen ducas, primus compellaris, qui quas anni tempestivitas concessit mortalibus delicias, abunde impartitus es. Videris cum singulis elementis in consilium ivisse, ut amicum obstringeres. Ab aëre impetraſti, oviculas, cothurnices, quas licet Medicorum quidam à mensis arceant, quod solæ animalium, præter hominem, comitiali morbo corripì credantur; ego tamen non valde ipsorum autoritate motus mensis apposui, memor versiculi Ovidiani:

Ecce cothurnices inter sua prandia vivunt.

Ab agris & matre terra impetraſti tempore minus opportuno lepores. Verum ne lasciviâ huius animalis peccarent convivæ, prudenter submisisti melones, fructus frigidioris succi. Probitatem eorum arguebat odoris suavitas, at paucorum voluptatibus illi militarunt. Erant qui capti eorum dulcedine ipsi Iovi particulam denegassent. Quid, quod cum Oceano quoque tibi bene conveniat, cuius donum est salmo iste marinus, qui stomachos carniû saturos nova alimonia recreavit. Huic ne suum deesset condimentum, non acri aceto adpersisti piscem aut sale, verum facundissimis & suavissimis versiculis, qui, uti & piscis ipse, ad captum fuere omnium. Risere matres virginesque, & veterem tuam in carmine facilitatem agnovere. Ego tam tibi prosperas opto has ipsas universi partes, quàm nobis bene cessere. Ne aërem un-

quam sentias gravem difficilemque, aut aquas infestas agris tuis, aut terras steriles aut infecundas. Et ne calidissimi elementi obliviscar: illud voveo, ut amore mei & bonorum omnium incalescas plus magis, nec finas priscos amicitiae fontes, & vivam adhuc prisci convictus lymphulam exarescere. Prodiere tandem poemata hæc, quæ per otium leges. Agnosces veteris vestigia vatis. Argumentis varia sunt nec omnino inficetis. Proxima hebdomade cum novis nuptis Hagam excurram: Calcabimus fortè arenosas vias, ut lætitiæ datorem videamus. Vale, Vir nobilissime, & nos amare perge. Amstelod. 4 Non. Aug. 1644.

471.

SYLVESTRO DANKELMANNO.

DUm in ocio isthic vivis, Danckelmanne doctissime, & pacis vocibus impleris, nos bellorum strepitu obtundimur, & jam Gallum, jam Auriacum pugnantes audimus. Princeps noster in expugnanda Gandavensium catharacta desudat, & jam in fossæ secundæ, quæ Arcem istam cingit, crepidine est. Hæc potito magnum se offert futuræ gloriæ argumentum, Hulsta, Antverpia, Gandavum. Vide quam sint fatidici vates, & quam benè ominer Patriæ meæ Antverpiensis. Iterum suilla me beasti & ferculis minime Iudaicis. Ego reddo grunnitum meum, hoc est, murmur poëticum, quod si facili manu & æquo animo exceperis, melos fortè videbitur

tur inconcinna cantio. Non potest non placere materies, five de Philosophia sermo sit, five de chiromantia aut magia. Vitæ rusticæ laudes Damon pastor loquitur; Cyrus aulicæ. In dialogis non inamœna offendes exordia, & alibi abstrusas pietatis voces. Vbi gravis esse voles & ferius, has lege: ubi festivus & jovialis, ad priora te recipe. Annuas mihi litteras objicis, quæ jam semestres erunt, postea futuræ menstruæ. Ita cum amore tui crescent amicitia officia. Cum antè quatrimum Hagæ essem, & in omnium ore esset Grevelinga, hæc epigrammata lusi, quæ mitto, ut iterum recordatione illustris victoriæ gaudeas. Nos memoriam tui circumferimus indefinenter, & ubi in D. vāder Mastium Advocatum incido, ilicet in te reflector, ut conspectus unius duorum sit, duplexque salutatio & gratulatio. Vale, & uxori prospera omnia precare. Si fert, faventem habeat Lucinam precor: si non fert, annitere tu vir ut ferat. Supervacua domi res est uxor vacua. Amstelod. 26 Aug. 1644.

472.

T H O M Æ F E R E N S.

DVm hîc Hagæ apud nobilissimum D. Vicofortium diverto, congruum visum fuit veteris amicitia novam tesseram transmittere, ut post annorum aliquot inter nos velut divortium, Tibi reddar & uniar. Præbet scribendi occasionem luculentam & pergratam valde Saffa

sa Gandavenfis, quæ armis quoque tuis sub Auriaco expugnata, jam custodem agnoscit suum, quem non ita pridem hostem sensit. Ejus Tibi præfecturam serîo gratulor, gaudeoque & virtute Te militari, & honoribus bello partis crescere. Germaniam aliquando superiorem fortiter cum tot heroibus adversus Austriacos asseruisti. Iam in inferiore & fortitudinis tuæ argumentum invenisti & famæ. Non meo judicio meruisti maximi propugnaculi recturam, verum Celsissimi Principis, qui juratam Patriæ fidem Tibi credit, & prudentiæ tuæ committit salutis gloriæque publicæ indubia munimenta. Sedes & præsides veluti medius undas inter & terras, & dum has Reip. Federatæ facis tributarias, illas aggeribus & catharactis arces vel admittis, Flandros jam & Mattiacos adspicis: illos minus, hos magis amicos. In Morinorum habitas regione, quam Cæsar olim tenuit, cum sylvosa esset & exculta minus. Stas in vestibulo & limine fertilissimæ terræ, cujus maximum est in bello hoc, quod Hispanos inter & nos geritur, momentum. Vellem ab hoc limine Te ulterius penetrare in magis mediterranea, aut in Gandavensium foro stare, ad latus statuæ Imperatoris Caroli, quæ illic visitur. Valde sum liberalis votis, & ea confecta velim, quæ animis præconcepimus. Nihil scribo ab indole mea alienum. Bene volo Patriæ & familiæ tuæ claritati, & nomini tuo. Vbi pedem aliquando posuero isthic ubi imperas, videbo æstatis elapsæ immanes labores

bores & fructum grandem. Nec erit Tibi grave, dum mœnia noctu diuque obis, meminisse amicorum. Ambulabo tecum, disponam excubias, armilustria instituam, sed sola mentis agitatione. Ero miles sine stipendio, signifer sine aquilis, dux sine turma. Pugnabo sine cæde, invadam hostem sine noxa, terrebo colonos, nec calamitatem faciam. Ita videbor mihi esse quod non sum, & ero quod sum toto adfectu Tuus & tuorum. Iunxi gaudia mea gaudiis publicis, cum Arx ista cessisset nobis: mox cum Te præfectum accepisset, gavisus sum magis, non Tui solum causa, verum Reip. quæ tanti propugnaculi defensionem tuis devoveret virtutibus, fortitudini, scientiæ militari & curæ. Vale, Vir fortissime, & dum publico invigilas Flandricæ portæ custos, crede nos philosophari inter discipulos, suaviter agere inter amicos, denique Te excubante in Batavis dormire suaviter. Hagæ, 20 Novemb. 1644.

473.

F R E D E R I C O R I C C I O.

Quam vos estis digni rerum æstimatores. Versiculos quos per lusum effudi in Bamæstram, coronatis Bamæstræ proventu & fructibus. Nunquam gratius aptiusque munus accepi, licet interdum me Regum Principumque liberalitas non invitum prosequuta fuerit. Ea mittitis, quæ terræ cultores rectoresque decent. Possum carere monilibus & torquibus regiis:

B b 4

cascio,

caseo, butyro & ovilla carere vix possumus. Faciunt hæc ad vitæ præsentis necessitatem : reliqua ad fastum & splendorem. Ruris opimi domini estis, & facitis me usufructuarium. Meto, ubi non ferui, & pro insipidis versiculis mittitis sapidissimi saporis alimenta & mensæ delicias. Scilicet exigitis à philosopho sub oviculæ specie innocentiam, sub casei emblemate acrimoniam, sub butyri malorum correctionem, & emolliendis visceribus medelam. Det Venus pectinem & columbas, Mars gladios, Vulcanus ignes, Apollo cytharam; etiam Deorum & Deorum munera sunt quæ misistis vos. Dat oves ovium custos Pan, Pales caseum & butyrum. Vbi opportunum erit, amplissimis Bamæstræ Dominis meis verbis gratias reverenter & serio age, meaque officia prolixè ipsis offer; illis pro publica, tibi pro privata liberalitate, qua illam auxisti, plurimum me debere fateor. Agam in fine Theologum, terrasque vestras prosequar Mosaica benedictione : Benedicti estote in civitate, benedicti in agro, benedictus fructus terræ vestræ, & jumentorum, & greges armentorum, & caulæ ovium, benedicta horrea vestra, benedictæ reliquiæ vestræ, hoc est caseus & butyrum. Deuteron. cap. 28. Vale, & D. van Os aggerum vestrorum curatorem peramanter saluta. Amstelod. 19 Decemb. 1644.

474.

... AIGUIBERIO *Gallo.*

EX quo Amstelodami dextras iunximus, tunc cum in ipso & primo ad me accessu abires, & vix visus evanesceres; sæpe mihi cum nobilissimo Vicofortio de te sermo fuit. Exercet te etiamnum & exercuit olim belli fortuna, & dum Regi tuo te probas, viam inis qua ad famam & gloriam itur. Verum rariore exemplo militas & studes: pugnas & inter Musas otiaris, sceptræ & litteras asseris. Quare non ægrè feres, si non miles scribam militi & quidem veterano, cui multæ noctes vigilatæ sunt in castris sub Iove frigido: nec enim totum te compello, sed qua parte mecum iis artibus imbutus es, quæ ad humanitatem nos formant. Faciunt hæ, ut arma tractes circumspectius, animosius & gloriosius, ut omnis seculi exempla veluti ante oculos posita habeas, & quid foedum ut evites, pulchrum ut imiteris, scias. Nos hic procul ab armorum tuorum fulgore, in umbra Peripateticam sectam profiteamur, & inter incruentas cathedras cum Scepticis, Platonis, Epicureis adversus veteris seculi placita disputamus. Vbi seriis esse displicet, in poëtarum hortis spatium libet, & minus vera dicere absque ullius noxa. Solet in bello fesso militi tibia, lituus, tympanum in deliciis esse, quod & in Achille notat Homerus. Non minus libet Philosophis se spinosis disputationibus expedi-

B b 5

re,

re, & morosiora studia amœnioribus diffundere. Hujus generis si quæ habes D. Vicofortii liberalitate, gratulor mihi ea tuo calculo probari, & te inter militiæ principes viros hoc affectus velut osculo dignari nostram Pallada. Vale. Amstelod. 1645.

475.

CONSTANTINO HUGENIO.

IAm cum Iesuitis nobis res est. Fortè quia de Tessela omnis sermo. Sic vara vibiam trahit, & Bitus interesse amat Bacchii rebus. Cum Baldeo Iesuitarum Monachii præfecto ab hinc biennio commutavi litteras, occasione Epigrammatis cujusdam, quod in effigiem Bavariæ Ducis scripseram, rogatu Sandrartii pictoris. Placuit illud Iesuitæ usque adeò, ut mihi ob hoc gratulatus fuerit, & Ducis nomine gratias egerit. Edidit Baldeus iste libros poematum suorum, à quibus Germanismus omnis abest, & Teutonicum *πᾶτος*. [*ingenium*.] Versus ejus magni facio ob munditiem Latini sermonis, & facilitatem. Versus è Gallia missi olent D. Grotium, ob nitorem, dictionem concisam & sensus erectiores. Si cum aliis ejus heroïcis, præsertim in Gallia scriptis, conferas, non ovum ovo magis simile. Nihil tale à Gallis exspectaverim. Omnes diffluunt isto scribendi genere. De Historia Brasiliensi cogito per otium, excutio chartas Illustrissimi Comititis. Secernendi sunt fursures à polline, & rerum pondera & gemmæ

ab

ab arenis & gestorum minutiis. Sed motus hic,
 uti omnis physicus, eget mora. Illud tuum in
 Tesselæ discessum plane divinum est & elegans,
 ubi ad sortem & usuram alludis. Quod in Lati-
 no carminum genere nuper fecisti, velim te fa-
 cere in Belgico, & colligere in unum, quæ spar-
 sim & per intervalla tibi exciderunt, facetias,
 locos eruditos, & tot semper se moventis inge-
 nii stricturas. Erunt hæc ad palatum omnium,
 secus quam Latina, quæ Hecubæ nostrates non
 capiunt. Vale Vir Nob. Amstelod. 1645.

476.

CONRADO GODDÆO.

D Octissime & amicissime vir,
 Dum ad te abit collega tuus ac symmy-
 tes D. Franciscus Martinius V.D.M. in Eepa,
 commodum visum fuit illum pro sarcina onera-
 re litteris. Qui enim ad te curare possint per
 vias Velaviæ vias prorsus ignoro. Video ex tua
 ad nobilissimum Satrapam epistola nondum me-
 moriam nostri apud te exolevisse. Vellem uti-
 que te nobis adesse propius, ut novis Ululam
 tuam plumis instruas & infarcias. Nec enim
 ineptiarum hic ut & alibi finis est, & pergit
 mundus histrioniam agere, & insaniam suam lu-
 cris, amoribus, poculis, bellis, litibus & politi-
 cis & ecclesiasticis insanire. Nuper hic conflag-
 ravit grande infortunio Basilicarum nostrarum
 una. Coacti sunt tenebriones tui templarii & tur-
 rium habitatores alio migrare, donec de novis
 lati-

latibulis ipsis prospectum sit. Epigrammata quædam habet D. Martinius, quæ in damna publica scripsi. Indecens est frigere Poëtam flagrantibus templis. Valdè tibi devincis clarissimum Hoofdium litterarum officiis : optat serio mecum voces vestras hic audiri posse, ubi & tersiores sunt auriculæ & oculatior auditor. Belli rumoribus omnia hic perstrepunt. Primo vere in Flandriam ibitur, ut fama est. Vrgendi sunt successus & utendum victoria. Monasterii de pace deliberant : interim per me licet, pereat in Morinis Sagunthus aliqua. Anglia pergit in viscera sua & se ipsam sævire : Quis navem quassam fluctibus civilibus referet in portum. Nisi Deus è machina adsit πανολεθρίαν [*internecionem*] florentissimis regnis parari autumant prudentiores. Tu extra bellorum strepitus & famam à longe hæc accipis, tanto beatior, quanto minus audis, quæ displicere possunt, & minus credulus es falsis. Vivamus nos & amicitiae, humanitatis & Christianæ concordiae studiis certemus. Ita nos hic Deus pacificos, alibi beatos velit. Vale. Amstelod. 7 Feb. 1645.

477.

FREDERICO SPANHEMIO.

Quam est laudabile, clarissime Spanhemi, multis linguis loqui posse & scribere. Vni genti nati videntur, quibus simplex est lingua : quibus bisulca & trisulca, pluribus. Inter hos nomen mereris, dum iis vocibus loqueris qui-
bu-

us se maxime explicat hodierna facundia. Latinas innuo & Gallicas, quarum documenta delisti scriptis luculentissimis. Linguae Latinae decias possum utcunque observare, & velut piscando assequi. De lingua Gallica pronunciant non ausim, quæ me ad suas cupedias & elegantias non admisit. Itaque expectavi aliquantulum & distuli responsum, donec collectis doctorum suffragiis, laudationem tibi transmitterem libri tui inartificialem, profectam scilicet à testimonio peritorum istius linguae. Dedi commentarium tuum legendum hic viris attenti & electi iudicii. Ajunt omnes dictionem tuam esse *αληθινὴς* [genuine] Gallicam, historiam res gravissimas nec vulgo notas referre, nempe motuum Germaniæ causas & originem, consilia adhæc machinationesque Principum, quæ cuncta interdum adspergis flosculis poeticiis & hyperbolis, quæ lectorem afficiunt, & velut in itinere recreant. Sed quis ego sum, qui paginam facio in tuo opere & eadem quâ illustrissima Princeps Iuliana claudor tabulâ? Fulgeo tantæ heroïnæ luce & subscriptum augustis nominibus video nomen meum ignobile. Hæc privilegia nostra sunt, hæc prærogativæ, clarissime Spanhemi. Qui Reges Principesque sæpe adspectu & accessu non dignantur Reges Principesque alios; poetam, utpote virtutum præconem, non averſantur: eum sibi adſtare, vultibus ipsorum subscribere, secum loqui patiuntur. Nec illud minus gloriosum mihi est tecum loqui,

loqui, qui facundiæ, doctrinæ, humanitatis studiis regnas. Facundiæ inter Latinos & Gallos, doctrinæ inter doctos, humanitatis inter bonos. De controversiis Anglicanis scribendi materiam vellem tibi non subministrari. Cuperem non minus Ecclesiam Christi unanimem esse & pacatam, quam regnum. Vale Vir eximie, & candorem amas, me tuis accense. Amstelod. 18 Mart. 1645.

478.

JOACHIMO VICOFORTIO.

INvitas ad te venientem ultro. Sed videbor peccare affectu paterno, si apud filium non divertam. Ille arbitrio meo rem omnem permittit. Dividam litem inter filium & amicum. Filio meridiem & summum diem largiar, tibi noctem & vesperam. Non habebit quod conqueratur, si temporis corculum nanciscatur. Sed fluctuo adhuc & pendeo animi. Vbi è curru descendero, deliberabimus, quid facto opus sit. Proxima hebdomade, die Martis aut Mercurii, ad vos cogito. piscibus vestris diem dixi. Horum saturi sunt cultores quadragesimæ, ego cupidissimus. Torstenfonijs Austriam terret, sed in Moravia moratur. Cæsar copias colligit magna rerum desperatione. Britanni peragunt Cadmeam pugnam pugnare, quæ non minus luctuosa est victoribus quam victis. No. Dano tandem videmur irasci posse. Sed multi cadent, non dico inter calicem & labra, sed in

te

er classem nostram & pugnam. Turca pyrgopolynicen agit suo more. Pamphilius Pontifex pamphilus est, dum plures sibi beneficiis devincit. Inter hos motus ego in territorio Pernambucensi classes dispono, æraria exaurio, & Præfectus mihi maximas res agere videor. Vale. 6 Apr. 1645.

479.

E I D E M.

Diu me expectatione tui suspensum tenuisti. Putabam utique futurum, ut adventu illustrissimi Grotii huc pertrahi posses, quem salutavi obiter & paucis. Exceptus fuit à Senatu & Consulibus perhumaniter.

Veteris sunt hæc vestigia recti.

Clade Gallorum indolui. Nimia securitate & hostium supino contemptu Marti vapulant. Torstenfonijs adhuc cis Istrum est, hic terminus fortunæ Gothicæ. Princeps noster nondum movet. nec ego. Futurum tamen propediem puto, ut Hagam excurram, videndi nepotis causa, quem:

Casta Venus genuit, sed non Simoëntis ad undam.

Tu negotiis publicis privatisque districtus me & amicos nescis. Vlciscar injuriam dentibus, non ut te mordeam, sed fenula tua. Audio te purgare domi non Augiæ stabulum, sed loca purgatissima. Insaniendum hic est matronis, ne in virorum capita sæviant. Ab hoc metu liber sum. Vale. Amstelod. 22 Maji, 1645.

480. I O-

IOHANNI SCOTO-TARVATIO.

Nobilissime vir,

Quam mihi misisti salutem, accepi à Forbesio. Nec verbis mihi solum illam transmisisti, sed reapse. Adeo enim ad nominis tui mentionem fui exhilaratus, ut novum salus mea vigorem conceperit & robur. Trajecisti procellosum mare, & commissam secum Angliam prætervectus, stas in Federato Belgio ab intestinis bellis per Dei gratiam immuni, nondum ab externis cum Hispaniarum Rege. Hæc feliciter sic satis procedunt, opitulante Gallo, qui Flandriæ magnis exercitibus incubat. Ego qui generosæ tuæ humanitatis, & prolixæ erga me benevolentiae, & erectæ eruditionis apud Bata-
vorum proceres testis sum & præco, vellem aut videre Te in Walachris, aut videri à Te in Batavis. Iam dudum scripsissem, sed distuli in editionem poëmatum meorum, quæ jam carceres mordent, ut in publicum prodeant. Illa à nominis quoque tui splendore, quod illis intercurfat, gratiam sibi lectoris fenerabunt. Si plusculum Veriæ commoraberis, mittam poëmatum fascies, animi nostri erga Te testes uberes satis. Sed mallem frui vultu tuo & alloquio, & ignotas audire & reddere voces. Obiit Rostochii clarissimus Grotius è Suecia redux: quod scribo ob viri maximi famam, quæ latere Te non potest. Nobilissime Vir, impera siquid à me
officii

officii Nobilitati Tuæ præstari posse putas. Experieris non claudi affectum, aut stare intra versiculos, sed latius se expandere veneratione tui, & virtutum tuarum admiratione. Vale, & hospitem tuum Wallasium meis verbis saluta. Amstelod. 12 Sept. 1645.

481.

GERARDO CROMMOM.

Vide quantam de humanitate tua conceperim fiduciam, Vir amplissime, ut vix semel aut bis Tibi visus aüssim chartaceas hæc bractæas mittere, qui jam alio forsan in Curiam & curas avocaris. Legeram nuper filii tui litteras, quibus de obitu illustrissimi Grotii ad Patrem scribit: illis excitus fui, ut veteri amico parentarem. Primus ferè loquor, ut alios ad honestam æmulationem provocem. Nec loquor operose, cum tanti Viri laudes facilius sit complecti, quam sigillatim exsequi. Rasi solummodo summa virtutum fastigia, contentus affectus mei magis erga defunctum, quem cum cordatissimis Batavorum æstimavisti semper, quam ingenii aut doctrinæ, quæ parce possidemus, elaboratius monumentum proferre. Non potestis non affici & Tu, & Senatorum reliqui ejus morte, qui Ius vestrum victuris libris illustravit asseruitque. Præivi aliis & præficam meo modo egi, ut alios ad similes lachrymas invitarem. Poëmatia scribere semper non vacat, quanquam argumenti abunde esset. Amplissimo D. Dedelio exemplar

C c

trade,

trade, & juxta votivas salutis voces. Vale. Am-
stelod. 2 Oct. 1645.

482.

IOACHIMO VICOFORTIO.

*N*obilissime vir,

Agnosco pertinax silentium, at nullam
in silentio culpam. Non habui quod scriberem,
cum tamen scriberem multum. absorpsit me pe-
nè Oceanus chartarum Occidentalium, è quo
emerfi post fastidiosam annalium lectionem.
Sentio, aliud esse carmen scribere, aliud histo-
riam. illic sine populi suffragio mentiri licet &
fingere: hic nequaquam. ut illic mei juris sim,
hic ab argumento & rebus ipsis detinear: Hul-
sta me loquacem iterum fecit, quæ, ut spes est,
viam nobis sternet in magnam Urbem, & belli
catastrophem. Sub prælo est Poëmatium. Mit-
tam, ubi lentas typographorum operas effuge-
rit. Heros Muydentis diu cum podagricis do-
loribus conflictatus, jam cum pedibus in gra-
tiam rediit. ambulat mecum, sed Vulcanio &
cespitante gradu:

Veteris sunt hæc vestigia recti.

Iam de bove cura est. Si me per hæc tempora
invises, infarciam te farcimine optimi saporis,
quod Veteres Aquæ, more annuo, misere. Quia
rerum novarum parcus es apud me depromptor,
ego Te scire volo, inter Anglos & Scotos malè
convenire super militiæ rationibus. Montro-
sium novum colligere exercitum ac redditum

minari:

minari: Scotos eam Anglicanarum Ecclesiarum formam urgere, qualis est ipsorum. Fuit hic per dies aliquot Director Cancellariæ Scoticæ Iohannes Scotus Tarvatius, vir eximiæ eruditionis, mei amantissimus. Regem amat & veneratur, non tamen partes Regis. Vale, & præstantissimam conjugem, & cognatas saluta. Amstel. 10 Novemb. 1645.

483.

CONSTANTINO HUGENIO.

Nobilissime Hugeni,

Quod per æstatem omnem egerim Harpocratem, duplex exspectatio in causa fuit. Vna illustrioris victoriæ, altera editionis Poëmatum meorum. Illam fortunæ bellicæ, hanc typographorum lentis operis imputo. ab utraque poteram scribendi argumentum nancisci. Iam, cum priori satisfecerit divinus favor, posteriori illud hominum genus, quod, præter morem suum commotior, Erasmus dixit non uno dignum suspendio, loquor. præterquam quod per hæc tempora per Occidentem omnem raptus non fuerim domi. ut Belgarum licuerit meminisse. Quæ in Hultam scripsi, rogo veteri tuo more tradas Cellissimo Principi, ubi oportuni erunt aditus. Demostheni somnum adimebant Miltiadis trophæa, & mihi veterum Auriaci. In oculis turrem Antverpiensem habet Princeps noster, in votis ac spe Antverpiam ipsam. Et possum ego ex ejus clade mihi aliquid polliceri, si

C c 2

: quan-

quando ad Federatos devolvantur culinarum
D. Michaëlis, qui Christianorum Perseus est,
opimi reditis, aut alterius cujusdam, sine meo
suffragio, in Sanctos recepti. Forsan me Iesuitici
Collegii professore dicere habebit Loyolita ali-
quis:

Quis novus hic nostris successit sedibus hospes?

Quid si fasces ambiam? Antverpianus sum, non
Hobocæ, aut in paludibus Kempensibus natus?
Si dubitas, crede titulo. Poëmata mea, quæ in
duo excrevere volumina, N. T. ea qua decet
veneratione offero. nuncupavi illa duobus apud
me Sanctis, hoc est à populo secretis. Qui isti
sint, loquitur altera à fronte pagina. Mihi hic à
Te habitus honos, ut in Poëmatum tuorum
frontispicio ostentes nomen meum. Quare, sine
ut tuo potius superbiam, & qua sim apud te ad-
missione & gratia indicem pluribus. Causas alias
dicet Dedicatoria. ut ad schedas tuas veniam,
crescunt victoriæ Principi, & tibi carminis vis.
illi laus *Ἰνὶ ἔνθα ἵσταται ἀκμὴς*, [*in novacule sita*
est cuspide,] tibi in cuspide Epigrammatis. Quam
non pulverulentum illud de pulvere, hoc est,
laudum divinarum materia. quod acumen non
Romanis, sed Belgis debes, ut & illud de Hulsta
arbore. Quam non vana est illa ad Antverpiam
parænesis, quam ego sororem, quam servam ma-
lim. Legi hæc cum Hoofdio, Vossio, Mostartio,
Vondelio, licet hic argumenti impatiens sit.
Hoofdus ex illustri morbo iterum convaleuit.
non bene convenit capiti cum pedibus. etiam

D. Vossium

D. Vossium exercuit Celsissimus iste, aut potius
imæ partis dolor. Illustrissimo Comiti Mauritio
dicas velim, me Brasilia rediisse domum, & jam
mea convasare. Vale nobilissime & præstantissi-
me Hugeni. Amstelod. 22 Novemb. 1645.

484.

IOHANNI SCOTO-TARVATIO.

Nondum excidit memoria suavissimi con-
victus quo me dignatus es, Tarvati clarissi-
me. Illud quantivis puto, quod quem vidi in lit-
teris chartisque publicis eximium, viderim co-
ram oculis mihi amicissimum. Crede esse sua
vincula humanitati & doctrinæ, quibus me Tibi
adstrinxisti usque adeo, ut & amare illam possim
& hanc venerari : ob utramque Te. Attineor
dudum promisso carminum meorum, quæ jam
è typis Blaeuvii nostri prodierunt ? hoc ipso me
exsolvo & fidem libero. ubi mare conscende-
ris, poterunt illa solari maris tædia & discutere
nauseam. Bene mecum actum putabo, si non
occurrant legenti talia quæ illam moveant. Non
omnium dierum par serenitas, nec eadem sem-
per in carmine vis & gratia. quædam lætiores
quædam tristiores scribimus, vacui aut occupa-
tiores. Ludiones à spectatoribus petere solent,
ne quis artis peritus artifice exprobret : idem
apud Te mihi faciendum, penes quem vis est &
potestas talia dijudicandi. Præfationem in tabu-
las Scoticas quam exegisti concepi. Videor no-
tularum tuarum mentem percepisse ; sin minus,

muta pro lubitu : fige, refige, adde, deme. Non est mihi grave in foetus istos favire, & dispingere male natam Pallada. dum iter in Scotiam capeffis, precor tibi faventem Æolum & pacatum mare. Debebat tibi adspirare Favonius, qui adspiras passim literarum studiosis. debebat tibi sterni placidum ventis mare, qui illud ipsum rei literariæ causa trajecisti. Domum ad tuos reversus, cogita hic inter Batavos vivere nominis tui cultorem serium, qui uti eruditione omnibus, ita grati animi significatione & magnorum virorum cultu nulli cedit. Addidi exemplar carminis, quod in recentem victoriam & captam ab Auriaco Hulstam scripsi. Si Belgarum victoriis applaudis, non potes non accinentis Poëtæ murmura benigne interpretari. Vale Vir maxime, & me ama. Amstelod. 20 Novemb. 1645.

485.

CONSTANTINO HUGENIO

Filio.

EX quo Academiam conscendisti, nihil de te ex te inaudivi, nihil tui commatis vidi, nec tu, ut opinor, mei à me. Adeo fortè Astræam amas, ut mares virosque nos posthabeas. Parum refert, interpellabo istos amores, & interveniam ICtorum Rubricis & paragraphis, quos audio jam te recitare inter cathedras. Nos Academia dimissi sequimur Principem, & urbes versibus expugnamus & verbis, quas ille vix omni Martis & Vulcani ope. Postremis triumphis ac-

cessu

cessit Hulsta & Wasia, quæ jam mihi pro Bata-
vorum partibus verba facit. An te tantam Pa-
triæ felicitatem silentio præterire fas sit. Facile
tibi esset brevi Epigrammate alludere ad obsi-
dionem brevi tempore peractam. Mitto tibi
Poëmata mea, pharmaca πολλά, [multa,] bona,
mala, mediocria. Invenies alicubi pileolum tuum,
& humeros, & manus &c. parentem ubique,
cui Heroica nuncupavi, uti Elegiaca & miscel-
lanea cognato tuo Schonckio. Nisi ejurasti Poë-
ticam mentem, lege subinde hilaris quæ scripsi
absque supercilio. Vale. Amstelod. 25 No-
vemb. 1645.

486.

SILVESTRO DANCKELMANNO.

T Andem, licet serò, post exactas aliquot mes-
ses nos respexit Numinis favor. Pene de-
speraveram tantorum motuum felicem succes-
sum, sed victoriæ gloria expectationi exprobrat
impatientiam. Hulstam vicit Auriacus, ego ce-
cini. difficile est silere triumphante Miltiade.
Si, quid dicat feracissima Wasia, scire desideras;
introduxi loquentem ea, quæ si non dixit ipsa,
dixisse sane poterunt ejus incolæ & coloni. Ad-
do carminum meorum farraginem. Collegi ea
in duos fasciculos sive tomos, ne turbata volent
levibus ludibria ventis. Quædam sereni, quæ-
dam nubili scripsimus: quædam seria, quædam
joculari oratione. quædam sponte, quædam jussi.
Etiam Lingam tuam, cui Index jus dicis alicubi

C c 4

vide-

videbis, & laudatas pernas. Utinam tibi ita fa-
perent versus, posses hos concoquere sine culi-
næ fumo; uti illas non possum sine gratiarum
actione. Satis beneficiorum est, humanitatis ab-
unde. Ego cum libellis animum affectumque
propensissimum erga te tuosque offero. Si quid
A. T. à me præstari posse officii putas, impera.
Si uxor optima, si liberi valent, faxit ea etiam
meis precibus perpetua Deus. Vale. Amstelod.
7 Decemb. 1645.

I A C O B O B A L D E.

V Nde araneis supputant telæ, utique nescio:
nec unde tibi tanta carminum vis. Inter
aviculas nulla magis variat modulos quam Phi-
lomela: at tu Philomelam vincis, qui pluribus
illam modulis canentem facis, quam natura do-
cuit. Non solum libellus tuus Philomelæ inscri-
ptione gaudet, verum ipse Philomelam agis.
Vti enim hæc iterat sæpe sonos, & per interval-
la canit; etiam tu veluti singultibus periodos
Poëticas claudis, & dum animi pios motus im-
petusque sequeris, sæpe ad carminum principia
redis. Philomela arbuta mutat, non silvas, non
hortos: nec tu è pietatis campo exis, etiamsi
argumentum mutes. Ita places lectori, uti Phi-
lomela auditori. Libris tuis de Vanitate mundi
nihil perennius. Ita eam depingis, ut vanitati
æternitatem comparavisse mihi videaris. Dum
omnia momentanea facis & peritura, duo secu-
lo

lo eximis, famam & pietatem; quarum hanc cœlo scis deberi, illam posterorum memoriæ. ubi jam hæreat Sandrartius noster pictor insignis utique nescio. Cogitabat in Austriam & vicina loca cum conjuge. Sed illa ex eo bellis exarsit, ut minus commodo tempore eo profectus videatur. Si isthic apud vos est, plurimum à me salveat. Nos hic inter bella & furores Martios exspectamus publicas pacis voces. Si omnes idem sentirent, quod Memii, Avansique, non esset desperata pax. Sed illa Deorum in genibus posita est, ut loqui amat Mæonides. Vale. Amstelod. 10 Decemb. 1645.

488.

FREDERICO SPANHEMIO.

QUæ de Poëmatibus meis judicas, clarissime vir, verecundè amolior. Accidit iis, quod & in aliis vitæ humanæ rebus evenire solet: quædam sereniores, quædam nubili scribimus, quædam ultro, quædam amicorum rogatu. Nihil æque compedes horret, quam Poëtarum genius: qui si repagulis continetur, similis est captivis, qui liberiore custodia habentur. Post Philosophiæ studia placuit pro diverticulo Poësis. Hunc mihi ab opposito in oppositum saltum dari volui. Vti enim illa rigide verum amat, ita hæc à vero amat digredi, & commentis gaudet non noxiis, sed quæ aut delectant, aut profunt. Principis superba appellatio nulli hominum ordinum magis invidenda est, quam vatibus.

Cc 5

Omnium

Omniū morsibus & jaculis patent sic dicti. Citius ferant Reges dominatum Asiæ & Africæ, quam Poëtæ Principem. Vnius dominatione offenduntur, ut præstet intra ἰσότητι [honoris æqualitatem] consistere. Exercitationes tuas de Gratia Universali aveo legere, quanquam R. T. amem versari in apodictivo, quam sensitivo dicendi genere. Interim inter virtutes Ordinis vestri hominum scio esse τῶν ἀντιθέτων ἐλέγχειν. [contradicentes refellere.] Ausus fui in hoc argumento te alloqui carmine, & de iis verba facere quæ à libri tui lemmate non possunt esse aliena. Tui hæc Elegia esto arbitrii. Si quid displiceat, dispunge, aut te monente dispungam: nec enim quenquam offendere instituti mei est. In Manichæum & Pelagium quædam dicuntur. At intercurrentes quæstiones, quas vetus Ecclesia determinare aulâ non fuit, quæ tamen Ecclesias nostras segreges fecere, non tango. Si amicitia tuæ inferi propius possim, præferam hæc lucra disputationum subtilissimarum, adde etiam Poëtarum omnium gloriæ. Vale Vir maxime, & Academiæ & Ecclesiæ commodo longum vive. Amstelod. 20 Ianuar. 1646.

489.

IOACHIMO VICO FORTIO.

Nobilissime Vir,

Dudum inter funera & mortes amicorum, vel auditas vel scriptas, vel visas versatus fui. Apud vos Constantia desiit in humanis stare,

re, magna matris optimæ dolore. Hic desit scribere scriptor publicus Sinapius, cujus morientis & lenta tabe deficientis spectator fui. Leydæ Cl. Professor & Theologus ivit viâ Patrum, ut cum Scriptura de Theologo loquar. cui nœnias & lesos scripsere plurimi. Tu volentem scribere hortaris, & merito. Nam & vivum semper coluisti ob eruditionem & optimam indolem, & in Filio inter alias paternas virtutes invenis affectum, quo & Te & me complectitur. Scripsi Elegiam hanc, qua summa sequor fastigia laudum. Eam si tradere dignaberis Heenvlietæ Domino, perges pro more tuo novis me tibi nominibus alligare. Elegiam ut & Epistolam apertas mitto, ut legas, & si minus probes, censura tua confodias. Si venia dignos versiculos judicas, potero inferi turbæ Poëtarum, & inter appendices Orationis Spanhæmianæ legi. Hic urbi imperantium alia jam facies est, de qua non judico. de hyemis facie ausim dicere sententiam. A rara Planetarum coitione hic rigor. desæviit Saturnus. exspecto, ut lætiores Orbi dies dent Iupiter, Apollo & Cypria. Mars castris annuat & Auriaco. Mercurius tibi, cui loquendum sæpe pro Principe tua est. Vale, amicissime, & conjugem, cognatas à me cumula optimis votis. Amstelod. ipsis Cal. Mart. 1646.

CONSTANTINO HUGENIO.

IAm tuta est Ægide Pallas & Ægis Pallade ,
 dum in eam curam incumbit Auriacus , ut iis
 artibus ornet urbem suam , quæ militiæ præsi-
 dia sunt & decora. Iustiniani verba sunt : Impe-
 ratoriam majestatem non solum armis decora-
 tam esse oportet , sed & legibus. Vellem tales
 Celsissimo Principi obtingere Professores , per
 quos tantarum rerum auspicia illustriora sint.
 Verum non annonæ solum , sed & doctorum
 caritate passim laboratur. D. Brosterhuysio con-
 sultum equidem gaudeo. illi penicillum & ta-
 bulas ab attenta manu excussisti. Spartam ἐλθὼν
 xλω [Græcanicam] ornabit , ut qui studio isti ad-
 dictior olim fuit. Nescio, num togatum incede-
 re velitis an palliatum. Certè hic habitus Græ-
 cum argueret. Rufum Iuris hic Professore
 sibi mercati sunt Amstelodamenses , quod vobis
 debet, per quos factum, ut abruperint lenta con-
 silia & procrastinationes primores nostri. Snip-
 pendalius in horto Botanico Herbarum vires
 prosâ, non carmine, dicet. Alius Ravius è Tur-
 cia redux Orientalibus linguis flectet Batavo-
 rum linguas. ut jam de studiis cogitare apud nos
 ferio incipiat Mercurius. Satrapa Muydensis à
 pedibus valet, non à manibus. Hæ, ut mortali-
 bus omnibus , duæ illi sunt , dextra & sinistra.
 Hanc, ut ocium fallat, exercet mecum quadran-
 gularium lapillorum jactu. illa linteis involuta

vacat

vacat à scribenda Belgarum historia. quod viro grave & molestum.

Borealis illa Vesta, pingit.

Opum suarum mater, hospes, artifex.

In ejus Natalem, qui in mensem Martium incidit, nuper lusi disticha aliquot. Martiam esse Vestalem non memini, ex quo Ilia sacerdos à Marte compressa est. Mihi musculos Pettemenses misit, hiantes adhuc & à suctione recentes. Ne crede hoc ejus emblemata esse & hieroglyphicum. Filium Constantinum non in laudem solum, sed & subsidium tibi adolescere lætor. Heri admissus fui ad colloquia Ill. Comitis Mauriti. ubi evaserit nuptiarum fratris & aulici luxus pericula, mecum Brasiliensis Historiæ meæ fila leget, & sicubi à vero aut decoro aberraverim, in viam reducet. Vander Burgius à secretis Federatorum legatis, ad Dominos suos scribit jussus, amicos veteres nescit, ut verum comperiam illud Aristoteles mei: Amicitias dispari amicorum sorte dissolvi. Sed vellicabo illi aurem. Prodiit libellus in Voetium patrem & theologum, & filium philosophum. De argumento non dicam sententiam. Titulus illi est: *Pedis & Pediculi Dialogus*. Sed quia inter arcana dominationis theologicæ habetur, nescio an exemplaria ubivis prostant. Vides, vir nobilissime, ut Satyram varii argumenti litteris hisce corradam, à feriis destitutus. Non enim vacat de nuptiis Gallo-Hispaniensibus, hoc est, politicorum technis, aut Creten-

sium

fium calamitatibus scribere. Quid Tiridatem terreat unice securus, in Te obsequioque tui quiescam. Vale. Amstel. 15 Apr. 1646.

491.

J U S T O V I G I O.

Nobilissime Vigi,

Alter à rectore Tilano, vir humanissimus & doctissimus cum hic ante menses aliquot esset, monuit, ut aurem tibi vellicarem carmine. nempe amant mortales committi alios, ut spectatores sint. nec amcenior contentio, quam poëtarum, quæ uti infaniæ affinis est, ita pluribus arridet. Mihi ob veterem amicitiam, quam cum fratre Nicolao puer colui, grata tui est & tuorum recordatio. Studuit mecum Bommeliæ ante annos quinquaginta & ultra. Ex eo sæpius in fata ejus fortunasque inquisivi, & (an certa auditio-
ne nescio) Ostendæ inter alios heroas pro patria & pulchræ pro libertatis amore occubuisse accepi. Tu, vir maxime, patere ut amicitiaæ sacrum illud & venerabile nomen à fratre in te derivem, & illo orbus, in te tantam hereditatem adire possim. Vt credas serio me loqui, mitto versiculos, ut tuos eliciam, aut potius animum nostri studiosissimum tangam levi officio. Vbi una vel in Batavis erimus, vel in Sicambris, libabimus Apollini. Vide, quam Te utar familiariter, idque prima admissione. quid futurum, ubi inveterata fides pudorem proscribet & audentiam addet scripturienti, Amstel. 19 Jul. 1646.

492. W I L-

492.

WILHELMO ADOLPHO
CROSECQ.

Accipe, illustrissime Crosecqui, quæ inter bella & Martios furores à multis retro annis etiam jam nuper lusimus. Debentur Tibi, qui in hoc dicendi genere excellis, & facem præfers cœcutienti Germaniæ. Videbis me Vertumnus esse & Protea, qui in omnes me verso formas, ut placeam. Iam de bellis, jam de nuptiis sermo est. Nunc versum Reges, nunc amici, nunc sacra, nunc profana faciunt. Omnium horarum homo sum, etiam tuæ, hoc est facetioris, cum res postulat, & D. Vicofortio sacra facimus. Ignosce si familiarius scribo ad Plenipotentiarium: licet Poëtis hoc, qui cum volunt, audent Iovem ipsum quamvis procantem cum Iunone affari. Inter pacis conciliatores es. Multum debet Tibi Europa, si rem tantam ex ejus voto confeceris. Si Lilia nerent, & non bellarent: Si Leones sterterent, & rugirent minus: Si Aquilis præcisi essent ungues & rostra, posset emergere Pax, & mergi Mars. Vos actores tantæ scenæ estis, nos spectatores. Ea vos mente induat Deus, quæ Christiani Orbis saluti tandem studeat. Vale. Amstel. 16 Jul. 1646.

493. CON-

493.

CONSTANTINO HUGENIO.

DUm in castris inter armatos vivis, ego inter inermes Musas tero canicularium dierum otia. Historia Brasiliiana sub prælo est, & cum typographorum lentis operis luctatur. Vobis quæritur belli materies, quæ magna passim patet. mihi materies scribendi de Barbaris & Antropophagis. Vobis trajicienda non sine discrimine flumina hostilibus copiis incesse: mihi Oceanus, sed absque discrimine. Antverpia mea nolet ingloria dedi, nec se incruenta victoria vinci sinet. Stat illa intra omnium vota & spes, sed & intra fortunæ & casuum aut potius Fati arbitria, quæ an nobis indulgere cupient istam Helenam & Europæ ocellum in ambiguo est. Fui ante biduum Alcmarix apud Tesselam. pingit & Parnassos portatiles condit sagax mulier. illic vertices, latebras & secessus fabricat, unum Tibi, alterum mihi in monte fecit. Illam hic exspectamus, ut Muydam abeat cum cognato, comite perpetuo, quem, quoties joculari lubet, non Draconem, sed custodem aurei velleris vocare soleo, ne illud Iason aliquis aut Argonauta Amstelodamensis auferat. Vellem te prunis Muydensibus nobiscum vesci posse. Sed vicinior es istorum prunorum & glandium messi, quibus urbes & castella subruuntur & oppugnantur. Faxit Deus, ne istius ilicis te fructus feriat. Est enim ex illarum nu-
cum

cum numero, quarum unica prodest, nocet altera, tertia mors est. Filium quæso meum in oculis habe, & ut obsequiosus sit in dominum suum mone, & periculorum æstimator serius. optimæ est indolis, & favore tuo, etiam ob me, dignus. Vale, Hugeni præstantissime. Salutant Te nobilissimus Hoofdius & Hoofdia. Amstêl. 2 Aug. 1646.

494.

LAURENTIO BROMAN.

Amplissime vir,
 Steristi promissis, quibus te ultro superiore ætate obstrinxeras. Iam mearum est partium non fallere fidem. Mitto ergo Poëmatum meorum libellos, in quibus offendes uberem insanæ non omnino insanæ materiem. Omnis argumenti commenta habes, seria, jocosa, sacra, profana, bella, amores, funera. Est ubi invictissimi tui Regis laudes leges, ubi Oxensterniorum, & patris & fratrum memini, etiam Appelbomii amantis. Cuncta hæc & plura merearis. adeo mihi gratum acceptumque fuit τετράγωνον [quadratum] illud munus scatens viventium myriadibus, quorum parens creditur esse Sol. Ego istos vestros caseos præfero Leodiensibus: vincunt acrimoniâ, uti gens vestra acerrima est armis, ita & caseis. duplex ergo laus vestra: altera Marti sacra, altera dentibus. una naturæ beneficio, vestra virtutis & fortitudinis. Tuus quem misisti potuisset mihi suffecisse in

Pars II.

D d

bien-

biennium, sed quia plusculum habebat à putredine, coactus fui amicis impartiri, ut jam desierint esse istæ deliciæ meæ & voluptates. ubi æquior vos Pales respexerit, audebo mihi polliceri beneficam & munificam. Vale. Amstel. 20 Septemb. 1646.

495.

J O R D A N O R A M P E R S.

CUm nuperrime Neomagi essem, valde me affecit urbis vestræ nunquam antehac mihi visæ conspectus. Venerabilem illam faciunt antiquitas, bellorum fama & utriusque testes rudera, minæque murorum ingentes. Ego tibi gratias debeo, qui dux viæ fuisti & monstravisti ignota, & rarioris spectaculi. Etiam velim meis verbis salutem dicas clarissimo Smitthio, viro non minus ob humanitatem colendo, quam ipsa virtus humanitasque. Tunc in mœniorum vestrorum fastigia me perduxisti, ubi speculam à Senatu destinari ajebas. Quæ cum non possit non esse amœnissima, libuit in absentem versibus furere, cum sciam hoc in votis te habere & flagitare serio. Accipe varii carminis Epigrammata, quæ si placeant, amicis impartire: sin minus, trade Vahali, ut vel legant Najades, vel natantes intercipiat hostis. Si in Najades incident, ero poëta amphibius notus terrâ & aquis. Si in hostem; leget, quam plus faverim, quam ipsis & merito. Vale. Amstelod. 20 Nov. 1646.

496. J O A-

496.

JOACHIMO VICOFORTIO.

Nobilissime Vicoforti,

Noli ægre ferre silentium. Essem loquax satis, si Te digna haberem quæ scriberem. Loquendum mihi indies de Angelis cum Metaphysicis, de virtute cum Ethicis. Cum Angelos cogito, aulæ & aulicorum omnium obliviscor. Illi liberrime agunt, hi ab hominum nutu & gratia toti dependent. Illi carnem & ossa non habent, habent aulici mecum. Illi nec uxoribus quidquam debent, nec fruges comedunt, nec libant munera Bacchi: hi istis adminiculis ad honestam voluptatem egent. Etiam virtutis consideratio docentem me occupat, quæ quamvis ab aulis non exulat, tamen post Regum & Principum commoda stat. Satius putant fractum illabi Orbem, quam non possideri duos. Vocabulum Pacis dudum delicias fecit auribus, sed rem desidero. Quamdiu ab armis non impetratur cessatio, bellum in sinu geritur: Non à ratione controversiæ Europæ suspenduntur, sed à fortunæ ludibriis modo huic, modo illi faventis. Illud gratum fuit ex Monasteriensibus litteris ad me scriptis intellexisse: pro explorato haberi Gallos una nobiscum non simulate, ut plerisque in Hollandia visum est, sed sinceris & communibus votis pacem poscere, cujus sententiæ meæ rationes in proximis litteris meis facile deprehendes. Legi illa quæ

D d 2

ad

ad Vogelarium scripsisti de rebus publicis : de Lusitanis , Hispaniensium Legatorum querelis super mora nostrorum , de statu Brasiliæ , Belgicæ , de nuptiis Brandeburgicis. quædam placeant, quædam displiceant. Ego nuptiis D. Gracii interfui, sed accubui velut viduatus comparatur. viduis ad fastidium gravibus opposui gravitatem meam Zenoniam , & tangere illas detrectavi , quæ tangi à philosophis nolunt. Non sum ex Pythagoreis , qui à carnibus abhorrebant , sed Aristippi secta. Quod malim credere Te , quam viduis istis , quibus grande supercilium , probare. de his tecum jocari amem, quam meditari verba apud matres Gracchorum. Vale, amicissime, & D. Zulechemum, Brasettum, aliosque saluta. Amstelod. 25 Novemb. 1646.

497.

CONSTANTINO HUGENIO.

*N*obilissime vir ,

Non possum in publico Domus Auricæ gaudio , post aliorum applausus & gratulationes filere, licet serius forte loquar & post festum. Acceperam Haga ab amicis nuptias protractas iri in Sacros Natales. Excusavi moram epigrammate ad Principem Brandenburgicum , cui si Tu quoque faciles voces commodare velis , feceris mihi rem gratissimam , & quæ deceat pectus istud tuum generoso honesto percoctum. In carmine non jam paginam facit Venus

nus Britannica, sed Vandalica: non Tamesis, non Britannus; sed Viadrus, Vistula, Cassubius, aliaque istarum terrarum ad mare Balthicum nomina. Polypi sumus, cui scopulo postremum adhærescimus, ejus colorem imbibimus. Hoofdius cum febricula diu luctatus convaluit. Tef-sela præter sacra nihil loquitur vel scribit. Me editio Historiæ Brasiliæ occupat, quæ jam carceres mordet. Vale. Amstel. 14 Decemb. 1646.

498.

BERNARDO PANDELARIO.

Doctissime vir,

Petis à me lugubre quiddam in obitum præstantissimi viri I. Beverovicii, quem à mortis condicione vindicare non potuerunt, quæ pro salute & valetudine ipsa, non sine genio, lætior valensque scripsit. Nempe ulciscitur se mors, quam Medicus avertere ab ægris mortalibus conatus fuit scriptis & pharmacis. Quia parentare ipsi pius instituisti, accipe & vocem meam & singultientem noeniam, quam cum aliorum lamentis, si ita visum, confundes. Vivum colui & dilexi: nec mortuo deesse cupio, iis versiculis, qui non virtutum ejus digni præcones, sed affectus nostri indices erunt, saltem apud eos, qui laudis posthumæ minus egere defunctum, sed tot virtutibus & honestæ famæ immortuum decessisse tecum & mecum credunt. Vale. 13 Mart. 1647.

D d 3

L E-

L E C T O R I.

Epistola sequentes serius ad manum venerunt, dignæ tamen ut superioribus, licet extra temporis ordinem, adjungantur.

499.

S I M O N I E P I S C O P I O.

NÆ quam vos estis opum vestrarum prodigi, qui ex reliquiis Danaum atque immitis Achillei tam luculentam dosin mihi reservastis, idque ob hoc, quòd ad aliquot septimanas operam dentium vobis fideliter locaverim, licet honestiorem causam vos prætexatis. Ego, tuum nec non aliorum fratrum in me propensissimum affectum, necnon illud affectus liberale testimonium animitus exosculor, illa verò de laboribus meis & fideli vobis navata opera judicia verecundè amolior. Iam mearum erit partium aliis officiis vobis litare, quod si thure non possum farre fiet aut falsa mola, quæ pauperum esse solent donaria. nunc gratias vobis agam tantum, ubi occasio se dederit, referam. De turbis quas hic dederunt sine veste heroës jam inaudivisti. Nostri ad primum hunc insultum animum despondere videntur. Sed culpa est non populi, sed eorum qui præire debebant. Seniores animalia sunt meticulosissima. Fortè cor amplum habent. Præcipuè iste vir pili, ut cum Hebræis loquar. D. Borrius nisi medicinâ illi occur-

occurratur propediem lapis fiet. Totus atrabiliaris est. Civibus nostris & Remonstrantibus animi gliscunt magis, & in adversam partem excandescunt. Sed vix consilio illos juvare audent, qui agmen ducere debebant. Hodie turmatim Leyderdorpium confluunt; sed isti bono seni ædium direptionem quoque minantur, qui ædes non habent. Omnino necessarium arbitror, ut D. Dwinglo & D. Corvinus Epistola ad Ecclesiam missa animos nostrorum erigant. Canonicas Synodicos expectamus. D. Vorstio metuo. Tibi minimè. Tantum profitendi jure excides. Octavus Maji ne mihi quoque fatalis sit vereor. Iustificationem istam cujus mentionem injicis jam concipere aggressus est D. Grevinchovius. Verum propter brachii morbum & symptoma in me provinciam istam transfert. Hisce meas finio & te cum aliis fratribus salvere jubeo. Raptim, Lugd. Bat. 28 April. 1619.

Nostris animos recolligere velle videntur in diem Solis proximum, & in urbe de habenda concione cogitant.

500.

CONSTANTINO HUGENIO,

τὸ ξύλον τορνεύοντι., [*lignum tornanti,*]

C. B A R L Æ U S S. P. D.

Epistola Iocosa.

NOn jam te Equitem Britannum, Constantine Hugeni, non summi Principis Secretarium, non Cæsarei Iuris consultum, non Pieri-

D d 4

dum

dum alumnum compello. Nobilitatis, doctrinæ, magnanimitatis, omnisque præterea heroicæ virtutis appellatione minor es, qui summa ista fastidire cœpisti. Tot apud me dignitatibus excidisti, tot amisisti titulos, tot laudum & honorum nomina detrivit perlatum hesterno die de te studiisque tuis nuncium. Itane manus illas profanare audes, quibus Principum responsa expedis? profanare oculos Barlææ tuæ illic? profanare genua, quæ regibus flexisti, pedes, quibus tot aulas conscendisti? digitos nobilioris & perennantis calami motores? membra omnia, ad splendorem Gratiarumque & Musarum lepores ac delitias comparata? Quæ hæc rerum nova facies, quæ stupenda metamorphosis? Non ita me verius Lycaon, non lapidescens Niobe, non latrans Hecuba, non virescens Daphne afficit, uti Hugenus τὰ ξύλα πορνεύων. [*ligna tornans.*] In olores, serpentes, flumina, pisces, montes ipsos mutatos homines legi. Iureconsultum in operarium, Equitem in sedentarium, Secretarium in opificem, Nobilem in mechanicum, Poëtam & præstantissimorum carminum fabrum, in fabrum lignarium, in tornionem vel toreutam (hoc artis proprium nomen est) mutatum nunquam legi, O tempora, ô mores. Quam verum illud Satyrici:

Si fortuna volet, fies de Consule Rhetor.

En, cum fortuna volet, factus de vate toreuta es. Nisi non tam fortunæ hoc ipsum, quam rationi adscriptum voles. Studio enim mihi videris

deris aut illustre vitæ genus cum vulgari hoc aut ignobili mutasse ; aut maxime disparata vivendi genera, ut mirabilior sis, in te consociasse. Ergo, cum vis, ad aulæ temores curasque componis : cum vis, turbam Remi sequeris : cum vis, quantivis es precii ; cum vis, nullius ; jam nobilium ordini, jam plebejo insertus : jam otii, jam laborum amans : jam honorabilis, jam mercenario similis. Inopinatum erat Iudæis Saulum inter Prophetas furere, mihi inopinatum magis, Hugenum asciam, scalprum & dolabram tractare. Stratonicus citharædus regi Ptolomæo aliena à regno tractanti respondit : alia res sceptrum, alia plectrum : quam ego verius dixerim tibi, alia, ô Constantine, res plectrum, alia scalprum & tornus. Etiam in te quadrat proverbium illud ὁ δὲν πρὸς ἔπος [*nihil ad versum.*] Dixissem pene & illud in te quadrare ὁ δὲν πρὸς τὴν χορδὴν, [*nihil ad chordam,*] nisi expensis artis tuæ utensilibus comperissem, circa chordam te quam maximè versari, & quidem, quod in vitio positum est, eandem. De Silenis Alcibiadis audivisti. Imagunculæ erant, quæ clausæ ridiculam tibicinis speciem exhibebant, apertæ numen aliquod ostendebant, ut artem scalptoris gratiorem jocosus faceret error. Tu quoque domi clausus, & in ædium tuarum fastigio delitescens imaginem tuis exhibes restiarii & vascularii. Sed dum apertis foribus populo te Principique tuo ostendis, gratior illustriorque exis. Sed quam miror istam partim

restiarum, partim lignariam artem placuisse homini ad bonum publicum nato & educato. Si ærarius faber æs Corinthiacum pulsares, non eruditionis solum tuæ virtutisque, sed & tam claræ & sonoræ artis strepitu vicos compitaque impleres. Si architectonicam selegisses, minus alienam à politicæ studiis elegisses, cum hanc architectonicam metaphorica appellatione indiget Aristoteles in Ethicis ad Nicomachum*. Si Cyclopicam, scutum Principi tuo fabricare posses, quale Æneæ fecit Vulcanus, bellorum nostrorum & tot triumphorum imaginibus cœlatum. Si figulus esses, pro te in promptu foret allegare reges, Agathoclem patrem & filium. Iam vero quo nomine hoc genus artificii laudem nescio. Laconem quendam, cum Lampen Æginetam laudari audivisset, quod prædives esset & multorum navigiorum dominus, respondisse ferunt: Non moror felicitatem ex funibus pendentem. Nec ego tuam istam artem à funibus supra & infra pendentem. Quid? quod nullam tibi ac nomini tuo dissimilem magis noverim. Non itas artifex, sed sedes; non constas tibi, Constantine, sed in perpetuo motu, Ixionis instar, cœlum inter terrasque, manus, brachia, pedes moves & libras. Verum ne & hic quod regerant Scepticis deesse putes, dicam ea, quæ pro tuâ arte adduci ab illis possent. Illorum hoc foret pronunciatum probabile: non minus laudabiles quam vituperabiles esse toreutæ, vel ob hoc: quod res scibilis credatur, mu-

* Lib. I, cap. 2.

are quadrata rotundis, omnes autem homines
 naturâ scire desiderent: vel ob hoc, quod gene-
 osiores animæ motu, uti illi, gaudeant: vel ob
 hoc, quod ipsam hominis animam Cicero ἐνδε-
 χεται, sive perpetuam motionem definiat. Vel
 ob hoc, ut cum Horatio moneant, male torna-
 os incudi reddere versus: vel ob hoc, ut erudi-
 tissimis Martialis epigrammatis de phiala subti-
 lissima Pauli & Rufi celebrentur; vel quod ho-
 minis doctrina, moribusque imbuendi metho-
 dum exhibeant. Vti enim rude lignum securi
 primum refecant, mox dolabra levigant, denique
 rotando subtilissimis gyris perficiunt & effor-
 mant: ita hominem refectis barbariæ ac vitio-
 rum nodis, sensim magis magisque accuratiore
 disciplina, expoliendum docent: vel ob hoc, quod
 equitibus analogos motus edant, dum ligno suo
 suppedaneo artificiose inequitant, & minus ob-
 sequentem illum equum, non calcaribus, sed ite-
 ratis pressionibus fodiant. Vel ob hoc denique
 (ne quid dicam ἀπερὶς δίοουσον) [*non ad Bacchum*]
 quia crateres scyphosque formant, quibus Dii
 hominesque πίνεσι ἀιθοντα οἶνον. [*bibunt fulgidum*
vinum.] Vale, Hugeni clarissime, & hæc soli tibi
 scripta puta. Quin si ita visum, lecta inter nos
 pereant. D. Brosterhusio hanc ingenii mei lasci-
 viam imputa. Is enim ad illa tua sacra admissus,
 vastum illud tuum & omnis disciplinæ artisque
 capax ingenium in occulto latere passus non
 fuit. Vale & uxori tuæ dilectissimæ à me salutem.
 Quid puer Ascanius superatne ac vescitur aura
 Ætherea?

E I D E M.

O Bsequar imperiis. En jam tibi seria mitto ,
 Verbaque, purpureo quæ placuere patri.
 Inspice, cognosces animi commenta sereni ,
 Et mixtos aliqua simplicitate jocos.
 Lusibus, Hugeni, me progeniere parentes ,
 Lusibus & risu te genere tui.
 Lusibus aula vacat, vacat omnis lusibus ordo ,
 Ludit anus, conjunx, virgo, puella, senex.
 Omnia cum ludant, cum tota Batavia plandat ,
 Unus ob amissas ploret Iberus opes :
 Obsecro, ne noceant uni sua gaudia vati :
 Cecropidæ flenti præfero Democritum.

Mitto, quæ ad Illustrissimum Molinum scripsi ,
 quæque rescripsit ille, additis etiam versiculis
 Bonifacii, & quas reposui Elegiis. Miserat an-
 te hac idem Senator ad me Satyram eruditam,
 cui titulus Hieromastix, authore Nobili Vene-
 to, quâ egregiâ libertate perstringit Clerum
 Romanum. Vellem te legisse. Aliorum versus,
 quos adjunxi, parum pensi habent miserum scri-
 ptum Pseudole. Vale præstantissime Hugeni,
 & Barlæum ama, qui lectis tuis litteris ingenio-
 sissimis se tecum in gratiam non rediisse, supra
 modum gaudet. Occurrit illud Hortensii, qui
 gloriari solebat, quod nunquam cum sorore in
 gratiam rediisset, utpote quam nunquam offen-
 disset. Utinam Heroicam illam tuam invecti-
 vam viderem, vel capitis mei periculo omnes
 ictus

ictus exciperem. Pythagoreorum effato me sol-
larer,

ὅς κε πάθῃ τὰ κ' ἔρεξε, δίκην ἡθεῖα γένοιτο.

[*Quæ fecit patiatur, fiat vindicta divina.*]

Zoroastres, Apolloni Thyanæ, Medea, Circe
amissa restituite. Tuque triceps Hecate & tria
virginis ora Dianæ. Vix dixcrim, quam me affe-
cerit recens illud nuncium de rapto aureo vel-
lere. Portantur Iberi Regis opes pelago, &
tantis dux Heinius ausis. Iam Poëmation insti-
tui hujus scribere argumenti. Iterum vale, nec
posthac quicquam à me expecta, præterquam
seria, ad quorum lectionem ipse surgat è curuli
sella Cato, & infulam componat sacerdos.

502.

P E T R O C. H O O F T.

V Ir. amplissime,

Dum amicos circumspicio, quibus plu-
rimum me debere agnosco, inter primos occur-
ris tu, cujus prolixam nuper humanitatem &
benignitatem expertus fui, cum rancidos ali-
quot versiculos tanto precio redimeres. Ex
animo loquor, non scripseram illos lucelli ali-
cujus spe, sed ut magno isti viro, quem fatorum
jam adversa vis exercet, gratificarer, & egre-
giis tuis virtutibus meum quoque testimonium
commodando, tam celebrem amicum lucrarer.
Ideoque puduit pro munere grauias agere, ne
venales domi Musas alere viderer, & littera-
riam nundinationem approbasse. Nec tacendum
quoque

quoque mihi semper putavi, ne insigni ingrati-
tudine Deorum dona sprevisse, crederer. Silui
itaque, donec argumentum nactus essem refe-
rendi gratias, non quæ tantis beneficiis respon-
derent, sed quibus ingenuè testarer, non nisi à
chartulis, versibus, pedibus & metris poëticis
me esse instructum, nec esse referendo, nisi iste
fortè paucorum foliorum apparatus placere
possit. Mitto exemplar Hymni, quem in Chri-
stum scripsi ad Christianissimum Regem, non ut
poëticæ artis documentum aliquod seculo da-
rem, sed ut pietatis me studio hic & alibi pro-
barem. Qui Principum summorum laudes an-
te hac carmine tentaveram exequi, idem me of-
ficium Servatori nostro, & æternæ salutis Prin-
cipi debere putavi. Consecrant Apollini suo
Hymnos poëtæ veteres tanquam carminis &
facultatis istius auctori. Quid ni & nos gratis
præconiis in Redemptorem nostrum reflecte-
mur, quem omnis boni non fictum, sed verum
largitorem agnoscimus & prædicamus. Vbi re-
missiore fueris animo, horulam versiculis hisce
impende, afficient fortè quædam legentem, si
non doctè, saltem piè dicta. Videbis illic mi-
nus me Theologum esse, ubi magis Poëta sum;
illic minus Poëtam, ubi magis Theologus sum.
Vale Vir præstantissime, & me tuum cense, sicut
fundum possis in alieno loco, nunquam aut rarò
visum. Lugd. Bat. 8 Id. Ian. 1629.

PETRO CUNÆO.

V Ir doctissime & celeberrime,
 Nisi nauta iste tuus, homo supra modum officiosus, literas ἀνάπαλιν [vice versa] exegisset, distulissem responsum ad dies paucos. Cras enim mane primam habebō lectionem hora nona. Orationes Inaugurales habitæ sūt dictis diebus, præsentibus Coss. Scabinis & Senatoribus omnibus, uno excepto, qui avem Iunoniam nomine refert. Aderant etiam Pastores Ecclesiarum aliquot, quod genus hominum minimè expectaveram affuturum. Omnia per Dei gratiam ex voto succedere. Physicam prælegam publicè, initium facturum à libris Aristotelis Physicæ auscultationis. Verum his præmittam lectiones aliquot de Veterum Philosophorum celebrioribus sectis Academica, Stoica, Epicurea, Peripatetica. Oportet salivam moveri mercatoribus, & studii istius amorem gratiores aliquo argumento in iis excitari. Cogimur togati docere, quem in finem triginta nos florenis annuis donavere Coss. more Leydensi. Locum quem designas in lib. de rep. Hebræorum postea consulam. De tua πρὸς πρεσβείας [de præsidentia] sententia non dubitant boni. Erat nasutulorum ista observatio ad titulum. Orationem à me habitam proælo commisi. Etiam D. Vossius suam. Videbis utramque ubi proælum effugerint. Carmen hoc, post habitam

habitam Orationem Magistratui distribui curavimus. Nec enim vetus meum *βρεκέκεκεξ* [*ranarum carmen*] dediscere possum. Vbi à lectionibus respirare dabitur, & mea feliciter peperit, advolabo. Desidero enim tibi aliisque amicis loqui. Exemplaria hæc velim per Iohannem tuum ad eos, quibus inscripsi deferri. Vale Vir clarissime & cognate dilectissime. Gratulor tibi natam filiolum. Ea ut in subsidium & solatium parentum adolescat Deum rogo. Mæ propinquitus partus adest, ut Amphitruo apud Plautum loquitur. Necdum tamen peperit. Vale & uxorem puerperam, ac liberos saluta. Raptim. 12 Ian. 1632.

504.

P E T R O C. H O O F T.

M *Agnosce vir,*

Mitto, quam petieras à clarissimo Heynsio, motuum Belgicorum historiam, sed *ἀκέφαλον* [*sine capite*] illam & *ἀνευ προοιμίου*. [*sine præfatione.*] Talem enim se à nobilissimo Mylio accepisse scribit, cui ab Illustrissimo Molino Senatore Veneto transmissa fuit. Vbi, quæ desiderantur, acceperit D. Heynsius à N. Mylio, hic à Molino, compos eorum fies. Scriptor minimè contemnendus est. Longis tamen & infinitis parasangis à Tacito veteribusque relinquitur, ut qui his ipsum comparare sustinent, minus mihi videantur observasse, quid in Tacito aliisque stupendum sit. Tu illo frui, &

fi

si quid reperis notatu dignum, in narrationes tuas transfer, & Belgis tuis imperti. Multa vera habet, plurima à partium studio profecta. dictio sibi dissimulis interdum mascula & Romana, interdum plebeia & à Belgicis non immunis. modo concisa, modo laxa; modo nervosa, modo elumbis. Cujus causam in diversitatem autorum rejicio, ex quibus hæc ipsa decerpfit. Quod & Thuano accidit, qui ut laboris compendium faceret, dum ex variorum ad ipsum missis chartis libellisque opus contextit, retentis autorum verbis, historiam nobis dedit non ejusdem genii & linguæ. A Domino Zulechemi non ita pridem literas accepi, quibus hæc in fine subscribit: Præstantissimo Hoofdio tantum nunc salutem dici cupio, scripturus propediem, & moniturus prudentissimum autorem de nonnullis, quæ illustrandæ historiæ, quam feliciter pertexit, apprimè, ni fallor, conducere judicabit. Vides quæ quantaque ab heroë nostro expectare debeas. Princeps noster cœptam Bredæ obsidionem solvit, voti sui compos, nec enim alio consilio urbem istam tentavit, nisi ut hostem Trajecto ad Mosam averteret, quem simulac cum toto exercitu obsessam urbem deseruisse, & Brabantia interiora Bredamque petere ex literis Principis Buillonii intellexisset, ilico exercitum Breda abduxit. Gloriosissimam crede hanc Principis abitionem, non ignominiosam, uti imperitum vulgus censeret. Hæc Haga ad D. Vicofortium

scribit Kinschotius. Scripsit eadem Dominus Zulechemi ad suos è castris. Vale Vir summe & officiosissime, uxoremque humanissimam filiamque modestissimam, & Iulum tuum familiaræ spem meis verbis saluta. Quod si postremus hic officii huius mei nondum per ætatem sit capax, osculo verba mea redime. Amstelod. 12 Sept. 1634.

505.

THEODORO SCHREVELIO.

D *Octissime vir, & amicorum integerrime,*
Carmen illud tuum Eucharisticum à genio & argumento placuit. Genius is inest carmini ut te ipsum superasse videaris. Aliis senescentibus languet œstrum & Apollinaris vis, tu sexagenarius novos motus concipis, & Parnasum omnem in tua vota sollicitas. Cum afflictam urbem caneres, vidi hic illic afflictæ vatis vestigia in ipso poëmate. Iam, quia lætiora canis, meliore vena fluunt versus, utpote à sereniore animo profecti. Ita judico, Te nunquam melius scripsisse carmen. Dixi, etiam ab argumento mihi placuisse, nam gratulor urbi vestræ, quam benigniore jam vultu adspectat clementissimus Deus, post tot civium funera, rogos, suspiria. Respondissem tibi citius, sed volui una mittere Orationem meam de Cœlo, ne putes me à veteri amœnitate prorsus exaruisse. Alia voce Sapientiam tractat Philosophus, alia Orator. Illius dictio horridior est, huius blandior;
ille

ille artem quam callet , ubique profitetur. Hic dum disputar , ipsam disputandi artem dissimulat. Inscripti exemplar D. Bacchæro , D. Bodechero, & Boxbornio Professoribus. Quibus illud , cuique suum , tradi vel per famulam mitti velim. Vale amicissime ac conjugem filiasque, etiam filium saluta. Amstelod. 9 Mart. 1636.



CASPARIS BARLÆI
EPISTOLÆ
DEDICATORIÆ,
A C
PRÆFATIONES.

I.

Præfatio in librum, cui titulus BOGER-
MANNVS EΛETXOMENOΣ.

Nobilissimo & magnifico viro

OTTONI à SEVENDER

oppidi Brilensium & agri Vornensis Prætori,

nec non

*Amplissimis, Prudentissimis, Consultissi-
misque viris,*

IOHANNI HERTOCHVELDIO,
NICOLAO ERCKENBOUTIO,

eiusdem civitatis Consulibus, aliisque ibi-
dem ordinis Senatorii viris

CASPAR BARLÆVS S. P.

Q Vanquam ea sit Illustrium Ordinum
Hollandiæ ac Westfrisiæ, & inter illos
vestra quoque Pietas Viri amplissimi,
ut neque benevolorum laudibus illi quicquam
accedere, neque malevolorum obtreccionibus
quicquam decedere possit; tamen, ne aut ingra-
tum

tum hoc nostrum audiat seculum, in quo suum innocentiae desuerit patrocinium, aut spreta omnino calumnia ab ipsa animum sumat impunitate, tempestive, & prudenter illam ab improbiis quorundam calumniis, & nupera Doctoris Franekerani epistola vindicavit, honoris etiam vestri assertor, H. Grotius. Qui vir cum honestissimis, & laudatis ab omni ævo rationibus patriam suam sibi, se verò patriæ devincire statuisset, post assertam illi Maris navigandi Libertatem, in qua Reip. hujus nostræ & subditorum positæ sunt fortunæ: post erutam ex vetustissimis superiorum temporum monumentis Aristocratici Batavorum imperii Antiquitatem; hoc unum adhuc se illi debere putavit, ut ab ea virtute, quâ maximè ad Deum acceditur, Pietate dico & Religione, Proceres ejus commendaret, & uti in aliis, ita hîc quoque animi sui, ingenii consiliique lumen Patriæ ostenderet. quod illi, qui longius positi sunt, aut post venturi sunt, cognoscant, hæc regna non tam calliditate & robore, quam syncero Dei cultu adversus hostium suorum rabiem & dolos in hunc diem stetitisse; qui verò domestici sunt, reverenter de illis sentire discant, quorum actiones ad Pietatis normam exigì posse compertissimum sit. Cornelius Tacitus sapientiæ & prudentiæ civilis certissimus dux, *Cæteris mortalium in eo stare consilia*, ait, *quid sibi conducere arbitrentur; principum diversam esse sortem, quibus præcipua rerum ad famam dirigenda.* Cætera illis statim adesse, unum insatiabiliter

parandum, prosperam sui memoriam, cum contemptu
 famæ ipsæ quoque ipsorum contemnantur virtutes.
 Quod si ita est, civis optimi officium mihi ex-
 plēvisse videtur, qui adversus iniquas hominum
 improborum sugillationes, & surgentem undi-
 que calumniarum excetram principum famam
 majestatemque tuetur, qua læsa nec legibus sua
 autoritas, nec Reip. sua constare potest incolu-
 mitas. Accidit tamen, ut, quæ est hujus seculi
 sive perversitas, sive ingratitude, dum pronis
 animis hoc honoris sui amuletum excipit Bata-
 via, non defuerint tamen homines μεμψίμοιροι.
 [queruli.] & δυσμενῆς, [malevoli,] qui pro offi-
 cio maleficio reponerent, & susceptam Ordini
 Hollandiæ defensionem cum sua institu-
 tam contumelia quererentur. Enimverò satius
 esse judicarunt pervicaciam improbitati super-
 addere, quam culpam priorem vel silendo, vel
 modesta confessione agnoscendo, humanam in
 se sortem deplorasse. In hoc tamen mutatos vi-
 deas, quod cum antehac, laxatis impudentiæ
 fibulis, calamos suos in Ordines distrinxerint,
 nunc eosdem occultiore via, & per vere λοξῶς
 [obliquos] obtrectandi modos adoriantur, &
 qui antea ὁβρισταί [apertè mali] fuere, nunc πανῆργοι
 [subdolè mali] esse incipiant. Docebunt hoc nupè-
 ra Bogermanni & Sladi scripta, quibus tantum
 abest ut Sibrandianæ istius calumniæ veniam
 deprecentur, ut potius, occultata tamen nonni-
 hil irreverentia, eandem audacter reponant, &
 ne inulti moriantur, certatim in illum irruant,
 qui

qui contorta in patriæ corpus calumniarum tela Pietatis suæ scuto fortissime excepit. Nimirum hoc bonæ conscientiæ signum interpretantur, nunquam cedere, aut Magistratum dignitatem fastigiumque pertimescere, modo habeant, quem obtendant, fidei & religionis prætextum. Non dicit Sladus Ordines Hollandiæ læsæ Pietatis reos esse, sed *Rempublicam ipsorum, Civitates florentissimas, Academiam nobilissimam, apud exteros, tam amicos, quam inimicos, in læsæ pietatis non tantum suspicionem, sed etiam infamiam incidere, & quacunque patet Christianus orbis male audire cœpisse* *. Quod certè mendacium suum spargendo, quibusdam dubitandi, nonnullis, id quod pejus est, suspicandi, perversis vero, quique Principum magnorum infamia vel pascuntur vel crescunt, hoc ipsum, quod narrat, credendi ansam subministrat. Non dicit Bogermannus Ordines Hollandiæ pati Ecclesias Belgicas perturbari & pessundari, sed modestiam simulans, *non libere iis, ait, penes quos est ejus rei authoritas de salutari eventu serio cogitare*. Traducuntur adhæc pertinaciter Nobilissimorum Curatorum facta: Academia Lugdunensis manifestæ objicitur infamiæ: fidelissimi Ecclesiarum Pastores, legum patriarum & Religionis reformatæ tenacissimi, horum quoque hominum obtrectationibus opportuni sunt, & ne improbitatis quicquam desit, Erasmus Roterodamus, naturæ illud miracu-

E e 4 lum,

* Vide Sladi Epistolam dedicat. præfixam disceptationi posteriori cum Conrado Vorstio.

lum, Amstelodamensi quoque pædagogo vapulat. Ad quæ certè omnia filere, illius esse puto, quem nec Reip. salus, nec veritatis cura, nec debita præclaris ingeniis laus, non ipsius denique eruditionis tangit æstimatio. De me ingenue fateor, quamvis ad diuturnas hæc contendentium Theologorum lites obsurduerim, & in tanta loquentium ac scribentium turba parum à me ad hanc rem conferri posse crediderim; tamen ad extremum indomita illa maledicendi optimis quibusque, & de Republ. Ecclesia, & re litteraria bene meritis, libidine, eo adductum fuisse, ut, si non ora illorum (quod sperari non potest) obturarem, saltem insanos istos impetus, & imperiosas voces aliquantum retunderem: idque asserta illorum innocentia, qui, Deo teste, nec hæresium ullarum sibi conscii sunt, nec hæreses in Ecclesias introducere satagunt, aut schisma ullum facere in animo habent. Si quibusdam hoc nostrum studium displiceat, equidem non mirabor. Rarum est, quorum vicia taxaveris, eorum gratiam emeruisse. Quod si verò paucis, iisque bonis placuerit, mihi gratulabor, nec facti poenitebit. Hoc autem ut non sperem solum, sed & confidam, vestra facit, Viri amplissimi, singularis Prudentia & Æquitas, quæ dum inter hos Ecclesiæ tumultus, & procellas clavum Reipubl. moderantur, illam semper Helicen intuentur, ut & Magistratui suum in Ecclesia integrum sit jus, & inconsulta illa separandi ab orthodoxorum communione dissen-

sentientes temeritas compescatur. Etenim notis, nec posse Ecclesiis suam constare unitatem, nec Reipubl. suam prosperitatem, nisi ii, qui populo præsunt, etiam ipsos, ubi necesse erit, Ecclesiasticos in ordinem redigant, & exortis de Fide quæstionibus, nec ad superstitionem usque rigidi sint nihil tolerando, nec ad veritatis usque contemptum languidi quidvis admittendo, sed media insistentes via eâ parte Christianos metiantur, qua revera sunt, hoc est Fide, quæ quam paucissimis articulis absolvatur, & seriis pietatis officiis. Nec fallit vos ratio. Si enim post constans Scripturæ suffragium, & perpetuam Ecclesiæ praxin, aliquid etiam ad veritatem momenti Gentilium quoque adfert consensus, Callimachum audite, regibus Philadelpho & Evergetæ carissimum. Is veluti præsagus hujus nostri temporis, in quo inter Magistratum Politicum & Ecclesiasticum distinguit imperiosa quorundam Theologia, in Hymno suo in Iovem ita eundem affatur :

σὺ δὲ ἐξέλεο Πολιάρχης

αὐτὰς, ὧν ὑπὸ χεῖρα γεωμόρῃ, ὧν ἴδρις αἰχμῆς,
ὧν ἐρέτης, ὧν πάντῃ. Τί δ' ἔκρετόν τ' ὑπ' ἰχυν?

at tu quibus oppida parent

*Eligis. his nauta, & miles, patiensque colonus,
Cuncta simul subsunt. Quid enim sub Principe non est?
Ergo & sacerdotes, & eorum sacra, jura, munia.
Et si de adhibenda in rebus hisce moderatione
oraculum deposcitis, ab Homero hoc respon-
sum habete : ἀμείνω δ' αἴσιμα πάντῃ. Meliora*

E e 5

omnia,

omnia, quæ moderata sunt. Quare, cum causam illam, quam præsentī libello tueor, vobis probari persuasissimum mihi sit, ea autem duobus istis capitibus ferè contineatur, commodum visum fuit, hanc nostram dissertatiunculam sub nominis vestri auspiciis publici juris facere, ut, quam aliorum fortasse vellicabit malignitas, vestri Confessus tueatur authoritas dignitasque. Ut æquis animis hanc excipiat, vix scio an exposcere debeam, cum vix possitis aliter, qui & Barlæorum semper fuistis studiosissimi, & pro bonorum fama ac honore decertare honestum esse judicatis. Deus Opt. Max. ea, quæ ad Reip. vestræ felicitatem spectant, largiatur, & animum vobis det sicuti pacis amantem, ita schismatici quorundam spiritus osorem. E Musæo nostro, Lugd. Batavorum, nono Calend. Augusti anno millesimo sexcentesimo decimo quinto.

I I.

In Ant. Herrerae descriptionem Indiae Occidentalis.

Illustrissimis ac Potentissimis

D. D. O R D I N I B V S

Generalibus foederatarum Belgii
Provinciarum,

nec non

Illustribus Potentibusque

D. D. O R D I N I B V S

Hollandiae & West-Frisiae, Patribus Patriae,

Dominis meis clementissimis.

QVartam vobis, illustrissimi ac potentissimi Domini, Orbis terrarum partem, non ea qua est amplitudine, sed modicis tabularum spatiis, ac succincta locorum singulorum descriptione coarctatam, summa cum veneratione offero; ut revocatum subinde à Reipubl. negotiis animum per earum regionum vastissimos tractus, quasi peregrinantes, circumferatis, quæ humanæ avaritiæ ac cupiditatis materiam altè defossam servant. Etenim multa sunt, quæ ad propiorem Americani Imperii investigationem ac hujus historiae lectionem invitare vestras Dominationes queant. Nam præterquam quod nihil dignius sit principibus viris Universi cognitione, in quo honores gerunt, imperia ipsi exercent,

cent, opes cupiunt, bella instaurant, totum genus humanum tumultuatur; nihil verò indignius, quam eas terras ignorare, quibus imperare non minus utile quam gloriosum foret: illud insuper affirmo, non parum Reipublicæ Vestræ interesse, si Novi hujus orbis, quæque in eo sunt oppidorum, arcium, portuum, fluminum, populorum accuratam habeatis cognitionem. Etenim post res domi militiæque terra marique prospere gestas, post exactos penè insulis Moluccanis Hispanos, post tentatas Septentrionis ac maris Tartarici vias, etiam de Novo hoc orbe adeundo tandem consilia cepistis. Utique optima semper visa fuit bellandi ratio, si non in nostro tantummodo solo hostem operiremur, sed in suo quoque regno securum, Romanorum exemplo, adoriremur. Certè hac arte revocatum in Africam ex Italiâ Hannibalem constat. Norunt hoc Medicorum filii, qui affecto crure dextro ad revellendum valetudinis hostem, oppositum ex adverso prudenter secant. Sed minus feliciter illud fiet, nisi quo eundum, quo deducendæ nostratum coloniæ, quo commerciorum bono, qua securitate, probè cognitum habeatis. Laudat in Hannibale Livius, *quod omnia ei hostium, haud secus quam sua nota erant. Quare hostium exercitum & locorum situm, & naturam regionis explorari vult.* At cognosci hæc rectius non possunt, nisi ex Geographicâ locorum descriptione, quæ etiam ea, quæ non vidimus unquam, quasi præsentia oculis objicit, & Lectorem domi positum felici

jucun-

jucundoque animi remigio per rerum universi-
 tatem, & remotissima terrarum ac maris spatia
 circumducit. Hoc fine Antonium de Herrera
 Hispanum, accuratissimum Indiæ Occidentalis
 scriptorem, Latinitate donatum ad favoris Ve-
 stri aram suspendo. qui author Historiographii
 regii titulo insignis, & intima secretorum à su-
 premo rerum Indicarum Senatu admissus, ma-
 jori hanc historiam fide, quam gentis suæ bono,
 divulgasse credi potest. Illud verum est, nemi-
 nem exactius ac enucleatius terminos ac fines
 provinciarum, earumque magnitudines: Ocea-
 ni tractus, sinus, promontoria, insulas: fluminum
 cursus, flexus, ostia: lacuum & stagnorum am-
 plitudinem & situm: tot urbium, propugnacu-
 lorum, oppidorum, vicorum, coloniarum, por-
 tuum, stationum posituram, tum inter se, tum
 respectu cæli: denique regionum singularum
 indolem, quid quæque ferat, quid ferre recuset,
 descripsisse. Quod si hinc aliqua ad Rempubli-
 cam Vestram redibit utilitas, si institutum Ve-
 strum juvabit hæc nostra opera, suscepti hac in
 parte laboris neutiquam poenitebit. Videbitis
 liquido, illustrissimi Domini, quam latè diffusa
 sit hostis vestri potentia, qui non contentus Eu-
 ropæ, Asiæ, ac Africæ parte, totum hunc No-
 vum orbem sceptris suis adjecit. ex quo quan-
 tum ejus opes & in bello robur increverint, ex-
 pertus est suo malo orbis Christianus, qui nus-
 quam ferè non hujus armis oppugnatus, pluri-
 bus in locis Americano auro fasces (pro dolor)
 sub-

submit. Non adfero hoc ad expectorandum animos Vestros, sed ut priscae virtutis memores, constanti fortitudine, sub felicissimi Arausiorum Principis ductu, potentissimi hostis impetum retundatis. quo victo, illustrior tanto erit victoriae laus, quanto cum valentiore hoste pugnavistis. Ut autem vincatis faxit patriae sospitator Deus. At ubi vinci debeat & possit, hic, quem Vestris Dominationibus offero, Liber explicabit, quem ut benignis animis accipiat etiam atque etiam rogo. Ita quæ Vobis, quæ Reipublicæ ac Ecclesiæ salutaria sunt, largiatur supremum Numen.

Vestris Dominationibus humillimè devotus

CASPARUS BARLÆUS M. D.

III.

In primam Poëmatum suorum Editionem.

Nobilissimo, amplissimo, doctissimoque viro,

D. CORNELIO VANDER MYLE,

Equiti, Domino in Myle, Dubbeldam, Bleskensgrave, Antonispolder, Alblas, &c.

CASPAR BARLÆUS S. P. D.

Ufus hosce poëticos, artis minime severæ effectum, Tibi offero, Nobilissime Myli. Nec enim aliter possum: cum jampridem proprietate quadam tuum esse cœperit, à Vatibus sollicitari. Videbam utique præstantissimos Bataviæ

taviæ poëtas , quorum nomina seculi invidiam supergressa sunt , à nominis tui splendore & claritate famæ patrocinium jampridem petiisse , & renaſcentes cum patriæ libertate Musas in clientelam tuam tranſiſſe. Nec minus æquum videbatur , ut ſub cujus tutela , ac moderamine adoleſcens olim in his ſtudiis profeciſſem , fructum aliquem horum ſtudiorum ſuo jure repeteret. Quid , quod & hoc litterarum genere non leviter te affici compertum habeam , & ſparſim antehac edita à me Poëmatia applauſum tuum , & commendationem meruiſſe. Amant etiam eos , à quibus amantur , Apollinis myſtæ , & gratiam refert cultoribus ſuis gens iſta , ad laudem & gloriam nata. nec ante operæ precium ſe feciſſe arbitratur , quam operas ſuas viris principibus , & in illuſtri loco poſitis probaverit. Dicam quod res eſt. dum hoc ludo includor , nec viam , qua ad carmen itur , metuo calcare , ſenſi & me honeſta quadam ambitione titillari , & qui Theologiæ antehac præceptis imbutus minime ambitioſus eſſe debebam , nescio quo fato , aliorum de me judiciis corruptus ; erigi cœpi , & inglorium vulgus poſthabere. Fecit hæc res, ut qui amœnioribus Muſarum ſtudiis antehac valedixiſſem , & quo tempore aut ad populum , aut ad ſtudioſam Juventutem publice locutus fui , non niſi iratus ad pangendum carmen acceſſi , tandem veluti poſtliminio cum neglectis Muſis in gratiam redierim. Etenim , dum temporum

cala-

calamitate in otium invitus detrudor , ne inertiae dulcedo animum operi assuetum frangeret , quicquid à severiori disciplina temporis subducere potui, his studiis impendi : & ut ægri animi murmura subinde reprimerem , liberum spiritum per poëtarum oblectamenta , easque meditationes præcipitavi, in quibus nihil fortunæ, nihil gratiæ, nihil odio debeo. Et quemadmodum amissa zona , & rebus accisis , hoc unum superest miseris , ut cantu miseriam solentur : ita nobis , post prioris dignitatis insigne naufragium, hoc solum reliquum fuit, posse canere. A Manibus itaque Auriacis auspicatus , dein ad Panegyrim & laudes Henrici Arausiorum Principis progressus, mox in Magnæ Britanniae Regis Inaugurationem diffusus , cum æquis animis hæc excipi viderem, alia subinde scripsi; didicique , poësin scabiem esse mentis , cum perpetuo pruritu conjunctam. Utut enim quam maxime avelli voluerim, & manum, quod ajunt , de tabula tollere , tamen modo amicorum victus precibus , modo naturæ inclinatione, ad insaniam pristinam relabor , & dum pluribus animi quadam facilitate obsequor , factus sum encomiastes ordinarius. Iamque herbæ parietariæ in morem ubique conspici cœpi, in funeribus , Academiarum solennitatibus , librorum frontibus , amicorum Albis , Principum inaugurationibus , etiam , ubi conjugis in gremium lætæ descenditur. Collectis tandem hinc illinc Ichediasmatis , comperi me brevissimo tem-

tempore libros carminum scripsisse , paucis exceptis , quæ crudam & incoctam juventutem sapiunt. Non digrediar late in Poëseos laudes , amplissime Myli , nec , ut hæc mea commendem , rem laudatissimam exaggerabo. Iam ante me didicisti , poëtas in Deorum numero esse , & Apollinem , Minervam , Musas novem Iovis epulis accumbere. Qui Orientem & Occidentem domuerunt Imperatores , qui Orbi universo jura dixerunt , qui Reges victos & captivos abduxerunt , minime indignum arbitrati sunt Cæsarea majestate , liberos sensus vinculis adstringere non necessariis , & velut captivam abducere orationem. Quam gravi carmine laudatus ille Germanicus cœli *φανόμενα* [*apparentias*] exhibet. Quam lepidis trochaicis Florum ridet Adrianus. Quanta æmulatione de carminis principatu cum Lucano contendit Nero. Possem etiam in exemplum citare Mæcenatem illum , ab Etruscis regibus oriundum , etiam Octavium ipsum , & post hunc Gallienum , Cæsares ; qui à Reipub. negotiis ad carminis tranquillitatem , tanquam ad portum faciliorem , se receperunt : ut minus recte rationes subduxisse mihi videantur , qui dignissimas hæc honestissimasque artes , ab aula , à nobilitate , à purpura , ad Scholas tantum , & mediam , cirratamque turbam veluti relegant. Sed ut ad me redeam , quoties animum à cogitatione gravi & solitudine , quæ duæ sunt nutrices dolorum , abducere studeo , paratius nihil occurrit ,

Pars II. F f quam

quam ut jucundissima Musarum consuetudine
& commercio fruar. Qui à scorpiis icti sunt ,
ab iisdem remedium petunt. Ita qui litteris su-
mus addicti , fessam tetricis philosophiæ studiis
mentem, iisdem, sed amœnioribus , sed suavio-
ribus , recreamus. Milites dum in hybernis ac
æstivis agunt , nec vel prælio experiri , vel sub
pellibus excubare necesse habent : tamen iis
lusibus relaxant animum , qui militiam sapiunt.
Aciem instruunt , hastas vibrant , equos armati
conscendunt , conflictus ludicros populo exhi-
bent , & sic à belli muniis feriantur , ut per lu-
sum eadem obeant. Horum exemplo sapien-
tiam à Lycæo & Stoa in Heliconem & Parnas-
sum deduxi , & serias cogitationes in lusus &
ingenii oblectamenta converti. Quid de iis ju-
dicaturum sit præsens seculum , non moror.
Commaſculavi frontem, & qualiacumque erunt
judicia, ἐπὶ τῷ ὄντι. [*jacta alea est.*] Scio equi-
dem & plura me scripsisse ad amicos, & de ami-
cis, à quibus vultum avertit favor publicus, quæ
hic studio omisi , quia evitare temporum invi-
diam malui, quam postea deprecari. Quæ edidi,
talìa sunt, ut omnium in ea oculi conjici possint,
modo æquo ac recto oculo ea videant. Nam à
malevolorum judiciis ne Pallas quidem me ægi-
de sua protegat. Ab Eroticis, quæ sola summis
vatibus laudem pepererunt, abstinui. Iam enim
in hac ætate , qua pleraque scripsi , non ipsa res
solum , sed & ipsum amoris nomen displicere
cœpit. Eorum loco Elegias aliquot sacras ex-
hibeo.

hibeo. Illud ultro fateor, hic illic versus occurrere tenues, nec sani coloris, ut avenam & zizania in meliori fruge. Alia namque pueri, alia viri scripsimus: quædam læti, quædam afflicti: quædam sponte, quædam ex aliorum præscripto, & jussu. Et uti in fructibus alius præco-
cium, alius eorum, quos calor & matura ætas coxit, sapor est: ita & in hoc corpore quædam cura, quædam facilitas & negligentia peperit. Tibi, Nobilissime Domine, hoc quicquid est litterarii muneris do, dico, utinam virtutum tuarum tam perenne, quam mei affectus cultusque sincerum monumentum. Magnatum mensis etiam fugaces ac horarii fructus apponi solent. Quare, ne minuta hæc, sed fortasse oblectantia, despice. Pelides iste Homericus inter arma fides & citharam interposuit. Idem facito, & optimo interjungendi genere, inter seria, hæc ludicra legito. Vale Vir nobilissime ac doctissime, & me, quod facis, ama. Lugd. Batav. E Musæo nostro, ipsis Idib. Martii, anno à nato Salvatore 1628.

In Poëmatum suorum Editionem
secundam.

Nobilissimo, amplissimo, doctissimoque viro
D. CORNELIO VANDER MYLE,
*Equiti, Domino in Myle, Dubbeldam, Bleskens-
grave, Antonis-polder, Alblas &c.*

C A S P A R B A R L Æ U S S. P. D.

PRodeunt jam secundum sub nominis tui au-
spiciis Poëmatum meorum libri, sed lucu-
lenta accessione aucti, & prioribus castigatio-
res. Ex quo enim primum ea edidi, loquacem
me valde fecerunt publica Patriæ commoda,
& felicissimi rerum nostrarum successus. Poë-
tarum est, teste Aristotele, imitari; nec poësis
aliud, quam concinna rerum quarumlibet imi-
tatio. Dum ergo Batavi pugnamus, urbes sub-
ruimus, maria infestamus, classes diripimus,
domi forisque terribiles sumus, adfui omnium
imitator sedulus, & numeris poëticis inclusi
res cœlo ac terra, Oriente toto ac Occidente
disjunctissimas. Iam ultra Atlanticum mare ra-
ptus, in Cubæ littoribus cum Argonautis no-
stris steti, & anhelantes spe prædæ animos,
mox pugnaces, inde rapaces dexteras, illam ha-
bendi famem, illam auri sacerrimam sitim, illud
gloriæ in ducibus studium, illos exultantis po-
puli applausus, qua potui, suis coloribus ex-
pressi.

pressi. Et cum verissimum sit, intellectum id omne fieri, quod cogitat, etiam ipse naves conscendere, per foros discurrere, operta recludere, rapere & convasare obvia quæque mihi visus fui. Nec enim suavius est amantibus suum somnium, quam Poëtis suum, & quas res parcius illos possidere vult scæva illa Dea, earum vel sola cogitatione frui volupe est ipsis. Quam ob causam Socrates in Phædro poëtarum & amantium insaniam inter præcipua bona collocavit, quod sola mentis agitatione felicissimi sint. Argonautarum laudibus defunctus, Vesi- liam, velut nocturnus aliquis Diomedes, furtim ingressus fui, & inter spem ac metum positus, hic, attonitis custodibus, una stupui: illic inter laxantes claustra Sinones promovi operas: alibi cum cataphractis adventans nutantem urbis fortunam occupavi. Per salebras & dumeta noctu incessi, fossas subii, perrupi sepimenta, mœnia conscendi, jam portas, jam forum, jam templa, jam urbem universam, jam castella Rheno ac Lippiæ imposita, armis tenui. Omnia dum fingendo imitor, omnia factus sum, miles, dux, victor, victus, jam spoliis insignis Iberum, jam excussis Cæsareanorum scriniis Cappadocum rex. Successit grande obsessæ ac victæ Sylvæducis argumentum, in quo eundem quoque habitum indui, cum tanti operis auctoribus. ita tamen, ut dum modo in obsidentium, modo in obsessorum me formas verto, nihil præterquam poëta fuerim. Estque hoc novum

ac proprium huic arti metamorphoseos genus ,
ut dum Peliden , Nestorem , Thelemachum ,
Penelopen , Æneam , Turnum exhibet μιμητής
[*imitator*] vates , ubique tamen poëtæ chara-
cterem agnoscas , & inter mendaces vultus ve-
ram effigiem hominis cum ratione insanientis.
Nam ut furientium certa signa sunt , non vul-
tus , non color unus , audax oratio , præceps
gradus , flagrantēs oculi , corpus concitatum ,
ita & poëtarum eadem signa sunt. Nec potui
profecto tot tantisque partis victoriis carmi-
num esse parcus. Ideoque latius diffudi Prin-
cipis nostri laudes, cuius magnanimitatem, for-
titudinem , in adeundis periculis prudentiam ,
in bellis conficiendis velocitatem , præsens hæc
nostra ætas suspicit , futura mirabitur. Etiam ,
ac si parum esset res domi gestas decantasse , in
alio Orbe , quem in Critia à Platone describi
quidam arbitrantur , inter Olindæ expugnato-
res , me quoque principibus Achivis permix-
tum agnosco , & dum tantarum rerum momen-
ta & causas exequor , furore poëtico Martium
incendo , & in media irruens tela, lituos, classi-
ca, tympana Apollineis cantibus intendo. Se-
quimur , quocunque abit , victorem populum ,
& qua præit fortiter agendo Auriacus noster ,
It juxta lateri vates , ne sine teste ac præcone
res gerat posteritatis memoria dignissimas. Ita
ad quodvis argumentum publicum , quod sum-
mi Numinis clementia obtulit , saliit mihi ma-
milla , & pruriit ista diviniore auræ particula ,
ut

ut quiescere nequiverim, etiamsi voluerim quam maxime. Nempe hæc amabilis insania me jam vexat, hæc Corydonem tuum cepit dementia. ut omnino sufflamine mihi opus sit, ne dum feror fervidius, languescam tandem, aut ridendus ilia ducam. Non semel voto me obstrinxi, uti in posterum filerem, & aliis illam lampada traderem. sed redii iterum atque iterum ad ingenium, ut quod de Amore pronunciavit Horatius, ego de hoc studio verius dixerim,

Quæ saga, quis me solvere Thessalis

Magnus venenis, quis poterit Deus,

Vix illigatum me triformi

Pegasus expediet Chimæra.

Subiit etiam aliquando animum meum rerum terrenarum fastidium, & poëticam vim experiri libuit in dicendis Servatoris nostri I. Christi laudibus, ne, à quo solo hausimus hanc ipsam facultatem, ingrati silentio præteriisse credamur. Præsertim cum & Gentilium poëtarum, Homeri, Callimachi, Theocriti, Hesiodi ea fuerit in deos suos pietas, ut religionis suæ ἀρχωτέρειον [apicem] esse putaverint, ἐκ Διὸς ἀρχεσθαι. [à love principium ducere.] Atque hinc factum, ut aliis atque aliis additamentis creverit poëmatum opus, usque adeo, ut jam mole sua laborare incipiat. Totum in tres partes distinxi, quarum prima Heroico carmine decurrit, secunda Elegias habet, tertia miscellanei generis versus. Pudor est, citharœdum circa eandem chordam oberrare. est & poësi sua

harmonia & μελοποιία, [*concinna modularer*,] quæ non minus, quam Musica, & numerorum diversitatem & modulos discrepantes amat, ut ex dissonis vocibus symphoniam fabricet, & discordiam laudabili concordia componat. In vestibus placet varietas, placet in suppellectile, in libris, in cibo & potu, & nullibi non. Placet eadem poëtæ, ne aut epici carminis perpetua gravitate severitatem induat sibi molestam, aut elegiarum facilitate ac suavitate diffuat: aut Iamborum brevitatem, veluti cohibito spiritu, concidat. Tibi vero Vir nobilissime doctissimeque, hæc ociosæ mentis commenta inscribo, quia nulli convenientius possum. Cum enim animum illum tuum contemplor, non aliis solummodo studiis, sed & huic, quod jam elegimus, impense deditum, non mihi visus fui ulli congruentius hoc munus dedicaturus, quam N. T. Ut nihil de præclaris tuis in Rempublicam & Academiam hanc meritis dicam, quæ tuo patrocínio tuta in illud excrevit fastigium, ut totius Europæ scholas literarum honore, studiorum fama ac doctissimorum virorum celebritate post se relinquat. Quin & æquum putavi, ut quem totum jampridem possedisti, ejus quoque literarios fructus in solidum porro possideres. Vale Vir magnifice clarissimeque, & posthac non à Rheni, sed Amstelæ ripa scaturigines poëticas expecta. Lugd. Batavor. prid. Cal. Maji, 1631.

V.

In Mediceam hospitem.

*Ad nobilissimos, amplissimos, spectatissimos,
prudentissimosque Reip. Amstel.*

C O N S U L E S,

D. ANTONIVM OETGENS
VAN WAVEREN, *Equitem, Domi-
num à Waveren, Bochtsholl, Rugewillis, &c.*

D. ALBERTVM CONRADI
BURGIVM, *ad Magnum Russiæ Ducem
Exlegatum.*

D. PETRVM HASSELAER,
Militiæ Urbicæ Tribunum.

D. ABRAHAMVM BOOMIVM,
*in Confessu Deputatorum D. D. Ordinum Hol-
landiæ antehac Delegatum.*

Nobilissimi, amplissimi, spectatissimi, pruden-
tissimique Consules,

Quod in cœlis Deus est, in terris Princeps
est. Ille nullius imago, quia à nullo. Hic Dei ima-
go, quia ab illo. Deus paret nemini, quia infe-
rior nemine. Princeps Deo, quia solo Deo infe-
rior. Illius potestas terminum nescit, quia divi-
na est. Hujus, cum hominis sit, termino modo-
que circumscribitur. Ille legibus solutus, quia
solus leges fert. Hic iis adstrictus, quas à Deo &
recta Ratione accipit. Numinis arbitrio & vi
aguntur omnia, etiam Rex, Regina, Princeps.

At horum nutu non nisi imperio subditi. Deus, quem submisse colat, amet, veneretur, non habet, quia nulli debet. Princeps solum Deum; cui & se totum & Principatus sui debet decora. Assurgit Principi populus. Deo & Princeps & populus. Qui Deo debetur cultus à religione est, quæ animas creatori arctius alligat. Qui Regibus, qui Principibus, ab ea pietate est, quæ officiosa esse in illos, sed remissius, amat. Habet mundus eximia plurima, magnitudine sua, sublimitate, splendore stupenda. Fulget in cælo astrorum omnium Princeps Sol, & mortalium in se oculos & anni spem convertit. Fulget Luna & siderum illustris exercitus. Luce, motu, tacitisque influxibus admirabiles sunt & pene venerabiles. At Principe nihil grandius, nihil sublimius, nihil illustrius habet suppositus cælo orbis. Non lucet sibi Sol, sed nobis. Movel se, ut hominum promoveat commoda. Nec vivit sibi Princeps, sed subditis. qua hic fulget luce, fulget & gaudet populus. Majestatem suam appellatione, usu suorum putat. Hinc in Deum & Principem, licet dispari affectu & studio, reflectimur amore, obsequio, reverentia, fide. In Deum, ut omnis boni & felicitatis humanæ fontem principiumque. In Principem, veluti tantorum bonorum Curatorem & administrum, adeoque à summo Numine secundum. Nec enim propius ad Deum acceditur, quam hominum tutela. Eminere regium est, sed magis prodesse & servare. Prima ipsorum virtus, patriæ, sociisque

que consulere, orbi quietem, seculo pacem dare. Harum rerum conscientia insidet alte mortalium animis, usque adeo, ut quoties augusto Principum vultu frui ipsis licet, numen aliquod se in terris adspectare putent, & ejus occursum tanquam ad fulgidioris astri jubar ortumque recreentur. Amant flagrantius adspicere cos, à quibus benigne adspiciuntur. Tradunt se totos illis, quibus non servitus civium, sed cura tradita est, qui Rempublicam non sibi solum, sed se quoque Reipublicæ devoveri volunt. Veneratione excipiunt Moderatores orbis, cujus partes sunt, & diffusos in Principem potentiae divinae rivulos attoniti admirantur & suspiciunt. Regem da, vel Reginam, quamvis vel Indis illa, vel Afris, vel Sabæis, vel Scythis imperet, sive magnanima fuerit Semiramis, sive bellicosa Thomyris, sive prudens & perita regnandi Tanaquil, sive pacis studiosa Placidia, excitabimur, commovebimur ad Imperatoriæ majestatis intuitum omnes, & reverentiæ ac gratulationis officia non invitis imperabit summæ potestatis veneratio. Non arcessam longe exempla. Venit pridem in urbem hanc vestram Augustissima Regina Maria de Medicis, familia, imperio, conjugio, liberorum sceptris thalamis illustris. Illi vos publico Reip. nomine, & privato insuper affectu assurrexistis. Cives jussi pariter ac injussi, tanquam ad novi sideris conspectum, gratulantes undique convolare. Idem plebis studium, fervor, alacritas. Documentum dedistis

dedistis grande , suspicere & Vos augusta Regum & Reginarum nomina , & charos habere, quos Deos appellavit , quantumvis zelotes , Deus. Nullum intermisistis officiorum genus , quod præstari à vobis præsens Reip. status, loci temporisque sivit oportunitas. Exhibitus honos majora , etiam vestro judicio, meritæ Principi, ut non liberatoriam hanc, sed confessoriam potius acceptorum beneficiorum tabulam credatis. Non referam publica. quod vos tangit privatum beneficium , majoribus suis debet , à quibus Civitati vestræ ea jura & immunitates concessæ, quibus latius potentiam explicatis. Quanta festivitate , quantis gaudiis, quam læto extra & intra urbis pomœria occurſu , quam prona ubique gratulatione , quam splendido apparatu , erectis hic illic Arcubus & Portis Triumphalibus , exhibitis Ludis , coacto totius Militiæ Urbanæ exercitu, Reginam exceperitis, norunt , quotquot tantorum solemniū spectatores fuere. Iam ad eadem Spectacula , ad eandem Panegyrim , vestra liberalitate & impensis admittuntur absentes, quibus coram hæc intueri non licuit. Venit jam ad illos Regina, & quæ moenia vestra subiit, nunc alibi scriptoris & sculptoris beneficio conspicitur , & salutatur. Stant ante oculos pegmata, theatra, classes, equitum ordines, civium cohortes, scenæ, dramata, prout hic steterere omnia, vel ivere. Non poterit ingrata esse eorum lectio , quorum conspectus fuit jucundissimus. Facit narratio, ut diuturnior sit

lit memoria eorum , quæ non scripta oblivione cito intercidunt. Et quæ multa singuli non videre, nunc in unum collecta, omnibus in aperto sunt. Spectaculorum & Emblematum argumenta, quæ ob subitas theatridiorum mutationes & vices pauci assecuti fuere, tranquillo & extra turbæ strepitum posito lectori explicantur, ea brevitate, quæ factis nihil magnum aut memorabile subducit. In minuta inquirere supervacaneum fuit, ob res plurimas minoris momenti, variis locis, à variis, & minus palam gestis. anxia sedulitas sedulitatis error est, cum rei summæ id omne decedat, quod minus seriis, ac non necessariis impenditur. Omnis hic apparatus ad Vos redit, Amplissimi Consules, quia vester est. Vestro nomini inscribitur, cujus vos auctores. Magnificentiae, humanitatis, & benevolentiae vestrae in maximam Principem monumenta agnoscent, quotquot hæc legent. Dicent imperio dignos, qui, cum honoris publici interest, sordes cavent. nec decere tenuitatem eos, quos populo secrevit fascium dignitas. Quod Regina, quod illustris Reginae comitatus, quod populus Amstelodamensis credit, brevi recensione postremus attestor. quæ quam gratiam derogat sibi, à vestra sperat facilitate & patrocínio. Æquis animis ea ipsa accipite, quæ æquissimis in Mediceam egistis. Placeat Vobis scribentis conatus & studium, quorum pronis in se studiis annuit Regia Mater. Qui Regum Principumque vultus in æra inducunt, quam ab arte nequeunt,

990 C. B A R L Æ I

queunt, ab insculpta Imperantium imagine benevolentiam impetrant. Dum Regina, dum Regum Genitrix, dum Imperatorum Neptis utramque paginam facit, veniam merebitur demissa & intra Majestatis apicem subsidens & fatiscens oratio. Videbitis, ubi per Reip. curas legere dabitur. Non urgeo hoc valde. illud maxime, ut qualem me erga Vos Urbemque vestram ostendi esse, talem me per ætatem fore credatis. Ita Vobis, ita florentissimæ Civitati, perpetuum Deus bene faxit. Anno 1638, Octobr. 20.

V. N. & A.

addictissimus

CASPAR BARLÆUS.

V I.

In Orationum suarum librum.

Nobilissimo, amplissimo, prudentissimoque viro,

D. J O A C H I M O

V I C O F O R T I O,

Ord. S. Michaëlis Equiti,

Et Serenissimæ Hassiæ Lantgraviæ à Consiliis, &c.

L Oquimur mortales, præstantissime Vicoforti, quod nec Angelis concessum, nec brutis.

rutis. Non illis, quia per disciplinam & voces,
 discere eos non est necesse, quæ natura perspe-
 cta habent & congenita. Non his, ob rationis
 defectum, cuius oratio est interpret. Nec loqui-
 mur solum; verum ita quisque loqui amat, ut
 persuadeat. ideoque artem adhibet, ut velut le-
 uocinio quodam orationis impetret, quod in-
 tendit maxime. Tenella & puerilis ætas subsidii
 & solatii indiga, voce ad ploratum composita,
 vel ipsam novercæ iram expugnat, ut acquirat
 quod dentibus immolet. Amantes leni ac po-
 pyrsinis suis blandiente oratione, amasiæ perti-
 naciam frangunt. Iratus concitatus loquitur, ut
 erreat; timenti remissa & tremula vox est, ut
 evadat; mœsto, languida & flaccescens, ut mi-
 seriamur; gaudenti comis & hilaris, ut oblectet.
 ita quisque sibi & Rhetor est & Orator; eam-
 que elocutionem comminiscitur, quam persua-
 dendis movendisque aliis optimam novit. Quin
 chemata sua singulis & loquendi formas, etiam
 indoctis, suos dicat affectus & vehemens inten-
 tio. Medea, Rhetorices, ut opinor, nescia, dum
 vehementer quid cupit, Epizeuxin facit. *Da, da*
 (inquit) *per auras curribus patris vehi*. Dido, ira-
 cunda & commotior ἀντιθετῇ [opposita] loqui-
 tur, *Flectere si nequeo superos, Acheronta movebo*.
 Penelope ob mariti absentiam dolens εὐχὴν [vo-
 tum] format: *O utinam tunc cum Lacedæmonia, &c.*
 Pastoribus apud Maronem modo Aposiopefin
 imperat indignatio, *Novimus & qui te: modo ob-*
 liquam Interrogationem vehementius asseve-
 randi

randi studium, *Non ego te vidi Damonis*, &c. Ut Rhetoricæ regulas non necesse sit ab Hermagora, aut Molone, aut Siculis petere, cum cuique nostrum eas dicent animi impetus & studia. Quod si verum est, quid mirum, Græcos, gentem acutam & controversam valde, in hoc annixos fuisse, ut cum rei bellicæ studiis dicendi exercitationem, cum casside linguæ, cum oleæ præmiis facundiæ laudem gloriamque conjunxerint, tunc maxime, cum regna urbesque per eloquentiam potius, quam armorum vim expugnandæ essent. Quis Mercurius ille λόγιος [*interpres*] sive Hermes fuit? me iudice, orator exercitatissimus fuit, ob facundiam pro numine habitus. Quales Nestor, Menelaus, Ulysses? oratores Græci fuere, in quorum verbis vis ἐλκυστική [*tractoria*] fuit & facultas ducendi homines, quo vellent. Et expediebat sane tales ad Trojam mitti, cum, non classibus solum & flammis, sed tropis quoque & schematibus, vincendi essent rudiores Asiatici. Graviter & prudenter locutus est Solon, oratorum Atheniensium fere primus, ut Pisistrato imperium affectanti resisteret. Contra suavis fuit Pisistrato & flexanima dictio, ut populi animos deliniret & regno potiretur. Aristoteles incredibili tum dicendi copia, tum etiam suavitate apud Alexandrum effecit, ut totam Græciam administram habuerit in scribenda Animalium historia. Demosthenes ad ἄνδρας ἀθηναίους [*viros Athenienses*] loquens Philippum Græcia arcuit, donec ab

Har-

Harpalo corruptus argentangina laborare cœpit. Tantum potuit Atticismis suis Demades, apud eundem regem, ut non seipsum tantum, sed & bis mille Athenienses prælio ad Chæro-neam captos gratis rex remisit. Dum bellis afferenda fuit Græcia, prolatandi fines, arcendi Macedones & Persæ, viguere oratores maximi. Scilicet, dicendi splendide, graviter, acriter & acute necessitatem ipsis imposuit, defendendi imperii necessitas. Quamobrem captis à Sylla Athenis, languit Atticorum Suada, & fatifcente Cecropidarum gloria, elanguit dicendi facultas, dejecta simul sceptri & linguæ, armorum & oratorum majestate, fulgore, impetu. A Græcis loqui disertius didicere Romani, sive ad bella inflammandi essent civium animi, sive componendæ seditiones, sive exigendus urbe conjuratorum princeps, sive objiciendus publicæ infamiæ futurus Triumvir, sive Reip. vindicanda salus, sive persuadendum aliud quid, cujus Romani Imperii interesset. Tunc magna C. Cethegi, Catonis Censorii, Scipionis Africani minoris, Lælii & Servii Galbæ fama fuit. Licet alium dicendi vis, alium majestas, alium elegantia, alium lenitas Græcanicæ similis erexerit. Quos secuti sunt, Cæsar Dictator & Cicero, Bruti quidem testimonio fractus & elumbis, Calvi solutus & enervis, sed plurimum & sequentium omnium seculorum, eloquentiæ Romanæ facile Princeps. Omnibus hoc studium fuit, ut docerent, delectarent, moverent. quæ tria non æque

ab omnibus præstita, nec singulis omnem laudem, nec nullam concessere. Et quanquam post Tullium exstiterint Viri disertissimi, tamen inde à Symmachi temporibus, deficiente & vergente in pejus Romano Imperio, minus gloriose & pugnare & perorare Quirites, ut nesciam, an armorum successus eloquentiam, an hæc armorum audaciam fiduciamque magis erexerit. Hoc omni seculo compertum, apud eruditos populos, animosius inter bellorum furores & tubarum strepitus pro aris & focis declamasse oratores, sive in hostem vibranda esset oratio, sive de victo hoste triumphandum.

Quo nos ævo vivimus, amplissime Vicoforti, etiam loquimur mortales, & loqui conamur, ut persuadeamus. & inter patriæ bella securi peroramus. Verum uti infantes paternas maternasque voces balbutientes imitantur, ita veterum Græcorum & Romanorum in dicendo imitatores sumus, & umbræ, & priscae facundiæ abortus & simulachra. Cum disertis quibusdam videmur, loquaces sumus, aut verbosi nimis & remissi; dum acumina affectamus, res magnas minutissimis & rancidis sententiis frangimus, nec nisi fumos ex antiquitatis luce damus. Nec tamen silendum propterea posteris, sed loquendum quoque, ne linguam ferrugo occupet, aut silentiariis adscribamur; præsertim titulo professores, qui audiri se malunt non eloquentes, quam non loquentes. maxime, cum quæ Veteres ad loquendum impulerunt causæ, etiam nos

movere possint, nempe: hostium odeæ, victoriarum gloria, principum felicitas & fortuna, quæsitæ in rebus humanis honesta voluptas, & rei vel nullius, vel stupendæ exaggeratio. Me quod attinet, dum in illustri Amstelodamensium Gymnasio inter Philosophorum tristes cathedras versor, & Thomæ, Scoti, Cajetani, aliorumque ingeniosissima commenta, sine Atticis & Romanis leporibus, eloquor, voluptas subinde me cœpit, ad vetera litterarum studia recurrendi, & deteresa professoriæ linguæ scabrie, eam affectandi dictionem, quæ Philosophorum subfelliis minus est familiaris & conveniens. Volebam etiam ab ea urbe non exulare voces veteris Latii, in qua barbaras Persarum, Arabum, Afrorum, Moschorum indies audimus. Nec dixi sine delectu. Cum primum metropolin hanc ingressus essem, (annus jam est duodecimus) mercimoniis toto orbe celeberrimam, docui mercatores sapienter & ex Stoicorum rigidis præceptis mercari, ea oratione, quæ scholæ nostræ inauguralis fuit, & *Mercator sapiens* inscribitur. Cum de Machiavello apud viros maximos & politicos incidisset sermo, & de nefario scriptore benignius quidam sentirent, dixi de *Bono Principe*, & ostendi, non indicari ab illo, quis Principum vivendi mos sit, sed quid Principem facere oporteat, non historici illum & narratoris, sed præceptoris & suasoris partibus fungi. Cumque inter Oratoris scopos sit delectatio, dixi alibi de *Ente Rationis*, hic de *Ente Reali*,

five Re , eo dicendi genere , quod nequaquam Catoni frontem corrugare possit & supercilium adducere fastidioso auditori. Est ea hominum, mi Vicoforti, conditio , ut *ἰαυματα ποῖλας* [*mira-
cula*] ament , & quicquid admirandum , suspi-
ciant & venerentur. Quare fuit, cum de *Animæ*
& *Cœli admirandis* verba feci , ne semper trita loquendo , somnolentos adspectarem auditores. Nec ignoras, inter tympana & tubas, classes & classica Batavos vivere, & Hispanorum metuen-
dam fortunam assiduis bellis fatigare , victoriis terra marique partis claros. His excitatus , in *Panegyricos* digressus fui , nec Suasoriis conten-
tus , laudavi Auriacos , Foederati Belgii patres, Remp. florentissimam, quæ pacatis domi rebus, profligata tyrannide , domito Oriente , attrito Occidente, quicquid Universi terminis capitur, nominis sui & rerum gestarum fama implevit. Denique , cum à rebus divinis minime alienam esse facundiam, grandibus exemplis ostenderint priscae Ecclesiæ lumina, Basilii, Chrysostomus, Ambrosius & Hieronymus, aliique facundissimi Scriptores Græci ac Latini, conatus fui de *Præ-
sepi* Servatoris Christi & *Cruce* ejus copiosius & ornatius loqui, ne ingrati arguamur in illum, à quo omnis hæc dicendi facultas profecta est.

Tibi, nobilissime Vir , hoc Orationum mea-
rum Opusculum inscribo, non uno nomine. Pri-
mum est, quod his ipsis studiis, quibus ad huma-
nitatem & elegantiam omnem informamur ,
jam inde à teneris imbutus sis , & facundiam
tuam,

tuam, si non in Scholis declamando, in Aulis apud Principes & terrarum rectores, scribendo prolixè explices. Alterum est, quod recitantem hæc ipsa me sæpius audiveris. ut monere jam necesse habeam, recitatæ orationis vim majorem esse, quam scriptæ. cum illam dicentis affectus accendat, acuat, attollat. hæc vero, dum motus animi abest, flaccescat lecta. Tertium est, sanctum illud & venerabile amicitiae nomen, quam tecum, ex quo pedem in Urbem hanc intuli, perpetuam colui, & conservavi. Dicam ingenue. Multa hujus civitatis decora sunt, quæ me afficere solent, ædium undiquaque conspectus pulcherrimus, stupenda Martis robora, classes & armamentaria, mercatorum frequentia, comitas, solertia, peregre advenientium, etiam ex alio orbe, mores, lingua, vultusque diversissimi, mercium receptacula, quibus aëris, terræ, aquarum spolia asservantur, templa, turre & sublimes passim Phari. Verum oculorum hæc solummodo oblectamenta sunt & pabula. quibus prætuli semper amicorum aliquot suavissimam consuetudinem, quæ mihi in agris pro vehiculo est, in urbe pro delitiis, in conviviis pro nectare, in funeribus pro solatio, in cymbulis & aquis pro Sirenibus, in ambulacris & porticibus pro pictis tabellis. Inter hoc familiam & agmen Te duxisse non dubitas, vel cum illorum invidia, qui & te & me amant tenerrime. nec enim dum te totum occupabam & possidebam, aliorum æque esse poteras. Vtique exosculatus

in Te fui virtutes summas, doctrinam, antiquitatis Græcæ & Romanæ curam studiumque, comitatem, candorem, fidem. quibus me, ceu compedibus & numellis ita N. T. devinxisti, ut jam avelli, nisi fato possim. Et cum nominis tui gratiam late foris, cum literis officiisque publicis privatisque, diffuderis & diffundas indies, etiam me hic illic, velut incertam epistolam, aulis intulisti, & eorum favore totum involvisti, quibus mihi male velle, religio est. Hæc testatus apud alios fui sæpius, jam testor publice, hac nominis tui Inscriptione quam præ se fert libellus noster, quo cultam hactenus, & gliscentem assiduis incrementis, amicitiam Tibi oppignero. Eam æternam faxit, Te vero tuosque hic fospites, alibi beatos velit ipsa Æternitas. Amstel. 20 Jun. 1643.

Nobilitati Tuæ

Cultor observantissimus

CASPAR BARLÆUS.

VII.

IN CONSTANTINI HUGENII
Zulechemi Domini &c. MOMEN-
TA DESULTORIA.

CASPARIS BARLÆI
PRÆFATIO
AD
LECTOREM.

CUM non ita pridem Hagæ essem, studio-
se Lector, cepit me voluptas, ea omnia
ibidem lustrandi, quæ aliquâ sui vel magni-
tudine, vel elegantia, vel novitate spectato-
rem detinent. Fuere in oculis Principum pa-
latia, sylvæ partim inordinatæ, partim longis or-
dinibus in quincunces digestæ, atria tot victo-
riarum monumentis conspicua, fossæ ædificiis
hinc inde ad æmulationem exstructis illustres,
curules magnificæ & pilenta *Regales vectura mu-
rus*, armamentaria & horribiles Martis officinæ,
aliaque plurima. Quæ dum lustro, ea mihi visus
sum vidisse, quæ non magis me afficerent, quam
pastilli vectorem Sileni, aut equum pictorum
tabulæ, aut simiam elephanti conspectus. Verum
publico subductus, & per amicorum hic illic
stationes domosque oberrans, forte in Musæum
nobilissimi clarissimique viri Constantini Hugenii,
Zulechemi Domini &c. delatus fui. Veni
huc plane tanquam capra ad festum suum, &

oculis meis repperi debitas delicias, & ἰδιον
 [proprium] Poëtarum spectaculum. Incidi quippe
 in grandem struem & sylvam Poëmatum,
 quæ Momenta Desultoria inscripserat. Lasci-
 viebam inter schedas hæc, conspersa mille &
 mille Epigrammatibus folia, veluti inter nucum
 cumulos cercopithecus, aut in farris acervo
 curculio. Vti ex avido armorum contactu de-
 prehensus fuit Achilles, potuissim & ego de-
 prehendi ex sollicita chartarum volutatione.
 Hinniunt admissarii equi, cum equarum odor
 nares adflat. idem fere mihi evenire sensi ex con-
 spectu tam procacis argumenti, quo pasci soleo,
 tanquam rore suo cicada. Nec contentus subitâ
 & perfunctoriâ lectione, precibus monitisque
 impetravi ab auctore, ut ea publici juris faceret.
 Quæ enim illi edi operæ precium non putabat,
 seculo doctissimo & acutissimo, adeoque inter
 amicos perire volebat, ego ut ingeniosissima &
 non obvii saporis eidem propinanda putabam.
 Displicebat foetus parenti suo, placuit suscepto-
 ri; & quem pro derelicto habebat, ut bene na-
 tum excepi ulnis, & nunc eruditorum oculis
 ostento, uti famæ gloriæque, ita & invidiæ secu-
 rum. Familiare hoc magnis ingeniis, ut quæ scri-
 bunt optima, damnent ipsi, aut quæ artis docu-
 menta dissimulant per modestiam, aliorum esse
 judicii mavelint, quam sui. Et forte non est cu-
 jusvis de hoc studiorum genere judicare. For-
 marum censores plurimos habemus, boni &
 erecti carminis paucissimos. De illis sententiam
 dicere

dicere possunt etiam maximè deformes. De his non nisi Poëtæ & ab eodem fidere tacti. Est ex illarum numero facultas Poëtica, quæ actione & usu comparantur. Et uti idoneus rerum civilium iudex esse nequit, qui se rebus & res sibi subduxit; ita poëmatis genium non capit, nisi ab eodem genio afflatus. Hæc ipsa, quæ vides, Momenta sunt, & quidem Desultoria. Momenta, quia pleraque nullo molimine, sed impetu scripta sunt, non conatu, sed nutu, non ad lentas clepsydæ moras, sed subito calore & quadam festinandi voluptate, ut veluti per tussiculas & interruptos singultus egesta videantur. Alia namque in castris inter lituos & tympana, alia domi inter supplicum flagitationes & amicorum officia nata sunt. quædam equitanti, quædam naviganti, quædam ambulanti exciderunt. quod sane vitæ genus uti longas moras nescit, & cunctationes fugit, ita præcipites subitosque animi motus amat. Desultoria sunt, quia cum non in castris solum, sed & in aulis alia se semper offerat rerum facies, alii hominum vultus, aliæ curæ, motus, iussa, non potuit non vagari mens libera & desultoriè ferri in res varias. Distrahuntur nubes roridæ à radiis Solaribus in guttulas minutissimas. nec aliter Autorem distraxere in diversa tumultus aulici bellicique, ut animum nunc celerem nunc illuc diviserit. tessella, dum aquarum superficiem ex obliquo jacta radit, saltuatim pergit. non secus, Principis sui subitis & iteratis imperiis avocatus, ad alia & alia deflexit

& brevibus intervallis ad se rediit ; non dissimilis Monomeris , Orientalibus populis , (si fides Gellio) singulis cruribus saltim currentibus. Non fertur uno tramite Poëta noster , sed in vagum , & quaquaversum curſitat. E coelo in terras, è terris in coelos rapitur. modo in sylvis, modo in montibus, modo in aquis est. ab urbibus in domos, ab his in urbes saltum facit. Iam illi vir, aut foemina, aut maleferiatus aliquis carmen facit. à flammis & incendiis publicis accenditur , rapitur per vasta maris spatia , cum Meteoris assurgit & erigitur, mordet officiosam & inofficiosam supellectilem , in singulis humani corporis partibus dentem figit , per vicos & plateas ambulat veluti ædilis aliquis, & sine populi suffragio pronunciat. nullam mundi particulam eximit suis lusibus & commentis. Vapulant illi Sol, Luna, pluvix, grando, nix, fulmina, ignes fatui , totusque exercitus imperfectorum corporum. Specula, forfices, dentiscalpia, acus, digitabula , flabella, & nihil non istorum impedimentorum , ut stultitiæ nostræ argumentum traducit. ita prisco Poëtarum more Superos inferosque, naturam omnem, & artem totam Sapientiæ , totam Morix pari libertate exercet. Laudat , vituperat, suadet, dissuadet, mulcet & asper est. speculatur cum Thalete , monet cum Socrate, censor est cum Catone, ridet cum Democrito, flet cum Heraclito. acu pungit ipsum sartorem , penicillo suo perstringit pictorem , cum milite cæsim & punctim agit , Thaidas &
Nomen-

Nomentanos nepotes lædit aliâ , hoc est doctâ
& dicaci cuspide, omnes singulosque Epigram-
mate. Est inter aviculas motacilla, quæ in salti-
bus non magnis spatiis volitat , sed breves facit
de arbore in arborem , de virgulto in virgultum
discursus. Idem facit noster in hoc Operis sui
salicto. arripit argumentum & deserit, intrat ut
exeat , venit & abit , nec , uti scopulis conchæ,
diu uni immoratus , stationem , quâ steterat, re-
linquit. sæpius incipit, sæpius definit, & repeti-
tis exordiis multas absolvit fabulas , non sine
verbere. Non invito ad lectionem sedentarios,
& qui foetus lambere in longum tempus amant,
ac continuâ mentis agitatione solidos dies fa-
tigant, non absimiles vulturi, qui Tityi ac Pro-
methei extis æternum incubat , sed eos, quibus
interrupta sunt otia , & divisi in plurima labo-
res , quique in ipso conceptu pariunt. Nec ad
Poëticum hoc epulum cupiam accedere tristes
& tetricos Deos , quibus non nisi suspirio exit
vox, sed quibus erudita comitas, & non ficta hi-
laritas , & supercilii expers frons, & jecur molle
& splen cachinnans in virtutibus sunt. Abesse
jubeo vitilitigatores , & minutiarum anxios se-
ctatores , qui ob voculæ situm aut accentum ,
frontem corrugant , & fluctus in simpulo exci-
tant. Quin & illos , qui cum noctuæ sint , in-
dignantur non videre se vim Epigrammatis obi-
ter lecti. Etiam hic locum habet : qui nucleum
esse vult, nucem frangat oportet. aquarum po-
toribus & in Bœotia natis hæc non scribuntur ,
verum

verum Lectori attento, & cui repetita lectio secreta aperit. quæ diluti & fatui saporis sunt, gustamus cum fastidio & contemptu, quæ vero erecti, attentâ pitissatione, & frictione crebrisque morficationibus. Ioviales convivas, Mitiones, Lælios, Augustos, Cicerones advoco, quibus suave est joculari sine noxa, ridere sine felle, quibus fabæ & betæ fabrorum prandia non sapiunt, sed asellos, & scaros, & apros & mullos in delitiis habent. Præstant hîc condimenta cibis, juscula carnibus, acumina rebus, apparatus argumento, qui in rebus etiam vilissimis elegantissimus est. Fulgent fumi acuminum luce. res nihili inventione maximæ fiunt. obtusa acuuntur ingenii solertia, & mira perspicacitate ipsæ, ut ita loquar, cotes pungunt. Loquor citra gratiæ spem. plurima sunt, quæ Bilbilicum vatem provocant; acumine, verborum emphasi, materiæ copiâ & ornatu. Veterum Græcorum & Romanorum acute dicta, allusiones & historiæ hîc illic inspersæ pro gemmulis sunt & coralliis, quibus plateæ, vici, lapides, utensilia, etiam corporis nostri particulæ despectiores coronantur & splendent. Intercursat τὸ ἠθικὸν τῷ φυσικῷ τὸ θυμικὸν τῷ διανοητικῷ, [*morale naturali rationale appetitivo*,] miscetur utile dulci, honestum utrique. jam Anacreonticum quid, jam Aristophanicum legis. Non unius pulpæ sunt, quæ sapiis. Prodeunt in scenam mortalium ineptiæ & multiformis fatuitas. in quam Satyram non scribere difficile est. Quare non pedes solum

in Epigrammatibus, sed & dentes invenies & ungues, quod ajunt, in ulcere. Nemo vapulat bonus, nemo impunè fert malus. Finguntur mali, non signantur. In rationis conceptibus luditur ingenio, nullius odio. Characteres crede & ideas describi potius, quam exempla viventium. Grassabatur Ajax in sues, quas Græcos putabat. Etiam furiis correpti vates perstringunt, quos nesciunt. Utopia pro regno ipsis est, subditi Lestrygones, Phæaces, Polyphemus, Circe, Calypso, à fictione sunt. Nemo in se dici putet, quod in vitium, & fieri saltem posse putet, quidquid exaggeratur ceu factum. Qui vatibus indignantur, lapidem mordent. non loquuntur ipsi. Pythius intus agit, quo inspirante non possunt non loqui. Non peccat, qui necessitate peccat, & Superum afflatu. Quisquis legere hæc Momenta vel Desulturas voles, momentaneus sis oportet & Desultorius. Ita nec iræ ob hoc, nec amor ob aliud Epigramma longam moram dabis. Non ridebis diu ob hujus festivitatem, nec dolebis diu ob alterius nœniam. Fabulæ totius partes & dramata sunt miles, studiosus, professor, sartor, pictor, princeps, rex, legatus, sacerdos, &c. ut Poëticam non particularem scientiam, sed universalem esse credas, quæ nihil intactum indictumque sinit.

Fruere, Lector, commentis ingeniosissimis. Digessi ea in ordinem, ut potui; ipsam annorum seriem secutus. noluit sibi hoc negotii dari autor, & quæ cuncta habebat contemptim, aliorum

rum curæ singula esse maluit , quam suæ. Non hîc canoras nugas & rerum inopes damus. Ab ea mente profecta sunt , quæ castrorum vallis conclusa , ubique esse amat, & palatiis circumscripta spiritum extrudit latius in obvium quodcunque. Vbi tympana Martius furor pulsat , hæc Apollinis citharam furore alio quatit. Evocata à Principibus pari fiduciâ Delo Phœbum Musasque arcessit , & jussus imperata facere à Dîs terrestribus, imperat cœlestibus. Poëmata hæc cum legis, in virtutum te area versari puta. Erga amicos candidus est vates & officiosissimus, in improbos acer, in Patriam pius, in Principes suos gratus , in hostes publicos animosus, in rebus lætis comis, in tristibus serius, in sacris religiosus. ut non boni vatis solummodo notas, sed & civis optimi ubique deprehendas. Qui famem publicam redimunt novi commeatus & luculentæ frugis vecturâ, gratiam publicam merentur. Eandem & mihi deberi puto , qui desideria doctorum recreo sapidissimis bellariis. Si sapient tibi , evasisti maledictum meum. Si non sapient, exspue. Non fert thuris odorem ad stivam enutritus , nec erecti carminis fragrantiam gens Arcadum.

VIII.

In Poëmatum suorum partem primam
anno 1645 editam.

Nobilissimo Viro,
CONSTANTINO HUGENIO,
Equiti, Zulechemi & Zeelhemii Domino,
Celsissimo Arausionensium Principi à con-
siliis & secretis.

Qui toties me hoc scribendi genere laceffi-
visti, Nobilissime Hugeni, & carminis tui
deliderio erexisti, jam, quæ mea vel ultio est vel
grati animi significatio, Carminibus vicissim
meis, vel ad nauseam, fatiare, & pro Momen-
tis tuis desultoriis, longos Sermones refer.
Etenim valde studiis differimus. Tu impetu
omnia & saltim agis, uti solent illi, qui non suo,
sed aliorum & quidem Principum arbitrio, vi-
vunt. Ego, quia minus anxie temporis tributo
attineor, traho carmen & avium more parturio
longiore incubitu. Viscosi sum & lenti ingenii,
ideoque cogor extendere & ductare poëma-
tium, uti fila sua plumbea trahit vitriarius, & au-
rifaber in immensam bracteam tundit auri ato-
mum. Tu, friabilis magis ingenii, acuta brevi-
tate absolvis cœpta. Vti in Mathesi puncta dif-
ferunt à lineis, in Physicis τὸ πῶς [*momentum*] à
tempore, in Arithmeticis unitas à numero, nos
meditatione discrepamus. Tu in carmine acu-
mina

mina & cuspides amas, hoc est puncta, & momenta. Ego lineas, tempora & numeros. Tu saltus breves & succinctos iteras, ego testudineo gradu emeritor mea spatia. Vtrumque verrat Pegasus. sed tuus totum incedit, meus succussor est. Credunt philosophi spiritus imperceptibili tempore moveri, corpora morâ. accidit idem vatibus, quorum alii pneumatici magis sunt, alii ὑλινί. [*materiales.*] Vehimur ambo curribus. Sed ego equorum opera, tu velorum. qualis iste Principis tui est, in littore. Inter Poëtas Curtii sunt & Longini, uti inter Capillatos. Mercantium alii verbo vendunt totam Orientis messem, quos tu refers, alii fastidiosè & ad indignationem usque oherant emtorem licitando, ut ego. Quod pugni est & palmæ discrimen, ascaridum & anguillæ, pedis & decempedæ, idem & nostrorum carminum. Quare cum mea leges, cave sine viatico accedas, nam diverticulis opus & respiratione. Cum tua lego, ubique domi sum, & in limine positus tango posticam. Ne tamen oneri Tibi sit prolixitas mea, constrinxi in non magnam libri molem hoc Heroicorum opus, ut Nobilitati Tuæ illud tradam, & in Famæ tuæ theatro, populo ostentem. Claudio similis sum, cui scipione opus. Pauperi, qui in publicum proditurus, aliorum honoratiore pallio indui cupit. Infanti, qui, ne pronus labet, fasciis librari eget. Ludiones puerulos humeris attollunt, ut spectatorem speciosa ostentatione alliciant. Eodem instituto

stituto Heroica hæc Tibi nuncupo, ut Heroum
 aulis, unde argumentum habent, ubi vivis quo-
 tidie & loqueris, me ingeras, & sublatum hu-
 mo, & gratia tua amictum, tibiue innixum, si-
 stas aliquando Iovi & Superis, ne à scarabeis &
 vespis pungar. Et audeo profecto hoc à te pe-
 tere, ob validam amicitiam, qua tibi alligor, lit-
 teris, colloquiis, versibus, feriis, jocosis, etiam
 cum res sinunt, Cerere & erectiore Liberi pa-
 tris succo. quem Pegasi ungulam vocare soleo,
 qua percussi, non montes, fabulosum hoc, sed
 poëtarum vertices ac frontes, insaniunt doctius,
 & manant uberius. Meminimus probè, quanta
 suavitate, quam annuentibus Apolline & Musis,
 ego loquentem te, tu me non semel audiveris.
 Nec erat sermo noster alienus à studiis & hoc
 litterarum genere. rarus admodum de Otto-
 mannica porta, aut Septentrionalium litibus.
 de Tapuiis ac Nigritis rarissimus. Sæpè fabu-
 lam fecit, benè aut malè nobis natum carmen.
 sæpius secundarum nuptiarum (hoc enim ad
 nos pertinet) anceps alea, & exercitati mulie-
 rum vultus & frontes Sophisticæ. Quàm volu-
 pe fuit, subinde mentiri rivalitatem, ne deesset
 argumentum scenæ. Quantis motibus tu mihi
 aliquando exprobraſti ὕδρωφοβίαν, [*aquæ timo-
 rem,*] ego tibi Neptuni & maris Deorum con-
 temptum. Quam non malis artibus, me cum
 maximo Senatore commisisti, cum de capella-
 rum tuarum precio lis esset & comparatio. E
 castris reduci gratulatus fui incolumi & vegeto,
 Pars II. H h licet

licet in Principum tentoriis consiliarios periclitari, negent sapientiores. Cum in turri Argentoratenſi annexam faſtigio faſciam, plus quàm poëtica audacia, attigiffes, habui quod epigrammate reprehenderem. Nec poteras excuſari, niſi Parnaffi illic te apices reperturum putaviſti. Eſt ubi præficam tecum ago ad aliorum tumulos; ubi ægrotanti medelam quæro ab ipſo Phœbo & carmine; ubi novercæ vapulant, inter pictos liberorum tuorum vultus. Reperies alibi, ubi publica Aularum & Templo-
 rum incendia tota Aganippe reſtinximus. Quoties ædificas, domi foriſque, adſum teſtis. Vbi cum præſtantiffima Virgine Ultrajectina loqueris, interloquor. Cum Sponſus thalamum ſcan-
 dis, præfero facem. Cum viduus à ſecundis thalamis tibi caves, metu trium L. L. L. libro-
 rum, liberorum & libertatis, annuo prudenti. Cum dies tuos operasque exigis ad normam viri boni & ſapientis, volo aulam tuam ſubire, quotquot pii eſſe volent. Cum organizas, concino. Cum vir factus es & duumvir, & Trium-
 vir, & plus, prædico felicitatem tuam, & utiles Univerſo, non culinæ, titulos. Cum ſerò potiris filiola, voto adſum, *Ne ſoror aut fiat Caſtoris aut Hecuba*. Alicubi in viduarum laudibus moror, quas tecum ſacro horrore veneror, non-
 dum depereo. Ita ſcribere volentibus nunquam deeſt argumentum, quod pari aviditate videmur captare, qua culices hirundo. Vtique patet nobis ad carmen omnis mundi machina, & quæ-
 cunque

E P I S T. D E D I C A T. TOTI

cunque illa complexu suo tenet. Quin & cognatione quadam & occulto nexu cœlos attingimus, unde ea suggeruntur, quæ nunquam venire in mentem. Vnde araneis suppetant tot telæ, vix dixerim. nec hoc, unde poëtis sua commenta. Ea efferunt, quæ nunquam audita aut lecta fuere, siue illa Anima mundi dicter, siue intelligentia & mens illa assistens Averrois, siue sublimior Deus. Dum meditamur, trahit versus versus, uti in fodinis vena venam, aut magnes cohærentes cuspide acus. Excidunt meditationes, velut contuberniis & manipulis, uti imbres guttis succedaneis labuntur, aves turmatim volant, annuli catenatim nectuntur, aut pontem transire volenti pecori pecus longa ferie instat. Nec tantus est pangendi carminis labor, cum absque impedimentis & organis edolari possit. Architectus sine coementariis non ædificat. opus illi ferra, amussi, malleo. Nec textor texere quiverit sine radio. militi vallis, gladiis, balista, ligonibus opus, ut oppida expugnet. nautæ ventis, velis, anchora, ut naviget. pictori penicillo, tabula, coloribus, ut pingat. Poëta ædificat, pingit, textit, absque utensilibus, & instrumentis. Officina operum mens est. faber mens est. famula mens. auditor & spectator mens. materies operis in mente est, ubi ideæ & universi species stabulantur. operæ precium sibi eadem mens est, quæ nato feliciter carmine, non minus gaudet, quam edito partu puerpera: infeliciter nato, sibi dolet. Non opus obstetri-

ce, sola parit. nec nutrice, cum fetus sibi sufficiat, & eodem vultu perseveret. Si susceprix esse velit fama, excitatur studium. si nolit, susque deque contemptum habet autor. Si arrodat Zoilus, emendatius exigit & promittit. Et quia solius mentis hæ sunt partes, vagamur, uti illa vaga est, nec uni glebæ affixa. Nunc in Occidente carmen faciunt Barbari & barbarorum dux Nassovius. modò in Occidentem delatus Moluccas & Iavas loquor. Ad Septentrionem cum uris luctor. Ad Austrum Mauri & Nigritæ versum implent. Cum domi sum, expugnatis maximis urbibus, Vesalia, Sylva-Ducis, Trajecto ad Mosam & Breda, murali corona cingo Auriacum. Navalibus præliis adsum vates, & Isabellam ratibus exuo ad Tolam, Philippum classe, sub Britanniae littoribus. In Germaniam raptus, Gustavi tumulum lachrymis rigo: Saxoniae Duci Bernardo victam Brisacum, & injectos Rheno compedes gratulor, Cæsari non armis sed Scazontibus adversus. At, ne videar cruentus semper & ferox, nuptias frequento Regum, Principum, amicorum, & bella narro nunquam matribus detestata piis. Mox ut à geniali voluptate ad severitatem meam redeam, nœnias & lessos singultio, totusque funestus & atratus sum. Ita quocunque mens agit vatem, sequor, modo amicorum jussibus, modo modestæ petitioni, modo animo meo obsecutus. Hæc causa est, quod dum ubique sum & grandem mundi aream pererro, in tantum cumulum excreverint

Epi-

EPIST. DEDICAT. 1013

Epicorum libri, ut brevitatis studioso lectori graves sint. Eos nomini tuo inscribo, Vir maxime, quia paginas in hoc opere imples plurimas. deinde, quia Heroicum metrum & cothurnum amas. præterquam, quod partem maximam Auriacus sibi vendicet, cujus heroicis gestis, bellis ac triumphis liber secundus decurrit. Auriacus inquam, qui dum te illustrem facit merito tuo, me honestè habet beneficio suo & tuo. Vterque Principem tangimus propius. Tu consiliis & chartis publicis, ego poëmatiis; tu quotidianis officiis, ego rarioribus; tu oculis, ego sola è longinquo veneratione. Non poteram inscribere Superis, Marti, Libitinæ, Veneri, quia tabellariis careo, qui deferant, & quia vivunt nullibi. Nolui Inferis consecrare, Plutoni, Proserpinæ, Megæræ, quia metuo chartis meis à Cocyti flammis. Et cum hominum pauci Philomusi sint, plures ἀμύσσοι, [*musarum expertes*,] ad hos ire timui, ne pro munere grunnitu exciperer & morfu. Quare munus conveniens offero, ac si Iovi aquilam, Mavorti gladium, Veneri pectinem, Apollini citharam darem. Vti hi hæc ipsa neglectius non habent, nec mea hæc, quæ vates vati confecro, habe, nec me. Vale Vir Nobilissime. & in castris inter tubas &

Tympana, tranquillæ relegas commenta Minervæ.
Amstelod. 16 Sept. 1645.

Nobilitati tuæ

observantissimus cultor

C. BARLÆUS.

Hh 3

IX. In

I X.

In Poëmatum suorum Partem
alteram.

Nobilissimo ac Magnifico viro

D. DANIELI SCHONCKIO,

Poelgeestæ Minoris Domino.

A Ccipe, Nobilissime Vir, Poëmatum meo-
rum Partem alteram, quorum priorem
credidi tutelæ N. Zulechemii. æquum putavi
vos jungi meis studiis & chartis, quos jungit
cognatio. Quoties prædium istud tuum illustre
ac peramœnum, quod ad Rheni ripam surgit,
cogito, quo me ægrum, quo incolumem excep-
pisti sæpius, in Tusculo mihi videor aut For-
miis tecum vixisse. Hic non semel barbitum te-
tendi, & inter avium matutinos cantus cantilla-
vi non segniter, veluti in Delo sua Phoebus, in
Tibure Flaccus, in Avenionis ad Rhodanum
montibus Petrarcha. Invitat me eò aëris mira
salubritas, & ad poëticas commentationes com-
paratus planè loci situs. qui inter arborum do-
ctos ordines & hortorum spatia ac pulvillos,
sub salicis vel tiliæ umbra, eas elicuit medita-
tiones, quas à litterarum & philosophiæ cultore
minimè alienas censes. Placent sua singulis
studia, & uti vitæ aliquod genus quisque sibi
eligit, vel χρηματιστικὸν, [*lucrosum*,] vel ἀπολαυ-
στικὸν, [*voluptarium*,] vel πολιτικὸν, [*civile*,]
vel

EPIST. DEDICAT. τοῖς

vel θεωρητικόν, [contemplativum,] ita in postremo hoc genere, contemplationum artiumque delectu gaudemus. Mihi duæ maximè arrisere: Philosophia & Poësis. illa seria & ad vitæ hujus usum faciens, hæc magis ad delectationem. illa ἔργον [opus principale] meum, hæc πάρεργον. [operis accessio.] Ea ferè hominum conditio est, ut quotidianam sapientiæ professionem, suavio- re otio diffindere ament, & postquam serii fue- re, cupiant in amœniora secedere. Huic in deli- ciis exotica sunt, & ex alio orbe allatus simius, psittacus, bacilla, capsulæ. illi testacea, con- chæ, turbines, cochleæ, rombi diem trahant. alios veterum Græcorum vel Romanorum utensilia occupant, lychni, fibulæ, pelves, secu- res, urnæ. Sunt qui felicitatis suæ summam pu- tant, canibus imperare & felibus. Quare non ægrè à Te veniam impetravero, si furore poëti- co plusculum commotior, hanc insaniam per- gam insanire, quæ prima veterum philosophia fuit & sapientia. Nec enim fero illos, qui acer- rimis impetiti convitiis, nullo offenduntur ma- gis, quam poëtæ nomine. quod adeò venera- bile arbitror, ut omnium dignitatum & appel- lationum titulos transcendat. Sane quanta fue- rit horum æstimatio, Augusti Cæsaris exemplo constat, qui à Reip. negotiis feriatus, duorum poëtarum gaudebat contubernio, Maronis & Flacci. licet alter lachrymis & oculis lippis, al- ter suspiriis & tussi Imperatori gravis esset. Fas est artifici suam artem prædicare, sine aliorum

infectatione. Poëtices laudes nemo capit, nisi poëta. Nemo propius ad Deos accedit, nemo cum iis familiarius agit, nemo indolem divinam magis refert. Invocamus Apollinem, Musas, modo omnes, modo singulas, etiam Minervam, & ad nutum adsunt. licet invita iuterdum accedat Minerva. Ioves, Martes, Veneres, Mercurios loqui nobiscum facimus, quod nec Iurisconsulto, nec Medico, nec Philosopho concessum. Non minus ubique sumus, quam Superi. & licet habitemus in terris, in intermundiis Epicuri, cum libet, scribimus. Est Deorum omnia nosse, & supra vulgus sapere. nec minus per universa oculos mentemque circumfert poëta. quam ob causam poësin Plato τὸ ὅλον [*universum*] vocabat. Commendat Superos iustitia. etiam vatem, qui versibus numeros, dictionem, decorum suum magna religione distribuit. tumultuamur cum tragicis, cum comicis incedimus lenius. jocamur cum Venere, cum Iove supercilium tollimus, crudeles sumus cum Marte, cum canimus *Bella per Æmathios plus quam civilia campos*. Et quàm illud excellens. cum mechanicorum vix ullus, nisi ad Solem & lucis beneficio suum munus obeat, poëta spissis in tenebris & intempesta nocte Musis vacat, similis aviculis istis, quæ defioculæ melius canunt. Cum novem virginibus nobis res est sub stragulis, remotis arbitris. iis in locis, quæ nunquam adspexit Sol, lineas poëticas ducimus. Vti Minos in inferorum sedibus vitas hominum

minum & crimina discit, nos nocturna caligine circumfusi eadem discimus & dicimus. Non impediunt Plutonis officia Furiarum flagella & latrans Cerberus. nec meditantem me turbant nocturni & horarii Stentores. Majoribus quoque fruimur indultis, quàm mortalium ceteri. Cum mentitur civis & maledicit, vapulat presbyteris. cum idem facimus poëtæ, & *Omne vaser vitium videnti Flaccus amico* dicit, lauream meremur. Apud Ethicos plus dicere, quam res est, in vitio positum, apud nos in virtute. Platonicas ideas, humanitates, animalitates, bovinitates ridet & explodit Alexandri præceptor. Nos cum ideis aulicis turgemus, & Regalitates, Cardinalitates, Principatus, Ducatus, Comitatus somniamus, à Regibus, Cardinalibus, Principibus ungimur. Solus post Deos miracula facit Poëta. mortuis vitam reddit, & immortalitate donat Achillem, Æneam, Scipionem. Cæcis visum dat, claudis gressum, paralyticis robur. macilentis toros musculosque cum mediocriter doctos, probosque superlativis donat. Cum vellera aurea, mala Hesperidum, Chimæras, Geryones fabricat, cum ex fumo fulgorem dat, ex musca elephantum facit, Nioben in saxum vertit, Daphnen in laurum, creanti similis est. Nec abest à miraculo, grandem cœli machinam in Epigrammatis punctum contrahere, quod fecit Claudianus; numerosos Græcorum & Phrygum exercitus classesque terras omnes & insulas paucis pagellis comple-

cti, quod fecit in Iliade Homerus; Romanorum res gestas jam inde à nutrice lupa ad Augustæa tempora, uni scuto insculpere, quod fecit Maro. Qui saccarias artes excutiunt, fallunt spectatorem. Etiam poëtæ, cum Trojam equus capit, Æneas Carthaginem appellit, Augustus Divûm genus est, Ilia ex Marte gravida est, fallunt nostram credulitatem. Pictores cum Pergamorum incendium, raptam Proserpinam, aut Deianiram pingunt, omnium in se oculos convertunt. at præivere pictores poëtæ. Musicis & cantoribus præbemus aures attentissimas, at poëtis Orpheo, Amphioni, ipsi leones & lapides. Mercator merces suas conditoriis asservat, quæ magno precio conducit. nos faburram omnem nostram nobiscum absque impensis portamus. Agricola ætheris favore, statim temporibus, fruuntur. nec semper sementem faciunt aut messem. nobis nullo non tempore vacat vatibus esse. Miles non nisi hostem suum exercet. Nos hostes & amicos. Medici minus jucundè sanant ægros catapotiiis ad fastidium ingratis. At nos μελοποιία [*versificatione*] & carminum concentu furiosos ad se revocamus, quod noverat Asclepiades medicus. Philosophi in sectas abeunt. poëtarum sectas nescio, quia ab eodem Numine agitantur omnes. Huius ordinis cum sim, noli averfari, Vir præstantissime, hospitem & hospites Musas. Fuere huius scholæ, quos Scipiones, Lælii, Polliones amavere. Si Lucanum non tulit Nero, ab invidia

EPIST. DEDICAT. 1019

dia carminum fuit. Nulli graves sumus. delectamus & profumus, dum benè factorum memoriam servamus. Amicitias bonorum magnificimus. loquuntur Elegiæ ad amicos. Sacra veneramur; loquuntur Sacræ. Principum vultus suspicimus, prout se res dant prosperæ vel adversæ, prout nascitur hic, denascitur ille, procantur Phyllides, nubunt Hecubæ, lustrantur urbes, prædia, agri, Epigrammata fundimus. Hæc amicitiae veteris & nunquam intermorituræ novam tesseram habe. Plurima apud te, in tuis ædibus & agris nata sunt. quædam de te & tuis loquuntur. Ipse, cum serenus esse vis, spiritum per poëtica commenta feliciter præcipitas. Me ea comitate, benevolentia, ac animi propensione amplecteris, ut ignorare hoc Batavos meos nolim, quorum uti plurimum consuetudine fruor, ita tuâ respiro liberius. Vale. è Museo nostro Amstel. 20 Octob. 1645.

Nobilitati Tuæ

addictissimus

C. BARLÆUS.

X. In

In Historiam rerum in Brasilia gestarum
sub Præfectura J. Mauricii Nassaviæ &c.
Comitis.

Illustrissimo Comiti

J. M A V R I T I O,

*Nassoviæ, &c. Comiti, Brasiliæ Bel-
gicæ nuper supremo*

G U B E R N A T O R I, &c.

BRasiliam, imperio tuo armisque fulgidam,
tibi offero, Comes Illustrissime. Si loqui
illa posset & tecum pacisci, traderet seipsam
tibi. qui insigni fortitudine asseruisti & auxi-
sti Belgicam; & Martis tui fama metuque im-
plesti Hispanicam, alterius vindex, alterius ter-
ror, utriusque admiratio. Quod non potest
vel hæc vel illa, faciam pro utraque, ea Narra-
tione, quæ nec autorem suis factis, nec facta
autori subducet. Quotquot Veterum res secu-
lo dignas posteris tradidere, prisci Orbis termi-
nos non egrediuntur. Nos audaces tecum egre-
dimur, in illum Orbem delati, quem toto se-
motum Oceano, seposuisse videtur & abdidisse
Natura, in tuos honores & Nassovicæ domus
gloriam. Romanis Græcisque scriptoribus
Athenæ, Lacedæmon, Carthago, Roma, La-
tium, Galliæ, Germaniaque utramque paginam
faciunt. Nobis Olinda, Pernambucum, Mau-
ritiopolis, Tamarica, Parayba, Loanda, Mina,
Mara-

Maragnana, ignota priscis vocabula. Tunc belli partes fuere Assyrius, Persa, Grajus, Macedo, Italus, Pœnus, Allobrox, Cheruscus. Nunc Tapujæ, Mariquites, Petivares, Caribes, Chilenfes, Peruenfes. Nec diverfis hic gentibus ſolùm, ſed commiſſis inter ſe Orbibus pugnatur. Olim Rhenus, Iſter, Rhodanus, Indus, Ganges magnarum rerum teſtes fuere. Nunc Maragnonus, Platenſis, Ianuarius, Aſogadorum, Portus Calvi, Capivaribi & Biberibi flumina. Nulli Polybio noti Mulatæ, nulli Livio Patagones, nulli Tacito Angolenſes, Floro Mamolucchi, Suetonio aut Iuſtino Nigritæ. at hæc noſtra nomina ſunt. Iſtis ſcriptoribus in bellum ibat veſtitus miles aut cataphractus. mei quoque bellatores nudi. illi gæſis, parmâ, ſariffis, bipennibus, falcatis curribus, inter meos arcu clavaque terribiles. illi Poliorceticis machiniſque ad oppugnandum & repugnandum violenti. hi, cum ſoli pugnant, talium inopes. Tunc Romanus Luſitanum vicit. Nunc Romanorum fratres & ſocii. ille ad Tagum. hi Oceanum ultrâ. Quæcunque mihi ſcribenti ſe offerunt, nova ſunt, ſidere, ſolo, populis, moribus, victu, armis. Barbaries ferrum acuit in gentem diſciplinæ & ſancti moris capacem. hæc in efferos movit, qui humanitatem non exuere ſolum, ſed & cum ipſa humanitate hominem devorare palmarium putant. Tanto major virtus tua, quanto à virtutis ſede & domicilio abiviſti longius, ubi lenis fuiſti inter duros, urba-

urbanus inter agrestes , inter cruentos mansuetus, inter veræ pietatis nescios pius. Quod dudum feceras domi, factum à te foris. nempe ut arma commodares Libertati & Religioni , Patriæ & Ecclesiæ , hominum saluti & mercantium cupiditati. utrumque Fœderatorum gloriæ. Præstitisti te militem adversus Hispanorum fortissimos, Banjolam, Torrensem, Barbalionem, Menezam, surgentia in Occasu lumina. nec militiam à legibus , à disciplina , ab ordine absolvisti. verum majorum tuorum exemplis intra recti terminos acriter retinuisti. Eras in tenebrarum regno Phosphorus , inter peregrinos & alienigenas tribulis , inter avios dux , inter diversissimas gentes idem omnibus Imperator. Cum Marte, qui domaret terras, traduxisti Christum, qui domaret animos, & inter tot victorias, quas meditabaris , etiam illa fuit, quam reportasti de erroribus. Illud belli tui & militiæ erectioris grande documentum , quod inter tot Nassovios , quos in hostem armavit domi sua virtus , inter tot consanguineos , Europæis bellis conspicuos , fiduciam primus sumseris trans maria bellum transportandi & in suo hostem regno adoriundi. Nimirum hæc à veteribus hausisti consilia, à Romanis adversus Macedonas , ab Annibale & Antiocho adversus Romanos. qui nihil se memoratu dignum gesturos arbitrabantur , nisi vim belli aliò transferrent. Vtique magni Duces angustiis domesticis circumsepti , laxius virtutis meritique spatium foris

foris quæſivere. Horum exemplo is fuiſti in Novo orbe, qui in Galliis fuit Metellus, in Africa Marius, in Germania Drufus, in Pannonia Trajanus. ut ſicuti hi trophæa exterorum ſuis inſcribere columnis, tu eorundem animis chariſque Belgarum inſcriberes. Appellationes & nomina gentis tuæ dudum acceperant Americani, Naſſoviorum neminem. ut non aliorum narrationibus notus Braſiliæ habearis, ſed proprio vultu & Marte. Vbi Arces ipſe & urbes condidiſti, ubi hoſtiles viciſti, Mauritiï nomen iïſdem inſcripiſti & Americani, inter tot Domus tuæ Heroâs, cognomen ſolus meruiſti. Inter bella, adventante potentiffima Hispanorum claſſe, ædificaviſti. ne videreris hoſtium metu temere abiturus aut de Republica deſperaffe. ut cum Friburgum & Boaviſtam intuebuntur Anthropophagi, Naſſovicæ magnificentiæ & illuſtris præſentiæ domicilium agnoſcerent. Induſtriam tuam loquentur ducti per flumina ad ſtuporem Pontes, in uſum & ſecuritatem publicam. Militarem fortitudinem Portus Calvus, Siara, littora Tamaricæ, Paraybæ, Fluminis Grandis, in Afris Æthiopum, in Maragnanâ Luſitanorum, cuncta navalium aut terreſtrium ſub Te præliorum conſcia, prædicabunt. At piæ & circumſpectæ moderationis teſtes erunt, diſcordes fide & cultu populi. Æquitatem laudabunt vicinarum in hoſtico urbium & provinciarum Rectores, clementiam & humanitatem Barbari. Cum poſt ſecula aliquot indigenæ, Luſitanus
Barba-

Barbarusque, Sigillorum tuorum insignia per Præfecturas omnes conspicient, agnoscent Nas-
sovicam fidem; cum aucta & dilatata per te im-
peria, memorabunt Ducis potentiam, pruden-
tiam, felicitatem; cum in desertis Copaobæ su-
spensa ad cippos & lapides Societatis monu-
menta adspectabit viator, exteri Rectoris inde-
fessa studia, & gentis, per avia lucri cupidine
digressæ, motus mirabitur. At cum pudere se
inter nostros & vestitam incedere intuebitur
Barbaries, Europæorum tuorum honestati im-
putabit prisca pudoris velamenta. Ipsa Olinda,
civitas & nomine & vultu olim pulcherrima,
nunc ruderibus deformis, in maxima sua clade
illud admixtum gratulationis habuit, quod cum
sibi incolumi stare non licuerit, utpote aliorum
victoriis perditæ; tua commiseratione leniter
fuerit habita. qui lugubrem casum sæpè intui-
tus, tantæ urbis fatis indoluisti. Proponatur in
conspicuo ruentis Olindæ facies & surgentis in
laudes tuas Mauritiæ. non dubitabunt homi-
nes, utro spectaculo magis delectentur. Nam si
flebile est in sacros penates exercere arma, ju-
cundum profectò & laudabile sit oportet, Deo
delubra, civibus domos condidisse. prius, ut in
Creatorem ipsum, posterius, ut in homines, hoc
est ipsius Dei imaginem, amor tuus reflectere-
tur. Ita aliis Te virtutibus hosti terribilem, aliis
tuis amabilem fecisti. illis immensam gloriam,
his amorem benevolentiamque omnium pro-
meritus. Invenisti medium iter inter hostes &
nostros,

nostros, inter efferos & lenes. ut quos Batava virtute vicisses, Batava mansuetudine honorares. Loquar summa. cum venires, erexisti lapsa, depravata correxisti, exanimata recreasti. cum abires, (res clamat) Senatus vindicem, plebs parentem, Respublica ordinem, leges custodem, pietas exemplum, Belga reverentiam, Lusitanus fidem uno & eodem momento visa sunt amisisse. Hæc dum oculis tuis subjicio, Comes Maxime, animos addo præclare de Republ. & Societate merito; dum Belgarum judiciis, ab eorum æstimatione mercedem aliquam impetrabo tuæ fortitudini; dum exterorum, convincam non omnino iniquos de belli Belgici fortuna & prosperrimis successibus; dum Societati & Rectoribus prudentissimis, causæ repertæ sunt, cur gloriæ bellicæ satis, lucrorum minus, in tantorum moliminum apparatu, reportaverint. Dignare patrocinio tuo scriptorem, licet validiore spiritu per te gesta, remissiore scripserit. Da vero, da Historiæ huic tranquillitatem. quæ quia argumento tota tua est, Illustrissimo tuo nomini inscribitur & consecratur. asserere illam, aliorum potius nixam testimoniis & fide quàm meâ. labescet illa, cum ora omnium oculosque, quibus imperavisti, per quos pugnasti, etiam hostium quos vicisti, falsi redarguent invidia, perversitas, credulitas. Amstelod. 20 Aprilis, anno 1647.

Illustrissimæ tuæ Excellentiæ

cultor humillimus

CASPAR BARLÆUS.

Pars II.

I i

ER.

E R R A T A

sic corrigenda Parte prima.

Priori numero signatur pagina, altero linea.

Pag. 131. 14. scribe secuta. 137. 30. aris. 149. 12. post corpus dele punctum. & lin. 25. lege fuit dulce. 143. 16. te. & lin. 19. me. 147. 2. secus. 6. fortunæ rivus. 15. à te. 148. 10. An aliam. 149. 17. quadam. 150. 21. divine. 23. Thetys. 151. 27. litore. 152. 19. post occuparet adde punctum. 154. 11. raras. 155. 18. cis. 157. 20. solatia. 158. 4. tuus. 22. Rubiconem. 160. 9. charissimum. 18. invitus. 21. contemp-
trum. 162. 12. positus, Regique. 15. post tuis deleatur comma. 166. lin. ult. tuus. 168. 27. pervigilia. 173. 10. Ba-
tavis. 27. Centum. 175. 3. matre. 6.7. Davus. 182. 3. consistam. lin. penult. phalaras. 183. 12. vera. 186. 12. re-
demisse. Præstar. 16. dele. Mense Nov. 191. 9. Dico adminicula. 192. 9. nostra. 193. 6. Alia. 7. mens. 195. 18. 19. ad-
hibitis. 199. 10. hostilibus. 200. 12. Incro. 201. 21. pro Sept. scribe Marr. & lin. penult. scr. poematum. 204. 8. scr. & diligentia tuæ. 208. 2. eas. 6. quos. 11. perfricta. 213. 27. abbreviationes. 215. 10. distorta. 217. 1. adversis. 218. 14. Tigrim. 220. 13. ævū. 221. 8. laceris. 224. 21. ille. 24. ille. 226. lin. ult. Interrupta. 227. 13. grandiu-
num. 242. 6. scio. 243. 22. liberrima. 248. 23. re. 249. 15. infimo. 251. 18. orbe. 252. 20. ὑπερπορον. 262. ante-
penult. leſum. 265. 12. concepat. 277. 1. accepissem. 279. antepen. ἀφθαρτίαν. 281. 14. ὁμογενή. 282. 15. Delectos. 289. 18. σπλάγχνα. 291. 7. aliquot, in. 292. 13. inhumitas. 295. 10. εὐδὲ-
σμον. 300. 20. soleant, ubi. 21. rem-
pus. Quid. 303. 10. ἀμφω. ibid. te-

gas. ibid. 14. ne. 15. affulgeat. ibid. iste. 304. 1. ἀντίπος. 305. 22. lit. 26. scribe. Revera amicus optima est possessio. 306. 13. μεγάλον πένον. ibid. 27. scr. IOH. GODESCHALCO. 307. 15. ἀν-
τοκλάνει. 16. te. 310. 4. reliqua. 10. habeat. 311. antepen. gratularis. 312. 28. reprehendenda. 316. lin. ult. poeniteat. 332. 15. ἑσπρον. 344. 26. annectere. 345. 20. Cellis. 347. 8. con-
fessu. 349. 14. post homini dele pun-
ctum. 355. 8. 9. post quoque dele pun-
ctum. 360. 21. post hunc dele comma. 28. post Adverte pone colon. 362. pen-
ult. extorquebit. 363. 21. post pueritia
pone hypocolon. 367. 27. commendō.
372. penult. loco vacuo scri. advertas.
373. 14. scr. Oſum post. 16. post Cyril-
lum dele comma. 25. loco vacuo scribe, in-
telligere. 376. 27. verba. 418. 27. fa-
lura. 419. 1. scr. LA VRENTIO
NYENDALIO. 19. senti. 420. 20.
post liceat dele comma. 423. penult. stu-
pendi ausus. 425. 25. post suos dele
comma. 429. 17. pectes. 431. 8. fuif-
se. 434. 12. salvam. 435. 23. 24. pri-
mam. 443. 2. fororum. 444. 10. mar-
cescit. 18. litigant. 448. 20. prohibi-
tam. 25. statu. 451. 27. scriptorem.
465. penult. post tetigisset pone comma.
473. 9. diem. 477. 15. sum. 478. 13.
curtum. 480. 5. in Batavis. 482. 28. fe-
cisse. 484. 10. Lyei. 492. 22. cata.
493. 20. aperias. 494. 14. Pilli. 497.
21. 22. perunctum. 501. penult. Lyaō.
504. 24. esse, quorum. 509. 22. Reip.
511. penult. nostro. 520. 15. post ve-
rum dele comma. 527. 13. maximos.

CORRIGENDA Parte altera.


Pag. 535. lin. 21. post elapsa pone pun-
ctum. 537. 5. mancipa. 538. penult.
fitu. 543. 23. consilio. 544. 20. Lu-
cretium. 546. 6. solaccisum. 547. 9.
post Minime pone punctum. 549. 23. Ele-
gia. 552. 9. vitæ. 554. 20. titulo.
564. 21. ipsam. 571. 8. quæ singulas.
578. 25. temerè. 579. penult. scr. qua-
tuor millia. 581. 23. hominum. 582.
2. post scis dele punctum. 586. 4. scr. ad-
versam. 587. 21. minus ponderosum.
592. 24. Hac. 593. 3. post ignorare dele
comma. 594. antepen. Vti. 597. 26. ad-
nitionem. 601. 10. post aliquoties dele
comma. 602. 2. post video dele comma.

614. penult. illustrissimus. 615. 3. post
fuit dele comma. 618. 29. 30. indubiam.
621. 26. Cuperem ego. & lin. ult. cau-
sa agitur. 622. antep. interdum. 624.
23. illustrissimo. 625. antep. Zelandiam.
626. 1. omni. 631. 14. alterius, puta.
ibid. 21. scr. Quam lator. 641. 10. γ-
λωσσοιδς, [visum. 16. gratuler, quam.
17. incolumem. 644. 19. post me dele
comma. 647. 26. quod sciam. 649. 22.
Aristorelis. 28. Coam. 653. 13. post in-
dignaris dele comma. 665. 2. videar.
667. 22. puta, quem. 676. 17. detrecta-
vissem. 678. 4. nocent. 679. penult. &
ult. illam. 683. 11. 12. querimoniis fru-
stra.

ira. antep. gratularis. penult. eveat?
ibid. cum illa. 684. 7. petit a. 685. 9.
conspirare.] 688. 16. ferox invictaque,
flebilis. 690. 16. post leniter pone semi-
colon. 695. 23. at Poëta. 28. studio, ut.
697. 25. cui ex. 698. 19. Cuperem.
702. 8. impediverat. 703. 18. rupibus.
714. antep. inferendo. 717. 12. fecun-
do. 720. 14, 15. brutis. 723. 3. scri.
Deo, subditis & Belgis. 729. 18. quas-
dam. 22. fit. 732. 8, 9. scribe: Gallus-
que. Federe juncti, veluti federe. 736.
6. Vernis. 740. 17. Medicea, tuos. 748.
21. extincta. 749. 27. senectutem.
752. 23. ordinat, ad. 756. 7. fruens.
15. gestit. 763. 21. Serenissimo. 765. 6.
has lauros. 767. 4. ad te cum. 773.
27, 28. ulciscaris. 796. 16. post Cato-
nis dele comma. 805. 18. seperatae à cor-
ti. 1. omnis. 817. 9. Domino. 820.
14. excusatus. 821. 9, 10. certatim: 23.
sensit. 828. lin. ult. post suum dele com-
ma. 838. 6. Boye, novi. 840. 21. fun-
ctus. 844. 7. nobilissime. 847. 2. lon-
gos. 3. domum. 848. 6. consulere.

858. 1. Parmenionem. 14. Sententia.
869. 9. Sculptur. 12. post chori pone
comma. 873. 5. Tuæ. 876. antep. com-
munia cum. 877. 1. possit,) ibid. post
aperuisse pone comma. 881. 1. scr. juven-
tutem, & tyronibus instillamus Suadæ.
882. 27. manifestæ. 886. 11, 12. ferru-
minandis. 887. 15. judico. 888. 1. ipso-
rum. 894. 3. feriunt. 907. 21, 22. Con-
quereris. lin. ult. & per portam. 912.
18. talem. 914. 23. Talasio. 915. 7.
aviculas. 927. 25. fercula. 931. 22.
domi, ut. 932. 3. reditus. 935. ult. lu-
dex. ibid. post dicis pone comma. 936.
12. suppetant. 941. 20. Aristotelis.
946. penult. faverim vobis. 948. 3. post
Brasiliæ dele comma. 956. 21. post habent
pone colon. 957. 3. idem. 4. Qui patitur
quod fecit, ei jus contigit equum. 6. resti-
tuire, Tu. 960. 13, 14. liberos. 961. 2.
disputat. 965. 2. defuerit. 987. 26. sce-
ptris ac. 995. 1. odia. 997. 27. hos.
998. 18. Nobilitatis. 1000. 17. ille.
1013. antep. Nobilitatis. 1017. 21. post
robur pone comma.

1741
18-443



0-7/8
F667
B141e
pt. 2

